





~~C. 42.6~~

C. 42.6.

14-30.C.18





MEMOIRES D'ESTAT,

P A R

MONSIEVR DE VILLE-
roy, Conseiller d'Estat, & Se-
cretaire des commandemens
des Rois Charles IX. Henry
III. Henry IV. & de LOVVS
XIII. à present regnant.

del Conu.^{te} della Mat della Scala.

Iouxtela copie imprimee à Sedan.

1623.



of former. The latter

A M O N S I E V R
M E S S I R E
ALEXANDRE
DE FAVCON CHE-
ualier, Seigneur de Ris, Con-
seiller du Roy en ses Conseils
d'Estat & Privé, & premier
President en sa Cour de Parle-
ment de Normandie.

M O N S I E V R,

LE loisir que mes veilles ont des-
robé à mes occupations, m'a conuié
de receuoir entre mes manuscrits, les
Memoires de feu Monsieur de Ville-
roy, & les mettre en lumiere. Je ne
doubte point, Monsieur, qu'ils ne
soient bien venus & receus, tant pour
l'excellence du subiet qu'ils traittent
que pour la nouveauté que la curig-

sité, du siecle, & la Cour desire en
routes choses, puis le nom & reputa-
tion de l'autheur y donne assez de
prix & de credit. Toutesfois, Mon-
sieur, i'ay creu qu'il estoit honorable
les accôpagner du nom de quelque
grand de ses amis, les vous dedier
comme à l'un de ceux qu'il aymoit &
honoroit grandement, vous ayant
quelquefois entretenu fort particu-
lierement sur ce subiect. Les loix
d'honneur & de debuoir m'y obli-
gent, celles de l'Estat me le permet-
tent, puis qu'estant chef & le premier
en ce grand & celebre Parlement, il
vous appartient de cognoistre tout
ce qui s'y fait pour vous en seruir aux
grands & importants affaires que sa
MAJESTE' vous confie, dont, Mon-
sieur, vous en rendez des actions si
louïables, prudentes & iudicieuses,
que sa MAJESTE' en reçoit de bons
& fidelles seruices, & la Prouince le

bien & le contentement. Receuez
les donc, Monsieur, avec autant d'ac-
cueil qu'ils le meritent, & que ce pre-
sent me serue de gage de mon affe-
ction, de resmoignage de ma bonne
volonté, & de recognoissance de
toutes sortes de bien-veillances, qui
m'obligent demeurer,

MONSIEVR,

Vostre bien humble & obeissant
seruiteur, DV MESNIL BASIRE,
Aduocat du Roy en sa cham-
bre des Comptes de Rouën.

AVANT-PROPOS.

CEs memoires ont esté faictz & dressez par feu Monsieur de Villeroy lors que durât les guerres de la Ligue, la neceſſité des affaires le portoit aux negociations pour remettre l'Eſtat en Paix, & les peuples reuoltez en obeyſſance, teſmoins irreprochables de ſa fidelité & de ſes ſeruices, qui ont eu ſi bon ſuccès, que la France en a receu tout contentement. Au lieu de ceſt eſchantillon, s'il euſt laiſſé toute la piece, le public luy en euſt eſté grâdemment obligé. Car il faut aduoüer franchement qu'il n'appartient qu'aux Secretaires d'Eſtat à faire l'hiſtoire, lesquels ont veu, ſeu & cogneu les ſecrets de l'Eſtat, les conſeils du Prince, & les affaires du Royanme. La cognoiſſance de leurs eſcrits & diſcours aſſaiſonéz par diuers âges & experiences, apprennent les nouuelles du monde, les moyens de s'y conduire, & la voye pour en ſortir. Ce qui véritablement ſe recognoiſt par ces Memoires, lesquels il auoit adreſſé à Monsieur de Bellieure Chancelier de France, & à Monsieur le Preſident Ianin, pour eſtre ſeulement teſmoins de ſes actions & deportemens, ſans les vouloir donner au public. Pour moy i'ay creu, avec le iugement de mes amis, que

ce seroit une trop grande perte de les taire & sup-
primer, tant pour l'utilité que le general &
particulier en pourra recevoir, que pour rendre
l'honneur à ce grand personnage, lequel par sa
fidelité, merites & services, a obligé toute la
France à sa memoire. Ceste consideration m'a
porté à ce dessein.

The first of these is the
 fact that the system is
 not self-sufficient. It
 requires a constant supply
 of raw materials and
 energy. This is a major
 problem for the system
 as a whole. The second
 problem is the fact that
 the system is not
 flexible. It is unable to
 adapt to changing
 conditions. This is a
 major problem for the
 system as a whole.

MEMOIRES

D'ESTAT

LE PLUS grand contentement que puisse auoir vn homme de bien, apres celuy que luy rend sa conscience, lequel ne luy peut estre osté, est d'estre tenu pour tel qu'il est, & principalement de ceux ausquels il a voüé amitié & seruice. Nous voyons peu de personnes en ce Royaume auoir iouÿ de ce bien là depuis ce regne, tant a esté grande la corruption des bonnes mœurs, & la porte ouuerte à la calomnie : & plus que les autres les courtisans en ont esté priuez, & spécialement ceux qui ont esté employez aux affaires publiques, & ont voulu suiure & exécuter fidèlement & rondement les commandemens du Roy : soit qu'ils ne s'en soient rendus dignes, ou qu'ils ayent porté le blasme & l'enuie des choses qui ont esté faites, lesquelles ont esté plus souvent condamnées qu'approuuées, à cause de nos diuisions & partialitez, & des vexations & surcharges publiques, qui ont esté mesurées aux causes & fins motiues

d'icelles, mais plustost au poid de nos passions, ou du mal que nous en auons receu; car comme le Roy a esté contraint, ou bien auoulu quelquefois changer de chemin & de resolution en la conduite de ses affaires, ceux ausquels tels changemens ont desplu & porté dommage, ont accusé les Ministres & seruiteurs de sa Maiesté de legereté, d'imprudence, mesmes d'infidelité: les huguenots les ont appelez Guisards & pensionnaires d'Espagne, & les autres fauteurs d'heretiques & politiques, & pouons dire qu'il n'y a celuy pour droit qu'il aye cheminé, qui aye peu eüiter qu'il n'ait esté depeint de l'une desdites couleurs, & de plusieurs autres encores, ce qui a plus appresté à parler aux detracteurs qu'il n'a troublé la conscience des gens de bien.

CAR la verité console & assure assez d'elle mesmes celuy qui s'y confie: mais à present que la violence de nos troubles a forcé plusieurs personnes de changer de route, ceux qui courent telle fortune, qui sont soigneux de leur honneur & de conseruer leurs amis, doiuent les esclaircir des raisons qui les ont poussez à ce faire, afin de ne leur donner occasion de changer la bonne opinion qu'ils auoient conceüe

d'eux, laquelle a deu estre le principal fondement de leur amitié, d'autant qu'il est impossible que nous aymions bien celuy que nous n'estimons.

C'EST pourquoy me trouuant, par la volonté de Dieu, du nombre de ceux qui ont changé de place, plus desireux de viure en la bonne opinion des hommes, & par ce moyen conseruer mon honneur & mes amis que ma propre vie, i'ay estimé leur deuoir représenter les choses qui me sont aduenues, & en ce faisant les rendre iuges de ma procedure, ce que ie feray le plus succinctement qu'il me sera possible: mais ie les exhorte & prie de croire que ie ne leur diray rien qui ne soit tres veritable, & que ie ne verifie & preue par escrit, ou autrement quand besoin sera: mes actions ont esté aussi si publiques, que quand ie voudrois les desguiser, c'est chose qui me seroit tres difficile.

L'VS cét honneur quoy qu'indignement mais fauorisé de la protection de la feuë Royne Mere du Roy, que Dieu absolve, & des seruices tres recommandables que feu M. de l'Aubespine, mon beau pere, auoit rendus à sa Maiesté, d'estre pourueu à l'aage de vingt quatre ans par le feu Roy Charles mon premier maistre, de l'office

de Secretaire d'Estat, qu'exerçoit ledit feu sieur de l'Aubespine, par la resignation qu'il m'en fit à sa suruiuance le vingt cinqiesme iour du mois d'Octobre mil cinq censsoixante sept. Mes lettres furent sceelles par feu Monsieur del'Hospital, Chancelier de France, auquel feu monsieur de Moruillier prit la peine de les presenter, & le iour mesme feu mondit sieur de l'Aubespine tomba malade dans le Chasteau du Louure, où il estoit logé, de laquelle maladie il trespassa l'vnziesme Nouembre qui fut le lendemain que la bataille fut donnee, entre Paris & S. Denis en laquelle feu Monsieur le Connestable Anne de Montmorency fut blessé à mort.

IE commençay dès le lendemain à exercer ledit office & y ay depuis vaqué continuellement & sans intermission durant le regne dudit feu Roy Charles: si ç'a esté avec sa bonne grace & son contentement, i'en appelle à tesmoin ceux qui ont vescu & suiuy la Cour de ce temps là, lesquels ont peu sçauoir la fiance qu'il auoit en moy, & la bonne volonté qu'il me portoit; laquelle veritablement procedoit plus de sa bonté, qui estoit infinie, que de mon merite; estant certain que tout le bien que ie faisois lors au seruice de sa Maiesté ne pro-

cedoit de mon industrie : mais de l'instruction & des bons records que ie tirois iournellement de feux Messieurs de moruillier & de Limoges, lesquels auoient tres.grande experience & cognoissance des affaires du monde, & ne pensoient iour & nuict, qu'à procurer le bien du Roy & du Royaume, comme ils ont faict tant qu'ils ont vesçu, & neantmoins telle communication & la conuersation que nous auions ensemble, en laquelle Messieurs des Fises, Brulart & Pinard estoient aussi ordinaires, ne peust estre exempt de d'enuie & de ialousie, spécialement apres l'aduenement du Roy à la Couronne, que ceux qui auoient deuant les yeux la gloire de Dieu, l'honneur du Roy & le bien public du Royaume eurent bien-tost, pour contraire, les autres qui vouloient s'aduancer à quelque pris que ce fust : dequoy ledit Euesque de Limoges commença à sentir & receuoir les effects aux premiers Estats de Blois, qui fut renuoyé en sa maison sans exprimer les causes de son bannissement, ny luy donner lieu de s'en iustifier.

IE n'ay deliberé de rendre compte par le present Memoire de toutes mes actions; ce seroit chose trop tedieuse, ie me contenteray seulement de représenter celles

quiont seruy d'argument à quelques vns de me calomnier, pour esclaircir ceux qui le liront de la verité d'icelles, à la charge de respondre tousiours des autres quad il en sera besoing, à quoy ie me soubmets & oblige de tres bon cœur.

PARTANT ie commenceray par le voyage que ie fis en Languedoc deuant le deceds du Roy Charles, pour respondre à ceux qui ont voulu croire & publier, que i'auois eu charge dudit Roy, partant d'aupres de luy, de faire attenter à la personne de Monsieur le Duc de Montmorency, qui portoit lors le nom de Damuille, sous couleur de luy parler de paix: car c'est vne imposture tres-vraye, ny plus ny moins que l'accusation, que l'on a dict depuis auoir esté faicte par vn nommé contre Monsieur de Villequier & moy, lequel fut executé à mort par le commandement dudit Duc, lors que le Roy fut en Aui-gnon, l'an mil cinq cens soixante & quinze.

IE fus depesché audit pays de Languedoc avec feu Monsieur de S. Sulpice, superintendant de la maison de feu Monseigneur le Duc d'Alençon frere du Roy, exprés pour essayer à composer les troubles qui estoient entretenus audit pays, ou en

quelques autres Prouinces de ce Royaume par les Huguenots, sur les aduis que ledit Duc de Montmorency, gouverneur dudit pays, auoit donnez au Roy & à la Roynes sa Mere, qu'il auoit moyen d'y pouruoir par ceste voye là: mais il ne fut iamais à nostre puissance de passer plus auant qu'Auignon, ny de voir ledit Duc, quelque debuoir & sollicitation que nous en feissions, & nous ne pouuions traicter avec les autres & avec luy, parce que nostre commission s'adressoit à luy, & s'excusoit sur les affaires qu'il auoit ailleurs, mesmes nous descourismes bien-tost qu'il attendoit quelque nouveau mouuement à la Cour, qu'il estimoit reüssir tout autrement qu'il n'aduint.

CAR vn mois apres nostre arriuee en ladite ville d'Auignon, nous receusmes la nouuelle de la prison de feu Monsieur le Duc de Montmorency son frere, & de feu Monsieur le Marechal de Cossé, laquelle nous fut apportee par le feu Comte de Martinengue avec commission scellée du grand seau, & commandement de sa Maiesté par lettre escrite de sa propre main, de nous saisir de la personne dudit Duc de Montmorency, que sa Maiesté nous mandoit tremper bien auant aux entreprises de

feu son frere, aupres duquel sa Maisté pensoit que nous fussions, & d'aduertir les Gouverneurs & Capitaines, Consuls, Manans & habitans des villes de son gouvernement: Et particulièrement les bandes Corfes qui estoient en garnison en icelles, de ne le recognoistre plus pour gouverneur, ny luy rendre obeyssance.

LEDIT sieur S. Sulpice & moy, fumes tres-estimez de ce commandement, non tant pour le regard du mescontentement que le Roy nous mandoit auoir dudit Duc, d'autant que nous auions descouuert plusieurs choses, qui nous auoient donné occasion de nous desier d'iceluy. Mais de quoy sa Maisté, laquelle nous auoit choisis & enuoyez deuers ledit sieur Marechal expres pour parler de paix, nous commandoit-il de nous saisir de sa personne, au milieu de son Gouvernement & de ses forces, n'y ayant aucune apparence de raison d'esperer que ce fust chose que nous peussions effectuer, quand mesmes nous nous fussions trouuez aupres de luy n'ayant forces ny moyens quelconques pour ce faire? de sorte que nous fumes tres-aises de ce que ledit Martinengue nous auoit encores trouuez en ladite ville d'Auignon, & est certain que si nous eussions

esté auprès dudit sieur Mareschal, qu'il luy eust esté tres-facile de nous faire le traicte-ment, duquell'on nous vouloit faire ministres en son endroit.

PARVOY nous nous resolumes bien tost de nous contenter de pouruoir au second chef de ladite charge que l'on nous donnoit par ladite depesche, dont à la verité nous mismes peine de nous acquitter avec toute vigilance & fidelité, & nous succeda assez heureusement par la bonne assistâce & correspondâce que nous tirasmes de feux messieurs le Cardinal d'Armagnac, du Duc d'V-
sez & du sieur de Loyeuse à present Mareschal de France: & des feux sieurs de Suze, de Quenaux, de Maugiron, de Quelus & du sieur de Rieux, ensemble desdits Cor-fes, & des officiers & habitâs des villes principales dudit gouuernement; de quoy les effects eussent encores esté plus grâds, n'eust esté que ledit Duc de Montmorency fut aduerty aussi-tost que nous de l'éprisonnement de sondit frere, & du commandemēt que ladite Maieité nous auoit adressé, par les bons amis qu'il auoit en Cour & en la ville d'Auignon.

CELA faict & voyant que nostre plus longue presence & demeure en ladite ville d'Auignon estoit inutile au seruice du

Roy, ledit sieur de saint Sulpice & moy prîmes resolution de reuenir trouuer leurs Maïestez par l'aduis desdits sieurs. Mais nous trouuâmes à nostre retour que le feu Roy Charles estoit decedé, à nostre grand malheur & regret & de toute la France, voire de toute la Chrestienté qui ne deuoit pour la gloire de Dieu & le bien vniuersel d'icelle, estre si tost priuée de la vertu, presence & assistance d'un Prince si magnanime, equitable & bon qu'estoit ledit Roy, qui estoit aussi tant obey, honoré & aymé de tous ses seruiteurs, qu'il n'y a que la seule mort qui puisse effacer de leurs cœurs sa tres-heureuse & chere memoire.

Si sa Maïesté eust commandé audit sieur de saint Sulpice & à moy partant d'aupres d'elle, de prendre ledit Duc, ou le faire tuer comme l'on a dict, nous ne nous fussions arrestez si longuement que nous fîmes par les chemins, ny en ladite ville d'Auignon sur les difficultez & remises, que ledit Duc faisoit de nous voir: n'y n'eussions attendu que les nouuelles de la prise de son frere luy eust descouuert l'intention de sa Maïesté: pareillement nous ne fussions partis de la Cour sans voir clair, & estre bien asseurez des moyens avec lesquels nous eussions peu executer tel com-

mandement: d'autre part il n'eust esté besoing que le Roy nous eust enuoyé vne nouuelle commission, pour prendre ledit Duc, comme il nous enuoya par ledit Martinengue; car nous ne fussions partis de la Cour sans estre garnis d'un bon pouuoir pour ce faire: plus ie diray, que nous estiōs instrumens tres-mal propres pour executer vne telle entreprise: ledit Martinengue auquel on disoit que le Roy en auoit depuis donné la charge, estoit bien plus propre pour ce faire que nous n'estions: or i'ay en main plusieurs lettres, memoires & papiers que ie représenteray tousiours, où il sera besoin, qui font foy certaine de la verité dudit faict.

QVANT à la premiere pretendue accusation & charge dudit qui por-
toit que Monsieur de Villequier & moy, l'auions desesché expres pour empoisonner ledit Duc, ainsi qu'il manda à sa Maïesté par du Balloy lorsqu'elle estoit en Aui-
gnon, c'est chose qui fut recognüe tres-
mensongere par la seule lecture de la depo-
sition qui contient plusieurs faussetez tres-
claires & faciles à prouuer: toutesfois i'of-
fris pour la descharge & iustification du-
dit sieur de Villequier, qui estoit lors en sa
maison, & de la mienne, d'aller trouuer le-

dit Duc, respondre à ladite accusation, & estre confronté audit

Mais il se trouua si animé d'icelle contre luy, qu'il le fit executer aux flambeaux, sans attendre la responce de sadicte Maiesté, qui luy pouuoit estre apportee en vn ou deux iours au plus.

ARRES le deceds du feu Roy ie fus enuoyé par ladite Dame Roynes sa mere en la compagnie de Monsieur de Chiuerny, à present Chancelier de France, & de feu M. de Sauue, au deuant du Roy, lequel nous trouuâmes à Turin, il nous receut tres humainement, & me fit en particulier certainement plus d'honneur & de bonne chere, qu'aucuns n'esperoient ny desiroient, se ressouuenant de la bonne volonté que le feu Roy son frere m'auoit portee, & de la recommandation qu'autrefois il luy auoit faite de moy, qui auois receu de luy auparavant qu'il fust Roy en ceste consideratiõ, & de sa bonté toute assistance, faueur & protection.

LE Roy estant arriué à Lyon, fut conseillé par quelques vns de faire deux choses, entre les autres qui ont depuis engendré beaucoup de maux : l'vne fut l'ouuerture des acquis des deniers contants mis es mains ou coffres du Roy : l'autre, le

changement de la forme ancienne des expéditions des dons & bien-faicts, sur ce qu'on luy fit entendre, qu'il n'estoit pas raisonnable que ses officiers controolassent ses volonteiz & commandemens, comme ils faisoient du temps du feu Roy son frere, lequel à la verité se reposoit grandement sur leur deuoir & fidelité, pour l'administration de ses finances & execution de ses commandemens, dont aussi ils estoient responsables du tout, ce qui estoit cause qu'ils y versioient plus religieusement & loyalement, comme l'on a mieux cogneu & experimenté depuis, car la facilité & couverture desdits comptables a engendré tant de sortes de concussions, larcins, dons immenses & despences mal-employées, que ie ne pense point qu'il y ait tant faict de tort au Roy ny destruit le Royaume que cela, comme a faict aussi la nouvelle forme de presenter & expedier lesdits dons; par ce que n'estans par icelle permis aux Princes & Seigneurs de qualitez de parler au Roy pour autres que pour eux, comme ils souloient faire de tout temps auparauant, cela les auoit grandement indignez & mal contentez, & auoient tellement chargé, voire accablé d'enuie ceux qui estoient aupres

de sa personne, qu'une grande partie de nos troubles en sont aduenus. Dauantage au lieu de retrancher par ladite forme les abus que l'on disoit, que les Secretaires ou leurs commis y faisoient, elle leur rendit les moyens de ce faire plus faciles : car deuant ils estoient responsables des expéditions qu'ils faisoient, & n'eussent osé en signer une contraire ausdites ordonnances & reglemens du Roy, sans courir le hazard d'un chastiment & reproche : dequoy ils furent deschargez par ce nouuel ordre, d'autant qu'il leur estoit enioint par iceluy de signer & expedier sans difficulte tout ce que le Roy auroit une fois accordé par placet signé de sa main, ce qui ouurit la porte à plusieurs surprises : Et me souuient qu'un iour le Comte d'Escars m'apporta un placet qu'il auoit fait signer au Roy, par lequel sa Maiesté luy auoit accordé, qu'il seroit imposé & leué sur les habitans de ses terres la solde de certain nombre de soldats qu'il disoit vouloir employer à la garde de ses chasteaux, que ie feis difficulté d'expedier, parce que l'on n'auoit encores commencé à faire garder les maisons des particuliers aux despens du peuple; dequoy il s'alla plaindre; de façon que i'en receus une grande reprimande, & me fut

dict, que ie voulois controoller les commandemens du Roy, que c'estoit chose que l'on ne vouloit plus que mes compagnons & moy feissions, ains que nous eussions à depescher promptement tout ce qui nous apparoiestroit par placet signé de la main de sa Maiesté, auoir par elle esté accordé, nous contentant de retenir & garder le placet pour nostre descharge sans entrer à l'aduenir plus auant en cognoissance de cause, ce qui a esté par moy comme par mesdicts compagnons suiuy depuis; de façon que ie ne voudrois respondre des expéditions que i'ay faictes depuis ledict commandement: chose certainement que ie ne faisois difficulté de faire en toutes celles que i'ay signées du temps du feu Roy Charles, lequel à l'exemple de ses predecesseurs, ne disoit iamais, non, à ceux qui luy demandoient quelque chose, aussi il ne leur accordoit d'abord leur demande, ains il commandoit leur placet estre baillé à l'un de ses Secretaires, qui estoit tenu d'en refuser à la partie l'expédition, ou à celuy qui auoit parlé pour elle: si la demande estoit trouuee contraire aux ordonnances & reglemens de sadite Maiesté, sinon il employoit & couchoit ladite demande sur vn roolle qui estoit apres rapporté &

leu à sadite Maïeste, en la presence de la Royne sa mere, & d'autres qu'elle vouloit y appeller, ou elle ordonnoit sa volonte, en signant ledict roolle qui seruoit apres de descharge audit secretaire, & de tesmoignage à Monsieur le Chancelier du commandement de sadite Maïeste.

CERTAINEMENT ceux-là ont esté tres-sages qui ont dit, qu'il ne falloit legerement changer les loix & formes qui sont en vsage en vn royaume, parce que tels changemens offensent souuent autant qu'ils edifient: ioint que l'on ne recognoist ordinairement les inconueniens d'une loy que par l'experience d'icelle, & que toutes choses pour bien ordonnées qu'elles soyent, sont subiettes à deprauation & corruption: de maniere que i'estois bien de l'aduis de ceux qui disent, qu'il faut plustost corriger les abus d'une loy deprauee, ou mal obseruee, que de l'innouer & changer; spécialement quand il est question de chose qui touche à plusieurs, & mesmes aux grands, lesquels vn Prince bien aduisé doit entretenir de tout son pouuoir, comme il fera facilement, quand il ne communiquera à moindre qu'eux sans grande raison, ce que la Nature & les anciennes loix & constitutions leur ont affecté: Et s'il adue-

noit

uenoit qu'aucuns d'eux en abusassent au dommage du Roy, ie dis qu'il seroit plus expedient pour le bien du Prince & du Royaume, faire chastier par iustice ceux-là, que de les priuier plus de leurs droits & preeminences, i'entens bien quel on a dit, que lesdits Princes & Grands acqueroient des suiets & officiers du Roy pour seruiteurs; & les obligeoient aux despens de sa Maiesté quand il leur estoit loisible d'interceder pour eux. Mais considerons si par ceste nouuelle forme, sa Maiesté a esté depuis plus fidellement seruie qu'elle n'estoit; & si lesdits Princes ont eu moins de cliens & seruiteurs, ie ne dis pas à la suite de la Cour, où chacun idolatre la faueur, mais dedans le Royaume, quand il a esté question de remuër mesnage: l'on trouuera que les changemens ont plustost enflé leur fuite qu'ils n'ont seruy à la retrancher.

IE fus employé à traiter la paix qui fut faite avec le Roy de Nauarre l'an mil cinq cens soixante & dixsept, & feis ce que ie peus pour en estre excusé, tant parce que le Roy auoit protesté & déclaré quelque mois deuant en la ville de Blois y estant les Estats assemblez, qu'il ne feroit iamais paix avec les huguenots, s'ils n'accordoient de

viure en ce Royaume, sans iouir de l'exercice de leur Religion: Et si par necessité, mauuais conseil ou autrement il en accordoit vn autre, qu'il vouloit & entendoit qu'eux & leurs compagnons sceussent que c'estoit contre ses commandemens & volonté, & partant qu'il ne l'obserueroit point afin que l'on n'en fit plus d'estat, & que par ce que plusieurs estimoient, que l'on auoit donné congé à l'Euesque de Limoges seulement, parce qu'il auoit assisté la Roync Mere du Roy en la paix qu'elle auoit poursuuie, & faicte auparauant avec feu Monsieur, en laquelle ie scauois qu'il auoit seruy en hoimne de bien.

NONOBTANT mes excuses le Roy me commanda d'entreprendre ladite negotiation, & me dit qu'il ne vouloit rien accorder de contraire à sa declaration, mais qu'il se promettoit que lesdits huguenots accepteroient la paix, sans auoir ledit exercice: & de faict ie scay quelques vns qui abusoient sadite Maiesté, ou cognoissoient tres mal lesdits huguenots luy en donnant esperance; & croy certainement que telle estoit lors l'intention de sadite Maiesté, laquelle aussi ne me donna autre charge m'y depeschant, que d'y faire resoudre le Roy de Nauarre & ceux de sa religion.

A quoy ie le trouuay tres contraires, i'a-
goit qu'ils fussent alors tres foibles & mal-
menez; mais ils commençoient à se promet-
tre que feu mondit sieur frere du Roy qui
conduisoit l'armée de sa Maiesté & leur fai-
soit la guerre, se lasseroit bientost de ce faire,
chatoüillé, & diuertý des esperances & re-
cherches qu'on luy representoit de la part
de ceux de Hainault, où il ne tarda gueres
apres de s'acheminer.

CE qui fut cause que sa Maiesté se reso-
lut d'auancer la conclusion de ladite paix
auec ledit Roy de Nauarre, parce qu'elle
estimoit que lesdits huguenots seroient plus
difficiles à contenter, quand ils verroient
que mondit seigneur se seroit separé de sadi-
te Maiesté, en la poursuite d'icelle, com-
me certainement il aduint: & toutesfois le
Roy fut si bien seruy en ceste negociation
que ceux auxquels il en confia la principal-
le conduite, n'y employerent toute la ma-
tiere qu'elle y auoit destinée, & en rappor-
terent de reste, de quoy elle monstra estre
tres contente.

COMME elle fit aussi de l'autre traicté que
Monsieur de Belieure & moy feismes aupres
de feu mōdit sieur, auec le Roy de Nauarre
au lieu de Flex, où sa Maiesté fut aussi tres
fidellement seruie, comme il me sera touf-

jours tres-facile de faire paroistre par écrit ou autrement à qui en doutera.

IE croy fermement que les Catholiques de ce Royaume, eussent à la fin receu vn notable aduantage de l'obseruation desdits traictez, si les choses qui se passoient à la cour n'eussent resueillé & alteré les esprits des grands, qui supportoient impatiemment l'autorité & puissance que l'on auoit donné à moindre qu'eux, & qui craignoient qu'il ne leur en arriuaist encores pis à l'aduenir.

IE ne diray point ce qui se faisoit à la cour, car chacun l'a sceu, & en estois aussi absent, il y auoit huit mois, quand les troubles commencerent : ie diray seulement deux choses : la premiere que i'ay tousiours esté obseruateur si entier des commandemens & volentéz du Roy, que l'on ne trouuera point, que i'aye fait depesche, ny refusé ausdits huguenots aucune expedition contraire à la paix, que sa Majesté leur auoit accordée tât qu'elle a duré : bien ay-ie empesché de tout mon pouuoir qu'ils n'ayent élargi la courroye, & obtenu de sa Maiesté plus que ses Edits ou articles pour malfaiçts ne portoient : & ose dire m'y estre comporté si loyalement, que les deputés du Roy de Nauarre & desdicts hugue-

nots n'ont eu occasion de s'en plaindre: l'autre, que si ceux qui estoient demeurez aupres de Maiesté durant mon indisposition qui m'en tenoit absent, eussent tenu la main que les gens de guerre, de cheual, & de pied, que le Roy auoit au commencement de l'année departis par ses provinces, eussent continué à estre establis & payez suiuant les reglemens qu'elle en auoit faict, il eust esté tres difficile de troubler son Royaume, commel'on fit: dequoy ie suis contrainct d'accuser ceux qui ont renuersé les anciennes maximes de nos peres au manient des affaires de ce Royaume, qui vouloient que les despences necessaires pour la conseruation d'icelle, & principalement celles des garnisons & de la gendarmerie, fussent assignées & payées par preference à toutes autres.

IE fus accusé par Salcede d'auoir proietté & fait certains desseins avec feu M. de Guise & quelques autres pour troubler ce Royaume par le moyen du Roy de Suede & ses ministres: & combien que sa disposition fut iugée pour ce qui me cōcernoit, tresimpertinēte, & peu vray semblable par la simple & nuë lecture d'icelle: toutesfois ie fis grāde instance au Roy, & à mes bons amis, à ce que ie fusse représenté, recollé, & cōfraté



audit Salcede de lors que l'on trauailla à son procez. Mais parce que sa Maieſté declaroit eſtre eſclaircie, & bien aſſeurée de mon innocence, & auſſi que ledit Salcede à ſon arriuée & premiere interrogation, declara & ſouſtint, que tout ce qu'il auoit depoſé eſtoit faux, & quel'on luy auoit fait dire iuſques au iour qu'il fut gehéné & executé, ie me remis à ſa M. à en vſer ainſi qu'il luy plairoit, & feis ſi peu de compte de toute ceſte pourſuitte, me conſiant en Dieu, & en mon innocence que ie ne fis aucune recommandation aux iuges ny à autres, & me contentay d'en attendre le iugement tel qu'ils ordonneroient. Ie iure & proteſte auſſi, & appelle Dieu & ſes Anges à teſmoin, ſuppliant ſa diuine iuſtice que ſon ire ſoit ſur moy, & ſur mes enfans à iamais, ſi ie diſ choſe qui ne ſoit tres-veritable: c'eſt que ie ne parlay iamais qu'vne fois audit Salcede, qui fut lors que M. de Carrouges gouuerneur de Normandie donna main forte à l'execution d'un Arrest de la Cour de Parlement de Roïen, contre ledit Salcede, pour forſaits par luy commis, lors qu'une maiſon qu'il auoit en Normandie fut ſaiſie, que ledit Salcede s'enfuit à Paris, où eſtoit M. le Duc de Lorraine: qui me fit commander par le Roy d'eſcrire vne lettre en ſon nō audit ſieur de Carrou-

ges pour faire sortir de ladite maison les gens de guerre qu'il y auoit mis, d'autât que ledit Salcede offroit se rendre prisonnier entre les mains du grand Preuost, pour se iustifier de ce dont on le poursuiuoit, que ledit Salcede me vint demander ladite lettre, laquelle luy refusay, parce qu'il me tint des propos dudit sieur de Carrouges indigne de sa preud'homme & vertu cogneuë d'un chacun & de sa dignité: de sorte qu'il falloit que mondit sieur le Duc de Lorraine auquel i'en fis plainte, cōme i'auois fait au Roy, me fit faire vn cōmādement par sadite Maiesté, laquelle ledit Salcede se garda bien de venir querir luy mesme; mais mondit sieur le Duc de Lorraine y enuoya vn des siens, qui s'en chargea, & ledit Salcede qui ne vouloit que trōper le Roy, & eluder la iustice, s'absenta de la Cour contre ce qu'il auoit promis, soudain qu'il eust tiré ladite lettre, ayant descouuert, que ledit sieur de Carrouges & le Parlement auoient enuoyé à sa Maiesté les charges sur lesquelles ils l'auoient condamné, qui fut cause que sa Maiesté me commanda deux ou trois iours apres de reuocquer ladite lettre, par vne nouuelle adressante audit sieur de Carrouges, qui fut soudain despechee & enuoyee. Voila en verité toute la cognoissance que i'ay ia-

mais eue dudit Salcede, & que ie n'auois
veu deuant, & n'ay veu depuis aucunement,
& pour plus grande iustification de mon
innocence en cét endroit, ie m'en remets
au procez dudit Salcede, & à son iugement,
& prie Dieu de tout mon cœur me rendre
le plus miserable homme qui viue sur la ter-
re, s'il me connoist coupable directement
ou indirectement, en tout ou en partie de
ladite accusation.

L'ESTOIS aux champs malade, il y auoit
huiet iours, comme i'ay commence à dire,
quand la guerre & la ligue commença, l'an
mil cinq cens quatre vingts cinq ie me ren-
disaussi tost aupres du Roy à Paris, ayant
encore la fieure, où ie seruis sa Maiesté
en homme de bien, & confesse que ie ne
fus iamais si outré de douleur & d'affliction
que ie fus de ce remüement, lequel ie ne
m'attendois pas voir arriuer durant la vie
du Roy, comme ie croy aussi qu'il ne fust
aduenu si sa Maiesté eust esté bien assistée
& seruie; ie veux dire si ses seruiteurs & of-
ficiers plus redeuables, eussent eu seule-
ment autant de soin de son seruice que de
leurs affaires priuez, que la resolution de
la leuée des Suisses, dont sa Maiesté fut
secourue tres à propos, & l'avancement de
l'auenue d'icelle, sans laquelle ses affaires

se fussent tres-mal portées, rendront tesmoignage à la posterité de la fidelité du sieur de Fleuri, mon beau frere, qui estoit lors son ambassadeur en Suisse, comme fera le dit sieur de Fleuri du bon deuoir que ie fis de l'en solliciter, avec Monsieur de Belieure & les gens de bien qui estoient près sa Maiesté: si elle eust esté seruie en toutes autres choses aussi diligemment qu'elle le fut en ceste cy, elle eust faict la paix plus à son aduantage qu'elle ne feir.

Sa Maiesté voulut m'enuoyer à Espernay deuers la Royne sa Mere, lors que l'on estoit quasi sur la conclusion du traité de ladite paix qui y fut faicte: ie n'en diray l'occasion par ce que ce ne sont choses à diuulguer, moins par moy que par vn autre: mais ie desire bien que l'on sçache que ce fut contre mon aduis, que ie fis ce voyage, comme ie puis monstrier par lettre escrite de la propre main de sa Maiesté.

NON pour cela que ie vueille faire croire, que i'aye esté contraire à ladite paix; car tant s'en faut, que cela ait esté, que iaduouë auoir esté de ceux qui ont conseillé à sa Maiesté de retenir à foy tous les Catholiques, par tous moyens possibles, & plustost faire la guerre fort & ferme ausdits huguenots, qui ont esté les premiers auteurs de

nos diuisions, que souffrir former en son Royaume vn party composé de Catholiques separé d'elle : meü premierement de l'affection tres-grāde que i'ay tousiours cogneu, que le Roy portoit à nostre religion, de son inclination à haïr mortellement les heretiques, n'ayāt oncques receu de luy cōmandement, par lequel ie me sois apperceu qu'elle les aye voulu fauoriser ny esparagner, quoy que l'on aye publié; ce que ie ne diray de tous ceux qui auoient part aupres de sa Maiesté : meü aussi du deuoir de ma conscience, & du zele à nostredite religion (que i'ay tousiours eu, & que i'auray tant que ie viuray si Dieu plaist) qui a eu plus de pouuoir sur moy, que toute autre chose : & finalement de la crainte que i'auois de voir arriuer ce que nous sentons maintenāt, par vn desespoir de recōciliation des chefs des Catholiques separez de sa Maiesté ; preuoyant avec monsieur de Belieure, que quand cela arriueroit, ce seroit la ruine du Royaume, & vn grand affoiblissement de nostre religion, comme nous sommes prests d'esprouuer au grand regret des gens de bien.

C'A esté le subiet & la cause des conseils retenus & timides que l'on a publié, que ledit sieur de Belieure, & moy, donnions quelquesfois à sa Majesté, quand il estoit que-

stion de pouruoir au mescontentemēt qu'elle auoit desdits chefs.

PLEVT à Dieu que ceux qui ont m'eue ou conforté la maiesté à faire ce qui s'est executé à Blois contre Messieurs les Cardinal & Duc de Guise, eussent esté aussi timides & apprehensifs, que ie confesse auoir esté toutes & quantes fois qu'il a esté parlé d'vser de violence, & appliquer le cautere aux malades de ce Royaume. peut estre qu'ils eussent faict à la Maiesté vn seruice, duquel avec le temps il eust receu plus de contentement & d'vtilité, qu'il ne fera de ce qui s'est passé.

IL y auoit ce me semble, d'autres môyens pour remedier aux mescontentemens du Roy, & aux choses qui se passoient: ie sçay certainement que le Roy auoit assemblé ses Estats avec dessein tout contraire à celuy qui en est succédé, & qu'il ne cherchoit qu'à bien faire pour nostre religion, pour le public & pour luy, qui sont trois choses inseparables: & croy fermement qu'il en fust ainsi aduenu: s'il eust esté de personnes, qui eussent eu son seruice & son hōneur en plus grande recommandation que leurs affaires particulieres.

A ce propos ie diray auoir remarqué avec plusieurs autres, que iamais on n'a parlé de

rechercher & punir les larcins de la cour que l'on n'ait quand & quand fuscité quelque trouble nouveau, qui a interrompu & faict cesser lesdites recherches: ce ne sont pas aussi ordinairement ceux qui ont la bourse mieux garnie, & qui ont le plus desrobé, & faict leurs affaires (pour vser des termes qui sont en pratique) qui ont eu le moins de pouuoir aupres des grands qui ont peu remuër mesnage.

Qui forçoit & obligeoit le Roy à se laisser emporter aux poursuites des Estats, & à leur accorder les choses qu'ils luy demandoient, qu'il estimoit & recognoissoit luy estre honteuses & preiudiciables? Je ne puis croire quant à moy, que ce fust l'intention du general desdits estats, d'offenser sa maiesté: le mal & le reproche leur en fust à la fin demeuré, quand ils eussent entrepris & executé: Et pour le regard des particuliers, & que l'on a dit qui mouuoient les autres; ie dis qu'à la fin tout fust tourné à leur confusion, & à l'auantage du Roy, & du Royaume: vray est que l'on eust peu donner quelque regle & bride aux surcharges que le peuple portoit, & aux desordres qui estoient ordinaires au maniemment des finances du Royaume, pour contenter & soulager le peuple: mais qui a plus desiré cela, & qui

en deuoit auffi plus profiter que le Roy?

FEV M. de Guise estoit-il assez fort dedās Blois, avec les deputez desdits Estats? Quand mesmes ils eussent esté tous à la deuotion, pour forcer la volonté du Roy à leur accorder ce qu'il leur eust voulu refuser, il y a paru par ce qui s'en est ensuiuy: le Roy n'auoit à faire autre chose qu'à fortifier son autorité & ses volontez, de la raison, en espousant le premier par effect de cœur & d'affection, le soulagement du peuple, la reformation des choses qui en auoient besoin, & la guerre contre les heretiques: il eust en ce faisant & sans coup ferir renuersé la ligue, & attiré à soy les cœurs des Catholiques, qui en sont à present par trop distrais & esloignez.

LES auteurs & fauteurs d'un tel conseil deuoient mieux recognoistre l'estat du Royaume, & les complexions & humeurs de la Cour qu'ils n'ont fait, leurs passions les ont aueuglez: ceux qui craignoient estre chassez, ont mieux aymé conleiller au Roy de manquer à ses promesses que de les abandonner: ils luy ont dit que feu M. de Guise l'eust mis en tutelle, & amené prisonnier à Paris, si on ne l'eust fait mourir, & qu'il luy vouloit donner un conseil, & des seruiteurs à sa poste.

IE n'ay que faire en cela de iustifier l'intention dudit Duc, parce que ie n'en fus iamais assez informé pour en respondre; mais i'ose dire, que quand il l'eust entrepris il ne l'eust peu faire, & qu'il se fust perdu: l'on dict qu'il s'en fust allé, & eust rompu les Estats, & commencé la guerre. Sur quel fondement l'eust-il faict; le Roy auoit desia accordé, ou estoit resolu d'accorder tout ce qu'on luy demandoit, pour le bien general du Royaume: c'estoit son seruice aussi d'en vser ainsi, mais il ne vouloit changer de seruiteurs à la poste dudit Duc, ny le faire Connestable de France. Eust-il pour cela, & sur cela commencé la guerre? C'eust esté bien vn foible fondement & pretexte, il eust esté mal receu d'un chacun, & eust en ce faisant plus perdu de seruiteurs, & de creance en ce Royaume, qu'il n'y en auoit acquis, par ce qu'il auoit fait. Il s'est tousiours aussi tres-bien gardé de coucher de son particulier, n'y d'auoir aucun autre dessein pour luy en tout ce qu'il a faict: il ne falloit que suiure le mesme chemin, & vser de mesme industrie, pour contreminer les desseins. Les peuples ne l'aymoiēt que pource qu'ils esperoient, par son moyē estre deliurez des heretiques, & soulagez plustost que par celuy du Roy: il ne falloit, pour changer

les affections du peuple, que faire mieux que luy en l'un & en l'autre, voila commẽs i'eusse voulu faire mourir Monsieur de Guise; c'estoit le moyen de releuer l'autorité du Roy.

DESLORS que le Roy permit à Monsieur de Guise de le venir trouuer à Meaux, pour aduiser & resoudre des moyens de resister à l'armée protestante, qui commençoit à marcher pour entrer en ce royaume: ie m'apperceus bien que l'on auoit fait trouuer mauuais à sa Maiesté le conseil que l'on luy auoit donné de voir ledit Duc, & de rallier à soy pour mieux s'opposer ausdits protestans, & que l'on luy auoit imprimé vne telle ialousie dudit Duc, qu'il oublioit quasi la crainte de ladite armée, en quoy sadite Maiesté auoit esté nourrie & entretenue par aucuns, poussez de leur interest priué, plustost que du seruice du Roy, ce que i'ose dire auoir esté la principale cause de nos maux: car plus le Roy se declaroit ialoux & mal content dudit Duc, plus ledit Duc regardoit à se fortifier, tãt pour se faire rechercher & rẽdre plus necessaire, que pour miex resister à ses ennemis, ce qu'il ne pouuoit faire qu'en offensant & affoiblissant le Roy, ce qui a engendré à la fin le tonnerre, qui est tombé sur les Catholiques.

LA dernière chose qu'un Prince souverain doit faire, est de se monstrier mal content & offensé d'un sien subiect, au lieu de le chastier luy donner plus de moyen & pouvoir de luy mal faire : car c'est tres grande folie & impertinence que d'esperer arrester le cours d'une desobeyssance par gratification, c'est par la vertu de la iustice que telles playes doiuent estre gueries, ce qui a esté trop mal pratiqué en ce Royaume, depuis 30. ans, de sorte que petits & grands ont creu que pour auoir des charges & des recompenses, il se falloist plustost faire craindre qu'aymer.

IL faict plusieurs autres voyages, affaires, traictez, negotiations de tres grande importance que i'estime n'estre de besoin de représenter, parce qu'il y auroit trop de choses à dire, lesquelles il vaut mieux taire à present pour diuers respects ; & d'autant plus qu'elles ne seruent à l'effect ; pour lequel i'ay entrepris d'escire le present memoire, comme i'ay desia dit, pour faire paroistre que i'ay seruy sa Maiesté tres fidellement en toutes, & en la meilleure partie d'icelles assez heureusement, graces à Dieu, dequoy ie me rapporteray à ceux qui en ont eu la cognoissance.

MAIS i'estime estre à propos, voire necessaire
faire

faire pour ma descharge , d'esclaircir mes amis de tout ce qui s'est passé entre Monsieur d'Espernon & moy , parce que l'on m'a dit que son inimitié auoit plus aduancé ma disgrâce que toute autre chose ; quoy estant, s'il y auoit eu de ma faute, l'on auroit eu occasion de m'en blâmer.

Je puis prouuer par lettres, & tesmoins, gens de bien, qui viuent encores, que feu M. de la Valette son pere, sur ses derniers iours n'auoit personne à la Cour de qui l'amitié luy fust si asseurée, & si vraye que la mienne, ayant souuent faict mon propre fait de tout ce qui le concernoit, tant l'honorois sa vertu en toutes choses, & sa fidelité au service du Roy : & de faict quand il mourut, il me recommanda ses enfans, & Madame de la Valette sa femme me les adressa, lors qu'elle les enuoya à la Cour, ce que ledit sieur Duc d'Espernon a dit souuent, & que l'amitié qu'il me portoit estoit hereditaire & procedoit de l'obligation que feu son pere m'auoit, dont il faisoit telles demonstrations, que souuent à la Cour on en a eu ialousie, comme toutes choses sont subiectes à y estre interpretees, & prises plustost en mauuaise qu'en bonne part.

CESTE opinion dura, & fut creüe d'un

C

chacun, & mesmes des plus grands, iusques au temps que ledit Duc s'opposa au mariage del'heritiere de la maison de Maure avec mon fils, auquel le Roy m'auoit seulement permis d'entendre, mais aussi promis avec la Roynes sa Mere, de me pręster toute faueur & assistance: & de faict leurs Maiestez l'embrasserent de leur grace, avec telle affection, que ie croy certainement que ledit mariage eust estę fait sans l'opposition qu'y porta ledit Duc, d'Espernon, lequel disoit que le Roy & Madame la Duchesse d'Vsez parente de ladite fille, luy auoient promis de la donner en mariage au fils de monsieur de Termes, que nous appellons ą present monsieur de Bellegarde: ce que ledit Duc print si ą cęur contre moy, que recognoissant le Roy en estre en peine, comme certainement il estoit, ie suppliy sa Maiestę trouuer bon, que ie quittasse la poursuite, comme ie fis ą l'heure mesme.

LES vns disoient, que ledit Duc auoit entrepris la susdite poursuite, meu veritablement du desir qu'il auoit de marier sondit cousin ą ladite fille, qui deuoit vn iour estre heritiere de grands biens, mais les autres eurēt aduis incontinēt, qu'il l'auoit fait plustost pour m'en priuer, que pour autre chose, parce que les principaux paręs de la

dite fille disoient qu'ils ne permettroient iamais qu'elle fut mariée audit sieur de Termes, aussi le Comte de Torigny, fils de Monsieur le Marechal de Matignon l'a depuis espousée.

Quoy que ce soit, depuis ce tēps-là ledit Duc cognoissant m'auoir fait perdre ceste occasion, & croyāt que ie fusse de ceux qui n'oublent, & ne pardonnent volōtiers vne offence, a tousiours eu defiance de moy & de tout ce que ie faisois, de façon qu'il estimoit que ie fusse cōtraire à tous ses desseins interpretant en ce sens tout ce que ie disois, & faisois par le commandement & seruice du Roy, qu'il ne luy estoit agreable & conforme à ses desirs, au lieu qu'āuparauant il souloit prendre le tout autrement.

A quoy ayda grandement la bonne volunté, que feu Monsieur de Ioyeuse cōmença à me monstrier & à mon fils aussi, l'honorant du guidon de sa cōpagnie de cent hommes d'armes, & le prenant en sa protectiō; car ces deux Ducs, que le Roy auoit voulu ioindre & alier ensemble de plusieurs sortes de liens, estoient si ialoux l'un de l'autre, que l'un haïssoit mortellement les seruiteurs de l'autre, & toutefois il estoit comme impossible qu'un ieune homme fust fortuné à la Cour, s'il ne prenoit le party de l'un des

deux: telle inimitié a duré iusques apres la mort, qui sont iugemens de Dieu, lequel ne permet que telles amitez basties sur faux fondemens prosperent, quoy que les Roys apportent de leur part tout ce qui est en eux.

QVAND ledit Duc d'Espernon partit de la Cour, pour aller prendre possession du gouuernement de Prouence; (que le Roy luy auoit donné, apres le trespas de feu M. le grand Prieur de France bastard d'Angoulême) il voulut m'asseurer de son amitié, en presence de Monsieur de Bellieure, qui luy estoit tres affectionné; & à moy tres parfait amy, laquelle assurance il me confirma encores à son logis à Paris, où ie le fus trouuer pour prendre congé de luy.

M A I S cela ne dura gueres, car ayant es- crit au Roy, qui lors estoit allé aux bains de Pougues, que la surprise que le sieur de la Valette, frere dudit Duc, auoit faicte en ce temps là de la Citadelle de Valence, sur le sieur de Gessan, estoit caule de troubler grandement les affaires, & ietter messieurs les Ducs de Guise & de Mayenne en plus grande deffiance que iamais de l'obseruation de la paix, que l'on auoit de n'agueres faite avec eux, avec grande peine & au des- aduantage pour sa Maiesté. Ledit Duc

d'Espernon en fut incontinent aduerty; les vns disent que ce fut par le Roy, les autres par autre voye: il m'en sceut tres mauuais gré, & le coup que i'auois frappé en bonne intention, renouuella la playe de son mescontentement en mon endroict, qui n'estoit pas encore bien consolidée.

LA surprinse de ladite Citadelle de Valence fut suiuite, quelque temps apres, de celle des villes de Dourlans & du Crottoy en Picardie faicte par Monsieur le Duc d'Aumale, lesquelles engendrerent tant de deffiance entre mesdits sieurs Duc de Guise, & de Mayenne, & ledit Duc d'Espernon & ledit sieur de la Vallette, que ç'a esté la pepiniere de tous nos maux.

Av mesme temps quelques vns de la ville de Lyon qui estoient bons seruiteurs du Roy, & amis communs de feu M. de Mandelot, & de moy, ne desirant pas que ledit sieur de Mandelot mariaist sa fille aisnée à Monsieur le marquis de villars, fils de madame la Duchesse de Mayenne, d'où l'on estoit entré fort auant en propos, pour la crainte qu'ils auoient que telle alliance, mit le Roy en defiance dudit sieur de Mandelot, & fit entrer ledit sieur de Mandelot en la ligue, mirent en aduant celuy de mon fils avec ladite fille: de quoy estant le Roy aduerty,

la Maieſté me commanda de le pourſuiure, me diſant que ie ne luy ferois pas moindre ſeruiſe que de luy aſſeurer ladiſte ville de Lyon avec tout le Gouuernement, & la perſonne dudit ſieur de Mandelot, que ſa Maieſté auroit occaſion de tenir comme perdue, ſi l'autre mariage ſe faiſoit, & ſur cela ſadite Maieſté me promit de faire tomber entre les mains de mondit ſils le gouuernement dudit ſieur de Mandelot, & de faire tant de bien & aduantage aux parties, que nous aurions occaſiõ de nous en louer, & qu'elle recompeneroit en ce faiſant tout d'un meſme coup deux familles qui l'auoient tres-bien ſeruy, & dont il eſperoit tirer encores à l'aduenir des ſeruiſes tres-notables.

LE commandement de ſadite Maieſté, ſesdites promeſſes & le deſir que i'auois de luy faire ſeruiſe, & luy conſeruer ledit ſieur de Mandelot, pour l'honneur & la bonne amitié que ie luy portois, me firent bientoſt reſoudre de rechercher ledit mariage, & le preferer à d'autres qui s'offroient, encore que ie ſceuſſe qu'ils eſtoient plus riches de biens que l'autre, mais non veritablement d'honneur.

CE qui fut incontinent diuulgué par tout, & ſeuu auſſi dudit Duc d'Espemon qui n'ai-

moit gueres ledit sieur de Mandelot, à cause qu'il auoit aydé aux habitans de ladite ville à faire sortir de la Citadelle le sieur du Passage que Monsieur de la Valette y auoit mis, lequel auoit achepté la Capitainerie d'icelle du sieur de la Mante, en esperance de recouurer quelque iour tout le gouuernement duquel il auoit obtenu la reserue, laquelle Citadelle ledit sieur de Mandelot auoit depuis faict raser par la permission de sadite M. dont ledit sieur de la Valette estoit tres indigné: & par consequent ledit Duc son frere iacoit qu'ils fissent quelquesfois demonstration du contraire.

COMME fit encores ledit Duc en ceste occasion, car à son retour de Prouence, ayant sceu que le Roy desiroit pour son seruice que ledit mariage se fist, & pour ce faire, asseurer ledit sieur de Mandelot de la suruiuance dudit gouuerneur pour son gendre, il remit entre les mains de sa Maiesté, tant pour luy que pour son frere la reserue dudit gouuernement, dont sa Maiesté luy auoit donné promesse.

L'EN fis vn grand remerciement audit sieur Duc d'Espernon, à son arriuée à Paris, & m'asseura qu'il n'eust quitté ladite reserue si ce n'eust esté en ma faueur & consideration, de sorte que ie croyois veritablement

auoit tresgrande part en sa bonne grace, laquelle ie mesnageois & conseruerois de tout mon pouuoir.

TOUTESFOIS par ce que le Roy, à son retour de Prouence ne luy monstroit ainsi qu'il disoit tant d'amitié & de confiance qu'il vouloit, & aussi que sa Maiesté parloit plus souuent à moy que de coustume, il se persuada bien tost après que ie luy faisois de mauuais offices, & que i'estois en partie cause du refroidissement de sa Maiesté en son endroit, de sorte que s'estant rencontré vne fois que ie parlois à sa Maiesté de Monsieur l'Archeuesque de Lyon, & que ie suppliois de luy faire faire vne lettre, & aduiser de composer le different qui estoit entre ledit Duc, & luy, pour retenir & conseruer ledit Archeuesque à son seruice, que ie scauois estre fort esbranlé à cause de la hayne qui estoit entre eux. Ledit Duc print occasion de fonder sur ce subiect, vne nouuelle querelle & plainte de moy; dont il me tint quelques propos; & pareillement d'une certaine ouuerture faite au conseil par le feu President Nicolay touchant le party du seel, qu'il disoit que i'embrassois & poursuiois à son preiudice à cause des assignations qu'il auoit sur ledit seel, dont ie n'auois parlé aucunement, & estois du tout

innocent: ie m'apperceus assez tost que son mal procedoit d'ailleurs: que de moy, & qu'il ne s'attachoit à moy que pour battre & gourmander le chien deuant le lyon, dont i'aduertis sa Maiesté, afin qu'il luy pleust y pouruoir.

SUR cela s'offrit le voyage de Meaux, duquel i'ay cy deuant parlé qui seruit grandement à bien remettre ledit Duc avec sa Maiesté, au desaduantage de ceux qui desiroient rabattre & faire cesser les desiances & mescontentemens qu'elle auoit du dit Duc de Guise, pour les raisons susdites; dequoy la Roynne mere du Roy ne fut mesme exempte non plus que les autres: toutes fois choses ne refroidissoient les gens de bien de leur deuoir, ny de procurer ce qu'ils estimoient estre vtile au Roy & au Royaume: côme la nouuelle arriua que les troupes du Duc de Guise auoient ia commencé à combattre avec celles de ladite armée protestante, où ils auoient gaigné vne cornette du colonnel Bouc, Monsieur le Duc de Neuers tesmoignera l'office que ie fis en cet endroit avec luy, pour auancer le partement de Paris de sa Maiesté, & son acheminement en son armée, meu principalement du zele que ie portois au Roy, & du soin que i'auois de sa reputation, &

de son contentement qui m'a tousiours esté plus cher quand i'ay esté auprès de luy, que la conseruation de ma propre vie.

LE Roy s'achemina bien tost apres en s^o armée, où ie fus commande de le suiure, estant à sainct Aignan, ledict Duc d'Espernon s'attaqua à moy, en la presence, & dedans le Cabinet de sa Maiesté, sur vn rapport que ie faisois d'vn aduis de Messieurs du Conseil que l'on auoit laissé à Paris, touchant certains deniers qui y restoiēt à receuoir de la vente du domaine du douaire de la feu Royné d'Escoffe au pays de Poictou, que l'on conseilloit à sadicte Maiesté de bailler au grand Preuost, pour luy donner moyen de partir de Paris, & acheminer en l'armée ses Archers, dont l'on auoit grand besoin, disant ledict Duc que les deniers auoient esté donnez à son frere pour les frais de l'armée qui estoient Dauphiné sous sa conduite, & partant que l'on ne pouuoit plus les destiner ailleurs sans luy faire tort, comme il sembloit que l'on prenoit plaisir de faire, & de luy retrancher & oster tous moyens de seruir: à quoy ie ne fis aucune responce, parce que ce propos, ce me sembloit, ne s'adressoit à moy, d'autant que c'estoit chose qui n'auoit passé par mes

maines, mais sa Maieſté & luy en entrèrent en grande conteſtation, dont la colere tomba apres ſur moy; car ledict Duc me dict, que i'auois eſté ſeul cauſe de ce que l'on auoit ainſi traicté ſon frere, pour fauoriſer Monſieur le Mareſchal de loyeuſe, dequoy m'eſtant voulu excuſer il me dict que ie taillois & rongnois des affaires de ſa Maieſté à ma diſcretion, & ſans charge ne commandement de ſadite Maieſté: & luy ayant reſpondu que c'eſtoit choſe que ie n'auois iamais faicte, meſme le preſſant d'en coter quelque vne, & que i'eſtois preſt d'en reſpondre, il s'eſchauffa tellement qu'il m'iniuria & menaça en la preſence de ſa Maieſté, lequel ſe leuant de ſa chaire, où il eſtoit aſſis & moy appuyé derriere luy, me commanda de me taire, ce qui fut cauſe que ie me departis de ceſte façon de la preſence de ſadite Maieſté, & l'on ma dict depuis que ie courus deſſors fortune d'eſtre renuoyé en ma maiſon, avec leſdictes iniures & menaces: toutesſois ſadite Maieſté feit toute autre contenance, car l'ayant ſuppliée le lendemain, de me faire iuſtice de ladite iniure, ou me permettre de me retirer en ma maiſon, parce que ie ne deuois ny ne pouuois la ſeruir eſtant iniurié, elle me refuſa mondit congé, & ſe

contenta de m'exhorter à la patience, & à l'exemple de ceux que ledit Duc auoit bafoüez, qui faisoient profession des armes, & estoient encores plus qualifiez que moy: & faut que i'aduouë que ie n'eusse iamais creu que le Roy eust permis, que ledict Duc ny autre plus grand que luy, eust en sa presence & pour occasion si friuolle, traicté de ceste façon, vn sien seruiteur & officier auquel elle monstroït tant de bonne volonté & fiance, comme estoit celle que i'en receuois.

IE portay ce desplaisir iusques à ce que la nouuelle arriua de la mort de Monsieur le Duc de Joyeuse, que sa maiesté voulut deux iours apres que ledict Duc en sa presence metint comme il fit, vn tres-honneste langage, sur ce qui s'estoit passé audit Saint Aignan: de façon que i'eus certainement toute occasion d'en demeurer tres-satisfait, depuis se representant celle de la poursuite de l'armée protestante, qui se retiroit apres la deffaiete d'Auneau, ie priay sa Maiesté de trouuer bon que la compagnie de mon fils, qui n'estoit des moindres de l'armée, suiuit ledit Duc d'Espernon, comme elle fit, sans l'abandonner iusques à la composition qu'il feit avec les chefs d'icelle, dont il enuoya la nouuelle à sadite Maiesté

par mon fils, qui la porta apres par le commandement de ladicte Maieſté, à la Roy ne ſa mere.

MAIS ie ne veux oublier à dire, que quād l'on ſceut la diſpute que ledit Duc auoit eue avec moy, tant de gens s'offrirent à m'aſſiſter, que ie recogneus que l'inimitié qu'on portoit audit Duc, eſtoit encores plus grande que ie n'auois creu, & qu'elle ſeroit en fin cauſe d'un tres-grand malheur: ce qui me meut depuis de le ſolliciter, & admoneſter aſſez ſouuent de compoſer tous les differens qu'il auoit avec meſſieurs de Guiſe, & d'en pourſuiure, & parler à ſa Maieſté, ſur laquelle ie preuoyois que le contre-coup & principal dommage en tomberoit à la fin: & certainement ledict ſieur de Bellieure y faiſoit de ſon coſté vn tres grand deuoir, comme il eſt tres-ſage perſonnage, clair-voyant & ayment grandement le ſeruiſe du Roy, comme il faiſoit auſſi particulierement le bien dudit Duc: mais plus nous remüions ce propos & affectionnions ce Conſeil, plus ledit Duc ſe deſſioit de nous; & mettoit le Roy en ſoupçon de nous, dont ie m'apperceuois tous les iours dauantage; & faut que ie die, que la cognoiſſance que i'en auois, fit grand tort aux affaires du Roy, lors qu'il ſe reſo-

lut de faire entrer les Suiffes dedans Paris, car ie n'en ofay parler qu'à demy: & à dire vray le regret m'en demeurera eternellement en l'ame, n'ayant rien fait ny veu faire durant que ie feruis le Roy, dont graces à Dieu, ma conscience demeure chargée, que de ce, seul faict.

Sur cela ledit Duc d'Espernon s'achemina en Normandie pour prendre possession du gouuernement dudit pays, & de l'Admirauté de France, dont le Roy l'auoit pourueu apres la mort dudit Duc de Joyeuse, ce qui augmenta l'enuie, & la haine que l'on luy portoit.

Ces grandes deffiances & inimitiez croissant à toute heure, firent venir à la fin ledit Duc de Guise à Paris, contre l'attente & volonté de sa maiesté, ce qui fut cause qu'elle fit entrer apres lesdits Suiffes dans la ville, & les compagnies du regiment de sa garde qui estoient logez aux fauxbourgs, dont s'ensuit la iournée des barricades, & le partement du Roy de la dite ville, qui se retira en celles de Chartres.

Ces choses affligerent grandement les bons seruiteurs de sa Maiesté, tant pour le desplaisir & la honte qu'elle y auoit receüe, que pour la cognoissance qu'ils auoient des miseres qui en naistroient; de quoy se

dōnerent peu de peine, ceux qui craignoient plus la guerre en la paix, que la ruine du Royaume.

C'a esté vn coup procedant du ingement de Dieu sur nous, car chacun preuoyoit & predisoit qu'il arriueroit quelque violence desdites deffiances & inimitiez, qui mettroient le Roy en peine tres grande, & ses affaires en pareille confusion; luy mesme le disoit & en receuoit tous les iours des aduis. Dauantage il faisoit demonstration d'y vouloir pouruoir, neantmoins comme il estoit conseillé des vns de ce faire par la douceur, & des autres par la rigueur; il s'y trouuoit tres-empesché toutesfois il inclinoit plus à suiure le dernier chemin que l'autre, pource qu'il estoit plus agreable à ceux qui auoient plus de credit aupres de luy: aussi qu'il luy faisoient tres facile, & qu'il luy sembloit que le malheur de ses affaires estoit d'auoir esté trop indulgent au parauant en semblables occasions: ce fut aussi celuy qu'il choisit, sans descouurir rien à la Roynne sa mere, parce qu'elle auoit iusques à l'arriuee dudit sieur Duc de Guise grandement contredit aux aduis que l'on en auoit donnez, & particulierement des remuemens qui se preparoient en ladite ville, lesquels pour mon regard ie sc̃auois &

reconnoissois estre tres-veritable : Mais certainement i' apprehendois fort le danger qu'il y auoit d'y remedier par la force, estât les choses si preparées & aduâcées, qu'elles estoient à vne souleuation, mais la facilité de l'executer que l'on en promit au Roy l'y embarqua : toutesfois il me fit cet honneur que de me dire le matin, que lesdictes forces entrèrent en la ville, qu'il eust desiré estre à l'ordonner, ayant la nuit poisé & apprehendé le mal qui en pouuoit arriuer. Dauantage ie suis obligé de dire que ie ne cogneus point que sa Maiesté eut lors volonté d'attenter contre la personne de M. de Guise, ny de faire apprehender ny punir par iustice aucuns de la ville, comme l'on a publié, ains seulement de faire vider plusieurs gentils-hommes, & autres gens d'effect que l'on y auoit fait couler deuant & depuis l'arriuee dudit Duc de Guise, pour rōpre le coup d'une souleuation de peuple, dont il estoit menacé. A quoy i'adiousteray que la resolution que sa maiesté print de sortir de la ville vint d'elle mesme, iugeant qu'en conseruant sa personne, elle pourroit apres recouurer ce qu'elle delaissoit.

CERTAINEMENT i'entrepris des premiers de remontrer à sa Maiesté les maux & accidēs que ceste guerre engendreroit, & de

de luy donner conseil de penser à y remédier plustost par la douceur, que par la force, luy cottant par le menules raisons qui fortifioient telle opinion, que sa Maïesté sçauoit & entendoit encores mieux que nul autre de ses seruiteurs: pour ceste cause elle eust bien desiré, que ledit Duc d'Espernon ne la fust venu trouuer à Chartres, comme il fit: car d'ailleurs il estoit si mal voulu à la Cour que les principaux d'icelle protestoient de s'en aller, s'il y demouroit, ne pouuant compatir avec luy: ce qui fut cause que sa Maïesté ne cessa qu'elle ne l'eust enuoyé, & pour ce faire luy accorda tout ce qu'il luy demanda: mais deuant que de partir il dissuada sa Maïesté tant qu'il peut de la paix, blasmant ceux qui la luy conseilloyent, sur tous autres il monstroït m'en sçauoir tres-mauuais gré: toutesfois partant il me voulut asseurer de son amitié, sur vn propos que i'auois tenu à son Secretaire:

B I E N . tost apres ledit parlement, sa Maïesté me voulut depescher à Paris, pour donner commencement à la negotiation d'vne paix, dequoy ie la suppliay de m'excuser pour la ialousie que ledit sieur d'Espernon auoit cōceüe cōtre moy, qu'il se predroit à moy de tout ce qui seroit dit & con-

D

clud à son defauantage : chose que sa Maie-
sté print en bonne part, de maniere qu'elle
y depescha monsieur Miron son premier
medecin : lequel n'ayant rapporté de deux
ou trois voyages qu'il y auoit fait que des
parolles generalles qui tenoient sa Maie-
sté en grand suspens & incertitude entre la
guerre , & la paix, dont elle estoit en tres-
grande peine, elle m'enuoya querir le iour
de la Pentecoste estant à Vernon, & m'ay-
ant dit en la presence dudit sieur Miron que ie
trouuay seul avec elle, l'ennuy & fascherie
qu'elle auoit de ces longueurs, & mesmes
le preiudice que ses affaires en receuoient,
& le desir extrême qu'elle auoit d'estre es-
claircie de ce qu'elle se deuoit promettre
de ladite paix, pour mieux se resoudre de
ce qu'elle auroit affaire, sa Maie-
sté me com-
manda d'entreprendre le voyage de Paris ,
où l'on disoit que i'estois desiré, pour ayder
à ietter les premiers fondemens de ladi-
cte paix : ie m'offris & resolu volontiers à ce
faire, me venant veritablement d'un tres bon ze-
le au seruice de Dieu, & celuy du Roy &
au bien public du Royaume ; & d'un tres-
grand desir de tirer sa Maie-
sté des incerti-
tudes esquelles elle demeu-
roit, que ie re-
cognoissois luy estre tres dom-
mageables, & refroidir grandement l'affec-
tion de ses
bons suiets.

IE fus donc depesché à l'heure même, & sur le champ deuant que de sortir du lieu où nous estions, & escriuions sous la Maïesté ma premiere instruction, laquelle fut dressée sur les aduis que luy donnoit ledit sieur Miron, qui auoit recogneu & appris aux voyages qu'il auoit desia faicts, quel emplastre il falloit appliquer aux playes que l'on vouloit guerir: pour ceste cause, ie suppliy ladite Maïesté de renuoyer avec moy ledit sieur Miron, ce qu'elle fit.

Et d'autant que ce dont i'ay esté le plus blasmé de toute ceste negociation, a esté du pouuoir que le Roy auoit accordé audit sieur Duc de Guise, parce que persõnen'en eust eu cognoissance ny communication qu'apres la conclusion de ladite paix; ie desire qu'un chacun soit bien esclairey de la verité de ce fait; pour ceste cause il est besoin que ie die, que par ladicte premiere instruction que le Roy me fit escrire sous luy, en la presence & par l'aduis dudit Miron, la Maïesté me commanda entre autre chose de proposer audit sieur Duc de Guise la Lieutenance generale de son Royaume, comme ie puis monstrier par escrit certifié & signé de la propre main de la Maïesté, ledit Miron luy ayant dit, que si elle ne

luy donnoit ce pouuoir, l'on ne feroit iamais la paix: & fus depesché avec cela & plusieurs autres commandemens, que ie me resolus de mesnager & faire valoir à l'aduantage du Roy & de son contentement avec toute industrie, sollicitude & fidelité.

Si i'eusse eu telle intelligence avec ledit Duc de Guise, & si grand desir de l'autoriser aux despens du Roy, ou eusse esté son pensionnaire, comme l'on a dit du depuis, sous correction tres-faussement, ie pouuois facilement luy donner aduis du commandement, & du pouuoir que sa Maiesté m'auoit donné, afin de luy faire demander & poursuiure ladiète Lieutenance generale que ie sçauois que l'on luy eust en ce castres volontiers accordée.

MAIS tant s'en faut que telle trahison soit entrée en mon esprit, que ie me resolus de dire à Monsieur le Cardinal de Bourbon, & audit fleur de Guise, & autres qui l'affistoyent, que le Roy m'auoit depesché sans charge & pouuoir quelconque, ains seulement pour sçauoir & luy rapporter s'ils auoient eue de la paix, ou non, afin qu'on nes'y attendit plus, s'ils estoient resolu à la guerre; sinon & qu'ils desirassent ladite paix, comme ils disoient que sa Maiesté sçeuft ce qu'ils demandoient pour cét effet,

& pource en falloit sortir, afin de la conclurre au plustost, pour soulager le peuple, & ne consommer inutilement les moyens & le temps que l'on auoit de faire la guerre aux heretiques, à laquelle sa Maiesté estoit plus disposée & resoluë que iamais, laquelle se plaignoit & mescontentoit grandement qu'en deux ou trois voyages qu'auoit fait vers eux ledit sieur Miron, il n'en auoit rapporté que des paroles generales & ambiguës, sur lesquelles on ne pouuoit asseoir aucun fondement.

LEDIT sieur Miron qui arriua à Paris deuant moy sçait & pourra tesmoigner, que ce fut la resolution que ieluy dis, que i'auois prise sur ma despêche, le priant de trouuer bon que ie la suiuisse, afin de ne rien precipiter, & faire parler les premiers ceux auxquels nous auions affaire.

CE qu'ayant fait entendre à la Royne Mere du Roy, à laquelle estoit ma principale adresse suiuant le commandement de ladite Maiesté, apresluy auoir à elle seule leu mon instruction, elle loüa grandement ma deliberation; & principalement pour ce qui concernoit ladite Lieutenancé generale, me disant qu'elle auoit descouuert & appris (& pense qu'elle me dit que ç'auoit esté du sieur de Schomberg, ou par

son moyen, que ledit Duc de Guise se contenteroit) que le Roy luy donnast vn pou-
voir general sur les armées en ce Royaume
conioinct & vny avec son estat de grand
maistre de France, en sa personne seulemēt,
& qu'elle en auoit desia aduertie la Maieité
par vne lettre qu'elle luy auoit enuoyée par
la Roche gentil-homme seruant de ladite
Dame, lequel elle me demanda si ie l'auois
rencontré par les chemins; & luy ayant dit
que non, pource que ie n'estois venu le che-
min des postes, elle me fit paroistre qu'elle
desiroit grandement receuoir au plustost la
response, & volonté de sadite maieité sur
ladite lettre.

DEVOY nous ne tardasmes gueres à re-
cevoir des nouuelles, car si tost que le Roy
eust veu l'aduis que ladite Dame luy don-
noit, il m'escriuit que ie n'eusse à proposer
ladite lieutenance generale, mais m'infor-
mer bien particulièrement de ce que ladite
Dame auoit appris, que ledit Duc de Guise
desiroit que lon luy accordast, afin del'en
esclaircir dauantage, me recommandant au
restel l'aduancement de la negociation qu'il
m'auoit commise.

VOILA comment il me prit bien d'auoir
teu le commandement qui m'auoit esté
fait, touchant ladite lieutenance generale,

Et comme ie ne fus iamais autheur ny inuenteur du pouuoir qui fut depuis donné audit Duc, lequel fut dressé, comme ie feray entendre cy apres.

LA feuë Royne mere du Roy, & ceux qui estoient avec elle, feirent tant que ces Princes commencerent à se laisser entendre de ce qu'ils desiroient, & en baillerent quelque chose par escrit, que i'eus charge de rempotter à sadite Maiesté, ce qui fut assez debattu par ladite Dame deuant que de l'accepter, afin d'en faire rabattre tousiours & moderer quelque chose, mais ce fut tousiours sans leur rien promettre de la part de sadicte Maiesté, qu'une tres-bonne volonté à la paix, d'autant que ladicte Dame fut conseillée de faire voir au Roy leurs demandes deuant que de l'engager aucunement, afin qu'en son conseil la Maiesté considerast, & resolut bien ce que son seruice requeroit qu'il en fut fait,

I'AY esté particulierement accusé de n'auoir conduit la pratique de la ville d'Orleans avec les sieurs d'Antragues & de Dunes, si chaudement & fidelement que ie deuois, de quoy ie rendray compte aussi par ce present memoire.

Et pour commencer il faut scauoir que le

sieur de Chemerault, qui a tousiours esté tres-bon seruiteur du Roy, & homme de bien, me dit vn iour estant encores à Paris, quelques sepmaines deuant que monsieur de Guise y arriuaist, qu'il estimoit qu'il y auoit moyen de gagner le sieur d'Antraques, & de Dunes, & les rendre aussi affectionnez au Roy, & à son seruice que nuls autres de ses subiects; ils estoient bien recherchez, & principalement ledict sieur de Dunes, qui pouuoit beaucoup enuers son frere : parce qu'il scauoit que l'un & l'autre auoient grande fiance en moy, qui leur auois aussi faict en toutes occasions, offices de vraye amitié, il estoit d'aduis que ie visse ledit sieur de Dunes, & que ie parlasse à luy se promettant que i'y gagnerois quelque chose pour le seruice du Roy; ie m'offris soudain à ce faire, & resolumes que ce seroit à Conflans, où il ameneroit ledit sieur de Dunes, comme il fit deux ou trois iours apres. Là ie luy fis ouuerture de se rallier du tout avec sa Maiesté, & y attirer son frere avec la ville d'Orleans, surquoy nous eusmes plusieurs propos qui conclurent en fin à faire quel'on rendist son frere content de deux choses, estimant, voire asseurant, qu'en ce faisant le Roy se l'acquerroit, tellement qu'il en pourroit du

tout disposer, & de tout ce qui dependoit de luy : l'une estoit que faire que l'on fit raison du langage que monsieur d'Espernon auoit tenu à son fis à Neuers, apres la déroute de l'armee protestante & l'autre que sa Maiesté luy donnast en chef le gouvernement d'Orleans, afin qu'il ne fust à l'aduenir subiet à monsieur le Chancelier avec lequel il disoit ne pouuoir plus compatir.

IE luy promis de faire entendre au Roy sa bonne volonté : en laquelle ie le confortay tant qu'il me fut possible, & de luy en faire responce bien tost par la voye dudit sieur de Chemerault. Quand ie parlay à sadite Maiesté, elle me dist que ledit sieur de Dunes luy auoit desia faict tenir semblables propos par le sieur de Longnac, & me commanda de luy faire sçauoir qu'elle auoit pris en tres bonne part, tout ce que ie luy auois dict, & qu'elle aduiferoit aux moyens de pouruoir aux deux points, desquels il m'auoit parlé que sadite Maiesté trouuoit assez difficile à accorder, pour ce que l'on auroit affaire audict Duc d'Espernon, & pour l'interest aussi de mondit sieur le Chancelier. Toutesfois i'eus charge de luy en donner bonne esperance, comme ie fis par ledict sieur de Chemerault, dequoy l'on me dit que ledit sieur de

Dunes aduertiroit son aîné.

Sur les entrefaittes suruint la iournée des Barricades, qui nous fit partir de Paris & nous retirer à Chartres, où biē tost apres que nous fusmes arriuez, ie ramenteus au Roy ceste pratique, & le sollicitay d'escrire vne lettre de sa main pour cēt effect audit sieur d'Antragues, considerant que si nous pouuions recouurer ladite ville d'Orleans par son moyen en la necessité où nous estions (car nous n'estions encore asseurez de la ville de Roüen) ce feroit vne retraicte tres-aduantageuse & propre pour sa Maïesté.

AYANT retiré ladite lettre ie l'enuoyay à vn de mes gens qui estoit à Orleans sous la couverture d'autres affaires, pour la presenter audit sieur d'Antragues, avec vne autre que ie luy escriuis à mesme fin, & luy fis donner esperance de le contenter sur les deux poincts susdits, s'il vouloit se resoudre de prendre le party de sa Maïesté, & la loger & receuoir dans ladite ville d'Orleans.

Au mesme temps vn autre qui ne scauoit rien de ceste pratique, proposa à sa Maïesté d'enuoyer deuers ledit sieur d'Antragues Desbarreaux habitant, & Thresorier de France en ladite ville pour le pratic-

quer par le moyen de sa femme, enuers laquelle il estimoit pouoir beaucoup pour vn tel effect: Et veritablement ladite Dame s'estoit tousiours monstree rres.affectionnee au party de sa Maiesté & à son seruice, & d'auoir grand regret de ce que son mary s'en estoit separé. Ledit Desbarreaux eut charge de luy offrir vne notable somme d'argent sans luy parler toutesfois de la charge de mondit sieur le Chancelier, auquel ceste depesche fut cōmuniquee comme elle fut à moy, qui dis audit sieur Desbarreaux, que ie craignois que son voyage ne mist les habitans dudit Orleans en défiance dudit sieur d'Antragues, parce que sa personne leur estoit tres-suspecte, luy remontrant que cela aduenant, il osteroit le moyen audit sieur d'Antragues de traicter, ce qui ne le peut retenir d'aller, parce qu'il se promettoit de couler dans ladite ville, & conferer avec le sieur d'Antragues, par le moyen de sadite femme, sans estre descouuert, & en tout cas quand il le seroit, que personne ne descouuriroit, ny ne sçauroit l'occasion de sa venuë.

SOVDAIN que ledit Desbarreaux eust veu ledit sieur d'Antragues, il m'en uoya par l'vn des siens vne lettre, laquelle il me prioit de rendre au porteur

d'icelle, apres l'auoir leuë, comme ie feis: par laquelle il se plaignoit estrangement du voyage dudit Des-barreaux, lequel il disoit auoir esté suscitë par ses ennemis expressement, pour luy faire perdre le credit en ladite ville, & le desespoir en quoy le confirmoient les propos qu'il luy auoit tenus, parce qu'il ne luy auoit parlé que d'argent, au lieu du gouuernement duquel ie luy auois desia donné esperance, & sans l'assurance duquel il ne vouloit ny pouuoit entendre à aucun accord : au demeurant qu'il auoit aduisé pour leuer de luy toutes sortes d'ombrage aux habitans de ladite ville, de leur permettre de changer les Magistrats d'icelle à l'exemple de ceux de Paris, esperant qu'il y en logeroit, qui seroient du tout à sa deuotion, & par le moyen desquels il pourroit tousiours mieux disposer de ladite ville.

Ayant receu ladite lettre i'en aduertis incontinent sadite Maiesté qui se repentit d'auoir enuoyé ledit Des-barreaux, & me commanda d'escire audit sieur d'Antraques qu'il ne s'arrestast à luy, mais qu'il aduisast par quel moyë l'on pourroit bien tost conclurre ce marché, au contentement de sa Maiesté, & au sien, & de luy renoueller l'esperance dudit gouuernement.

OVTRE cesteresponse que ie luy feis par l'homme qu'il m'auoit enuoyé, ie feis que le Roy commanda au sieur de Rhodes son cousin, qui s'éretornoit en sa maison pour aller donner ordre à son equippage, pour reuenir trouuer sa Maiesté, pour luy seruir comme il a tousiours faict, fort fidellement en toute occasion, de passer par ladite ville d'Orleans, sous pretexte de visiter sondict cousin, luy confirmer lesdites promesses, & nous esclaircir du chemin qu'il falloit tenir pour aduancer la resolution dudit traicté, qui importoit grandement au seruice de sa Maiesté.

DEVOY il fit tres bon deuoir, nous mandant qu'il auoit trouué ledit sieur d'Antraques en tres-bonne disposition: mais que pour bien faire & ne donner ialousie aux habitans dudit Orleans, auxquels le voyage dudit Des barreaux auoit apporté desia vn grand ombrage, falloit aussi adresser ceste negociation au sieur de Dunes qui estoit à Paris, lequel auoit tout pouuoir enuers son aisé.

LE mesme aduis & conseil nous fut donné par le sieur de Schomberg, & par le sieur de Chemerault qui estoient bons amis dudit sieur de Dunes, & auxquels il auoit decouvert la volonté qu'il auoit de traict er

ce qui fut cause que ie suppliay sa Maiesté d'enuoyer à Paris ledit sieur de Schomberg, sous couleur d'aller assister la Roynie sa Mere, mais expressement pour parler audit sieur de Dunes, ce que sa Maiesté trouua bon, & pareillement pour aduancer l'affaire, & pour conuertir ledit sieur de Dunes à ce faire, & sans perdre temps de luy bailler vne promesse par escrit, qu'il emporta signée de la main de sa Maiesté, & contresignée de la mienne, de pouruoir ledit sieur d'Antragues en chef dudit gouuernement, & ledit de Dunes de la lieutenance, & pareillement d'une compagnie de cinquante hommes d'armes; en s'obligeans par promesses signées de leurs mains, & cachetées du seel de leurs armes de se departir de toutes ligues, associations & pratiques qui seroient desagreables à sadite Maiesté, & la seruir à l'aduenir de leurs personnes, & pareillement de laditte ville d'Orleans, & de toutes celles dudit gouuernement enuers, & contre tous, sans nuls excepter ny reseruer.

LEDIT sieur de Schomberg s'en estant allé avec ceste promesse, ie fus d'aduies encore de le faire suiure par ledit sieur de Chémervault qui auoit tres-grande enuie, que ce marché reussit selon l'intention

de sa Maieſté, pour le bien & aduantage qu'il recognoiſſoit qu'elle en retireroit, afin d'y elchauffer tousiours dauantage ledit ſieur de Dunes.

LEQUEL fit reſponce audit ſieur de Schomberg, ainſi qu'il nous manda apres auoir veu par eſcrit l'intention de ſadiſte Maieſté, qu'il eſtoit beſoin qu'il en aduertit ſon aiſné deuât que de faire autre choſe.

SVR ces entrefaites ſa Maieſté ſ'achemina à Mante, & à Vernon, & aduint que leiour meſme que ie partys dudit Vernon, pour m'acheminer à Paris, pour la negociation de ladite paix, eſtant ia à cheual, monſieur Bruſſart m'enuoya par vn des ſiens vn paquet dudit ſieur de Schomberg, dedans lequel eſtoit la reſponce que ledit ſieur de Dunes luy auoit faiſte de la part de ſon dit frere, qui contenoit ce qui enſuit.

PREMIEREMENT vn remerciement de la faueur que ſa Maieſté leur vouloit faire, d'accorder en chef audit ſieur d'Antragues le gouuernement du Duché d'Orleâs, avec meſme puissance & authorité que ſa Maieſté l'auoit accordée à M. le Chancelier, ſans aucune moderation ou reſtriction.

ASSEVRANT ſadite Maieſté qu'en recognoiſſance de ceciẽ, il eſtoit preſt & reſolu de la recepuoir toutes & quantes fois qu'il luy

plairoit en ladite ville d'Orleans, & luy rendre tout honneur, seruice & obeyssance, qu'un tres-humble subiect doit à son Prince.

ITEM, de luy donner assurance par un sollemnel sermēt qu'il feroit entre les mains de sa Maiesté, de se departir dès à present, cōme pour l'aduenir de toutes ligues, pratiques, associātions, obligations, & intelligences qui luy seroient desagreables, auxquelles il renonçoit, tres-resolu de n'auoir iamais autre volonté, passion ou affection, que ce qui concerneroit le bien de son seruice, & l'accroissement & conuersation de son autorité, offrant de faire ses Pasques & receuoir le saint Sacrement, pour plus grande assurance de ce que dessus.

MAIS qu'il supplioit sa Maiesté de se contenter dudit serment, & de sa parole sans desirer ladite promesse par escrit, que sadite Maiesté luy auoit fait demander, par ce que semblable obligation escripte ne pouuoit apporter plus de seureté que la parole, & foy d'un homme d'honneur, & aussi qu'elle presupposoit quelque defiance.

IL supplia aussi sa Maiesté, à cause de la peur & du soupçon que quelques vns des habitans de ladite ville, auoient de sadite Maiesté, d'auoir agreable, & trouuer bon, que

que lors qu'elle entreroit en ladite ville, il luy pleust se contenter d'y entrer avec sa Cour & noblesse, sans autre force ou gens de guerre: protestant qu'il ne luy faisoit telle requeste pour luy prescrire son train, mais pour chasser, par ce tesmoignage de sa bonne volonté; & confiance des cœurs desdits habitans, la crainte & la peur qu'on leur auroit imprimée de l'indignation de sa Maiesté.

AYANT leu ladite réponse; estant à cheual, ie me resolus de n'arrester pour le faire entendre à sa Maiesté, pour ce que ie scauois qu'elle trouueroit mauuaises ces deux restrictions proposées par icelle; l'une touchant ceste promesse, que sa Maiesté auoit demandée; & l'autre de son entrée en laditte ville d'Orléans seulement avec sa Cour, & noblesse, pour la deffiance que sa Maiesté auoit dudict sieur d'Antragues; à cause des choses passées; ioinct que i'auois prins congé de sa Maiesté, laquelle m'auoit commandé de monter à cheual; & partir sans voir personne: ie me resolus de porter à Paris ceste réponse pour en conferer moy mesme avec le sieur de Dunes, & voir si ie pourrois faire changer lesdites restrictions;

SVIVANT quoy ie ne faillis à veoir ledit sieur de Dunes sur ce subiect, duquel i'ap-
prins encore vne autre difficulté, que ie
n'auois comprise par ladite responce, qui e-
stoit, que sondit frere entendoit estre pour-
ueu non seulement dudit gouuernement
en chef du Duché d'Orleans, comme il
sembloit qu'il ne pretendist autre chose par
ladite responce, mais aussi du pays Char-
train, de Blois, Amboyse & Loudunois,
tout ainsi & en la forme que mondit sieur
le Chancelier estoit pourueu dudit gou-
uernement, dequoy ie fus fort estonné,
& marry, parce qu'il n'auoit iamais faict
autre instance que destre deschargé de
l'autorité & puissance que mondit sieur
le Chancelier auoit sur eux, & que les-
dits pays Chartrain, Blerois & Loudunois
estoient séparés du Duché d'Orleans; ie
luy parlay aussi des deux autres poincts,
mais ie ne peus rien conclurre avec luy, me
disant que son aîné auoit tousiours creu
que les choses passeroient comme il les
expliquoit, & qu'il ne bailleroit pas vo-
lontiers ladite promesse par escrit, ny
d'introduire le Roy dedans ladite ville,
pour la premiere fois, avec sa garde de gens
de pied, mais qu'il feroit que sondit frere se
trouuerait à Paris quand ie reuiendrois,

avec laquelle pourrois resoudre, & que de son costé il faciliteroit les choses. Voila donc à mon grand regret tout ce que ie peus faire avec ledit sieur de Dunes en ce premier voyage, pour le regard de ladite ville d'Orleans.

ESTANT retourné vers le Roy, que ie trouuay en la ville de Roüen, ie suppliy la Maiesté auoir agreable que ie luy rendisse compte de tout ce que i'auois fait, negotié & rapporté, en la presence de tous ceux de son Conseil, tout ainsi que ce qui estoit passé à Paris, auoit esté traicté en la presence de la Roynes mere, de la Roynes & de tous ceux qui estoient aupres de leurs majestez, pour l'importance de la matiere, & pour ma descharge, ce que la Maiesté m'accorda.

DE sorte que fis rapport à sadite Maiesté en plein conseil, de tout ce qui s'estoit traicté, leur representant par escrit les demandes desdits Princes, & de leurs adherans, ensemble ce que nous leur auions respondu & remonstré sur icelles en les receuant: la M. fit escrire son intention sur chacun article d'icelles audit conseil par M. Brulart, ce qui me seruit d'instruction au second voyage qu'elle me commanda de faire pour poursuiure ladite negotiation.

SEULEMENT ie rendis compte à part à sadite Maiesté, dece que i'auois appris du pouuoir que la Royne sa mere luy auoit escrit, que l'on demandoit qu'elle donnast à monsieur de Guise sur les armées de ce Royaume, conioinct à son estat de grand Maistre, que l'on presuposoit deuoir estre accordé avec les mesmes fonctions & authoritez d'un Lieutenant general, ou Connestable de France, desquelles charges sadite Maiesté me commanda de luy représenter les prouisions, & pouuoirs ordinaires, pour en mieux iuger & ordonner, afin de n'en faire legerement : & parce qu'au moyen de nostre deslogement de Paris en haste, ie ne m'estois chargé de mes registres ordinaires, où estoient lesdits pouuoirs, sa Maiesté me commanda de les luy apporter quand ie reuiendrois, & cependant dire à la Royne sa mere, pour aduancer tousiours ceste negociation, de laquelle l'on disoit sous main, que l'on ne tireroit iamais le bon mot de monsieur de Guise, qu'il ne sceust ce que le Roy luy resoudroit, de faire pour son particulier, que sa Maiesté estoit fort contente de faire despescher audit Duc de Guise, vne declaration, portant pouuoir affecté à la personne de commander comme grand Maistre sur

les armées; dont on enuoyeroit puis apres la forme, sans s'expliquer dauantage: voila ce qui me fut baillé & ordonné par sa Maiesté pour instruction particuliere & secrete sur ce faict, dont ie rendis compte à ladite Dame Roynne mere du Roy à mon arriuee à Paris.

LE Roy ayant aussi entendu à part par moy les difficultez que m'auoit faictes ledit sieur de Dunes, au moyen de son frere pour le faict d'Orleans, l'estrouua mauuaises & mal fondees; toutesfois me permit pour les surmonter de leur offrir, & accorder de sa part, & en pur don vingt mil escus, outre & par dessus ce qu'il leur auoit desia faict offrir.

EN ce deuxiesme voyage ie suiuis le mesme ordre que i'auois tenu au premier, toutes choses furent traitees, & debattuës en plein conseil, & par escrit, pour le regard du general dont les particularitez seroient trop longues à representer: mesme ie suppliy la Roynne mere du Roy, d'y appeller Messieurs les Presidens de la Cour, qui s'y trouuerent vne fois: mais ceux ausquels nous auions à faire le trouuerent mauuais, de sorte que ladite Roynne mere fut conseillée de ne les y appeller plus.

LADITE Dame fut d'aduis de n'enga-

ger point le Roy de promesse pour le regard dudit pouuoir de monsieur de Guise, mais seulement luy dire, que le Roy l'approcheroit de sa personne, & se seruiroit de luy dignement, estant la paix faicte, ce qui fut suiuy.

LEDIT sieur d'Antragues se trouua à Paris, où il se comportoit de telle façon avec Monsieur le Duc de Guise, que luy & les siens en auoient tres-grande défiance : ie parlay à luy, pour luy faire entendre l'intention & les raisons du Roy, sur les demandes & difficultez qu'il auoit faictes; d'auantage ie luy fis offre pour luy & son dit frere, desdits vingt mille escus : mais ie le trouuay si resolu, & difficile à se contenter, que ie me departy d'avec luy tres mal edifié, & m'en plaignis au sieur de Chermersault son cousin, qui estoit Lieutenant de sa compagnie des gens-d'armes, & depuis au sieur de Schoimberg, & de Dunes, & ce qui m'en faschoit, & mettoit encores plus en peine, estoit que ie voyois monsieur de Guise resolu de demander ladite ville d'Orleans pour ville de seureté, & de ne faire la paix si elle ne luy estoit accordée, par où la pratique que i'auois avec ledit sieur d'Antragues, & tous les moyens de seruir le Roy, s'en alloient en fumée; tou-

resfois ie fus cōtrainct de partir de Paris sans rien conclure avec ledit sieur d'Antragues.

IE retournay vers le Roy, luy rendre cōte de ce que i'auois negocié en second voyage, dequoy ie m'acquittay ainsi que i'auois faict la premiere fois, où toutes choses furent debattuës, représentées, considérées, ordōnées & recueillies par escrit par le sieur Bruslart; entre autres choses ie fis entendre l'instance qu'on faisoit d'auoir Orleans pour ville de seureté, avec Bourges, & fut resolu & à moy baillé par escrit, qu'elles leur seroient accordées, si on ne les en pouuoit faire departir: les instructions qui me furent données, font foy de ce que dessus.

IE receu à mon arriuée à Roüen vne lettre dudit sieur d'Antragues, par laquelle il me manda, qu'ayant depuis mon partemēt mieux pesé ce que ie luy auois dit & remonstré de la part du Roy, il s'estoit resolu à cōdescendre à faire tout ce que ie luy auois dir, que sa Maiesté vouloit de luy, & me prioit de mettre fin à ces affaires que i'auois si bien acheminées, s'en fiant, & reposant du tout sur moy, qu'il recognoistoit aymer plus son bien que luy mesme. Ce qu'il accordoit donc estoit, d'accepter le gouuernement en chef du Duché d'Orleāns, la lieu-

tenance pour son frere, & vne compagnie de 50. hommes d'armes, & les vingt mil escus, & de bailler par escrit la promesse que le Roy auoit demandée: ce que ie feis entendre à sa Maiesté, deuant qu'elle eust resolu ma depesche, pour sçauoir si à l'occasion du traicté dudit sieur d'Antragues, il aduenoit que nous ne peussions faire departir ceux de la ligue de la demande qu'ils faisoient d'auoir Orleans pour ville de seureté; nous romprions le traicté general de la paix, ce qu'elle me dit qu'elle n'entendoit pas.

IE feis voir aussi à sa Maiesté vn pouuoir de Connestable de France, & vn autre du Lieutenant general, representant la personne du Roy, par tout le Royaume: de ces deux pouuoirs, sa Maiesté me commanda de tirer ce dont fut composé celui qui fut baillé audit sieur Duc de Guise, que sa Maiesté auoit faict lire, ou leu elle mesme, & corrigé par trois fois, comme il appert par la minute que i'ay reseruée: puis l'ayāt mis au net, il le signa, & avec tout cela me renuoya à Paris pour la troisieme fois.

Ov ie metrouuay plus empesché que iamais, pour les difficultez nouuelles qui nous estoient faictes; sur tout ie le fus pour le faict d'Orleans, car plus i'en voulois

esloigner & destourner Monsieur de Guise, plus s'y opiniastroit-il : ie proposay qu'elle donneroit aux sieurs d'Antragues, & de la Chastre, la suruiuance de leurs gouuernemens pour leurs enfans, & que l'on ne rendist point pour villes de seureté celles d'Orleans & Bourges, qui estoient sieges d'Archeuesché, & d'Euesché, & que c'estoit chose qui n'auoit point encores esté faicte, & combien que telles ouuertes fussent plus aduantageuses, & pour le particulier desdits sieurs de la Chastre & d'Antragues, & mesmes pour ceux de la ligue, toutesfois ils n'y voulurent entendre. Sur cela ie feis dire audit sieur de Dunes, que son frere & luy deuoient faire parler les habitans d'Orleans, & leur faire dire que ladite ville leur fut baillée pour ville de seureté : Mais ie trouuay qu'ils auoient faute de credit enuers eux, pour leur faire faire ledit office: ie dis doncques alors qu'il falloit que ledict sieur d'Antragues feist les mesmes protestations, & obtint que ceux de la ligue se departissent de leur demandes, puis que pour mes raisons ils n'en vouloient rien faire, & que nous estions accrochez à ce poinct : lesdits sieurs d'Antragues, & de Dunes ne furent d'aduis non plus de faire ladite protestation, de sorte

que tous moyens & inuentiōs pour gagner ce point me manquerent, ledit sieur de Schomberg sçait ce que ie luy en dis, & cōmençant à dresser l'article, que faisoit mention de l'octroy desdites villes, ie m'aduifay de le coucher de telle façon, que quelque iour il pourroit seruir de fondement d'y changer quelque chose.

Av troisieme voyage nous demeurasmes d'accord de toutes choses avec ceux de la ligue pour ladite paix, & mesmes du faict du Haure de Grace, qui auoit esté demandé de surcroist pour eux, depuis le traicté le gouuerneur d'icelle s'estant ietté au party quelques iours deuant; de sorte que les articles de ladite paix, furent signez de part & d'autre, lesquels ie fus porter à sa Maiesté qui les confirma & ratifia aussitost, apres les auoir fait lire en son Conseil.

IE dis aussi à sa Maiesté comme la Royne sa mere, & moy avec elle auions leu à Monsieur le Duc de Guise, apres l'accord & signature desdites articles, la minutte du pouoir que sa Maiesté auoit aduisé de luy accorder, lequel m'auoit donné charge d'en remercier sa Maiesté, & neantmoins le supplier d'auoir agreable, qu'il ne l'acceptast point, ains seulement qu'il le seruist de son estat de grand Maistre, duquel il se sen-

roit fort honoré, & ne luy demandant pour son particulier que l'assurance de sa bonne grace, puis qu'il auoit pourueu au public, ainsi que luy deuoient plus particulièrement faire entendre, Messieurs l'Archeuesque de Lyon, & de la Chastre, qui deuoient le lendemain arriuer vers sadite Maieité, laquelle me respondit resolutement, qu'elle vouloit que ledit sieur de Guise print ledit pouuoir, ce qu'elle confirma encores ausdits sieurs, & escriuit vne lettre de sa main tres-presse audit sieur de Guise, de laquelle furent porteurs lesdits sieurs Archeuesque de Lyon, & de la Chastre; & neantmoins lesdites lettres de pouuoir & declaration ne furent mises au net, signées, scelées, ny deliurées audit sieur de Guise, que iusques à leur entreueüe à Chartres que quelques vns en auoient degousté sa Maieité, & luy auoient faict trouuer mauuaise l'autorité qu'elle auoit accordée par icelle audit sieur de Guise; les vns par ialousie qu'ils luy portoient, les autres parce que c'estoit chose qui diminuoit aucunement l'autorité & puissance de leurs Estats, & la plus grande partie, parce qu'ils cognoissoient que sa Maieité ne pouuoit oublier le mal talent qu'il portoit audit Duc pour luy complaire, l'animer & irri-

ter dauantage contre luy.

De façon que sa Maieſté mit vn iour en deliberation de retrancher ledit pouuoir, deuant que dele deliurer, dequoy elle fut desconſeillée, par ceux auſquels elle en parla; qui luy remonſtrèrent, que puis que c'eſtoit choſe qu'elle auoit deſia accordée audit Duc pour vn bien de la paix, que la coppie luy en auoit deſia eſtée leuë & baillee, elle n'en pouuoit rien oſter ſans faire tort audit Duc, & à la foy donnée pour la dite paix, qui auoit trop couſté à faire, & dont l'oſſeruation importoit grandement à ſes affaires, ioint que ledit Duc qui ſçauoit les trauerſes qu'on luy donneroit en ce faiſt, ſe laiſſoit deſia dire n'auoir peu faire que à l'appetit de tels enuieux, on ne luy fiſt receuoir telle eſcorne: ſurquoy ſa Maieſté ſe reſolut, & commanda ledit pouuoir eſtre deliuré audit Duc de Guiſe, comme il fut fait, mais on a dit depuis qu'elle fit ce commandement avec tel regret, qu'elle reſolut deſlors de chaſſer d'aupres d'elle, ceux qui luy auoient donné tel conſeil, & ne l'auoient ſecondée en la volonté qu'elle auoit de le retrancher.

IL faut noter encores de ce traicté, que iaçoit que les principales & plus aigres plaintes que ceux de la ligue auoient faiſt

de leurs mescontentemens, & auxquels ils requeroient plus viuement estre pourueu; eussent esté fondez sur la personne, l'autorité, & les charges dudit Duc d'Espéron, cōme il appert par leurs escrits: toutesfois d'autant que sa Maiesté me l'auoit ainsi re-commandé, & enioint tres-expressément, ie fis tant, qu'en tout ce qui fut mis par escrit, il n'en fut fait aucune mention, mais que l'on se contenta de remettre à sa Maiesté d'y pouruoir elle mesme, comme elle leur auoit fait dire, & promettre qu'elle feroit; dequoy certes il faut que ie die, que ie trouuois ledit sieur de Guise plus favorable & moderé que nul autre, non pour en auoir occasion, que pource que ie luy auois remonstré qu'il feroit en ce faisant, seruice tres-agreable au Roy.

Les Deputez de ladite paix, tesmoigneront, assez le deuoir que ie fis, & le soin que i'en eus, pour l'honneur & l'obeyssance que ie portois à tous les commandemens de sa Maiesté, & pour le desir que i'auois aussi d'esteindre toutes les estincelles, qui pouoient seruir avec le temps à rallumer le feu de discorde entre ses subiects & seruiteurs Catholiques, pour la consideration seule de l'honneur de Dieu & du

seruice de sa Maiesté, dont dependoit le bien du Royaume,

Et toutesfois ie fus souuent aduertý durant la negociation de la paix, & depuis la conclusion d'icelle, que ledit Duc estoit tres-mal content, & iusques-là qu'il escriuit à quelqu'un de ses amis en Cour, qu'il m'en feroit repentir & perdre la vie; dequoy ie ne m'emús gueres, par ce que ie scauois bien qu'il n'auoit occasion quelconque de se prendre à moy, de ce qui s'estoit passé, ny de la defiance de son Maistre, qui estoit ce qui l'irritoit le plus, d'autant que ie n'auois esté que Ministre de sa Maiesté, à tres-bonne fin & intention, & mesme que i'auois eu tel soin de sa reputation, qu'il n'auoit esté rien escrit contre luy, & aussi que ie me confiois que i'auois pour bon tesmoin & protecteur de mon innocence sa Maiesté, qui scauoit comme toutes choses auoient passé.

Le Roy estant à Vernon, par où il passa reuenant de Roüen à Mante où se deuoient trouuer les Roynes, m'enuoya querir exprés, pour se plaindre d'un aduis qui luy auoit esté donné, que ledit Duc d'Espernon se vouloit aller ietter dedans la ville d'Angoulesme pour s'en saisir, & me com.

manda d'escrire des lettres en son nom au sieur de Tayan, aux habitans de la ville, au Lieutenant general d'icelle, & au Capitaine de la Citadelle, de ne recevoir personne en ladite ville qui leur peust donner loy, de quelque qualité qu'il fust, iusques à ce qu'il leur apparust d'un commandement de luy postérieur ausdites lettres, que sa Maiesté au deffaut d'un valet de chambre, commanda d'enuoyer par courier exprés, comme ie fis incontinent & fidèlement, ainsi que i'auois accoustumé, les commandemens de sa Maiesté.

Le courrier arriua à Angoulesme trois iours apres que ledit Duc y eust esté secueu, auquel les lettres du Roy furent portées, dont il s'irrita & s'offensa grandement, & s'en print à moy, disant que i'auois esté auteur desdites lettres, & en fit vne tres-grande plainte à sa Maiesté, qui luy manda les auoir commandées, & les raisons qui l'auoient meu à ce faire. Lesdites lettres ayant esté veuës du Maire & des habitans d'icelle ville, furent cause qu'ils depescherent bien-tost apres l'un de leurs citoyens beau frere dudit Maire en Cour, lequeleut charge de s'adresser à moy : parce que ladite ville d'Angoulesme, estoit de mon département, que les lettres dernières que le

Roy leur auoit escrites estoient contresignées de moy, aussi qu'ils auoient quelque creance en moy pour m'auoir tousiours reconnu tres-affectionné à leur bien, & au seruice de sa Maiesté, il se presenta comme nous estions à Chartres, & me dit que lesdits Maire & Escheuins ayans veu lesdites lettres de sa Maiesté estoient entrez en doute si c'estoit son intention, ou non, que ledit Duc d'Espernon fist sa residence en leur ville, en laquelle ils protestoient qu'ils ne l'eussent iamais receu, s'ils n'eussent pensé faire seruice à sa Maiesté, comme ledit Duc leur auoit fait apparoir par vn pouuoir que sa Maiesté luy auoit donné de commander en leur ville & au pays, & qu'il auoit esté despesché expres par eux pour en estre esclaircis, & autant que si sa Maiesté ne trouuoit bon ce qu'ils en auoient faict, ils pourroient encore reparer leur faute en fermant la porte de leur ville vn matin, qu'il seroit fortly dehors pour aller courre labague, comme il faisoit souuent, laissant la garde des portes ausdicts habitans, qui estoient beaucoup plus forts dans la ville, que n'estoit ledit Duc avec tous ses gens, & qu'ils pouuoient aussi pour mieux asseurer & executer ladite entreprise, se saisir de la personne du Capitaine de la Citadelle, sinon la

non la

non la circuir, & enuironner par dehors par vn bon nombre de Gentils-hommes du pays qui estoient à leur deuotion, afin de garder que le secours n'y entraist, pendant qu'ils forceroient ladicte citadelle par le dedans de la ville; comme ils disoient pouuoir faire facilement: Ayant entendu ce propos, ie luy demanday qui il estoit, & s'il auoit quelques lettres; & m'ayant donné cognoissance de sa personne par le moyen du courier qui auoit porté à Angoulesme les susdites lettres de sa Maiesté; & sur ce, dit qu'il ne s'estoit oïé charger d'aucunes lettres, de peur d'estre prins en chemin: Ie luy dis que l'ouuerture qu'il m'auoit faite de l'occasion de son voyage, estoit de telle importâce, qu'il estoit nécessaire que i'en parlasse au Roy auant qu'il d'y respondre, & partant qu'il eust à me venir trouuer le lendemain de bon matin.

Ie fus le soir mesme trouuer sa Maiesté tant pour la remercier de ce que la Roynne sa mere m'auoit dit qu'elle luy auoit accordé, & promis de me descharger de l'exercice de mon office de Secretaire des commandemens, suiuant la supplication que ie luy en auois faite; ainsi que ie diray cy-apres, avec tout ce qui s'est passé en ce fait; que pour luy faire entendre les propos que

m'auoit tenu ledit habitant d'Angoulesme, lequel sa M. fit demonstratiō d'escouter volontiers pour le mescontentement qu'elle auoit, de ce que ledit Duc estoit allé en ladite ville, ainsi que sa Maiesté disoit, contre son cōmandement, se promettant d'en auoir sa raison, par lesdits habitàs: Et en ce faisant, faire paroistre & sentir audit Duc & à tous autres, cōbien vn Roy a les bras lōgs, & est foible toute autre puissance en son Royaume sans la sienne, me disant qu'il vouloit parler luy-mesme audit habitāt, sans que personne en sceust rien; Dont il me chargea expressement, & à ceste fin le luy amener le lendemain de bon matin comme ie fis.

Et l'ayant introduit dās le cabinet de sa M. où il n'y auoit personne que moy, il luy rapporta & confirma les mesmes propos qu'il m'auoit tenus de la part desdits Maires & habitans, desquels sa Maiesté luy declara estre fort cōtente, & leur sçauoir tres bon gré, luy disant qu'elle les auoit tousiours recogneus tres-gens de biē, aymās Dieu, & sō seruice, & qu'elle loüoit la resolution qu'ils auoiēt prise d'enuoyer deuers elle pour estre esclaircie de la verité sur l'entrée & demeure dudit Duc en ladite ville: laquelle sa Maiesté vouloit qu'ils sceussent luy auoir esté desagréable, comme ayant esté entreprise par

ledit Duc contre son commandement, & en faison qu'il auoit eu occasion de se defier de luy & de ses actions; parce qu'il monstroist estre par trop indigné, de ce que sa maiesté auoit fait la paix: par laquelle elle auoit accordé qu'il se despoüilleroit d'une bonne partie de ses charges, & specialemēt des gouuernemens qu'il auoit, & qu'il sembloit que Dieu auoit conduit expressement ledit Duc en ladite ville, & auoit enuoyé à sadite maiesté ceste occasion, pour luy donner moyen de pouruoir à ce coup, puis que ledit Maire & habitans auoient le moyen & la volonté d'executer ce qu'elle leur commanderait: Mais que ce n'estoit assez faire pour son seruice que de chasser & faire sortir ledit Duc d'Espernon de ladite ville, comme il luy auoit proposé, qu'il falloit que lesdits Maire & habitans ses bons subiects & seruiteurs se faussent de luy sans toutesfois faire mal à sa personne, afin que le tenant en sa disposition, il peust recouurer les villes de Mets & de Boulogne, qu'il ne vouloit rendre, & le faire contenter du gouuernement de Prouence, qu'il auoit aduisé de luy laisser. Quoy faisant lesdits Maire & habitans luy feroient ensemble à la religion Catholique & à tout son Royaume, vn seruice tres-signalé,

que sa Maïesté reconnoistroit à iamais, luy demandant si lesdits habitans n'auroient pas le courage & le pouuoir de luy faire ce seruice, qu'il auoit tres à cœur, & qui leur importoit aussi grandement ; parce que si ledit Duc demeueroit long-temps en leur ville , tout ainsi qu'il s'entendoit avec le Roy de Nauarre & les huguenots, il estoit à craindre qu'il ne les mist avec le tēps entre leurs mains, qui estoient leurs ennemis. A quoy il luy fut respondu par ledit habitant, que lesdits Maire & ses concitoyens auoient tousiours eu le courage de mourir pour executer ses commandemens, lesquels il leur rapporteroit tres-fidèlement, & que sa maïesté en oïroit bien tost parler. Et comme il auoit esté enuoyé sans apporter aucune lettre, il fut aussi renuoyé sans en reporter, & print congé de sa maïesté en ceste façon, laquelle luy commanda de desloger à l'heure mesme, afin de n'estre descouuert.

TOUTESFOIS ledit habitant me vint encore trouuer en mon logis, pour me dire, que depuis estre party d'aupres du Roy, il auoit mieux examiné & considéré le commandement que sa maïesté luy auoit cōmis, lequel il craignoit ne pouuoir estre executé sans coup ferir, d'autant qu'il esti-

moit que ledit Duc se mettroit en defence, quand on le voudroit prendre. Quoy aduenant, il desireroit volontiers sçauoir ce qu'ils auroient à faire contre ledit Duc. A quoy ie luy respōdis; que c'estoit chose qu'il deuoit auoir demandée luy mesme à sa maiesté, quand elle luy auoit faict ledit commandement. Mais ce que ie luy pouuois dire sur ce, estoit que le Roy luy auoit expressément commandé ne faire aucun mal à la personne dudit Duc: de sorte que i'estimois, quād à moy, que s'ils ne s'en pouuoient saisir sans crainte d'estre offencez, ou de l'offencer, qu'il seroit plus à propos qu'ils se contentassent de luy fermer la porte de la ville, lors qu'il en seroit hors, comme il auoit proposé qu'ils pouuoient facilement & sans danger de personne, ny de leur ville, qui estoit tout ce que ie luy pouuois dire sur la difficulté qu'il m'auoit proposée; & que s'il en vouloit de rechef parler au Roy, pour en estre mieux esclairey & asseuré, que i'en aduertirois la Maiesté: Surquoy m'ayant dit qu'il craignoit que son seiour le fist descouvrir, il se resolut de s'en aller.

V O Y L A la verité de tout ce que i'ay sceu & a passé par mes mains touchant ce faict, & fais iuges mes amis & tout le monde, si ie m'y pouuois conduire autrement,

s'estant ledit habitant adressé à moy, comme il auoit fait.

IE ne veux point parler de ce qui est aduenue de ladite entreprise, des propos qui ont esté tenus sur le suiet d'icelle : mais ie veux bien croire & ose dire avec verité, que ledit Duc d'Espernon a depuis suffisamment recogneu par diuers effects & tesmoignages, que la mal veillance que le Roy luy portoit, ne procedoit de moy, ny de mon inuention & persuation, dont aussi i'appelle Dieu à tesmoin. Veritablement i'ay souuent blasmé plusieurs choses que ledit Duc faisoit quand il estoit aupres du Roy, & ne les ay teues à luy mesme : Et pleust à Dieu qu'il eust voulu croire Monsieur de Bellièvre & moy ; ie suis asseuré que le Roy, le Royaume, & luy-mesme s'en fussent beaucoup mieux trouuez qu'ils n'ont fait, & ne feront de ce qui est aduenue ; mais les flatteurs, qui sont les vrayes pestes & ennemis des Roys, & des grands, l'ont tousiours emporté par dessus les gens de bien ; tant est forte & puissante l'industrie conioincte à la nature.

ESTANT à Chartres, ie receus encores vne lettre dudit sieur de Dunes par les mains du sieur de Schomberg du 27. iour de Iuliet, par laquelle il me mandoit m'enuoyer

la promesse susdite de son aîné, & de luy, que ie leur auois demandee de la part du Roy, & ne l'auoit peu recouurer que depuis deux iours. Et afin quel'on sçache qu'il n'estoit point si mal content de ce que i'auois faict & poursuiuy pour son frere & pour luy en ceste occasion, commel'on m'a voulu depuis faire croire, qu'il l'auoit publié, i'ay bien voulu icy transcrire la mesme lettre dudit sieur de Dunes, pour me seruir de descharge où besoin sera, & à luy de responce s'il s'est plaint de moy.

*S'ENSVIT DONC LA TENEVRE
de ladite lettre.*

MONSIEVR, mon beau pere s'en retournant trouuer le Roy, ie l'ay supplié de se charger de la promesse que vous auez desiré de mon frere d'Antragues, laquelle i'ay depuis deux iours recouuerte, & la vousrepresente avec ceste lettre, que vous receurez, s'il vous plaist, pour me ramenteuoir en vostre bõne grace, & vous asseurer de la fidelle volonté que i'ay de vous faire seruice, & non pour vous importuner & presser de l'effect que vous nous auez à tous deux procuré; vous priât très-humblement de croire, que si tous les bons offices

qu'avez departis à beaucoup de personnes de toutes qualitez, auoient rencontré des ames aussi peu ingrates, que le seront pour iamais enuers vous celles de deux freres, que ie ne sçache Seigneur en France, qui ait plus acquis d'amis & de seruiteurs, ny qui en eust de plus affectionnez que vous monsieur à qui i'espere pour mon particulier, faire cognoistre que l'obligation que ie vous ay iointe à l'ancienne inclination & deuotion que i'ay eüe toute ma vie à vous faire seruice, vous a acquis sur moy toute l'autorité & commandement que vous scauriez desirer ? dequoy ie me promets que Dieu me fera la grace quelque iour de vous en rendre tesmoignage. Je n'ay mis que le mois en ladite promesse, ayant laissé le iour en blanc, afin que comme vous le trouuez le plus à propos, vous commâdiez qu'elle soit remplie, ayant faict entendre sur ce suiet l'opinion de mondit frere, à monsieur de Schomberg, laquelle il vous descourira, voulant finir apres vous auoir tres-humblement baïsé les mains pour prier Dieu.

Monsieur qu'il vous donne en santé tres-heureuse & longue vie. De Paris ce 27. Iuliet 1588.

PAR ceste lettre escrite apres la conclusion & publication de la paix, apportee par

ledit sieur de Schomberg qui auoit assisté ladite negociation, & auoit veu & sceu tout ce que i'auois traicté avec ledit sieur d'Antragues & son frere, chacun peut iuger s'ils estoient mal satisfaits de la peine que i'auois prinse pour eux, ou non. A la verité aussi s'il y a eu faute en ce fait, elle a plus procedé de l'irresolution dudit sieur d'Antragues, & de la deffiance que ses actions passees luy faisoient auoir de la volonté du Roy en son endroit, & particulierement du peu de pouuoir, & peu de credit qu'il auoit dans la ville d'Orleans, que d'autre chose.

LEDIT sieur de Dunes arriua en ladite ville de Chartres, bien-tost apres que ladite lettre m'eust esté baillee par ledit sieur de Schomberg, accompagnant encore feu M. de Guise, & me vint parler: & me le fist aussi commander par le Roy, de parler à monsieur le Chancelier, pour auoir sa procuration du gouuernement du Duché d'Orleans, en faueur de son frere, & la luy faire remettre entre les mains du Roy, afin que sondit frere en peut estre pourueu. Veritablement ie luy dis, qu'il me sembloit pour le seruicé du Roy, & le bien particulier de son frere, & le sien; qu'il ne deuoit encores poursuiure ladite prouision, parce que j'estimois que ceux de la ligue s'y oppose-

roient: d'autant que ladite ville leur auoit esté delaissee pour leur seureté, quoy faisant le Roy seroit contrainct passer par dessus leurs oppositions, ou bien y acquiescer, & que de l'un & l'autre party qu'il choisiroit, il pourroit plus aduenir de mal que de bien: parce qu'ils diroient, que sa Maiesté commenceroit desia de contreuenir à la paix si elle gratifioit ledit sieur d'Antraques dudit gouuernement malgré eux: estant ainsi que la condition d'une ville de seureté, tiroit apres yne consequence, que ceux qui y commandoient fussent agreables & confidens à ceux auxquels elle auoit esté delaissee & accordée par cet effect, dequoy sa Maiesté se pourroit trouuer en peine, n'estant à propos ny vtile, si fraichement apres estre sorty d'un mal, tel qu'estoit celuy où nous auions esté, que nous entreprissions de faire chose qui nous y plongeast, incertains du bien qui en succederoit: que s'il aduenoit aussi que sa Maiesté pour le bien general de ses affaires, fust contraincte de ne faire expedier ledit gouuernement audit sieur d'Antraques, & à luy la lieutenance, que les dommages & la honte en tomberoient principalement sur eux, lesquels se seroient descouverts tres-mal à propos pour eux, & le seruice du Roy,

luy remonstrant pour conclusion qu'il ne deuoit encore à mon aduis faire ladite poursuite, en luy offrant & à son dit frere la continuation de mon seruice & assistance, lors que ie verrois qu'il seroit à propos de remuer ceste pierre pour le seruice du Roy, & leur contentement. Je m'apperceus que ledict sieur de Dunes n'auoit si bien pris le propos, comme certainement ie luy disois de cœur & d'affection que ie luy portois, & à toute sa maison : & parce que ie partis de la Cour deux iours apres, pour venir en ma maison, ie ne puis respondre de ce qui s'est passé depuis, pour ce regard, n'ayant eu cognoissance ny communication quelconque d'un certain breuet, qui s'est trouué expedie dudit faict, & fais vn chacun iuge, si i'ay deu estre blasme de la façon, de laquelle ie me suis conduit en cest affaire : & si lesdicts sieurs d'Antragues & de Dunes ont esté bien fondez de s'en plaindre, i'ay dequoy prouuer & verifier tout ce que i'en ay cy deuant dit : l'on peut iuger aussi par l'issuë qu'aeu la precipitation desdicts sieurs d'Antragues & de Dunes en la poursuite dudit gouuernement, si i'auois raison ou non, de les en diuertir, tant pour le seruice du Roy, que pour leur propre bien.

Il y auoit quelque temps, que ie desirois me faire descharger, sinon du tout, au moins en partie du labeur & du trauail ordinaire de la charge que i'exerçois, tant pource que ma santé n'estoit si bonne & assurée depuis auoir eu la fieure quarte, qu'elle estoit denant, que pource qu'il me sembloit qu'à cause de la multitude & diuerses sortes d'affaires, dont i'estois surchargé, sa Maiesté n'estoit si bien & diligemment seruie en toutes choses que ie desirois, son seruice & le bien de ses affaires m'ayant tousiours esté recommandé plus que toute autre chose. Et faut que ie confesse que ce mien desir se fortifia & augmenta grandement, deslors que ie vis qu'il auoit esté permis audit Duc d'Espernon de m'outrager en la presence du Roy, sans raison ny fondement, ayant esté toute ma vie, aimé & protégé de mes maistres en les seruant fidèlement, & ce qui m'auoit encores plus piqué, c'estoit que ledit Duc m'auoit accusé & reproché en la presence de sadite Maiesté, que i'auois faict, & faisois en ses affaires tout ce que ie voulois, sans que sa Maiesté sceust rien de tout ce qui se passoit, dont elle auoit faict si peu de conte de me faire raison; que par là ie iugeay, ou que sa Maiesté le croyoit ainsi, ou qu'elle estimoit

fort peu la reputation & l'honneur d'un homme de bien, qui estoit ce qui m'estoit le plus cher, & me faisoit bien souuent quitter le manger, le boire & le dormir pour la bien seruir.

IE m'estois quelquesfois descouvert de ce mien desir à aucuns de mes principaux amis & parens, pour y estre fortifié de leur consenteinēt & assistance, mais ils m'en diuertissoient tousiours plustost qu'ils ne m'y confortoiēt tous, pour l'affection qu'ils me portoient, n'estimāt pas que ce fust mō bien de me retirer si tost de la Cour, quelques vns pour leur interest, & les autres, parce qu'ils me faisoient cēt honneur de croire que i'estois encore vtile en ma charge pour le seruice du Roy : Toutesfois plus i'allois en auant, & considerois des choses qui se passoient, en ce Royaume & à la Cour, & celles qui se preparoient, cette enuie m'augmentoit dauantage.

Ce qui me meut en second voyage que ie fis à Paris pour la paix d'en parler à M. de Villequier, & le prier de me conseiller, & secourir en cette occasion vers la Royne mere du Roy, aupres de laquelle ses longs seruices luy auoient acquis autorité & crrance, en quoy ie le trouuay de sa grace tres-disposé, & en parla à ladiēte Dame;

laquelle il trouua tres-desireuse de me faire tout plaisir, suiuant sa bonté accoustumée enuers ses creatures, telles que i'estois.

Monsieur de Villequier m'ayant asseuré de la bonne volonté de ladite Dame, i'en remerciay sa Maïesté, & la suppliay d'en faire naistre le fruit, quand elle reuerroit le Roy son fils: la suppliant de croire que ie ne pretendois demander autre recompense du seruice que ie luy auois fait, & pretendois faire tant que ie viurois, que ladite permission de me delcharger de mon office, & de me retirer en ma maison, avec la bonne grace de leurs Maïestez, & en leur protection.

MAIS comme à la Cour on interprete plustost en mauuaise part qu'en bonne, les actions d'un chacun, & ne peut on croire qu'un courtisan, qui a esté employé aux affaires publiques, avec honneur & dignité, vueille iamais de son bon gré s'en departir, sinon à dessein d'obtenir mieux: ladite Dame Royne, & plusieurs autres qui oyrent parler de ceste mienne deliberation & poursuite, creurent incontinent, ou que ie ne parlois à bon escient, ou que i'auois quelque autre pretention, dont ie ne me descouurois, qui fut cause que ie

dis à ladite Dame, que s'il plaisoit à leurs Majestez m'oütroyant ma requaſte eſtre encores quelquesfois ſervies de moy à la Cour, ie receurois à grand honneur qu'il luy pleuſt m'accorder, qu'eſtant à leur ſuite i'entraſſe en leur conſeil d'Eſtat, & en celuy de leurs affaires, ſinon, ainſi que faiſoit mon grand pere en celles du Roy François premier, au moins comme ie faiſois tous les iours ; dequoy madite Dame me promit de faire requête à ſa Maieſté.

E L L E en parla à ſa Maieſté à Manté, où leurs Maieſtez ſe virent la premiere fois apres que la paix fut accordee, toutesfois elle me dit qu'elle n'auoit peu obtenir du Roy qu'il me permiſt de me deſcharger de l'exercice de mondit office ſans m'en dire autre raiſon : & parce qu'elle s'en retourna de là à Paris querir Meſſieurs le Cardinal de Bourbon & Duc de Guiſe, elle me promit qu'elle en parleroit derechef, lors que ſa Maieſté ſeroit à Chartres.

C E qu'elle fit d'elle meſme & ſans en eſtre par moy ſollicitee, ainſi qu'elle me fit l'honneur de me dire, & qu'elle auoit tant preſſé le Roy qu'il m'auoit accordé ma requête dont ie fus très ioyeux.

Et fus dès le soir trouuer sa M. pour l'en remercier, & luy faire entendre les raisons qui me mouuoient à faire ladicte poursuite. Ce fut le soir mesme, que i'ay dit cy dessus que iela fust trouuer pour luy parler de la venuë du beau-frere du Maire d'Angoulesme.

Soudain que sa maiesté m'apperceut dans sa chambre m'appella, & sans me donner loisir de parler à elle, commença à me dire la priere que la Royne sa mere luy auoit faicte pour moy, comme elle luy auoit respondu à la fin, qu'elle desiroit tant faire pour moy, & mesme en sa consideration, qu'elle condescendroît & accorderoit tousiours tres volontiers tout ce que ie desirerois tant en ceste occasion qu'en toutes autres: mais aussi qu'il falloit que i'eusse égard à son seruice, qu'elle auoit à present plus grand besoin de ma presence en ma charge, qu'elle n'eut iamais, & mesmes en ses estats, qu'elle alloit tenir, où l'on traicteroit des affaires tres-importantes à sa personne, & à son estat, me donnât courage par ses paroles, pleines de tres-grande confiance & affection, de cōtinuer à la seruir audit estat, surquoy ie luy representay les raisons qui me contraignoient à faire ladicte poursuite, suppliant sa M.
de

dé ne croire que ce fust en intentiõ de quitter son seruice, ny de demeurer inutile, & mesmes en l'assemblée des estats, en laquelle ie luy promettois me trouuer, & la seruir de mon pouuoir; que i'estois de ceux qui seruoient de cœur & affection sa Maiesté; comme i'y estoistres obligé, & partant que ie voulois mourir à ses pieds, si telle estoit sa volonté, pourueu que ie fusse deschargé du faix trop pesant de l'exercice de ma charge qui commençoit à m'estre insupportable. Et voyant que ie ne pouuois obtenir que sa Maiesté m'en deschargeast entierement, comme ladite Dame Reyne m'auoit dit qu'il luy auoit accordé, ie m'aduisay au moins de la supplier me permettre que ie m'en deschargeasse d'une bonne partie sur le sieur de l'Aubespine secretaire de ladite Dame auquel sa Maiesté auoit desia en ma faueur accordé & fait expedier la suruiuance d'iceluy, & que nous peussions ensemble estans à la Cour expedier & signer ses commandemens affin que ie fusse soulagé: ce que sa Maiesté m'accorda tresvolontiers, me commandant d'en faire expedier telles lettres que ie cognoistrois estre necessaire, comme ie feis incontinent, & luy en presentay la minute; affin qu'il luy pleust de la voir, & confi-

derer à part, pour la faire apres changer, ainsi qu'il luy plairoit, sadite maiesté retint, & garda trois iours ladite minute, auant que de me la rendre, puis me dist qu'elle l'auoit trouuée tres bien en la sorte, & que i'eusse à la faire mettre en forme & expedier. Et parce que la grace que le Roy m'auoit faicte fut incontinent diuulguée & sceuë d'un chacun, le sieur de Beaulieu Ruzé, qui pretendoit tousiours d'estre faict quelque iour Secretaire d'Estat s'en pleignit à sa Maiesté, ainsi qu'il luy pleut me dire elle mesme, & qu'elle auoit tres-volontiers permis audict Ruzé, de se retirer en sa maison, & se défaire de tous ses offices, sur l'instance qu'il luy en auoit faicte, fondée sur le mescontentement, qu'il auoit de ce que sa Maiesté m'auoit accordé, encores qu'elle luy eust faict cét honneur de luy remonstrer, & faire entendre qu'il n'auoit aucune cause de ce faire d'autant qu'elle ne creoit vn office nouveau comme il s'estoit persuadé, mais me donnoit moyen seulement de me soulager, me faisant sa Maiesté paroistre se soucier fort peu de la retraicte dudit Ruzé, puis qu'il s'estoit si legerement, & mal à propos desbandé.

AUDIT temps le Roy me fit encores vne autre faueur, par laquelle il luy

pleut me tesmoigner sa bonne volonté, & le soin qu'elle auoit de moy & des miens. Ce fut sur l'instance tres-grande que la Royne sa mere luy faisoit en faueur de Madame de Nemours & de Monsieur son fils, pour le gouuernement de Lyon, duquel on requeroit sa Maiesté qu'il luy pleust rafraischir la promesse autresfois faicte audit sieur de Nemours : à quoy sadite Maiesté ne se voulut engager, se souuenant de ce qu'elle en auoit accordé à feu monsieur de Mandelot & à moy pour mon fils en le mariant avec la fille aisnee dudit sieur de Mandelot, sans en auoir au preallable mon aduis & consentement. Pour cette cause non seulement elle m'en parla en la presence de ladite Royne sa mere, où ie leur dis que si leurs Maiestez cognoissoient que ce fust chose qui leur tournast à seruice, que d'asseurer mondit sieur de Nemours dudit gouuernement, que pour ce qui me concernoit particulièrement & mondit fils aussi, ie me remettois à elles d'en disposer à leur discretion & volonté, les suppliant seulement d'auoir égard aux mentes & seruices dudit sieur de Mandelot, & au besoin que leurs affaires auoient, qu'il n'eust occasion de se plaindre : Mais aussi sa Majesté voulut

que ie veisse à part & mesme reformasse selon mon aduis le breuet qu'on luy en demandoit, affin qu'il ne feust rien' escrit, ny ordonné par iceluy, qui obligeast sa Maiesté à autre chose, qu'à ce qu'elle auoit promis par le premier susdict breuet, qui auoit autresfois esté depesché par elle pour cet effect du consentement mesme dudit feu sieur de Mandelot, ainsi que ie fis, sans que personne en sceust rien que sa Maiesté, de laquelle ie pris congé deux iours apres pour me venir rafraischir en ma maison, apres luy auoir promis de me rendre à Blois deuant l'ouuerture desdicts Estats, suiuant son commandement. Et faut que ie die que ie ne m'estois iamais departy d'aupres de sa Maiesté, & de la Cour avec tant d'assurance de la bonne grace, satisfaction & protection d'icelle, que ie fis lors; ce fut le vingt-troisiesme du mois d'Aoust 1588.

Et neantmoins le huiëtiesme du mois de Septembre ensuiuant, le iour de la nostre Dame estant en ma maison de Ville-roy, ie receus au matin par Benoïse la lettre & le commandement de sa Maiesté, par laquelle elle me deschargeoit de mon office, & de son seruice; & toutesfois me promettoit de me faire plaisir en autre chose.

i'appris dudit Benoife qu'il auoit porté pareille depesche à Messieurs le Chancelier, de Bellicure, Bruflart & Pinart, & qu'ils auoient desia quitté la Cour sans voir le Roy ny prendre congé de luy.

Ie laisse à penser à mes amis, si i'eus occasion ou non, de m'esmerveiller d'un tel changement & inopiné commandement, lequel neantmoins ie receus avec la reuerence que ie deuois, fortifié & consolé de la sincerité de mes comportements : ie m'enquis seulement dudit Benoife, si le Roy ne pretendoit point faire de difference de ceux qui auoient bien versé & seruy, d'avec les autres, & luy dis, que s'il luy plaisoit de suiure ce chemin là, qu'il feroit beaucoup pour son seruice, & pour les gens de bien.

Et m'ayant demandé responce, ie l'escriuis, & la luy baillay sur le champ, telle que la deuoit faire vn seruiteur tres fidelle & obeyssant à son maistre ; adioustant seulement de bouche, que s'il eust pleu à sa Maiesté me laisser sortir de la Cour, par la porte à laquelle i'auois tant heurté deuant que d'en partir, sans me faire sauter par les fenestres, qu'elle eust mis mon esprit en grand repos, comme i'esperois, moyennant la grace de Dieu & le congé qu'elle

me donnoit, d'y mettre le corps.

L'AVOIS fait venir de Lyon en ces quartiers mondit fils expres, par ce que monsieur le Duc de Mayenne ayant à dresser vne armee pour servir en Dauphiné contre les huguenots, il sembloit que ceux de son aage ne se pouvoient bonnement excuser estant voisins dudit pays, ce que ie ne voulois qu'il fit, sans que le Roy luy commandast pour ma descharge & pour la sienne, à cause du lieu que ie tenois au service de sa Maiesté, m'estant tousiours estudié de la servir fidèlement; mais aussi de ne luy donner aucune cause de suspicion de mes actions, & de tout ce qui dépendoit de moy. Ce que ie diray en passant m'auoir meu dès le commencement à nourrir mondit fils près de Messieurs de Longueuille; Princes que ie recognoissois, & par l'exemple de feu monsieur leur pere, & par l'instruction que leur donnoit Madame leur mere, ne viser qu'au pur service du Roy, & auoir leur grandeur attachee à la prosperité des affaires de sa Maiesté, à quoy ladite Dame sçait & tesmoignera tousiours le deuoir que j'ay fait de la conforter, toutes & quantes fois qu'il s'est présenté occasion de ce faire.

L'AVOIS doncques enuoyé mondit fils

deuers sa Maieſté pour receuoir ſes commandemens ſur l'occaſion ſuſdite lequel arriua à Blois le iour meſme, ou le lendemain que les commandemens de nos congez furent portez à meſſieurs du Conſeil, & enuoyez deuers moy, & furent ſceus d'un chacun : toutesfois il ne laiſſa de ſe preſenter à ſa Maieſté avec la lettre que ie luy eſcriuois, laquelle il receut tres benignement, luy diſant, ainſi qu'il me rapporta, qu'il eſtoit fils d'un pere, qui l'auoit ſi bien ſeruy, qu'il n'auoit qu'à imiter ſon exemple, & ſuiure le chemin qu'il luy auoit monſtré, pour acquerir honneur en ſa profeſſion, & ſa bonne grace & protection en routes choſes.

Qu'il deſiroit qu'il le ſeruiſt en ladite armée de Dauphiné avec ſa compagnie de gens-d'armes, & quelques autres forces, dont Monsieur de Mandelot auoit proietté de luy donner ſa conduite, ſous le bon plaifir de ſa Maieſté, laquelle eſcriuit par luy vne lettre de ſa main audit ſieur de Mandelot, pour l'aſſeurer de la continuation de ſa bonne volonté.

Ces bons propos qui me furent rapportez par mondit fils, certainement me conſolèrent grandement, entendant par iceux, que le Roy n'auoit conceu mauuaife

opinion de moy, ayant dit que ie l'auois tres bien & fidellement seruy. C'estoit le fruit aussi que i'auois toute ma vie desiré moissonner de tous mes labeurs & seruices, duquel à la verité ie craignois que le chemin que l'on auoit tenu à me donner congé, m'eust aucunement priué, sinon à l'endroit des gens de bien, qui auoient eu cognoissance de mes deportemens, au moins en l'opinion commune du vulgaire qui a accoustumé de iuger des actions des hommes plustost par le succez de leurs fortunes, que par la verité & iustice d'icelles.

CE langage doncques m'ayant grandement conforté, me donna encore la hardiesse d'enuoyer vn de mes gens deuers le Roy, pour luy remonstrer la perte que ie faisois par la priuation de mon office, qui m'auoit esté mis en consideration, en partageant les biens de feu Monsieur del'Aubespine mon beau pere duquel ie le tenois, & le peu de bien qui me demeueroit apres auoir si longuement seruy le feu Roy son frere, & luy audit office avec beaucoup d'honneur, n'ayant acquis pour toutes choses, que trois ou quatre mil liures de rente de reuenu en fonds de terre que ie pourrois lors dire miens, quand i'aurois payé mes debtes, qui n'estoient pas petites,

(comme il me seroit facile de monstrier en respondant de toutes mes actions , où & quand il plairoit à sa Maiesté l'ordonner, comme i'estois prest de ce faire; le suppliait à ceste cause d'y auoir esgard & m'ordonner quelque recompense, & en attendant icelle de continuer de me faire payer les gages & pensions dont ie iouyssois, pour m'ayder à viure à ma maison. Et donner moy, en à mondit fils de luy faire seruice en la profession, en laquelle ie l'auois nourry & acheminé par son commandement, & sur la promesse qu'il luy a pleu me faire quelquesfois de l'y proteger: ie suppliois aussi la Maiesté, puis qu'elle auoit aduisé & resolu d'employer à l'exercice de mon office, des personnes nouuelles & de moindre estoffe & qualité, ce sembloit, que n'estoient celles qui auoient seruy, il luy pleust au moins choisir & prendre pout ce faire quelqu'un de ceux que i'auois nourri, qui s'estoient rendus dignes & capables de ce faire; luy faisant seruice aupres de moy, comme ie recognoissois qu'estoit en fidelité & suffisance, Pasquier mon commis, que i'auois rendu porteur de ma lettre; luy remontrant qu'en ce faisant, il donneroit à entendre à tout le monde, m'auoir esloigné de son seruice pour faute que i'eusse

faicte, ny pour défiance que la Maiefté eust de ma loyauté: qui estoit la plus digne & chere recompense, que ie luy demandois de tous mes seruices: i'en rescriuis autant à la Roynemere du Roy, la suppliant d'interceder pour moy enuers la Maiefté.

LA response que le Roy fit à ma susdite depesche m'osta toute esperance d'attendre & receuoir de luy à l'aduenir aucune recompense & gratificatiõ, & qui plus est me donna assez de subiect de croire qu'elle n'estoit demeurée si satisfaicte de mes seruices ny de ma fidelité, que ma conscience, les traitemens que i'auois receu de luy en toutes choses, & mesmes à mon parlement de la Cour, & les derniers propos qu'il auoit tenu à mondit fils, m'auoient donné occasion de croire encores que ladite Dame Reyne sa mere m'asseuraft du contraire par la response qu'elle me faisoit par ledit Pasquier: dequoy certainement i'estois tres-affligé, & allois examinant toutes mes actions passées; & conferant avec vn chacun pour descouurir les causes dudit mescontentement: les vns disoient que le Roy s'estoit laissé entendre, que i'auois trop d'autorité & de credit en ma charge; les autres qu'il trouuoit mauuais, que ses Secretaires ouurissent ses paquets ailleurs

qu'en sa presence, & qu'ils escriuissent des lettres particulieres aux Gouverneurs des Prouinces, à ses Ambassadeurs, & autres qui le seruoient, & en receussent aussi d'eux concernant ses affaires: Aucuns que la Maiesté auoit descouuert que quelques vns de mes gens, & mesme ledit Pasquier, donnoient aduis à ceux de la ligue des affaires de sa Maiesté qui passoient par mes mains, & mesmes que ie m'entendois avec eux.

PLVSIEURS me taxoient aussi de ce pouuoir accordé à feu M. de Guise, & de la negociation de la paix, en laquelle on disoit mesme, que la Roynie mere du Roy estoit entrée en ialousie de moy: & ceux qui estimoient estre plus clairs voyans disoient, que le Roy auoit ainsi esloigné de luy ses vieux seruiteurs & ministres, pour le seul respect de ladite Dame Roynie mere du Roy, avec laquelle ils auoient trop grande communication. Cōme si la Maiesté n'eust eu volonté de luy confier à l'aduenir celle part de ses affaires, qu'elle luy auoit diferée iusques alors; & fut telle opinion fortifiée par les deportemens de ceux que la Maiesté appella au maniement de ses affaires, lesquels ne recherchoient aucunement ladite Dame, & ne l'honoroient & courtoisoient, comme nous auions accoustumé de faire.

Et combien que les choses qui sont aduenues depuis, ayent vuidé ceste question, & assez esclaircy vn chacun de la verité, & cause certaine de nos esloignemens, & que toutes les autres raisons susdites n'estoient que couleurs mises en auant pour esblouir les yeux de ceux qui s'y sont arrestez.

Toutesfois ie respondray succinctement à celles que l'on a publié auoir esté cause de ma condamnation, & disgrâce, plus pour représenter la verité des choses, à ceux qui pourroient veoir quelque iour le present memoire, que pour besoing que i'estime qu'il en soit.

Doncques pour respondre à la premiere raison par laquelle l'on disoit que le Roy recognoissoit que i'auois trop d'autorité, & de credit en ma charge, ie diray que ie me suis tousiours mocqué d'icelle quand l'on m'en a parlé, n'ayant peu croire que la Maiesté ait conceu telle opinion de moy, & sur ce fondé la resolution qu'elle a prise de m'esloigner d'elle, veu que l'autorité que i'auois procedoit entierement de celle qu'elle me donnoit du fardeau qu'elle me faisoit porter, & de la confiance qu'elle faisoit paroistre auoir en moy. Chose qui luy estoit tres-facile de retrancher toutes lesfois qu'elle eust voulu sans me chasser,

ioint que ie luy auois mis en main quelques iours deuant le moyen d'y pourueoir plus doucement, lors que ie l'auois suppliee me descharger de l'exercice de ma charhe. Dauantage i'auois deuant cela souuent supplié la Maieité de ne me charger de tant d'enuie, comme i'escauois que i'en portois, pour executer les commandemens dont elle m'honoroit ordinairement en ses affaires, lesquels elle me deffendoit souuent de communiquer à autres quels qu'ils fussent. Mais tous ceux qui cognoistront en quoy consiste, & combien importe la charge des Secretaires d'Etat, ne trouueront estrange, si en faisant bien leur deuoir, ils acquierent de l'autorité, de l'honneur, & de la creance non seulement aupres du Roy, & à la Cour, mais aussi par toutes les Prouinces du Royaume, & hors iceluy : S'ils sont gens de bien, le Roy ne se peut trop fier en eux, il faut qu'ils escriuent, & facent toutes les depeches que les autres proposent & ordonnent, & qu'ils tiennent registres, & mémoires des precedentes pour en seruir le Roy, & ceux qui l'assistent aux occasions qui se presentent. Ce que tous autres ne peuuent si bien faire qu'eux : ç'a tousiours esté aussi sur la vigilance, diligence, capaci-

te & fidelité d'iceux, que les plus sages Princes se sont reposez, & reposeront, quoy que l'on face, de la principale direction & conduite de leurs affaires. Et est certain que le maistre qui n'en vsera ainsi s'en trouuera tres-mal, les affaires seront faiçtes par pieces, & à bastons rompus : ioint qu'il luy sera tousiours beaucoup plus facile de corriger & chastier vn Secretaire qui versera mal en sa charge, qu'un autre de plus grande qualité. C'est aussi en chastiant par iustice les meschans, & faisans difference d'iceux d'avec les bons, qu'il faut corriger les abus, & fautes des charges. Il n'y a rien qui oblige tant vn homme de bien à se crucifier pour seruir son Maistre, que quand il void qu'il se fie en luy, & qu'il faiçt distinction de son seruice d'avec celuy de ceux qui versent mal. Sa Maieité ne se peut trop fier en ses Secretaires qui la seruent bien, & fidèlement, & ne peut aussi chastier trop seuerement, & exemplairement ceux qui en vsent autrement. Pleust à Dieu que le Roy eust voulu suiure ce chemin en nostre endroit, il eust fait beaucoup pour l'honneur & contentement de ceux que l'on eust trouué auoir bien vescu, mais il eust faiçt encores dauantage pour son seruice : car tout ainsi que le benefice

bien colloqué & employé honore le Prince, encourage & recompense tout d'un coup plusieurs personnes; aussi la correction des meschans a pareille vertu & efficace. Et n'y a rien qui face tant reuerer, craindre, & aymer vn Prince que l'vsage de ceste iustice, par laquelle les Roys regnēt & ne regneront iamais heureusement sans icelle, quoy qu'ils facent. Mais considerons si avec toute la faueur, auctorité & confiance que le Roy me communiquoit, i'eusse peu acquerir quelque reputation & creance entre ses seruiteurs; si ie l'eusse serui infidellement, & negligemment. I'en appelle à tesmoins tous ceux qui auoient cotespondance avec moy, & suis content de receuoir telle punition que l'on voudra, s'il s'en trouue vn seul qui puisse prouuer que ie luy aye iamais dir, conseillé ny escript chose qui fust tant peu que ce soit contraire, ie ne diray pas aux affaires & seruice de sa Maiesté, mais seulement à ses volonteiz & commandemens, qui m'ont tousiours seruy de loy & de reigle en toutes choses. Dauantage en quoy ay- ie abusé de ladicte auctorité, me suis- ie aggrandy avec les miens au dommage de quelqu'un? I'ay exercé vingt & vn an & plus vne

mesme charge, aymé, honoré & fauorisé en icelle de la bonne grace de mes maistres autant & plus dès la premiere année qu'en la derniere: l'ay veu asseoir au Conseil du Roy, & passer deuant moy plusieurs personnes qui estoient venuës à la Cour, & au seruice de sa maiesté long temps apres moy, & ay long temps refusé tel honneur, commandé par le Roy de l'accepter, & depuis en auoir esté honoré: A t'on veu que i'aye pris ma place, & me sois assis au Conseil de sa Maiesté, lors qu'elles'y est trouuée, encores que tous ceux qui estoient venus apres moy le fissent. l'estois content de quitter les honneurs, les charges, & mesmes quelquesfois les biens-faicts aux autres, & estre leur sollicitateur, & facteur en la poursuite d'iceux, pour faire que mon maistre fust mieux seruy, aymé & obey d'un chacun. Ce m'estoit assez de bien seruir, & de cognoistre que sa Maiesté se confioit en moy, & me tenoit pour homme de bien.

Certainement les Secretaires ouuroient les paquets des affaires du Roy, soudain qu'ils les receuoient, leurs peres & eux en auoient ainsi vsé durant les regnes du feu Roy Charles & du Roy qui est à present, & principalement depuis huiet ou dix ans, sans

sans que l'on leur ait iamais fait paroistre le trouuer mauuais, ils eussent volontiers pristelle regle que l'on leur eust prescrite pour ce regard, mais qui plus est il sembloit que l'on voulust voir qu'il fust necessaire, qu'ils en vlassent ainsi, parce que le Roy ne leur permettoit de les luy porter à toutes heures, & que la plus grande peine qu'ils auoient, soit que le Roy fust present ou absent, estoit de luy lire ou faire voir les depesches, d'autant que par faute de ce faire à poinct nommè, ils ne pouuoient, comme il estoit necessaire, faire promptement response à ceux qui escriuoient, lesquels se prenoient ordinairement à eux desdites longueurs, & les affaires de sadite Maiesté en patissoient, de sorte qu'ils estoient contraincts quelquesfois d'extraire desdites depesches, ce qui estoit le plus important, soit pour l'envoyer à sadite Maiesté par escrit quand elle estoit dehors, ou ne pouuoient parler à elle, comme il aduenoit trop souuent, soit pour luy en faire rapport, & tirer d'elle plus facilement sa volonté affin d'y satisfaire.

IE diray que les affaires d'Estat requierent que ceux qui les conduisent voyent les depesches à mesure qu'elles viennent,

car elles peuuent contenir telle chose, que si vous retardez d'y pouruoir, il en arriue des dommages & inconveniens incroyables, & pert-on des occasions qui ne se peuuent apres recouurer: de sorte qu'il faut ou que le Roy permette que l'on les luy porte, & represente à toutes heures, ou qu'il donne charge à quelqu'un de prendre ce soin, ou bien qu'il s'en fut confié & reposé sur sesdicts Secretaires: sinon qu'il face estat d'estretres-mal seruy, & de ne se prendre qu'à luy-mesme du mal qui en succedera. Quel plus grand contentement peuuent recevoir les Secretaires, que quand leur maistre void tous les iours ses affaires, & leur ordonne ce qu'ils ont à faire, c'est leur descharge & leur honneur. Car il void & considere mieux le devoir qu'ils font en leurs charges, & peuuent mieux satisfaire à ceux qui s'adressent à eux, & leur correspondre: sans quoy il est du tout impossible que les affaires du Roy cheminent comme il appartient, & c'est pourquoy j'ay trouué bien estrange, ce que l'on a publié que sadite Maiesté auoit trouué mauuais de ce que lesdits Secretaires accompagnoient de leurs lettres celles que sa Maiesté escriuoit.

Si sa Maieſté s'eſtoit enquiſe & bien informée de tous ceux qui l'ont ſeruié dedans & dehors le Royaume, depuis ſon regne, ſi c'eſt choſe qui ait preiudicié à ſes affaires, ou non, ie ſuis certain qu'elle ne blaſmeroit ceux qui ont prins la peine de cē faire, ie penſe eſtre vn de ceux qui en a eſcrit aiant, & eſt certain, que c'eſtoit ce qui m'empelchoit & trauailloit le plus en ma charge, & en quoy ie cuide auſſi auoir mieux ſeruy le Roy; voulant que ſi parmy vne miliace de lettres que i'ay eſcrites, il s'en trouue vne qui ait eſté contraire au ſeruice & aux volontez de ſa Maieſté; en eſtre repris & puny grieuement. Nous eſcriuons ce que nous cognoiſſons eſtre de l'intention de ſa Maieſté, & neceſſaire que ſes miniſtres ſceuſſent pour bien ſeruir, & accomplir ſes commandemens, à laquelle nous ne cachions rien de tout ce que l'on nous eſcriuoit, & bien ſouuent c'eſtoit choſe qu'on ne luy oſoit eſcrire à elle meſme, pour diuers reſpects, leſquels quoy qu'elle face, elle n'oſtera iamais entierement de l'eſprit de ceux qui le ſeruent: car la Cour, & les affaires en engendrent tous les iours de nouueaux.

Et tels que ſi on ne leur ouure vn

chemin de se satisfaire & contenter en cela, le Roy doit faire estat qu'il ne sera seruy qu'à demy, dont i'appelle à tesmoing, tous ceux qui manient ses affaires, & sont employez à son seruice dedans & dehors le Royaume, sadite Maïesté deuroit pour son propre bien chercher plustost à confirmer & estreindre la correspondance & confiance entre ses ministres & officiers, que de les blasmer, ce ne seroit leur faire tort, ce seroit leur faire iustice.

QUAND à l'intelligence que l'on a voulu dire que mes gens auoient avec ceux de la ligue, ie iure & proteste deuant Dieu, estre chose dont ie ne me suis iamais apperceu, & à laquelle toutesfois i'ay eu les yeux ouuerts autant que nul autre de ma profession, & croy veritablement que cela n'estoit point. Mais si l'on en auoit quelque opinion fausse ou vraye, pourquoy ne m'en aduertissoit-on? on eust veu comme i'y eusse pourueu: & s'y i'en eusse conuiué, i'eusse porté patiemment la peine que l'on m'en eust imposée, il n'y a celuy qui ne soit suiet à estre trahy ou trompé, & mesmes en ce miserable siecle, que le vice & la corruption regnent par tout: & est certain que souuent nous nous apperceuons les derniers des trom-

peries qui nous concernent. Quoy que ce soit ie repeteray encores vne fois ne m'estre iamais apperceu, que Pasquier, ny aucun de ceux qui seruiôient le Roy aupres de moy, m'ayent fait ce tort : protestant que si ie m'en fusse apperceu, i'y eusse pourueu tres-viue-ment. Dauantage ie diray qu'il estoit assez difficile, de delcouvrir tout ce que i'y faisois, pour ce que i'escriuois de ma main les choses plus importantes, & ne les commettois toutes à vn seul, mesme ie ne les faisois escrire en vn registre ; pour ceste occasion, comme d'autres faisoient, ie me contentois de garder & renuerfer mes minutes, desquelles ie seray tousiours prest de respondre.

Et quant à la fidelité, pleust à Dieu d'estre condanné d'en rendre compte à peine de ma vie en la presence de mes accusateurs: ie suis certain que ie les ferois rougir de honte, & paroistre tels qu'ils sont; ils diroient que Salcede m'a accusé, & que la plus grande partie de ce qu'il a dit, a esté confirmé par les euenemens suruenus depuis, qui sont tesmoins irreprochables: ie l'auouë pour ce qui concerne les autres, mais que ie sois pour cela conuaincu, ie le nie ; i'ay respondu par cy deuant à ce point, de façon que ie n'en diray autre

chose. Mais combien ay ie escrit de lettres; à combien de personnes ay - ie parlé: combien ay- ie d'amis & parens, à qui ie me suis communiqué, & descouvert ce que i'auois sur le cœur, & iugeois deuoir aduenir les remuëmens de ceux de la ligue? I'ose me promettre qu'il n'y en aura vn seul qui m'accuse de les auoir iamais approuuez: mais au contraire qu'ils en trouuera plusieurs qui diront que ie les ay trauersez, voire persecutez pour ceste seule occasion: car graces à Dieu, pour mon particulier ie n'eus iamais dispute avec personne, qu'avec ledit sieur Duc d'Esperron.

Ils diront aussi, que feu monsieur de Guise me faisoit cest honneur, que d'estimer & rechercher mon amitié, se loüer de moy, & mesme en faire estat: tels argumens sont ils suffisans pour me condamner, & que sçait-on s'il en vsoit ainsi pour me nuire? Veritablement ie ne le croy pas; mais ie dis qu'il y auoit peut-estre plus grand occasion d'en soupçonner quelque chose, que de m'accuser pour sa façon de proceder en mon endroit: a-on iamais veu qu'il ait failly à carresser tous ceux qu'il a estimez que le Roy aymoit & fauorisoit? Que l'on se représente ses comportements. Il auoit telle enuie d'acquérir les bonnes graces du

Roy, & pouffer la grandeur de sa fortune par ceste voyelà, qu'il honoroit le plus petit seruiteur que sa Maiesté eust, qu'il cognoissoit auoir quelque part aupres d'elle: mais cōbien y a-il maintenant aupres de sa Maiesté de persōnes, qui ont suiuy la ligue? Pourquoy ne cōtent ils quelque chose particulier de l'intelligence que i'auois avec ledit Duc de Guise, lors qu'ils scauoiet tous ses secrets? ie ne les prie point de s'entaire, ny de m'espargner, mais seulement de ne me seruir à couuert ny en derriere, pour faire les bons courtisans. l'offre de me presenter & rendre où l'ō voudra pour respoindre à tout ce qu'ils proposeront? ie ne demande point de grace & de faueur pour ce regard; ie ne demande que iustice, & que l'on trouue bon que la verité soit aprofondie & cogneuë, ie me departiray volontiers de la poursuite de la recompense de tous mes seruices, & que l'on m'accorde ladite grace. Je voulois ce dit on, establir monsieur de Guise à la Cour pour en tirer support; & toutesfois, il est certain que i'auois demandé mon congé, & auois plus grande enuie d'en sortir que d'y demeurer. Estoit ce pour plumer l'oye du Roy avec luy, que ie cherchois tel support? quel besoin auois ie de luy pour ce faire? Ceux qui s'estoient

enrichis l'auoient fait sans son assistance, i'en pouuois donc bien faire autant, si i'eusse voulu sans icelle; dauantage chacun sçait, que ie tirois du Roy des biens faictz & des faueurs assez pour m'enrichir, si ie l'eusse voulu faire, sans auoir besoin d'un entremetteur ou mediateur entre sa Maiesté & moy pour cet effect: car de sa grace, elle ne me refusoit chose quelconque que ie luy demandasse: i'eusse aussi esté tres-mal aduisé ce me semble d'ayder à rendre monsieur de Guise si puissant à la Cour, que i'eusse esté contraint avec les autres de despendre de luy, & aller à son leuer, au lieu que ie soulois estre recherché de luy, & qu'il auoit besoin de moy, comme de tous les seruiteurs du Roy, pour se maintenir en Cour: dauantage estois-je si ignorant ou grossier, que ie ne recogneusse quelque chose de la ialousie que sa Maiesté auoit du dit Duc de Guise: ne m'en auoit elle iamais parlé? Ce sont simplicitéz ou malices trop grandes que d'en douter: mais il ont dit, que ie voulois authoriser ledit Duc de Guise, pour me venger de M. d'Espernon, & me fortifier contre luy: voila encores vne plus grande asnerie. Ceux qui craignoient sa puissance estoient ils pas assez asseurez ou vengez de luy par son esloigne-

ment, sans faire autre chose : i'estois trop
sçauant courtisan pour choisir ceste voye
là, quand i'eusse voulu en trouuer quel-
qu'une pour nuire audit Duc. Car tant s'en
faut que i'aye iamais creu, que l'inimitié de
mon sieur de Guise ait nuy audit Duc d'Es-
pernon aupres du Roy, que ie tiens pour
certain, qu'elle luy a long temps seruy de
protection. Ledit sieur d'Esperson auoit à
la Cour des ennemis & enuieux plus dan-
gereux & puissans que ledit Duc & moy en-
semble : ie les cognoissois bien, ie iure
auoir plustost destourné que procuré le
mal que i'ay cogneu que l'en luy vouloit
faire : aussi ma fortune n'auoit rien de com-
mun avec la sienne, il voloit d'une autre
aisle.

I'ay tousiours conseillé l'union des Ca-
tholiques avecques le Roy, comme i'ay cy
deuât dit, c'est ce qui a meu les huguenots
& leurs adherans de dire que i'estois de la
ligue, & que ie la fauorisois, au preiudice
du seruice du Roy, aux Edicts duquel s'ils
eussent voulu obeyr, comme i'ay souuent
esté cause qu'ils en ont esté recherchez, &
admonestez, ils eussent bien tost esprou-
ué & cogneule contraire, i'eusse esté leur
cousin : car ils eussent en ce faisant sappé la
ligue par son fondement, esté cause de la

restauration de ce pauvre Royaume que leur obstination a renuersé les pieds contremont,

MAIS ie m'estonne & me plains grandement de ceux qui ont eu opiniõ ou faict paroistre l'auoir, que i'eusse esté pensionnaire de monsieur le Duc de Guise. Pericard son Secretaire m'a dict qu'il en a esté enquis & interrogé apres sa mort, & menacé de la corde, parce qu'il disoit que cela n'estoit point. I'ay receu beaucoup de mal & d'ennuy de toutes mes fortunes, mais l'aduouë, que ie n'ay point senty de coup qui eust plus estourdy, & esmeu ma patience, que cestuy-là, ayant par iceluy recogneu la mauuaise volonté que l'on me portoit, la sincerité de ma conscience m'empeschoit de le recognoistre, & i'eusse esté tres-mal aduisé de m'adresser à Monsieur le Duc de Guise pour auoir du bien, il m'estoit plus facile d'en tirer du Roy, qui ne me refusa oncques chose que ie luy aye demandee, comme i'ay desia dict: Et quand i'eusse voulu estre si meschant que de m'enrichir aux despens du Royaume, ie suis asseuré que la meilleure bourse de la Chrestienté, ne m'eust point esté fermee, Et c'est pourquoy les Anglois & les huguenots, qui sont plus rusez que les autres,

ont bien mieux rencontré: car ils ont publié que ie prenois des pensions, & des presents du Roy d'Espagne, & l'ont autrefois voulu faire croire à feu monsieur frere du Roy & à d'autres; iene respondray qu'une seule chose à ceste calomnie, c'est que si i'eusse voulu estre traistre, & vendre ma conscience, ie ne l'eusse fait pour peu. Je suis prest à rendre compte de tout le bien que i'ay: ien'ay esté ne iouieur de déz & de cartes, ny faiseur de festins, ny trop sôptueux & magnifique en toutes mes actions; i'ay seulement vescu honnestement, comme il me sembloit que le requeroit la charge que i'auois, & l'honneur que me faisoit le Roy: i'ay tousiours esté comme ie suis encores, fils de famille, & partant sans tirer aucune commodité de nostre maison; i'ay vescu de mon trauail, s'il y a quelqu'un qui se plaigne de moy, que i'aye exigé de luy argent, ou autre chose, ou luy aye fait tort ou iniure, ie suis prest de luy en faire raison, & d'en respondre, où l'on l'ordonnera. Les plus grandes dépenses que i'aye fait ont esté à faire instruire le fils vnique que Dieu m'a donné, & à luy donner moyen de paroistre entre les gens d'honneur, & faire seruice au Roy: si ceux qui entreprennent en ce Royaume de suiure le chemin

que ie luy ay faict prendre par la permission & le commandement du Roy, ne despendent du commencement pour recompenser aucunement les autres defauts qui sont en eux, ils ne peuuent estre aymez, ny suivis, & mesmes en ce temps que le profit & l'argent commandent plus aux hommes que l'honneur. I'ay veritablement basti vne basse-cour en la maison ancienne de mes peres & y ay employé plus d'argent que ie ne deuois: mais ie suis prest à monstrier qu'il est venu de la liberalité du Roy, & nō d'autre, comme tout le reste que i'ay eu, qui n'est pas grande chose: car pour tout i'ay acquis en vingt & vn an, que i'ay exercé mon office, prés de quatre mil liures de rēte en fonds de terre, que ie pourray dire miennes, quand i'auray payé trente mil escus que ie dois, comme ie puis à mon grand regret, prouuer trop facilement: & me submets à tout perdre, si ie ne le fais, où & quand l'on vouldra, & outre cela que i'ay engagé ou vendu vne bonne partie du bien de ma femme.

VOILA les thresors que i'ay tirez d'Espagne, & de Monsieur de Guise, & ce que i'ay gaigné à estre traistre. Quoy doncques? i'ay refusé autresfois pension de deux mil escus par an; qui me fut offerte de la part du Roy

de Nauarre, & de la cause apres la paix, de l'an mil cinq cens soixante & dix sept, par vn cheualier d'honneur, comme ie puis encores monstrier par escrit, ie n'ay iamais receu aucun present d'Angleterre, & partant i'en dois auoir tiré & receu d'Espagne, & d'ailleurs: ceste consequence n'est pas bonne. Ie veux croire aussi que ceux qui en vsent & les autres qui me condānent sans m'ouyr, iugent de la conscience d'autry par la leur. Qu'ils se presentent, & que l'on nous commande de respondre de nos actions: i'offre de comparoistre où l'on voudra pour cet effect, & ne demande point de grace, ny de pardon, de ma desloyauté, si elle est verifiée: ie ne leur souhaite aussi autre mal, si non que mon innocence soit cogneuë telle qu'elle est; car ie ne pretends m'armer & defendre de reccrimination, leurs fautes ne me touchent point, mon but est de me defendre, & non d'affaillir: pourquoy doit on plus volontiers exposer sa vie, que pour sauuer son honneur.

IL n'y a grand ne petit en ce Royaume, qui puisse dire m'auoir iamais donné vn escu; & si, il y en a bien peu qui n'ayent passé par mes mains; i'ay aussi seruy des maistres, qui me faisoient assez de bien, sans en aller chercher ailleurs: Celuy qui prend

s'engage, ce que ne doiuent faire ceux qui sont cōstituez aux charges publiques, pour quelque cause que ce soit.

ET parce que i'ay assez esclairey vn chacun de la verité, de tout ce qui s'est passé en la negociation de la paix derniere, & de l'octroy & expedition du pouuoir dudit Duc de Guise pour ma iustification en cét endroit, ie me contenteray de dire sur ce premierement.

QUE s'il se trouue que i'aye escrit chose que ie ne puisse prouuer, ie suis content de porter tout le reproche du mal qui s'en est ensuiuy. Secondement i'ay tres grand regret, dequoy le Roy n'a vſé autrement du bien & aduantage qu'il pouuoit receuoir pour luy, & pour son Royaume de ladicte paix & mesme dudit pouuoir, il a perdu par ce qu'il a faict la creance que l'observation de la foy & parole, luy auoit encores conseruée, non seulement entre ses peuples & ſuiets, mais aussi par tout le monde: ie luy ay souuent ouy dire, qu'il vouloit plustost perdre la vie, qu'un tel thresor; lequel ie suis asſeuré qu'il eust gardé tres cherement s'il eust recogneu & creu pouuoir sans y faire bresche, conseruer son autorité & puissance. Voila l'escueil contre lequel il a faict naufrage, voilà la cause de ces tra-

liaux, & de nos maux, ie ne veux accuser ny excuser personne, ie prie Dieu qu'il donne paix aux trespassez, & conserue les viuans: mais ie dis qu'il y auoit plusieurs bōs moyēs d'arrester le cours des desseins dudit sieur Duc de Guise, & de monsieur le Cardinal son frere, estant desagreables à sa Maiesté, comme ils estoient sans vsr de celuy qui a esté pratiqué; i'en ay dict quelque chose cy-deuant, & n'en diray dauantage à present, ne voulant augmenter le regret & la douleur que nous deuons ressentir des maux que nous en receuons.

Q V E le Roy nous ayt esloigné de luy pour le respect de la Royne sa mere, c'est chose que ie ne croyray iamais: car il luy auoit trop grande obligation, & luy estoit son conseil & assistance trop necessaire: les huguenots ont voulu dire qu'elle auoit des desseins à part en faueur de monsieur de Lorraine, & messieurs ses enfans, pour la reuerence qu'ils luy portoient, & pour luy estre si proches qu'ils estoient; mais qu'elle eust voulu pour cela nuire au Roy, & à ses affaires, ceux qui l'ont bien cogneu, n'ont iamais eu telle opinion, ouy bien qu'elle eust bien voulu que le Roy se fust seruy d'eux & les eust aduancez plustost que d'autres. Mais où sont ceux que lesdits

huguenots n'ont accusé, quand ils ne les ont fauorisez & seruis ? qu'ont-ils dict autrefois du Roy mesme, deuant & depuis qu'il est Roy, & qu'ils n'estiment vrais François que ceux qui approuuent leurs actiōs ? ils blasment les Catholiques qui se desient d'eux, & ils ne se fient aucunement des Catholiques, d'ont i'appelle à tesmoin monsieur de Montmorency, & tous les aures qui se sont meslez avec eux ; ils appellent rebelles, ceux qui combattent pour leur religion ; & il y a trente ans & plus qu'ils font la guerre au Roy, & au Royaume : sous ce pretexte quelles villes n'ont-ils pillées ? quelles Eglises n'ont ils abbatuës ? combien de fois ont-ils combattu contre le Roy mesme ; mis la discorde en la maison Royale, logé les Anglois, & autres estrangers en ce Royaume ? en fin quels maux n'ont-ils faiçts depuis ce temps-là ? Il ne faut que lire les Edicts de paix, que l'on a fait avec eux, l'on verra de quelle eau ils ont eu besoin d'estre lauez. Et toutesfois aujour-d'huy, le Roy n'eut & n'aura iamais (ainsi qu'ils disent) de meilleurs seruiteurs & subiects qu'eux : cela veut dire pourueu qu'il se serue d'eux, qu'il face leurs affaires, & qu'il trouue bon ou souffre que le Roy de Nauarre tienne la place en ce Royaume,

Royaume, quel'on dit que feu Monsieur de Guise vouloit occuper, & qu'il leur soit loisible, cependant que sa Maiesté & les Catholiques qui ont prins les armes s'entrebatteront, de s'emparer des villes & deniers du Roy, s'establiir, & fortifier le tout pour le seruice de sa Maiesté, & le bien general du Royaume. C'est estre Espagnol ou Guiscard, que de n'approuuer ou endurer toutes leurs actions : Et de ne pouuoir compatir avec ceux qui veulent nous troubler en nostre religion, nous abstraire à leurs volontez, & nous donner la loy, comme ils feront à la fin si nos diuisions continuënt encores longuement.

OR si tant est que nous ayons esté esloignez de ladite Cour, pour le respect de ladite dame Roynemere du Roy, comme l'on a dit, certainement nous auons moindre cause de nous en plaindre pour nostre particulier, que pour le Roy & le public.

Entre autres Princes & Seigneurs qui me firent cet honneur, que de m'enuoyer visiter & offrir amitié apres mon bannissement de la Cour, feu Monsieur de Guise y enuoya deux ou trois fois, dequoy ie le remerciai bien humblement, le suppliant par ma response, que s'il auoit enuie de me faire plaisir, il luy pleust faire tant pour moy,

que d'esclaircir sa Maieſté de la façon de laquelle ie m'eſtois conduit en ſon endroit, en guerre & en paix, ne deſirant autre recompence de mes ſeruices, ſinon que ſa Maieſté cogneuſt au vray comme ie l'auois ſerui. Voila toutel'intelligence que i'ay eue avec ledit Duc, depuis mon parlement de la Cour.

Plusieurs de mes amis, qui eſtoient deputez aux Eſtats, & autres, voulurent ſçauoir de moy ſi i'auois agreable que leſdits Eſtats fiſſent inſtance & ſupplication au Roy, pour me r'appeller à ſon ſeruice: mais ie les ſuppliy ne le faire pas, parce que ie ne voulois que pour l'amour de moy, ils fiſſent choſe qui deſpleuſt à ſa Maieſté: ionct que ie m'eſtimois tres heureux, de iouyr du repos de ma maiſon, & auſſi que ie ne voulois entrer à la Cour, ny aux affaires, contre le gré & la volonté de ſa Maieſté: ſi nonobſtant ma reſponſe, quelqu'un d'eux, euſt eu opinion d'en parler, ie n'en dois ce me ſemble eſtre blaſmé, comme i'ay entendu auoir eſté aſſez legerement pour ce regard.

Dieu voulut audit temps appeller à ſoy feu monſieur de mandelot, dequoy ie receus tel deſplaiſir, que chacun peut ſ'imaginer, perdant vn ſi fidel amy, & ſur la

vertu duquel i'auois fondé le reste de toutes mes esperances & resources de ma miserable fortune.

Ie prins la hardiesse, d'escrire vne lettre au Roy, pour supplier sa Maiesté d'auoir compassion dela famille dudit feu sieur de Mandelot, & de la mienne, qu'elle auoit ioincte & vnue ensemble pour son seruice, afin de faire iouyr mon fils de l'effect de sa promesse, touchant le gouuernement de Lyonnois, sur laquelle auoit esté basty principalement ledit mariage.

*S'ENSVIT LA TENEUR DE
promesse escrite de la propre main
de sa Maiesté.*

ADVENANT que le mariage du fils du sieur de Villeroy, s'effectua avec la fille aisnée du sieur de Mandelot, i'accorde en cōsideration des seruices de l'un & de l'autre, que le fils du sieur de Villeroy, soit pourueu du gouuernement de Lyonnois, Forests & Beaujolois, à la suruiuance dudit sieur de Mandelot, pour l'exercer apres sa mort : dont ie veux que les expeditions & prouisions soient faiçtes, qui luy seront necessaires par l'un de mes Secretaire d'Estat, Bruslart ou Pinat, apres l'accomplisse-

ment dudit mariage : sans qu'il soit besoin d'autre rolle, breuet, commandement, ou descharge, que la presente escritte de main, nonobstant tous autres breuets de reserve, ou promesse dudit gouvernement, expediez au contraire. Faict à Paris le deuxiesme iour de Iuillet 1587.

Signé, HENRY.

Depuis ladite signation à condition de suiuanee nous fut accordee & confirmée sur le rolle de monsieur Brussart, le 11. Mars 1588. & la prouision d'icelle expediee en forme & scelle sur iceluy.

Veritablement ie ne m'attendois pas, que le sieur de Mandelot deust si tost faillir au Roy, à la ville de Lyon, & à ses amis ; mais que viuant il dresseroit mondit fils de sa main, & le rendroit capable de faire seruiue à sadite Maiesté en ladite charge, de laquelle pour son aage, & inexperience, il estoit indigne.

Ie ne receus point de responce du Roy à mes lettres : mais quand il fut, asseuré du trespas du sieur de Mandelot, non seulement il donna le gouvernement dudit pays à M. le Duc de Nemours, mais aussi il priua mondit fils de la Lieutenance generale d'iceluy, pour en pouruoir le sieur de Guadagne, il luy refusa pareillement le bailliage de Mas-

con, qu'il auoit donné audit feu sieur de Mandelot six mois deuant à ma requeste & consideration.

Dauantage sa Maiesté voulut tant de fauoriser la maison dudit sieur de Mandelot & la mienne, que de dōner au sieur du Perrat, demeurāt en ladite ville de Lyon, l'Abbaye de la Grace, de laquelle ledit sieur de Mandelot, depuis la mort de defunct son frere, qui estoit religieux & titulaire d'icelle, aduenüē quelque temps auparauant, n'auoit encore retiré les bulles & provisions Apostoliques, iāçoit que ladite Abbaye ne fut vacante par le trespas dudit sieur de Mandelot à qui sa Maiesté en auoit enuoyé par vn sien parent toutes les expéditions nécessaires.

Depuis madame de Mandelot ayant enuoyé vers sa Maiesté le sieur de la Grange pour le supplier d'auoir compassion d'elle, & de sa maison, & luy remonstrer les debtes d'icelle, il n'en rapporta que du mespris & de l'indignation : bien luy fut il dit, que l'on pourroit avec le temps faire quelque chose pour ladite Dame, & ses filles, en consideration des seruices du feu sieur de Mandelot, mais qu'il ne falloit pas qu'il s'attendit que l'on fit rien pour mon fils ne pour moy.

Sur ces entrefaictes la mort de feu M. de Guise, & de feu M. le Cardinal son frere sont aduenues avec l'emprisonnement de monsieur le Cardinal de Bourbo, & de Messieurs les Princes de Joinville, Ducs de Nemours & d'Elboeuf, de M. l'Archeuesque de Lyon, & autres qui ont esté arrestez avec eux.

Soudain que i'en fus aduerty, i'enuoyay querir les officiers & habitans de la ville de Corbeil, dont ie suis Capitaine, lesquels i'admonestay de leur deuoir & fidelité, & de ne s'embrouïller avec ceux qui entreprendroient, à l'occasion de ladite mort, de remuer mesnage, ce qui me cuida couster bien cher, parce que ceux de Paris en furent incontinent aduertis, qui entrerent en tel soupçon de moy, que ma maison de Paris en faillit estre pillée, comme furent les villages de celle de Villeroy, par les premieres troupes qui sortirent de Paris, & quand ie vis que les habitans dudit Corbeil prenoient le party de ceux de Paris, ie ne voulus que celuy que i'auois mis dedās le chasteau qui n'estoit tenable contre ladite ville y demeurast avec eux, ny fit le serment qu'ils faisoient: & aimay mieux quitter la place, en laquelle ie n'ay peu rentrer depuis, que de tremper en ce qu'ils faisoient; esperant que moy, & les miens, serions à la fin ho-

norez de quelque commandement de sa M. Ces mesmes raisons furent cause que mon pere s'abstint de s'engager & obliger en la ville de Paris, mais qu'il resolut de sortir d'icelle avec la fieure quarte, & se retirer en sa maison d'Alincour, laissant les biens qu'il a en ladite ville, qui sont les principaux de nostre maison, à la mercy & discretion du temps.

L'escriuis aussi à mes amis, qui sont à la Cour de sçavoir du Roy, ce qu'il luy plaisoit faire de nous & l'asseurer de nostre fidelité: à quoy il ne fit autre response, sinon que l'oy aduíseroit, ce qui me mit en tres-grande peine, & encores plus, quand ie vis que le Roy non seulement ne nous auoit fait cet honneur, que de nous escrire, ny nous honorer d'un seul commandement depuis la mort dudit Duc de Guise, ie ne dis pas encores pour nos personnes, mais pour les charges que nous auions, combien qu'alors l'on n'en fut pas chiche, mais que l'on auoit commandé au sieur de Varicaruille de se ietter dans Meulan qui estoit de la charge de mon pere, & que l'on auoit fait sçavoir à ceux de Mante de se défier de luy, & aussi que l'on auoit cassé la cōpagnie de gēsd'armes de mondit fils, laquelle M. le Cardinal de Gondy, m'escriuit quelque temps apres

auoir esté remise sur l'estat, pour seruir en Dauphiné à la requeste de monsieur le Duc de Rets son frere.

Ie receus encores au mesme temps vne lettre de sa Maiesté, par laquelle elle me mandoit d'ordonner à mondit fils de se retirer de ladite ville de Lyõ, & me venir trouuer, non par ce que sa Maiesté ainsi que le portoit ladite lettre, l'estimast autre que son seruiteur; mais pource que son seiour en icelle ville, en ce temps plein de suspicions ne pouoit empescher d'en faire diuers discours, autrement qu'à l'aduantage de son affection.

Veritablement laditte lettre m'estonna voyant que non seulement l'on ne se vouloit seruir de moy, mais aussi que l'on ne vouloit que nous demeurassions aux villes qui obeyssioient à sa Maiesté, & mesme en celle de Lyon, laquelle ie scauois n'estre demeurée en son obeyssance les troubles passez, que par le bon deuoir de feu monsieur de Mandelot excité & fortifié du mien, en la consideration du mariage de mondit fils; toutesfois i'escriuis aussi tost à mondit fils, d'obeïr à laditte lettre.

Mais bien tost apres ie sceus, que ceux de laditte ville de Lyon auoient pris resolution d'entrer en l'vnion des Catholiques,

& que mondit fils en estant par eux requis, auoit fait le semblable, ne les ayant voulu esconduire & abandonner, en consideration del'affection que feu Monsieur de Mandelot leur auoit portée, & del'honneur qu'ils auoient aussi fait à sa memoire.

Ie sçay bien que peu de personnes croiront que mondit fils aye franchy se sault cōtre ma volonté: si est-ce que c'est chose tres veritable, & prie Dieu qu'il me punisse rigoureusement, s'il est autrement, & faut que ie die que si deuant & depuis ladite declaration, i'eusse peu estre assure de la protection du Roy, i'eusse plustost choisi & souffert la perte de tous mes biens, voire la prison, & la mort mesme, que d'en chercher vn autre, quand i'eusse deu abandonner pere & fils, & tous mes parens & amis ensemble: chose pourquoy i'enuoiaý demander vn passeport au Roy pour sortir du Royaume, si tost que ie cogneus qu'il ne se vouloit point seruir de nous, & m'en fusse allé, si ie l'eusse receu plustost: mais il me le fit seulement rendre à Paris le 2. du mois de Mars, par vn des gens du sieur de Haute-fort.

Or voyant que non seulement le Roy ne vouloit point oüir parler de moy à la Cour ny ailleurs, mais aussi que mes ennemis

auoient eu tant de pouuoir apres de luy, que de luy imprimer en l'ame que i'estois vn traistre, de forte qu'il ne nous estoit point loisible de demeurer es villes qui luy rendoient obeïssance, & que l'on ne m'enuoyoit le passeport que i'auois demandé pour sortir hors du Royaume.

VOYANS d'ailleurs que Messieurs de Paris parloient de faire saisir les biens de ceux, qui n'entreroient en l'vnion des Catholiques, & que tous les nostres estoient en ladite ville, ou aux enuironsen leur main, ie resolus avec mon pere, poussé d'un tresardent desir que nous auions tousiours eu, de seruir de tout nostre pouuoir à la conseruation de nostre religion, & au bien public du Royaume, de nous transporter en ladite ville de Paris, où nous arriuasmes le 18. iour de Mars, & pareillement d'entrer en l'vnion & conseil desdits Catholiques, où ils nous auoient choisis & enroollez en l'establissement d'iceluy, ayant esté recherchez & viuement poursuiuis & sollicitez de ce faire, tant par Monsieur le Duc de Mayenne, que par lesdits sieurs de ladite ville, & autres dudit party,

IE supplie tous ceux qui liront le present Memoire, de ne croire que ce soit chose que nous ayons faicte pour nuire à

personne, ny pour en rechercher vengeance, ou aduantage aucun au dommage d'autrui, ou du public: ie prie Dieu me faire succomber miserablement, si nostre volonté a esté telle; ains seulement de secourir de tout nostre pouuoir, & en gens de bien, l'Eglise Catholique, & tout le Royaume au danger extreme, auquel l'un & l'autre se trouuent, & nous conseruer avec le general des Catholiques, qui sont arriuez à la veille de deuenir la proye des heretiques, si Dieu n'y met la main, & ne les assiste; comme i'espere qu'il fera, & l'en supplie de tout mon cœur, en terminant au plustost ceste malheureuse guerre & diuision qui est entr'eux, en vne bonne sorte, ou autre à sa gloire, & au salut public dudit Royaume, pour lesquels i'exposeray ma vie, tres-volontiers, comme i'ay tousiours fait tres-fidèlement, où i'ay esté employé, dont i'offre derechef pour la fin & conclusion du present escrit, de respondre à peine de ma vie, si particulièrement que l'on voudra, ou quant il me sera ordonné.

Fait à Villeroy le 8. iour d'Auril mil cinq cens quatre-vingts neuf.

Signé,

De Neuuille.

A P O L O G I E ET DISCOVRS DE MONSIEVR DE VILLEROY.

*Pour monstrier la peine qu'il a pris de faire la
paix, entre le Roy & Monsieur de Mayenne,
& de sa continuelle poursuite à la pacifi-
cation de nos miserables troubles.*

A M. DE BELLIEVRE.

MONSIEVR, ie vous enuoye le
memoire que vous m'auiez deman-
dé ; il contient les causes qui me contrai-
gnirent du temps du feu Roy, que Dieu
absolue, de me sauuer à Paris, & me ioin-
dre à monsieur le Duc de Mayenne, le-
quel ie fis deslors, plus pour moy-mes-
me, que pour le communiquer à person-
ne, ny seruir à ma iustification : car enco-
res que la nature nous excuse, voire que la
loy nous permette de defendre nostre vie,
auec impunité : toutesfois comme tout
homme de bien doit estre moins soigneux
d'icelle, que de son honneur, & que ie
sçay que le commun, lequel s'arreste plus

à ce qui apparoist, qu'à ce qui est, fait sou-
uent tel iugement de nostre deuoir & me-
rite, qui est le contentement que nos supe-
rieurs monstrent auoir de nous : i'ay depuis
ceste action tousiours desiré l'amender plu-
stost en bien faisant au public que le iu-
stifier ou l'excuser par la publication dudit
memoire ; lequel encore que ie vous le
presente maintenant, plus pour vous obeyr
& satisfaire à nostre commune amitié, la-
quelle comme elle a esté fondée sur la con-
gnoissance que nous auons de nos depor-
temens au service de nostre Roy, le garan-
tira s'il vous plaist en vostre endroit de
suspçon ; auquel il pourroit tomber enuers
vn autre, qui ne m'auroit esprooué com-
me vous, qu'il fust accompagné d'artifice
ou deguisement : car c'est vn peril ; comme
vous scauez, qui suit l'aduersité autant &
plus que l'enuie fait la felicité, laquelle
aussi vn malheureux doit fuir tant qu'il
peut ; ie dis aussi parce qu'il est impossible
qu'il s'en garantisse entierement, tant est
grande la malice des hommes, & sont
nos fins & opinions diuerses. Desorté que
souuent il nous aduient que nous, vou-
lant purger d'vne chose par vne autre,
comme nous donnons nouvelle matie-
re de parler de nous, nous empirons no-

estre marché au lieu de l'amender, spécialement quand ce que nous entreprenons & faisons ne plaist à vn chacun, ou ne nous succede heureusement, mesme au gré de nos maistres, d'autant que leur opinion ou iugement, soit par autorité ou flaterie, a communement plus de vogue & creance que la verité, chose que ie puis dire auoir esprouuee depuis ma disgrâce, en la continuelle poursuite, que i'ay faict de nos miserables troubles : car encores que i'y aye procedé avec toute l'affection, sincerité & candeur, qu'un homme qui craint Dieu & ayme son pays, peut faire, neantmoins, soit que mon entreprise aye despleu à quelques vns, ou qu'elle n'aye eü bonne yssue, i'en ay souuent esté long temps hay, & blasmé de part & d'autre, iusques à m'auoir taxé d'ingratitude enuers ma patrie, par vn escrit composé & publié par vn personnage qui me cognoissoitres mal, encore qu'il fust mon voisin, & m'eust quelque obligation. C'est pourquoy, Monsieur, i'ay estimé qu'ayant à vous contenter du premier escrit, i'y deuois encore ioindre ce second, par lequel ie pretends vous rendre compte de toute ceste poursuite : car ie confesse m'y estre embarqué apres les considerations publiques,

expres pour effacer l'opinion; qu'aucuns auoiēt conceuë & publiée de ma retraite auprès dudit Duc, & pour contenter mes amis & moy mesme, au moyen dequoy, ie vous supplie prédre la peine de le lire apres l'autre: il est veritable, comme ie puis facilement prouuer par escrit, ou par bons tesmoins; si ie voulois aussi mentir ce ne seroit en choses qui ont esté si publiques, & dont la memoire est si recente, ny en parlant à vous, estant clair voyant & nous honorant plus que' tout autre.

MONSIEVR, ie commenceray donc pour vous faire entēdre chose que vous auez peut estre experimentée comme moy; c'est qu'e mon aduersité i'ay certainement trouué & receu plus d'assistance de ceux, auxquels i'a-uois moins fait de plaisir & seruice en prosperité, que des autres, soit que l'enuie de ceux qui nous approchent & cognoissent le plus soit communément plus grande que celle des autres; ou qu'ils estiment auoir plus grande occasion de craindre de se faire preiudice en parlant pour leur amy, que ne doiuent auoir ceux qui nous sont moins tenus; ou bien qu'il y ait veritablement des personnes qui ayent l'ame au prix des autres si bonne & genereuse, qu'ils s'estudient à bien faire, à quiconque en a

besoin , comme il a pleu au Roy, qui est à present, & à feu Monsieur de Chastillon en uſer en mon endroit : lors qu'estant le feu Roy arriué à Estampes, venant deuers Paris, apres la bataille de Senlis, ils supplierent sa Maieſté à la poursuite de Bigot, qui sert maintenant de Secretaire à Monsieur de Guise, de me permettre de demeurer en ſeureté dans ma maison, comme i'en auois enuoyé charge audit Bigot, que ie ferois avec mon pere & môs fils, si elle l'auoit agreable & nous y vouloir proteger, contre ceux qui diſoient auoir coniuéré noſtre ruine & celle de noſtre maison, enquoy toutesfois ils furent eſconduits; de sorte que nous fumes contraincts apres la prinſe du pont de Poissy (car nous eſtions à Aincour) de nous retirer tous à Paris, aupres du Duc de Mayenne, où peu de iours apres ſuruint la nouuelle de la mort du feu Roy; à la ſuite duquel ledit Bigot eſtoit demeuré, dont ſe reſouenant le ſieur de Chastillon, il l'enuoya querir & le fit parler à sa Maieſté, laquelle luy commanda de me voir, & me venir trouuer avec vne lettre de sa main, pour me dire qu'elle deſiroit parler à moy, partant que i'eusse le lendemain à me rendre dedans le parc de Boulongne, où elle se ſtrouueroit :

(car

(car l'armée de la Maieſté eſtoit encores à ſainct Cloud) diſant qu'elle ſe vouloit ſer-
uir de moy pour faire la paix, à laquelle el-
le eſtoit tres-diſpoſée; & de faire pour y
paruenir tout ce qui y ſeroit iugé raiſon-
nable, & vtile, meſme de contenter Mon-
ſieur de Mayenne. Je fus tres-aiſe de ceſte
ouuerture, de laquelle i'aduettis le iour
meſme ledit Duc de Mayenne, le priant
me permettre de voir ſa Maieſté, afin d'en-
tendre plus particulièrement ſon inten-
tion: mais il me refuſa, diſant que chacun
entreroit en ombrage de ceſte miennē veuë;
& qu'elle ne pourroit eſtre ſi ſecrete qu'el-
le ne fut ſceuë; & partant à luy encore pre-
iudiciable, toutes choſes eſtans encores ſi
meuës, comme elles eſtoient à cauſe de
la mort du feu Roy; laquelle il eſperoit
apporter vn grand changement aux affai-
res en ſa faueur, pour eſtre ſa Maieſté de
contraire religion. De faiſt il eut opinion
qu'elle deſiroit parler à moy, plus pour
faire cognoiſtre aux Catholiques de ſon
armée, vouloir traicter, & par ce moyen
les garder de ſe deſbander, que pour en-
uie qu'elle euſt de faire autre choſe. De
ſorte qu'il me fut permis ſeulement fai-
re ſcauoir à ſa Maieſté par ledit Bigot, que
ſ'il luy plaiſoit enuoyer quelqu'un des

siens vers moy, iusques en ceste ville de Paris, ie le receurois, & mettrois peine d'obeyr à ce qu'il me manderoit : adioustant que ledit Duc m'auoit dit, qu'il n'auoit aucune querelle particuliere avec sadite Maiesté, laquelle il honoroit grandement, & d'autant plus qu'il auoit sçeu qu'elle n'auoit approuué la mort de Messieurs les freres.

SVR ce estant party, ledit Bigot ramene deux iours apres le sieur de la Marfilliere Secretaire de sa Maiesté, que ie receus en ma maison, mais ledit Duc ne voulut iamais parler à luy, comme ie desirois qu'il fist; d'autant qu'il auoit expresse charge de l'asseurer de la bonne volonté de sa Maiesté à la paix, luy représenter combien elle estoit necessaire, que sa Maiesté estimoit qu'il ne tiendrait à luy, qu'il n'eut tres-bonne part aupres d'elle, luy remonstrant aussi que tous les Princes & officiers de la Couronne, Seigneurs, Gentils-hommes & autres, outre ce qui s'estoit trouué en grand nombre en l'armee du feu Roy à sa mort, auoient desia promis & iuré à sa Maiesté toute loyauté & obeïssance, estant demeurez contents d'elle pour le faict de la religion, moyennant vne promesse qui leur auoit esté faicte, de laquelle il me dit la sub-

stâce, & dont il m'en enuoya depuis le double, que nous n'auions encores veu; adioustant, que si les choses se pouuoient accommoder, l'on pourroit donner aussi moyen d'adoucir les esprits desdits Catholiques, lesquels ils disoient grandement estre irritez contre la personne dudit Duc, à cause de la mort du feu Roy leur Seigneur souverain, laquelle ils luy imputoient, qu'ils auoient tous protesté de poursuiure la vengeance & punition iusques au bout: en quoy sa Maiesté s'estoit aussi engagée si auant avec eux, qu'elle ne s'en pouuoit départir, que pour vne vtilité telle que pouuoit estre la pacification du Royaume, laquelle pourtant sa Maiesté desiroit que ledit Duc voulut embrasser, afin d'auoir occasion d'oublier le passé, le traicter & viure avec luy cy apres, comme sa qualité le requeroit, ce que au deffaut dudit sieur de la Marfilliere, ie fis entendre audit Duc: mais il me donna charge de luy respondre, que sa religion & le respect qu'il portoit à Monsieur le Cardinal de Bourbon, lequel il auoit recogneu pour son Roy, comme celuy à qui de droit la couronne appartenoit, ne luy permettoit d'entendre à ceste ouuerture: que Messieurs ses freres auoient pris les armes du temps du feu Roy comme ils

disoient auoir faict exprés, pour empescher que le sceptre François tombast entre les mains d'un Prince de contraire religion, dont le Royaume auoit esté menacé, par la mort de feu Monsieur le Duc d'Alençon: à present que l'occasion de s'y opposer estoit plus vrgente & necessaire que iamais, il ne vouloit faire ce tort à la memoire de Messieurs ses freres, à sa conscience, ny à la fidelité qu'il deuoit audit sieur Cardinal d'y manquer, ioint qu'il auoit engagé sa foy, & donné sa vie à la cause publique, par le serment qu'il auoit faict, receuant la charge dont il auoit esté honoré: de sorte qu'encore qu'il eut vn tres grand desir d'abreger la guerre, pour obuier aux maux qu'il preuoyoit qu'elle apporteroit; toutefois c'estoit chose qu'il ne pouuoit entreprendre seul, & sur tout que ledit sieur Cardinal ne fust libre, afin de se conduire par son commandement: que si la mort du feu Roy luy auoit acquis tant d'ennemis, comme disoit ledit sieur de la Marbilliere, elle luy auoit d'ailleurs apporté vne telle consolation du sang de ses freres qu'il en porteroit plus patiemment toutes sortes de perils, partant qu'il auoit plus à louer Dieu, que de se mettre en peine de ce qui estoit aduenu, qu'il ne vouloit entrepren-

dre de donner conseil à sa Maieſté, ayant les armes en main contre elle: mais qu'elle deuoit conſiderer, que difficilement il les pouoit poſer & entendre à aucune negocia- tion, tant que ledit ſieur Cardinal ſeroit priſonnier, & qu'elle perſeuereroit en ſa religion.

LEDIT ſieur de la Marſilliere comme tres aduiſé & affectionné ſeruiteur de ſa Maieſté, me repliqua pluſieurs raiſons, principalement ſur la recognoiſſance & liberté du dit ſeigneur Cardinal & la religion de ſa dite Maieſté, leſquelles avec tout ce qui ſe paſſa entre luy & moy, ie ne vous repréſenteray, d'autant que ledit Duc de Mayenne voulut que les choſes demeuraffent aux termes ſuſdits: toutesſois ſa Maieſté ayāt ouy ledit ſieur de la Marſilliere, eut opinion qu'õ ne luy auoit parlé librement, à caüſe de ſa religion; de forte, que ledit Bigot me fut encores r'enuoyé avec vn trompette de ſa Maieſté, & vne lettre de M. de Liencour, premier eſcuyer, par laquelle il me mandoit qu'il eſtoit neceſſaire qu'il parlaſt à moy pour choſe qui importoit grandement, laquelle il ne me pouoit eſcrire ny faire ſçauoir, par vn autre, partant il me con- uioit d'aller iuſques à Liencour. Le Roy eſtoit lors du coſté de Clermont en Beau-

uoisis, où il se trouueroit aussi-tost que moy moyennant ledit trompette & vn passeport pour ma seureté: ledit Bigot me dit que ceste recherche procedoit encores du cōmandement de sa M. laquelle depuis le retour dudit Marfilliere auoit monstré auoir plus grande enuie de parler à moy que deuant dont i'aduertis ledit Duc, le suppliant tres-instammēt me permettre ce voyage: toutesfoisie ne le peux oncques vaincre, n'y l'entreprendre sans sa permission, estant où estoit mon fils quasi desesperé & desploré de l'arquebusade qu'il auoit receu au siege de Pontoise: de façon que ie fus contrainct de m'excuser de rechef deuers sa M. & par ce que ie voyois; que ledit Duc faisoit estat de partir de Paris, & de s'approcher de saditte M. i'escruiy audit sieur de Liécour que i'estimois que nous serions bien-tost si près les vns des autres; que ie pourrois alors auoir congé & moyen de le voir, dont i'auois tres grand desir, & de me retirer en le seruant le soin qu'il monstrois auoir de moy.

MONSIEVR le President Ianin estoit nouvellement arriué à Paris venant de Lorraine, lequel auoit veu le commandeur Moreau qui reuenoit d'Espagne, & auoit rapporté audit Duc qu'il deuoit estre bien-tost secouru de grandes forces, leuées en Alle-

magne, Suisse, aux pays bas & en Lorraine, & de grande somme de deniers du costé d'Espagne, partant querien ne luy mănquerait : ce qui auoit tellement enflé les espérances dudit Duc qu'il me pria de faire qu'on ne m'enuoyast plus des messagers de la part de sa Maïesté, d'autant que plusieurs commēçoient à en murmurer, & mesme Dō Bernardin de Mendoza Ambassadeur du Roy d'Espagne, lequel auoit eu le vent du voyage dudit sieur de la Marfilliere & de l'arriuee dudit trompette; deslors ie cogneus que ledit Duc n'auoit pas grande enuie de la paix.

D'AVANTAGE ledit Dom Bernardin de Mendoza estimant que ie ne pouuois estre instrument fort propre pour seruir aux desseins de son Roy, me les descouuroit & communiqua deslors plus clairement qu'il n'auoit encore fait audit Duc; n'y à autre, avec dessein de m'y engager : mais comme ils tendoient à vsurper le Royaume, i'en demeuray si scandalisé, que l'ayant faict entendre audit Duc, ie le suppliay en la presence dudit sieur Ianin, de me donner congé de me retirer en ma maison, s'il ne s'y vouloit opposer, luy declarant que ie ne voulois auoir part en vne entreprise si iniuste & si impossible qu'estoit celle dudit Roy, laquelle des-honnorerait tous ceux

qui s'en mesleroyent & seroit cause de destruire la religion & le Royaume; adioustant que puis que le Roy auoit tel dessein, il ne deuoit aussi esperer de faire fortune par son moyen, & qu'il acquerroit plus de gloire, de grandeur, & de contentement en aydant au repos du Royaume, sous l'obeyssance d'un Prince François, qu'il ne feroit en fauorisant un dessein estrange, lequel luy feroit en fin perdre la reputation, & ses amis, & peut estre perdre les biens & la vie.

Monsieur de Lorraine s'estoit nouvellement saisi de Verdun, & voyant que chacun aspiroit à l'usurpation ou separation du Royaume, ce qui augmentoit mon despit de mescontentement avec plaine toutesfois ledit Duc m'assura par serment, qu'il ne consentiroit jamais, ny à l'un ny à l'autre; & au reste qu'il scauroit mieux que ledit Dom Bernardin, que ledit Roy d'Espagne n'auoit autre intention que de voir regner en ce Royaume un Catholique; de l'amitié duquel il peust estre assuré, comme ledit President Ianin luy auoit rapporté que luy auoit confirmé ledit Moreau: surquoy il obtint de moy que ie ne cesserois que ie n'eusse veu ledit Moreau, & sceu de luy la verité du dessein de son Roy, au-

quel ie condescendis plus volōtiers, d'autāt que i'esperois l'accompagnant au voyage qu'il vouloit faire, de voir par ce moyen ledit sieur de Liencour comme ie luy auois escrit.

L'A V O I S neantmoins ſceu que ſa Maieſté auoit eſté mal ſatisfaicte de la reſponſe que ie luy auois faicte, & qu'aucuns m'auoient pour cela depeinct par vn bon Eſpagnol, ennemy du bien & repos de la France, & en particulier de la perſōne de ſa Maieſté, à quoy auoit ſeruy à la perſuader l'opinion qu'on luy auoit dict de leur reconciliation, comme i'ay depuis apriſ d'elle meſme, & ſceu tout le compte qu'elle auoit deſcouuert des lettres par interceptes que ledit Dom Bernardin faiſoit de moy à ſon maître.

A P R E S la mort du feu Roy, ledit Duc fut conſeillé & ſollicité d'aucuns de ſe faire eſlire & declarer Roy de France par les Catholiques, auxquels il commandoit, luy remonſtrant qu'il ne deuoit perdre ceſte occaſion, de remettre en ſa maiſon la Couronne qui en auoit eſté oſtée, & eſtant deſia recogneu & obey des principales villes du Royaume, & d'vn grand nombre de Nobleſſe, comme il eſtoit, ayant à faire à vn Prince de contraire religion, auquel la

succession pouvoit estre iustement debattuë: lequel ne seroit iamais bien obey, ny aymé des Catholiques du Royaume: que si à ce commencement ceux qui auoient seruy le feu Roy, faisoient contenance de le suiure, c'estoit à cause du regret qu'ils auoient encores tout recent de la mort du feu Roy, plustost que pour affection ou inclination qu'ils eussent; mais comme les Catholiques & huguenots estoient incomptables, ils n'auroient gueres vescu ensemble, que la memoire des haynes & iniures passees durant nos guerres se renouelleroit, laquelle leur feroit bien-tost oublier ceste paction; que le principal estoit que lors ils trouuassent vne Royauté formée & estable à laquelle ils peussent auoir recours, d'autant que les François estoient tous accoustumés à la Monarchie, que tous autres gouuernemens leurs estoient odieux; & qu'on ne les contentoit pas, leur donnant pour Roy monsieur le Cardinal de Bourbon, comme aucuns proposoient à cause qu'il estoit prisonnier, & Ecclesiastique, qu'ils vouloient iouyr de leur Roy, qui fust belliqueux, & allast à la guerre comme eux, & non en seruir vn par imagination, qui ne peust voir leurs actions, les recognoistre,

ny leur bien faire; que ledict Duc seroit accusé de faute de courage, s'il mespri-
soit ceste occasion: qu'il n'y auoit que
les simples & pusillanimes qui attribuoient
ce refus à bonté & equité, pour estre
ceste entreprise digne d'un cœur gene-
reux, tant pour le merite de la chose,
que de la commodité qu'il auoit d'y par-
uenir; c'estoit faire les affaires du Roy de
Nauarre, que de recognoistre ledit sieur
Cardinal son oncle: car c'estoit en fin
confesser la couronne appartenir à la mai-
son de Bourbon, lequel toutesfois l'on
pouuoit debatre: Que de s'amuser à de-
fendre le droit de l'oncle contre le nep-
ueu, c'estoit vn subiect bien fragile, à
cause de l'aage, & de la personne dudit
Cardinal, qui estoit au pouuoir d'un nep-
ueu; qu'aduenant sa mort, il ne restoit
plus que le pretexte & titre de religion
contre le Roy, lequel cesseroit quand
il voudroit aller à la Messe, comme il
ne falloit point doubter qu'il ne fit en
fin, si autrement il ne pouuoit faire ses
affaires; qu'aussi diroit-on que ledict
Duc auoit mis ledict Cardinal en ieu
exprés, pour sous son nom couvrir son am-
bition, & peut estre aduancer ses iours, car
peu de gens croioient qu'il l'eust fait par

affection ny iustice. Ce pauvre Prince tenu prisonnier estant demy mort au monde, & la iustice peu considerable, quand il estoit question de regner: de sorte qu'en suivant tel chemin, il ne seroit exempt de calomnie & de blasme, & si perdrait sa part d'une tres-belle & glorieuse fortune, laquelle il ne recouvroiroit iamais: car quand bien ledit sieur Cardinal mourroit, & que ledit Roy persisteroit en sa religion, il resteroit tousiours d'autres Princes de sa mesme maison, faisans profession de la religion Catholique, auxquels ledit Duc seroit d'autant plus obligé de conserver leur droit par ces mesmes raisons qu'on luy representoit, pour ledit sieur Cardinal, qui n'auroit le ieu si beau qu'il auoit maintenant à cause de la diuersité de la religion du Roy, & mesme de la ptouision de Monsieur de Guise son nepueu, qui pourroit avec le temps estre deliuré, & apres luy enuier ceste grandeur, qu'il ne falloit douter qu'il ne fust assisté du Pape, & du Roy d'Espagne, apres ce coup: car cōme il seroit sans remede, il seroit tousiours plus aysé de le favoriser, que d'acquiescer au Roy de Nauarre, estant pour sa religion & pour la dispute du Royaume de Nauarre, ennemy irreconciliable de l'un & de l'autre, qu'estant authorisé de sa Sain-

été, & secours dudit Roy d'Espagne, tout luy deuoit estre possible : car il acquerroit vn grand honneur d'espouser ceste entreprise, traualier & mourir pour icelle, cōme auoient faict ses predecesseurs ; qu'il poursuuiust donc sa fortune courageusement sans varier, quoy qu'il en peust arriuer : car tels desseins vouloient vne ame forte & constante, tels qu'il s'estoit monstré depuis la mort de Messieurs ses freres, dont Dieu luy offroit & liuroit maintenant le loyer qu'il ne pouuoit mespriser sans faire tort à la memoire des siens & pareillement à ses enfans ; que quand Messieurs les Ducs de Lorraine & de Sauoye n'approuueroient du commencement ceste resolution, il luy seroit facile apres la leur faire trouuer bonne, qu'au pis aller il en seroit quitte pour leur faire part de sa fortune. Aussi seroit-il difficile qu'il mangeast seul ce morceau, non plus qu'auoient faict ceux qui auoient autresfois tenu ce chemin, lesquels n'auoient rien espargné ny refusé pour y paruenir ; que c'estoit le principal aussi d'entrer en ieu, & auoir part au hazard, non comme procureur ou Lieutenant d'vn autre, ainsi que l'on les voudroit rendre, mais comme partie interessée, & pour telle recogneuë car les temps acheueroit apres le deme-

rant, s'il s'en rendoit digne deuant Dieu, & les hommes: que si maintenant il reconnoissoit ne pouuoir ny deuoir aspirer à ce grade, au moins deuoit-il rompre & empêcher la reconnaissance dudit Cardinal de Bourbon; d'autant que par icelle non seulement il priuoit luy & toute sa maison de toute ceste fortune, mais aussi c'estoit le moyen d'en pouuoir à l'aduenir disposer en faueur d'un autre Prince que de la maison de Bourbon, laquelle estoit ennemie de la sienne.

A ce conseil qui estoit assez chatoüilleux, ceux qui y vouloient cōtredire n'emploierent pour toute raison que l'impossibilité, Car Monsieur, comme vous sçauiez, en telles matieres celles qui sont fondées sur l'equité ont ordinairement peu de credit, l'honneur & la iustice y suivent l'utilité, sinon deuant Dieu, au moins deuant les hommes. Ledit Duc auoit desia perdu partie de la bonne opinion, que du commencement l'on auoit eüe de luy, autant peut-estre par la faute d'autrui, que par la sienne; tant y a que son malheur estoit tel: car ces peuples qui s'estoient persuadés, en prenant les armes que personne ne leur pourroit resister, ayant depuis esprouué le contraire, & n'agueres

veu ledit Ducauxabois avec eux en la ville de Paris, s'en prenoient à luy, de façon qu'on ne luy portoit l'affection & obeyssance que l'on souloit faire : partant soit que leldits peuples fussent desia pratiquez, ou qu'ils en parlaissent par experience ou iugement, ils disoient sur cette occasion assez communement & ouuertement, qu'il n'estoit puissant assez pour conseruer la religion, & soustenir ceste guerre. Sur cela aucuns vouloient que l'on esleust le Roy d'Espagne, & que l'on se iettast du tout entre ses bras : les autres que l'on print monsieur le Duc de Lorraine, ou l'un de Messieurs ses enfans comme chef de la maison, se persuadant que ledit Roy d'Espagne l'approuueroit, & mesme y engageroit sa fille. Aucuns proposoient encores monsieur le Duc de Saouye comme issu d'une fille de France, desia allié & suporté de la Couronne d'Espagne, Prince courageux, voisin du Royaume & puissant : mais la grande & saine partie iettoient les yeux sur monsieur le Cardinal de Bourbon, auquel l'on disoit que la Couronne appartenoit de droit pour en estre plus proche d'un degré que son nepueu, qu'il auoit esté ainsi iugé par les Estats & Parlemens du Royaume, que c'est un

grand aduantage que de combattre & souffrir pour vne bonne & iuste querelle. D'auantage que ledit Cardinal estoit Prince & Catholique, auoit esté chef de party, & comme tel, auoit beaucoup souffert, d'ot il estoit encore prisonnier, que l'on estimoit qu'il estoit facile de le recouurer & pratiquer par force, qu'il seroit cause de r'allier tous les Catholiques ensemble, qui estoit le moyen de destruire bien tost les huguenots, sans estre contrainct de mendier l'assistance des estrangers, laquelle ne nous seroit donnée pour neant. Peu certes inclinoient audit Duc de Mayenne, à cause de sa foiblesse, & du peu de contentement que l'on auoit de luy, & de ceux qui manioient les affaires auprès de luy : seulement aucuns deses domestiques, ou leurs parens, ou amis en petit nombre parloient pour luy, & comme il ne pouuoit se faire eslire, que par le Parlement ou par le conseil general de l'uniõ qui n'estoit lors en sa force, ou le corps des villes, combien que telles compagnies, fussent remplies de personnes de différentes humeurs & opinions, non encores bien pratiquez, instruits ny resolu de ce qu'elles deuoient faire, & desirer en ceste occasion, s'accordoient toutesfois à ne vouloir recognoistre ledit Roy de Nauarre à cause

cause de sa religion, ny eslire ledit Duc de Mayenne pour Roy pour les raisons susdites. Sur cela estoit fondée principalement l'impossibilité du dessein dudit Duc; à quoy ledit Dom Bernardin de Mendoza au nom du Roy son maistre, & les seruiteurs des autres Princes, qui aspiroient à ce grade ne s'endormoient pas, ce qui estoit mieux cogneu dudit Duc que de ceux qui luy en parloient: partant ils prirent conseil, & resolurent d'en donner le tiltre à vn autre, & mettre peine d'en maintenir & conseruer l'effect, puisqu'ils ne pouuoient auoir l'autre pour luy; & comme ledict sieur Cardinal estoit plus propre que tous autres, pour seruir à ce dessein, tant pour la qualité de son aage qu'à cause de son absence; ioinct que ses pretentions estoient plus plausibles, il s'arresta à luy, le recogneut le premier, & le fit proposer, recognoistre & proclamer au Parlement, au conseil del'vnion, & par ceux de la ville par l'aduis dudit Dom Bernardin, lequel en fit grande instance; aucuns ont dit par affection comme celuy qui se vançoit estre yssu d'une fille de la maison de Bourbon mariée à celle de Mendoza en Espagne; mais plus à mon aduis pour donner temps & moyen à son Roy, & de dref-

fer les pratiques en ce Royaume & assembler & faire venir les forces & deniers pour mieux executer son dessein ; iugeant bien que ledit Cardinal ne la feroit pas longue, que son nom seroit plus propre pour seruir de planche à son maistre que celui d'un autre, & principalement dudit Duc de Mayenne, l'ambition & auctorité duquel il redoutoit d'autant que ceste opinion par laquelle la couronne estoit adiugée & conseruée à la maison, à laquelle de droit elle appartenoit, iustificoit mieux la cause publique, & rendoit nos diuisions & guerres ciuilles moins dangereuses ; elle fut incontinent embrassée d'un chacun, & veritablement à propos pour le salut du Royaume, puis qu'il n'y auoit moyē de persuader lors à ce peuple d'enuoyer vers sa Maiesté traicter avec elle, ny de la recognoistre ; car si ledit Duc eust pris deslors resolution de contenter le Roy Catholique, & tout autre Prince, il ne falloit que surseoir la declaration de recognoistre ledit Cardinal, cōme il pouuoit faire facilement, sous pretexte de sa captiuité, & d'assembler ceux du party pour en ordonner ; car par ce moyen il en eust disposé quasi comme il eust voulu, tant estoit grāde la hayne audit Roy, fondée sur la religion, & bonne opinion que la commune

auoit de la probité, pieté, forces & moyens dudit Roy d'Espagne, & de ses ministres & seruiteurs ; de sorte que ceux qui furent cause de ceste resolution ne firent pas petit seruice au Royaume. Ledit Duc de Mayenne partit de Paris avec son armée, le premier iour de Nouembre, passa par Noisy, Mante, Vernon & Trepagny : alla assieger la ville de Gournay, dans laquelle commandoit le sieur de Rubempré avec son regiment de gens de pied, là suruint le commandeur Moreau, lequel estoit party d'Espagne, deuant la mort du feu Roy, par tant il ne sçauoit certainement quel conseil prendroit son maistre, apres ceste nouvelle: car si sa Maiesté eust vescu c'estoit biē son intention de secourir M. de Mayenne d'hommes & d'argent; mais sous main & sās engager son nom & ses bandes, cōme desia il auoit commencé ; lors qu'il auoit enuoyé en France le Comte de Collate avec son regiment de Lansquenets qu'il auoit esquippez à son seruice, & promis faire seruice audit Duc, encore qu'il fust payé de ses deniers. Cela fut cause qu'à l'abordée ledit Moreau ne me parla qu'en termes generaux de l'intention de son maistre, cōme il auoit fait audir President Ianin en Lorraine : & neantmoins comme il estoit de son na-

turel assez prompt & impatient, & aussi qu'il estimoit auoir si bon ieu, qu'il ne se deuoit plus contraindre, il ne tarda guerres à me donner trop d'occasion de croire qu'il n'auoit pas moins de fureur pour son maistre, que ledit Dom Bernardin : car il ne parloit que de faire vn Roy de France de sa main, qui fust grand & puissant assez par soy mesme & sans secours d'autrui, en bannir du tout l'heretique & les adherans, & plusieurs autres contes semblables, par lesquels l'on descouuroit que la mort du Roy luy auoit aignifé l'appetit.

LE Roy estoit retiré du costé de Dieppe avec les forces qu'il auoit, où ledit Duc s'achemina incontinent apres la prinse de Gournay qui ne dura que deux iours, reprint en passant Neuf Chastel, & apres auoir ioinct monsieur le Marquis du Pont & monsieur le Duc d'Aumalle, se vient presenter deuant la vile de Dieppe, du costé du Pollet avec son armée, qui estoit composee de quatre cens cheuaux François, Reistres & Vuallons, six mil Suisses, trois mil Lansquenets, & de cinq à six cens hommes de pied François. Quelques iours apres i'obtiens permission dudit Duc, de voir Monsieur de Liencourt dont ie l'aduertis : mais il me respondit que la recherche qu'il

en auoit faicte auparauant n'estoit pas venue de luy, partant qu'il sçauroit & me manderait si l'on l'auroit encore agreable ; toutesfois ie n'eus depuis aucune nouuelle de luy, dont i'appris que de cela auoit esté causee l'impression susdite que sa Maiesté auoit conceuë de moy, perdis ceste occasion à mon tres-grand regret, par laquelle i'esperois ietter les fondemens d'une bonne negociation, pour abreger nos miseres.

MAIS il s'en representa vn autre bien viste, apres par la prinse du sieur de Belin, l'un des Mareschaux de camp de l'armée dudit Duc aduenü au combat d'Arques, auquel Dieu fauorisa miraculeusement sa Maiesté : car encores que le logis de son armée fust tenu aduantageux, & le chemin pour y aller tres-difficile & perilleux, toutesfois comme les forces dudit Duc estoient sans comparaison plus grandes que celles de sa Maiesté, si elle eussent aussi bien assailly comme les autres se deffendoient, sa dite Maiesté eust couru grande fortune. Ledit sieur de Belin y demeura doncques prisonnier à la teste de l'armée, lequel estant deliuré sur sa foy, vint trouuer ledit Duc au pont d'Auney, où il s'estoit retiré, à cause que son armée s'estoit desbâdee depuis son partement de deuant la ville de Dieppe pour

recueillir quelques gens & deniers qu'il esperoït tirer des pays Bas, par le moyen dudit Moreau.

LEDIT sieur de Belin luy dit, que sa Maïesté l'auoit enuoyee expres pour luy demander la paix, de laquelle elle auoit telle enuie, que sans auoir esgard à sa dignité, ny consideration quelconque, elle auoit bien voulu le rechercher maintenant, que l'on ne pouuoit dire que ce fust par necessité qu'elle le fit, puis qu'il s'estoit reculé d'elle. Mais pour la compassion, qu'elle auoit du public & du Royaume : ledit sieur de Belin luy dit aussi, comme les Catholiques qui estoient avec sa Maïesté le prioient de faire semondre sadite Maïesté de quitter sa religion & embrasser la Catholique, & ne laisser ce faisant de traiter avec elle, & la recognoistre, se promettant par ce moyen d'auoir la paix à la gloire de Dieu, ou bien qu'il en réussiroit vn tres-grand bien & aduantage, pour la defense de nostre religion, qui apporteroit audiect Duc tres-grand honneur.

CESTE proposition fut mise en deliberation & deslors fort debatue prés dudit Duc: car les vns vouloient que le conseil desdits Catholiques fust suiuy, & les autres y resistoient. Ceux là disoient que telle

recherche ne pouuoit estre que tres vtile à la religion & au Royaume, tres-honorable à ceux qui la feroient, & mesme agreable à Monsieur le Cardinal de Bourbon estant en prison, & quasi hors d'esperance d'en sortir, comme il estoit: car il aduiendroit d'icelle, que le Roy changeroit de religion ou non; s'il faisoit le premier, Dieu en seroit glorifié, la religion restaurée, & le Royau-
me mis en paix, au grand honneur & ad-
uantage de Monsieur de Mayenne & de s^{on} party, parce qu'il seroit recogeu auth^{eur} de tel changement, & qu'il obtiendrait pour la grandeur de sa maison la seureté de nostre religion, & de tous ses partisans; que telles conditions qu'il voudroit demander, il les auroit, & asseureroit aussi la vie dudit sieur Cardinal, laquelle couroit fortune en ce debat, & peut estre seroit cause de sa liberté, laquelle il ne falloit esperer, puis que nostre armée ne s'y estoit acheminée & employée au departir de Paris, & qu'il auoit esté liuré par Monsieur de Chauigny au Roy son nepeveu, lequel l'auroit enuoyé à Fontenay en Poictou, en la garde de ceux de la religion; seroit cause de la deliurance de Messieurs de Guise & d'Elbœuf, dont il seroit, loüé & fortifié, & que c'estoit tout ce qu'il luy restoit à faire

eterniser d'une gloire immortelle, la poursuite qu'il auoit faicte si heureusement de la mort de Messieurs ses freres : & que si sa Maiesté refusoit d'embrasser la religion apres son offre, non seulement il iustificeroit sa cause deuant Dieu & les hommes, dedans & dehors ce Royaume avec la memoire de sesdits freres, & les armes passées, mais aussi apporteroit vne telle diuision entre sa Maiesté & les Catholiques qui l'assistoient, que son party en seroit très-fortifié, que c'estoit le but auquel il deuoit tendre, le preferant à toute autre chose : les autres remonstroient qu'estant nostre guerre fondée sur la religion plus que sur le droit de la Couronne, ledit Duc ne pouuoit en saine conscience, ny ne deuoit par raison s'engager à tel offre, sans la permission du Pape, le consentement des Prelats, villes & communautéz du party, mesmes des Princes estrangers qui l'auoient assisté iusques alors, d'autant que c'estoit vn coup de partie que chacun trouueroit mauuais qu'il entreprint de iouer sans eux, lesquels encores qu'ils l'eussent esleu chef du party, n'auroient toutesfois entendu ny esperé, qu'il disposast du general sans les appeller, & quand me de l'utilité publique, il s'en dispenseroit, il ne seroit suivi des autres : de façon qu'au lieu de

pacifier le Royaume, il le troubleroit & diuiseroit par aduanture plus qu'il n'estoit: quoy aduenant ses moyens ne sauueroiēt le public, ains demeureroit mesprise de tous, ce qui leur donnoit cognoissance de soupçonner, que ce conseil des Catholiques apporté par ledit sieur de Belin estoit artificieux, & mis en auant du contentement de sa Maiesté, exprés pour faire perdre audit Duc ses amis dedans & dehors le Royaume, & sur tout le Roy d'Espagne, lequel ils n'estoient d'aduis qu'il me contentast aucunement, comme celuy seul duquel dependoit son principal appuy, mesmement pour chose si incertaine qu'ils estimoient qu'estoit le fruit de ceste ouuerture, pour auoir les Catholiques qui estoient aupres de sa Maiesté fait, preue depuis la mort du feu Roy auoir peu de soin de leur religion, pour maintenant esperer, qu'ils fissent mieux à l'aduenir; que leur deuoir estoit de sommer & preser eux-mesmes le Roy de se faire Catholique, & l'honneur de sa Maiesté, qu'elle se resolut à leur requeste plutost qu'à la postulation de ceux qui luy faisoient la guerre, & se contentast qu'apres sa conuersion faicte comme il conuient, elle fust recogneuë d'eux: ils remonstroient aussi le pey

ril que couroit la religion en cas de dissimulation en sa conuersion, concludant qu'ils trouuoient ceste ouuerture si dangereuse, tant pour ledit Duc que pour le party, que non seulement il la falloit reietter, mais aussi celer à vn chacun, pour obuier aux diffiances & diuisions qu'elle engendreroit si elle estoit descouuerte & communiquée: les premiers repliquoient que la guerre estoit pour aucuns bien plus ambitieux que religieux, comme l'on commençoit à descourir, & mesme de la part des Espagnols, lesquels au lieu de secourir ledit Duc, des forces qu'ils auoient faict approcher de la frontiere, sous la conduite du sieur de la Motte gouverneur de Grauelines, avec lesquelles il eust peu du tout renfermer saditte Maiesté dedans Dieppe, comme il leur auoit remonstré, & ce faisant gagner vn grand aduantage sur luy, auroient voulu surprendre la ville de Cambray sur Balagny qui auoit enuoyé ses forces, & s'estoit luy-mesme acheminé au secours & seruice dudit Duc, & de la cause: que leur but estoit d'vsurper l'Estat, & le dissiper, quoy estant les armes & les assistances seruiroient plus à nous des-vnir & destruire qu'à autre chose, que l'on deuoit bien porter honneur & respect au Pape, & par-

tant ne rien conclurre avec sa Maieſté, ſans ſon aduis & permiſſion, d'autant qu'il eſtoit beſoin que ſa Saincteté mit la main à la conuerſion de ſa Maieſté, pour la rendre parfaite, qu'il en falloir auſſi communiquer aux Prelats, Seigneurs, villes & communautéz du party, afin de ne rien faire ſans eux, pour les raiſons repreſentées : mais que ledit Duc ayant plus de cognoiſſance des affaires que perſonne, ne deuoit faire de difficulté d'eſbaucher ce remede à nos maux, s'il iugeoit qu'il fuſt à propos, pour n'en perdre l'occaſion, & apres le pourſuiure & paracheuer, par l'aduis & conſentement des autres enuers leſquels ils ne pouuoient prendre creance, ſi veritablement & par eſſect ils n'en recherchoient le bien & auantage de la religion & du Royaume, leſquels couroient plus grand peril, la guerre durant, ſi elle n'eſtoit mieux iuſtifiée & conduite, que d'un bon accord fait avec ſa Maieſté conuertie, quand meſme il y auroit du deſguiſement : d'autant que l'ambition & la conſuſion qui eſtoient audit party, rendoient les armes d'iceluy malheureuſes, & que l'on pouuoit par ledit accord bridertellemēt ſa Maieſté, qu'il ne ſeroit apres en ſon pouuoir de nuire à la religion ny à ceux du party, quād meſme elle en

auroit volonté : reiettant ce conseil c'estoit non seulement affermir au service de sa Majesté lesdits Catholiques qui estoient avec elle, mais aussi luy en donner des nostres, lesquels cognoissans comme plusieurs commençoient desia de faire, la malice des Espagnols & leur but, composeroient avec elle & l'iroient trouver & servir, que ledict Duc pouvoit facilement se conduire en ce moyen sans se faire tort ny offenser personne; & que tât s'en faut qu'il deust craindre, que lesdits Espagnols fissent bande à part, & l'abandonnassent comme l'on disoit, qu'au contraire, quand ils verroient que luy & le party se pourroient passer d'eux, ils en feroient plus de conte, & rechercheroient davantage son amitié, comme gens mesprisans ordinairement ceux qui ont besoin d'eux, à quoy ils se reduiroient tellement avec le party, s'il refusoit ceste occasion, qu'il seroit apres contraint de servir tout à leur dessein, voire devenir esclave d'iceux que neantmoins ils n'estoient d'advis de les mespriser ny offenser si faire se pouvoit, tant pour l'assistance que l'on en auoit receüe, qu'estoit encore leur amitié & association vtile & aduantageuse au public & au particulier dudit Duc, mais bien de ne laisser de faire pour eux ce que

l'on iugeoit estre honnesté, iuste & vtile à la cause, comme ils concludoient qu'estoit ladite ouuerture, laquelle pourtant ils supplioient ledit Duc d'embrasser, & non la reietter comme les autres luy conseil-
loient.

NEANT MOINS l'aduis des autres fut suiuy, car ledit sieur de Belin fut renuoyé avec vne responce conceüe en termes generaux, de l'affection dudit Duc à la paix du Royaume, pour laquelle il disoit qu'il estoit prest del'employer quand il cognoisträ par icelle, pouuoir conseruer & asseurer la religion qui estoit son principal but, dequoy ledit sieur de Belin eut charge d'asseurer lesdits Catholiques, sans toutesfois engager ledit Duc plus auant enuers sa Maiesté.

LEDIT Duc de Mayenne alla de là à Amiens, où il fut receu tres-magnifiquement: toute la ville sortit en armes au deuant de luy, l'artillerie le salua, & luy fut présenté vn poisse qu'il refusa: mais estant conduit en la grande Eglise, il s'agenoiilla sur le marche-pied qui luy auoit esté preparé. Il estoit en grand soucy de la ville de Paris, où il auoit sceu que sa Maiesté s'estoit acheminee au partir de Dieppe, toutes-
fois il fut si pressé des habitans dudit

Amiens d'y demeurer iusques à l'eslection de leur maieur, quise deuoit faire le iour de saint Simon & S. Iude le 28. Nouembre, quil y accorda : mais il fit cependant aduancer son armee du costé du pont de sainte Maixance, afin de s'approcher de ladite ville de Paris, dont il sceut la prise des faux-bourgs bien tost apres, ce quil hastad'allier : & si l'on eust mieux rompu ou tant soit peu deffendu ledit pont de sainte Maixance, ie croy quil ne fust iamais arriué à temps dans ladite ville de Paris pour la secourir, tant les habitans estoient effrayez & pressez de sa Maiesté, de sorte que ledit Duc y arriua tresà propos. Le lendemain sa Maiesté quitta lesdits faux-bourgs, & ledict sieur de Belin reuint encores trouuer ledit Duc, qui derechef luy parla de la paix, mais il aduança aussi peu que la premiere fois, encores qu'aucuns ayent depuis soupçonné quil luy fut deslors donné charge d'asseurer sa Maiesté en secret ; que si elle vouloit estre Catholique, ledit Duc se disposeroit avec ceux de son party de le cōtenter ; chose, si ainsi est, qui ne me fut cōmuniquee, encores que chacun sceust assez que ie fauorisois ce conseil sur tous autres. Il ne sortit aucun fruiet de ce propos car sa Maiesté alla apres à Vendosme, au Maine, & en

Normandie, gaignant & forçant tous les iours quelques places : ledit Duc demeura en laditte ville de Paris.

LE sieur Iean Baptiste de Tassis du conseil du Roy d'Espagne au pays Bas, arriua quelque temps apres accompagné dudit commandeur Moreau : deslors ils voulurent engager ledit Duc à traiter avec leur maistre, assistez dudiect Dom Bernardin de Mendoza, & demandoient qu'il fust déclaré protecteur du party Catholique en ce Royaume, avec des authoritez, puissances royales & souueraines, qu'ils bastissoient, marques & tiltres de laditte protection & recognoissance, comme ils disoient de l'obligation que nous luy auions, & du besoin que nous auions de son assistance, come de pouruoir aux principales charges & dignitez du Royaume, Ecclesiastiques & seculieres, tout ainsi que fait le Roy au Royaume de Naples & de Sicile par dessus ses vice-Rois qu'il y enuoye.

IE fus appelé à ce conseil, où ie fustres-empesché, encores que ledit Duc m'eust promis, qu'il n'accorderoit rien contre les loix du Royaume; car il me sembloit que c'estoit faire tort à nostre honneur seulement de prester l'oreille à telles demandes, lesquelles ils poursuiuoient avec tant

d'ardeur (comme s'ils nous eussent tres-
honorez de nous receuoir pour esclaves)
que c'estoit chose indigne de la nation
Françoise d'y entendre, & meisme de la fi-
delité que le party auoit iurée à Monsieur le
Cardinal de Bourbon, duquel ils faisoient
bien lors paroistre qu'ils faisoient peu d'e-
stat, & à quelle fin ils auoient fauorisé sa
reconnoissance. Ledsits Espagnols pressoiēt
tellement ceste resolution, qu'ils ne vou-
loient donner loisir audit Duc d'attendre
que Monsieur le Cardinal Caietan enuoyé
Legat en France par le Pape Sixte cinquiēme
fut arriué pour luy en communiquer, en-
cor que sa Sainteté l'eust depesché expres
à la poursuite, & qu'il fust desia bien auant
dans le Royaume, & fut cela à mon aduis
pour s'aſſeurer de son affection particuliere
au seruice de leur maistre, comme celuy
duquel les parens tenoient desia de la vo-
lonté du saint Pere; lequel aussi l'on disoit
commencer à reconnoistre leur malice &
ambition, & auoir compassion de la Fran-
ce. Monsieur l'Archeuesque de Lyon re-
uint lors de prison; & ce à propos, car il
fortifia & authorisa grandement ceux qui
contredisoient ausdits Espagnols, ausquels
veritablement ledit Duc fit paroistre par
effect, n'auoir enuie d'accorder leurs de-
mandes

mandes : toutesfois ils ne laisserent d'en faire instance & poursuittes, assistez & fortifiez de leurs partisans qui n'estoient en petit nombre :

Monfieur ie fus trouuer en ce temps-là Monfieur le Cardinal de Gondy à Noyfi avec monfieur de Videuille, & le fieur Zamet, où vous priſtes la peine de vous rendre à ma priere, il vous en ſouuiendra ; ce fut pour vous dire la peine en laquelle ie metrouuois de la poursuite deſdits Espagnols, du peu d'affection, que ie recognoissois que ledit Duc auoit à la paix, & de la crainte que i'auois qu'à l'arriuee dudit Legat, il print quelque resolution, & remplist tout le Royaume de feu & sang pour iamais : & sur ce ie suppliy ledit fieur Cardinal de venir iusques à Paris, pour assister les gens de bien enuers ledit fieur Legat, afin de le disposer de rechercher les moyens, de pacifier ce Royaume, comme chose que ie recognoissois ne pouuoir auoir lieu, que par l'entremise & autorité de sa Sainteté, pour estre le party trop fort de ceux ; qui sous pretexte de pieté, vouloient destruire ou enuahir le Royaume. Vous nous aydaſtes auſſi à faire entreprendre ce voyage audit fieur Cardinal, encore qu'il fuſt tres affectionné au bien

de ce Royaume, comme il s'est monsté en toutes occasions : de sorte qu'il se rendist à Paris apres l'arriuee dudit Cajetan qui y fut receu, ledit Duc absent, car il estoit au siege de Pontoise, duquel il vint à bout plustost qu'il n'esperoit.

M A I S ledit Caietan fit peu de conte des bons conseils & aduis dudit sieur Cardinal de Gondy des miseres de la France, ny des remonstrances des gens de bien : car au lieu de faire l'office de pere commun, comme l'on esperoit & croyoit certainement que c'estoit l'intention de sa Beatitude qu'il fit, il embrassa & fauorisa ouuertement les turbulens, & sous main le dessein desdits Espagnols, au grand preiudice de la religion, & de la France.

N O U S voyans doncques deceus & priuez de ce remede contre raison & nostre attente, ie me resolus de me retirer en ma maison : mais auant que partir ie voulus mettre & laisser par escrit audit Duc les conseils que ie luy auois donné pour me descharger, de les luy enuoyer au siege de Pontoise, parce que ie sçauois que ledit Tassis l'auoit suiuy, qui le pressoit encores de luy permettre de faire pour son Roy, sinon tout au moins vne partie de ses demandes, disant le vouloir aller trouuer &

l'en resoudre. Le sçeus aussi que ledit Duc auoit delibere d'enuoyer avec luy en Espagne l'un des siens, de sorte que ie craignois qu'ils s'engageast, encore qu'il nous eult promise le contraire; il fit faire ce voyage à Rossieux, dont ie fus tres marry; car c'estoit celuy de tous les seruiteurs, qui le sollicitoit le plus de contenter lesdits Espagnols.

LE DIT Duc m'escriuit auoir prins en bonne part mon escrit qui tendoit à le persuader au conseil, que les Catholiques qui assistoient sa Maiesté luy auoient donne par ledit sieur de Belin, c'est à sçauoir de former sa Maiesté d'estre Catholique, & en ce faisant l'asseurer de la reconnoistre; l'adioustois aussi qu'à son refus il deuoit mettre peine de retirer vn Prince du sang Catholique, pour estre nostre chef en l'absence de Monsieur le Cardinal de Bourbon; afin de couper broche à toutes les pratiques que l'on faisoit contre l'Estat, neantmoins le dict Duc print autre conseil, pour autres raisons cy dessus dictes, lesquelles aucuns luy faisoient encores plus pregnantes & considerables que deuant, à cause des voyages en Espagne desdits Tassis & Rossieux; & de la ialousie que les ministres du Roy d'Espagne cōmençoient à faire paroïr.

estre auoir de luy, & de ceux qui l'assistoient, pour auoir contredit leurs demandes qu'aucuns de la ville de Paris fauorisoient si ouuertement, qu'ils luy disoient, que ledit Duc estoit seul qui s'y opposoit, avec quelques vns qui estoient aupres de luy, & que la ville & tout le party ne demandoient autre chose que de contenter sa Maiesté catholique: ce qui fut cause que les ministres dudit Roy commençoient à s'adresser à ces gens là pour desauthoriser ledit Duc, & faire leurs besongnes sans luy, comme ils leurs disoient qu'il leur estoit facile de faire; en quoy les vns & les autres se conduisoient si impudemment, & insolemment, que chacun s'en apperceuoit, mesme que la partie estoit fauorisée dudit Legat, auquel neantmoins ie feis voir l'escrit, que i'auois enuoyé audict sieur Duc, sur l'instance qu'il m'en fit: car il fut incontinent diuulgué & assez bien receu, toutesfois en la ville il se contenta d'en voir coppie sans en faire autre compte, aussi ne pouuoit-il seruir au sien.

VOYANT doncques que ledit Legat nous estoit si contraire, ie dis audict sieur Cardinal de Gondy, lequel ie visitois souvent, que iem'en voulois aller: & de faict ie ne voulus accepter vne prouision de

conseiller dudict Duc, qui me fut lors enuoyée, ny faire le serment d'iceluy, que Monsieur de Lyon, lequel auoit accepté la garde des sceaux, faisoit prester à tous ceux que ledict Duc auoit choisis & retenus du conseil general de l'vnion, lequel il auoit esté conseillé de supprimer; & fuisse par-ty à l'heure mesme sans la prinse de Monsieur le President de Blanmesnil, lequel ie ne voulois abandonner en ceste necessité qui estoit certes tres perilleuse. Dieu me fit ceste grace, que si ie n'eus le credit de garantir la bourse, ie ne fus du tout inutile à sa vie, laquelle estoit fort menacée de plusieurs, qui auoient lors plus de puissance & auctorité en ladite ville, que n'auoit la iustice, ny mes continuelles sollicitations & supplications, lesquelles durerent deux ou trois mois: que si ledict President n'eust mis la main à la bourse, & payé sept ou huit mille escus qui tournerent au profit d'un particuliet, comme il se resolut de faire à la fin, il n'en fust pas sorty autrement.

QUELQUES iours deuant ie receus vne lettre de Monsieur le President Ianin, escrite de Maigny, par laquelle il me priot si l'occasion s'en offroit, & que i'en eusse les moyens, de ietter les fondemens d'une ne-

gociation pour la paix publique, d'autant qu'il recognoissoit ledit Duc plus disposé d'y entēdre qu'il n'auoit encores este: ceste lettre me resiouyt estant dudit President, qui estoit à la suite dudit Duc, auquel il se confioit grandement, & qui estoit homme de bien & clair-voyant.

L'EN fis part incontinent audit Cardinal de Gondy, & resolusmes que ie me retirerois en ma maison, que sa Maiesté m'enuoyeroit vn passeport, & me donneroit moyen de parler à elle pour attacher ceste negociation, comme de moy-mesme, & la pour-suiurois apres selon que les occasions s'en presenteroient.

SVR cela ledit Cardinal partit de Paris tres-mal edifié dudit Caietan, & se retira à Noyfi: mais voyant que ie n'auois aucunes nouvelles de luy, & que d'ailleurs toutes choses s'alteroient tous les iours dauantage en ladite ville de Paris, que les Flamans estoient arriuez en l'armée dudit Duc de Mayenne, sous la charge du Comte d'Aiguemont, que l'on ne parloit que d'aller secourir la ville de Dreux assiegée par le Roy, & donner vne bataille, & que le marché de la deliurance dudit President Blanmesnil estoit accordé & signé, ce qui m'auoit si long-temps arresté en la ville de

Paris. Je prins congé d'un chacun pour me retirer en ma maison, dequoy le commandeur Moreau fut tres-aïlé ; car il estimoit que ma personne portoit malheur aux affaires de son maistre, & auoit esté si effronté que de le publier par la ville : & soupçonnoit mesme ledit Cardinal Cajetan, qu'il auoit veu les articles de la paix signez de ma main, & accordez du consentement de mes Dames de Nemours & de Mayenne, desquelles il n'estoit lors gueres mieux edifié que de moy, par ce qu'elles n'approuuoient leur dessein. Mais comme ie voulus monter à cheual le quinziesme du mois de Mars de grand matin, monsieur de Lyon, duquel j'auois pris cōgé le soir deuant, m'en uoya prier de voir encore deuant que partir, avec lequel ietrouuay le sieur du Tremblay, qui luy auoit apporté le premier aduis de la perte de la bataille d'Iury, comme celuy qui pour estre prisonnier sur sa foy, auoit veu iouer les ieux sans s'en mesler, & partant eut moyen d'apporter la nouuelle le premier : & neantmoins il parloit incertainement de la personne dudit Duc de Mayenne, pour estre party comme il disoit auant l'entiere defaïcte de l'armee, & ne s'estoit meslé en la presse.

CESTE nouuelle m'arresta tout court:

M iiii

car ie ne voulois qu'il fust dit, que i'eusse abandonné le party à cause de ceste perte, comme peut estre on eust faict de part & d'autre, sans auoir esgard à ma premiere resolution : ie voulois voir aussi si elle apporteroit point quelque changement aux affaires publiques, comme de nous donner enuie de faire la paix, & chercher quelque remede à nos maux, autre que celuy duquel nous auions vsé iusques alors, ie voyois aussi mon fils engagé à Pontoise, dont ledit Duc luy auoit de nouveau rendu la charge apres l'auoir reprise, & me sembloit ne pouuoir honnestement laisser ledit Duc, le party, ny les miens en ceste necessité, laquelle chacun estimoit veritablement deuoir esclorre d'autres effects qu'elle ne fit, comme à mon aduis il fust aduenue, si les choses eussent autrement esté conduictes qu'elles ne furent.

LEDIT Duc arriua tost apres à saint Denis peu accompagné, ie le fus trouuer avec les autres, & comme il ne parloit que de chercher les moyens d'auoir sa reuanche, d'y engager & encourager vn chacun: Je m'abstins aussi de luy parler de ma retraite, ny d'entreprendre la paix pour ce qu'il ne l'eust eu agreable, & qu'il eust peut-estre attribué à lascheté, mais i'en dis

mon aduis au sieur de & entre tous audit President Ianin, lequel m'asseura . que sans cette disgrâce ledit Duc se fust disposé à la paix : mais qu'il n'y auoit ordre apres ce coup de luy persuader , ny seulement de luy en parler ; qu'il falloit laisser le douloir, & abbattre le vent des esperances qu'on luy donnoit par vn nouveau secours, me promettant qu'il ne perdrait l'occasion d'y seruir, quand il recognoistroit le pouuoir faire avec l'honneur dudit Duc, & la seureté de la religion & du pary. Ledit Duc se retira à Soissons, & laissa à Paris monsieur de Nemours pour y commander assisté dudit sieur de Lyon ; il y laissa aussi sa mere, sa sœur, & sa femme avec ses enfans, & pria ledit Cardinal Cajetan d'y demeurer pour assurer lesdits habitans, auxquels il promist de les secourir bien tost, quatre ou cinq iours apres son partement. Monsieur le Cardinal de Gondy m'enuoya vn passeport du Roy, pour aller à Noyssi & à Mante, où estoit sa Maiesté, car la ville luy auoit esté rendue par les habitans: apres ceste victoire ie retournay apres à Paris, pour huit iours, durant lesquels ledit Cardinal me coniuira de l'aller trouuer, à quoy ie me resolus, pour sçauoir de luy à qu'elle fin il m'auoit enuoyé ledit passe-

port, & quel moyen il y auoit de seruir au public. Il me dit que ledit passeport auoit esté accordé sur l'instance qu'il en auoit faict par le sieur de la Verriere son cousin, deuant la bataille, suiuant la resolution que nous auions prinse ensemble sur la letre dudit President Ianin, dont i'ay faict mention cy-deuant : & encore qu'il n'eust esté expédié, que depuis ladite bataille il auoit estimé estre à propos de le receuoir; & me l'enuoyer, par ce qu'il estoit apres ce coup, plus necessaire que deuant, de bastir vn bon accord pour sauuer la religion & garantir la ville de Paris, laquelle couroit grande fortune, partant il estoit d'auis que ie visse sa Maiesté, & luy fisse ouuerture de ladite paix, nonobstant ce qui estoit aduenu depuis, disant qu'elle s'y attendoit, & que mon logis desia estoit marqué en ladite ville de Mante, mais ie m'en excusay sur ledit changement, le quel ie luy dis auoir plustost refroidy que rechauffé ledit Duc de Mayenne d'entendre à la paix, comme i'auois appris dudit sieur President Ianin : partant ie craignois allant trouuer sa Maiesté, non seulement me faire mocquer de moy, mais aussi nuire plus aux affaires publiques que ie n'y seruirois. Toutesfois sur l'instance que m'en fit ledit sieur Cardinal, ie

luy promis de voir le sieur du Plessis Mor-
nay comme mon voisin & amy, avec le-
quel ie pourrois conferer des affaires publi-
ques & des miennes particulieres, sans pre-
iudicier à personne, tout ainsi que i'auois
fait, par la permission dudit Duc de Maye-
ne, avec le sieur de Buy son frere, qui lors
commandoit à Pontoise pour le seruice du
Roy.

— DONCQUES ie fus trouuer ledit sieur
du Plessis près ladite ville de Mante, au-
quel ie fis le discours de tous les susdits
propos de la paix, qui s'estoient passez en-
tre ledit Cardinal de Gondy & moy, à la-
quelle ie luy dis que i'auois recogneu ledit
Duc auoir eu plus grande inclination, de-
puis auoir descouuert les intentions des
ministres du Roy d'Espagne, qu'aupara-
uant: de sorte que i'estimois que l'on en
eust peu tirer quelque fruit deuant la batail-
le, comme il m'auoit esté mandé & asseuré
par vn de ses principaux seruiteurs, dont
i'auois aduerty ledit sieur Cardinal de Gon-
dy, lequel sur cela auoit desiré que ie visses sa
Maiesté pour l'en aduertir: à quoy ie m'e-
stois disposé, pour le desir que i'auois tous-
iours eu de seruir à vn si bon œuure, luy di-
sant en ce propos la deliberatiō en laquelle
m'auoit surprins la nouuelle de la bataille;

mais depuis que i'auois recogneu ledit Duc refroidy en ladite paix, & resolu de recouurer ce qu'il auoit perdu, dont ie preuoyois que les Espagnols feroient tres bien leur profit, comme ceux qui auoient bien recogneu que ledit Duc, ny le general du party n'auroient pas grande enuie de s'embarquer avec eux, qu'ils se seruiroient de ceste necessité, en nous faisant achepter cherement leur secours: à quoy il estoit au pouuoir de sa Maiesté de remedier en bien vsant de la victoire que Dieu luy auoit donnée, comme elle feroit si elle aduisoit à contenter les Catholiques au faict de la religion: sans quoy ietenois pour certain que la guerre dureroit encor long temps, & que sa Maiesté auroit quasi aussi tost la fin du Royayme que dudit Duc de Mayenne & de son party, d'autant que les villes & la noblesse qui en estoient ne s'accorderoient iamais avec sa Maiesté, tant qu'elle seroit de contraire religion, & à luy difficile de les y forcer, estant assiste du Pape & du Roy d'Espagne, comme ils estoient, & sur tout du dernier, lequel il scauoit auoir delibéré d'abandonner ses propres affaires pour soustenir le party contre sa Maiesté. Que si le Roy auoit autresfois résisté à la France, lors qu'elle estoit florissan-

te & viue, à plus forte raison la pourroit il endommager maintenant qu'elle estoit à demy destruite & diuisée par tout comme elle estoit, qu'il ne deuoit croire que la bonne fortune de sa Maiesté esbranlast les villes ny la noblesse du party, qu'elle n'eust pourueu au susdit point de religion, ains plustost que le peril les rendroit plus constants & opiniastrés; mais s'il plaisoit à sadite Maiesté satisfaire à ce poinct, comme ce changement seroit du tout interpreté à la pieté & bonté sans plus craindre qu'il fust à aucune autre necessité, ie me laissois assureur que chacun accourroit à elle, la recognoistre, & obeyroit à l'enny l'un de l'autre, soit que ledit Duc se resolust ou non; que pour mon regard ie detestois le dessein des Espagnols, encores qu'ils me l'eussent descouuert & confié des premiers, que ie m'estois retiré vers ledit Duc, du temps du feu Roy par necessité: mais que ie m'estois depuis entretenu pour le respect de ma religion, & pour m'estre promis de seruir quelque iour au repos du Royaume, à l'honneur de Dieu: que si Dieu nous vouloit tant punir, que de nous priver de ceste esperance là, comme il aduiendroit, si ledit Duc par necessité, ou autrement se iettoit entre les bras des Espagnols, & se

donnoit à eux, i'auois delibéré me retirer de la presse, & ne participer iamais à tel dessein, s'il plaisoit à ladicte Maïesté me prendre en sa protection: chose que ie ferois encor plus volontiers, si la Maïesté pouruoit à la seüreté de la religion, vouloit vaincre, comme il me sembloit qu'elle pouuoit facilement & vtilement faire, ledit Duc & ses partisans par bonté & prudence, comme elle auoit faict par les armes, à quoy i'exhortois ledit sieur du Plessis d'employer le credit qu'il auoit aupres de sa Maïesté, laquelle i'eusse volontiers prins la hardiesse de l'en requérir & supplier moy-mesme, si i'eusse estimé qu'elle l'eust pris en bonne part, & n'eusse eu crainte de desplaire audit sieur Duc, mais qu'il me suffisoit de luy auoir représenté, scachant qu'il estoit si affectionné à sa Maïesté, & d'ailleurs tellement mon amy à cause de nostre voisinage, & del'assistance qu'il auoit tiré du nostre, du temps que i'estois en Cour, qu'il satisferoit à tout ce qui estoit necessaire pour ce regard, l'asseyurant pour fin que si ledit Duc refusoit d'entendre à la paix, ie l'abandonnerois pour viure priuément en ma maison suiuant ma premiere deliberation prise deuant la bataille.

LEDIT sieur du Plessis fit contenance de

bien prendre mes raisons & mon intention, me dit sa Maieſté auoir encore plus de bonté que de generoſité, ne demandant à ſes ſubieſts que l'obeiſſance qu'ils luy deuoiẽt, la Couronne luy appartenoit tant par droit qu'encores par merites; il s'y falloir arreſter comme Prince tres-vertueux & parfaict, dont il auoit rendu tant de preuue, que perſonne n'en pouuoit douter : dauantage qu'il eſtoit Prince de foy, & tres-grand obſeruateur de ſa parole, à laquelle il vouloit moins manquer qu'à foy-meſme; que c'eſtoit vn fondement tres-ſolide, ſur lequel on pouuoit baſtir vne bonne paix & reconciliation, à laquelle l'on le trouueroit touſiours tres-diſpoſé, qu'il n'eſtoit aucunement vindicatif, qu'au combat il eſtoit ardent & courageux, mais hors d'iceluy il eſtoit, encores plus gracieux, comme il apparoiſſoit qu'il faiſoit aux priſonniers, de la bataille, lesquelſ eſtoient de luy fort carreſſez : que Dieu l'auoit touſiours aſſiſté, luy attribuant toutes ſes proſperitez, lesquelles ſont encores plus aduouçees de ceux qui l'ont touſiours ſeruy que les autres, principalement depuis la ligue, la rage de laquelle eſtoit tombée ſur luy cõtre toute iuſtice, parce que lors il ne penſoit qu'à viure en patience, & rendre obeyſſance au feu Roy, ſous la protection

de ses Edicts, au lieu de l'accabler, comme les auteurs d'icelle l'auoient proietté, l'auoient remplie & comblee de gloire: que quand il se resouuenoit d'auoir veu huit ou dix armées toutes employées contre luy & ses amis, delaisié & abandonné quasi de tout le monde, n'auoir peu toutesfois gagner sur luy aucun aduantage digne de memoire, ny seulement d'esbranler sa foy enuers Dieu ny sa vertu & constâce en aucune chose, qu'il auoit deslors iugé que Dieu auoit entrepris sa deffence & protection, & l'auoit reserué expres pour en faire trophée de sa iustice diuine, & restablir le Royaume en son entière splendeur & puissance: que si iamais Prince fut aussi propre de ce faire, il l'estoit; car s'il aymoît les armes, il fauorisoit encore plus la iustice, & estoit ennemy du vice, honorant & respectant les gens de bien & de vertu qu'il luy assentoit, que si ledit Duc luy demandoit la paix, & se rangeoit à la raison, il la leur accorderoit tres liberalement, & demeureroit content de luy, & de ses actions, comme l'estoient les Catholiques qui l'assistoient, & mesmes de la declaration qu'il leur auoit faict sur la religion, qu'estant comme ils estoient en tres-grand nombre, composé des principaux Princes & officiers

ciers de la couronne, Seigneurs & Gentilshommes du Royaume, l'on pourroit dire qu'ils faisoient la principale & plus considerable partie des Catholiques d'icelle, de sorte que ledit Duc ny les siens ne pouuoient vser de ce nom, ny apporter du scrupule & difficulté; & ce dont les autres estoient demeurez tres contens & satisfaits, sans luy faire tort, & donner occasion à vn chacun de se defier de sa volonté qu'il ne doutoit point que les Espagnols ne fissent leur profit s'ils pouuoient de la mauuaise fortune dudit Duc, comme il luy auoit remonsté; ce qu'il ne trouuoit estrange d'eux, estant comme ils estoient nos anciens ennemis; mais que le blasme & le dommage en demeueroit audit Duc, & autres François s'asseurant à ceux; qu'il esperoit que Dieu acheueroit de reuerfer leurs desseins comme il auoit commencé: quand le Roy d'Espagne n'auroit que vingt-cinq ans, & seroit trois fois plus puissant & mieux assisté en ce Royaume, il y succomberoit, l'entreprenant contre vn Prince si genereux & bien fondé en iustice; nourry au travail, & bien assisté dedans & dehors le Royaume, comme estoit sa Maiesté, laquelle faisoit aussi peu de compte des rodomontades & forces Espagnolles, & que

ce ne feroit iamais par crainte que ses subiects obtiendroient la paix de luy, mais par submission esmeuë de la compassion qu'il auoit du peuple; qu'il cognoissoit mon intention à la paix, m'exhortoit d'y perseuerer, & comme mon amy me separer dudit Duc & de son party, comme d'un tres mauuais garand & appuy, que sa Maiesté me donneroit pour ce faire toutes les provisions & assurances qui me seroient necessaires: mais il falloit que mon fils en fit de mesme, remettant au pouuoir de sa Maiesté la ville de Pontoise, à laquelle il commandoit, disant que ma retraite ne pouoit estre autrement que tres suspecte & mal receuë, que puis que ie n'auois aucune charge dudit Duc de Mayenne de parler de la paix, i'auois bien faict de ne me presenter deuant sa Maiesté mais qu'il estoit d'adujs que ie visse ledict Duc, plustost pour l'asseurer de la volonté de sa Maiesté, & sçauoir qu'elle estoit la sienne, pour sur cela me resoudre, ne pouuant croire que Dieu eust fait tant de graces au Roy pour les laisser imparfaites: de sorte qu'il esperoit que ceux qui s'opiniastreront luy faire la guerre, accroistroient plustost leur honte qu'ils ne recouvreroient leur perte, & qu'il ne falloit plus qu'oster la Pierre au laict à ceux de Pa-

ris, pour les ranger à leur deuoir par force s'ils n'y vouloient entendre d'amitié : quoy succedant, qui douteroit que les autres villes du Royaume ne se vissent ietter aux pieds de sa Maiesté? Qu'il ne pouuoit conseiller audit Duc, d'attendre iusques là à se resoudre, parce qu'il ne feroit son deuoir ny son profit, comme il me conseilloit de luy remonstrer, m'assurant au reste que si ie reuenois avec charge dudit Duc de parler de la paix, ie serois tres. bien venu, & que sa Maiesté aupres de laquelle il m'assisteroit, me verroit bien volontiers, mais il me prioit de me hastier.

MONSIEUR, ie remerciay ledit sieur du Plessis de sa bonne volonté, & luy dis, que i'estois si affectionné à ma patrie, que ie tenois pour perduë, si la guerre duroit, que ie ne faudrois d'aller trouuer ledit Duc de Mayenne iusques à Soissons, où il s'estoit retiré, pour luy faire entendre ce qu'il m'auoit dit de la bonne intention de sa Maiesté à la paix, & le supplier de s'y resoudre en preferant le salut du Royaume à toute autre consideration, l'assurant que ie ferois pour ce regard tout ce qui seroit en ma puissance, & que selon sa response i'yrois trouuer sa Maiesté pour luy en rendre compte : ou s'il appelloit

les Espagnols, & traittoit avec eux, ie me retirerois en ma maison, sans plus le suiure ny assister; mais que ie ne voulois point permettre que mon fils rendist Pontoise, parce qu'il me sembloit y aller trop de son honneur, la place luy ayant esté franchement baillée en garde par ledit Duc: & ne voyant autre cause & chāgement en la personne de sa Maiesté qu'il le peust iustement mouuoir & excuser de ce faire, que l'aduantage de ceste derniere victoire que Dieu luy auoit donnée, laquelle obligeoit plustost mondit fils de perseuerer en la foy qu'il auoit donnée audit Duc, qu'elle ne l'en deschargeroit s'il ne vouloit estre accusé & conuaincu de lascheté; de laquelle comme mon amy & Gentil-homme faisant profession d'honneur, il me deuoit plustost dēcōseiller si i'y estois disposé, qu'exciter par la consideration du repos de ma maison, duquel ie luy declarois vouloir plustost estre priué pour iamais, voire de la vie mesme, que de consentir que mondit fils acquist vne telle honte, & auois mesme vne telle confiance en la bonté & vertu de sa Maiesté, que ie m'asseurois, qu'elle l'estimerait dauantage faisant ce qu'un homme de bien doit faire, que s'il en vsoit autrement: que s'il falloit que i'achetasse à tel prix la seureté

de ma maison, i'estois deliberé de quitter plustost le Royaume que d'y cōdescendre, que ie ne doutois point des vertus de sa Maiesté & de bonne fortune, ny de la fidelité de ses seruiteurs & amis, & pareillement qu'en ostant à ceux de Paris le laiët & le froment, & les passages des viures, sa M. n'auançast grandement ses affaires; mais iele priois de croire qu'elle ne reduiroit iamais les habitans d'icelle n'y d'aucune autre ville de la ligue à la recognoistre de bonne volonté, si elle ne donnoit ordre au poinct de la religion: le suppliant sur ce de considerer combien il falloit de temps pour forcer lesdites villes l'vne apres l'autre, estant mesmes assiste des susdits Espagnols, encouragez par le Pape, desesperez de la religion de sa Maiesté, laquelle pourtant me sembloit y deuoir bien penser.

LEDIT sieur du Plessis fit peu de conte de ces propos, mais il ne me pressa dauantage d'engager mon fils à ma retraite, seulement d'auancer mon voyage deuers le dit Duc, pour lequel il m'enuoya du depuis vn passeport par la voye dudit sieur de la Verriere par lequel i'auois esté conduit en ceste conference. Ce ne fut sans me plaindre à bon escient audit sieur de la Verriere, du propos que m'auoit tenu ledit sieur du

Plessis concernant mon fils, luy priant de dire au Roy, que ie ne desirois pas, que mondit fils vint à son seruice indignement ny honteusement, parce que ie scauois qu'il faisoit plus de conte d'un homme de bien que de mille poltrons, & qu'aureste ie ferois son tres-humble seruiteur, bien delibéré de faire mon deuoir pour la paix, & de n'estre iamais Espagnol. Je vous assure, Monsieur, que cecy me cuida desbaucher; car ledit sieur du Plessis me donna occasion de croire qu'il auoit plus d'enueie de retirer ladite ville de Pontoise pour ledit sieur de Buy son frere, lequel en estoit gouuerneur auparauant, que d'ayder à la paix, ny à mon repos particulier : toutesfois ie me resolus de m'acquitter encore de ce deuoir, & apres prendre conseil de mes affaires avec Dieu, & mon honneur, comme i'ay déclaré audit Cardinal de Gondy, quand ie fus de retour à Noyssi, où vint le iour mesme ledit Cardinal Cajetan, & me semble que vous vous y trouuastes aussi poursuiuant vostre accoustumee affection au bien du Royaume, faire quelque office enuers ledit Cajetan: mais ce Prelat tendoit plustost à diuiser les Catholiques d'avec sa Maïesté, les exciter solliciter & presser de suiure l'Eglise, que

defaciliter vn bon accord, tant il desiroit complaire au Roy d'Espagne & le seruir. Ce fut à Monsieur le Marechal de Biron à qui il s'adressa, pour cest effect: fut il pas bien conseillé, mesme si fraischement apres ceste signalée victoire, qui auoit enflé les cœurs & les esperances des seruiteurs de sa Maiesté? aussi fit il tres mal ses besongnes, dont ie m'asseure qu'il n'estoit pas fort marry, comme celuy qui auoit à mon aduis faict le voyage plus pour irriter le Pape entre les Catholiques qui seruoient sa Maiesté, que pour y profiter, craignant que sa Saincteté qui commençoit desia à changer d'aduis en nos affaires, feit trop de compte d'eux.

ESTANT à Paris, ie fis part aux trois Princesses qui y estoient, & à Monsieur de Lyon, des bons propos que m'auoit tenus le dict sieur du Plessis: tous firent demonstration d'approuuer & desirer que i'allasse trouuer le dit Duc de Mayenne pour en informer. Je partis huit iours apres; le sieur Zamet vint avec moy, nous le trouuâmes à Soissons tres-mal de sa santé, & encor plus affligé del'esprit à cause de l'estat de ses affaires; neantmoins comme Prince courageux & aduisé, il n'obmit rien

à faire, pour maintenir les partisans en deuoir, & dresser vne nouuelle armée. Il auoit desia depesché par tout, & auoit enuoyé gens exprés à Rome, en Espagne, Flandres, Lorraine, & Saupye, où vous pouuez penser qu'il n'auoit rien oublié à remonstrer & promettre dequoy pouuoir seruir à son be-
soin, comme ont accoustumé les Princes qui se trouuent en pareille necessité; voyant mesme que sa Maiesté auoit desia gagné la ville de Mante, laquelle s'estoit rendue d'effroy, & qu'elle auoit attaqué Corbeil & Melun, mal-garnie de ce qui estoit necessaire pour se defendre, le succeds de ceste derniere bataille ayant surpris les plus fins & diligens, & estonné les plus a-
seurez.

LEDIT Duc ayant ouy mon rapport que ie doray le plus que ie peus; d'abord il eut grande difficulté de me permettre de commencer ceste negociation tant il craignoit d'un costé offencer les Espagnols, par les partisans desquels il estoit environné & fort veillé; & d'autre part que la recherche de cetraicté luy fust imputée à faute de courage ou de moyens de se defendre, & partant tres-preiudiciable & honteuse: toutesfois le lendemain il changea d'aduis, soit que ce fust pour

donner l'allarme & l'espouuante aux Espagnols, & en ce faisant auoir le secours qu'il leur demandoit, ou preparer vn moyen pour au besoing sauuer la ville de Paris, laquelle personne n'estimoit pouuoir durer, quand les passages des viures seroient bouchez; ou bien endormir sa Maiesté de l'esperance d'un accord: car il me permit de retourner vers elle, & me chargea de luy dire de sa part que s'il luy plaisoit donner contentement aux Catholiques sur le faict de la religion, il mettoit peine de disposer de ceux qui l'auoient esleu & recogneu pour chef, de luy rendre obeysance & traicter d'une bonne paix; laquelle il protestoit desirer & affectionner plus pour garantir le Royaume des calamitez de la guerre, que pour se preualloir, ny aduantage, comme celuy qui n'auoit rien deuant les yeux que le bien de la religion, & contenter pour ce regard nostre saint pere le Pape, lequel il honoroit comme le chef de l'Eglise, sa conscience & ceux qui l'auoient honoré de la charge, qu'il auoit, que sa Maiesté ne deuoit croire que sa mauuaise fortune ny sa foiblesse luy fissent tenir ce langage; car ie pouuois tesmoigner quel auoit esté son desir en cela: quelques iours auant la bataille, il esperoit

aussi mettre sus bien-toſt vne armée encor mieux que iamais : ſur tout, il me pria de ne dire à perſonne qu'il m'eult donné la charge de parler à ſa Maieſté d'aucune choſe, mais de faire courir le bruiſt que ie me retiroyſ en ma maiſon avec ſa permiſſion, pour n'eſbranler ny intimider ſes amis, auxquels il donneroit aduiſ de ma retraicte, & ne croire qu'il m'eult enuoyé vers ſa Maieſté, ſi d'auenture l'on leur en demandoit quelque choſe, tant de l'armée que d'ailleurs.

IE voulus voir ledit ſieur du Pleſſis, & luy communiquer ce que i'auois faiſt avec ledit Duc, & meſme l'aduiſ qu'il auoit donné de mon voyage à ſes amis, deuant que de me preſenter à ſa Maieſté, afin qu'il aduiſaſt avec elle, ſ'il eſtoit à propos pour ſon ſeruiſe & le public, que ie paſſaſſe outre: car ie n'auois enuie de ce faire, ſ'il iugeoit qu'il en deuſt aduenir autrement. Ie le vis à Lezigny en Brie, où ie fus conduict par le ſieur de la Verrière: ledit ſieur Zamet y vint avec moy, comme celuy qui deſiroit ſeruir de tout ſon pouuoir au repos de ce Royaume, ainſi que ie puis teſmoigner qu'il a'fait depuis très-fidèlement.

LEDIT ſieur du Pleſſis apres m'auoir ouy, fut d'aduiſ que ie viſſe ſa Maieſté, laquelle

je trouuay logée aux faux bourgs de la ville de Melun, de laquelle le sieur de Fontaines auoit composé, deux iours auparauant. Je dis à sa Maiesté la charge que m'auoit donné ledit Duc, comment & à quelle condition il m'auoit permis de faire le voyage, & ce qui m'y auoit embarqué: le suppliant prendre en bonne part mon affection, & ne perdre maintenant l'occasion de remettre le Royaume en paix, que Dieu luy auoit mis en la main par son trauail & sa valeur; que tout dependoit du poinct de la religion, puis que ledit Duc offroit de la recognoistre, si elle se vouloit resoudre d'y pouruoir au contentement des Catholiques, & par consequent de sa seule volonté: partant elle pouoit dire qu'il ne tenoit plus qu'à cela qu'elle ne vous rendist tous heureux, & qu'il ne fust bientoist le plus grand & glorieux Prince de la Chrestienté, & le mieux obey en son Royaume: que s'il luy plaisoit maintenant prendre ceste resolution, l'honneur, & le gré luy en seroient entierement deus deuant Dieu & les hommes, à cause de l'aduantage que ceste victoire derniere luy auoit donné, tellement que personne ne pouoit dire auoir esté contrainct à ce faire par ses ennemis. Que sa Maiesté

rendroit en ce faisant sa victoire aussi heureuse à ses subiects, à elle mesme, voire à toute la Chrestienté, qu'elle auoit esté trióphante & glorieuse, car elle engendreroit vne paix vniuerselle qui rendroit son nom admirable & immortel : que tout ainsi que sa Maiesté auoit donné preuue de son courage, elle pouuoit aussi maintenant faire cognoistre sa grandeur & manifester sa bonté; avec quoy elle pouuoit acquerir plus de villes en vn iour, qu'elle ne feroit peut-estre en toute sa vie à coups de canon, & par ce moyen euter le sac des meilleures villes de son Royaume, qui estoit quasi ineuitable; autrement que ie m'asseurois que celuy de la ville de Melun fait à ses yeux, l'auoit autant contristé, que la cōqueste d'icelle l'auoit resiouy, encore qu'elle fust aduenuë tres-heureusement, parce qu'en fin sa Maiesté perdoit plus à la ruine desdites villes que personne, sans compter le desplaisir qu'une ame vraiment Royale telle que la sienne, receuroit des desordres qui s'en ensuiuroient : que sadite Maiesté considerast, qu'encore que sa victoire eust esté grande pour estonner lesdites villes, toutesfois aucune ne s'est esbranlée du party, ce qu'elle deuoit croire proceder seulement de la force & puissan-

ce que la religion a sur les hommes. Car que pourroit-on esperer dudit Duc de Mayenne, & moins encore desdits Espagnols ? quel plaisir & aduantage y auroit il de continuer vne guerre si malheureuse qu'estoit la nostre, & attendre vn siege, & peutestre vn sac plus cruel, que n'auoit esté celuy des habitans de Melun ? Que c'estoit donc effects de la religion, qui les roidissoient au peril, comme il auoit autresfois esprouué : au moyen dequoy il estoit tresnecessaire que sa Maiesté pourueust à ce poinct pour cheuir desdits Espagnols, & autres estrangers qui aspirét sur ce Royaume, lesquels sa Maiesté deuoit plus craindre que iamais, à cause du besoing que l'on auoit de leur assistance, qui auengloit, & souuent desespéroit ceux qui estoient pressez. Qu'il pleust à sa Maiesté considerer combien il luy falloit encores acquerir de villes deuant que d'estre Roy paisible : que toute la guerre se faisoit à ses despens, & que ses ennemis n'auoient guerres à perdre, & prou à gagner ; que quand il ne demeureroit audit Duc qu'une ville de cent ausquelles il commandoit, encores seroit il mieux partagé, qu'il ne l'auoit esté de sa maison : que c'estoit avec prudence & consideration, que le

fruid de la victoire se recueilloit & asseu-
roit contre l'inconstance de la fortune.
Partant qu'il pleust à sa Maiesté de ne
perdre ceste occasion de pratiquer l'une
& l'autre vertu, laquelle peut-estre, elle
ne recouurerait iamais: car quand ses ho-
stes viendroient, ledit Duc de Mayenne
ne pouuoit plus disposer de luy & de ses
amis, comme il pouuoit faire de present,
d'autant que la necessité authorisoit tous
les iours les forces estrangeres, & facili-
toit leur dessein: que i'auois entrepris
ce voyage exprez, pour luy représenter
ses raisons & inconueniens, meu d'un
tres-bon zele, & battu d'une apprehen-
sion que i'auois du malheur qui menaçoit
ce Royaume, lequel i'estimois ineuitable,
si sa Maiesté failloit à ce coup d'y reme-
dier, comme il estoit en son pouuoir,
que depuis le trespas du feu Roy i'auois
suiuy ledit Duc, plus pour trouuer moyen
d'ayder à pacifier ce Royaume, que pour
autres considerations, comme i'auois desia
assez tesmoigné par mes actions & que
ie desirois continuer tant qu'il me demeu-
reroit quelque esperance d'y pouuoire estre
utile, mais aussi me retirer en ma maison
quand elle me le defendroit & y viure sous
sa protection, comme son tres-humble

suiet, sans plus me mesler d'autre chose que de prier Dieu pour le repos & salut de son Royaume, si sa Maiesté l'auoit agreable comme ie l'en suppliois.

SA responce fut tresbenigne, elle loüa mon intention, de laquelle neantmoins elle me dit que plusieurs auoit fait à tort autre iugement, me tenant pour vn bon Espagnol, mais qu'elle estoit bien aise, & me scauoit bon gré deuoloir maintenant faire paroistre du contraire, ce que ie ne pouuois pas mieux faire qu'en recherchant & procurant le repos du Royaume; qu'elle auoit esté bien ayse d'entendre ce que ie luy auois dit de la part dudit Duc de Mayenne, qu'elle tenoit de Dieu premierement, & apres des Princes & officiers de sa Couronne, & de sa noblesse, la victoire qu'elle auoit gagnée: Que Dieu estoit aussi le protecteur de la iustice & des Roys, contre la rebellion & desobeyssance de leurs suiets, cōme auoit tousiours esté en ce Royaume leur vray & plus seur apuy ladite noblesse, ainsi qu'elle auoit bien esprouué en ceste derniere occasiō, en laquelle elle l'auoit recogneuë inuincible, ayāt son Roy en teste: que le Royaume luy appartenoit, par la grace de Dieu, & par succession legitime, que personne ne le pouoit quereller iustement, & moins en-

cor ses subiects, luy desnier l'obeyssance, qu'elle n'auoit offensé personne, seulement s'estoit-elle defenduë pour conseruer le sien comme elle pretendoit continuer, & esperoit faire aussi heureusement qu'elle auoit commencé, avec la grace de Dieu, & que c'estoit sa plus grande esperance: que quand elle se resouuenoit des miseres, & necessitez qu'elle auoit endurez du temps du feu Roy, lors que chacun auoit conspiré sa ruine, que les armées sortoient & marchoient en foule contre elle & ses amis, & que l'on la tenoit pour perduë, sans iamais s'en pouuoir releuer, & que Dieu l'auoit tellement fauorisé, que non seulement il auoit renuersé le dessein de ses ennemis, mais aussi luy auoit par ce moyen ouuert le chemin de sa gloire à leur honte & confusion: elle ne se pouuoit lasser d'admirer ses diuins iugemens, benir sa bonté, & sans cesse le remercier & inuoker en son ayde, comme elle auoit faict plus ardamment depuis la victoire que deuant, d'autant qu'elle recognoissoit en auoir plus grand besoin, pour estre la iouyssance d'une bonne fortune subiecte à diuers accidens, souuent autant pour nostre propre faute, que par celle d'autrui & par son accoustmée inconstance. Que son but estoit d'estre
Roy

Roy de fait comme de droit, & que celuy dudiect Duc, & de ceux qui l'assistoient deuoit estre de viure en paix & honneur, sous l'obeyssance de celuy que Dieu & la nature leur auoit donné pour tel; dequoy la maiesté estoit prestee de les faire iouyr sans auoir esgard au passé; s'ils vouloient aussi s'en rendre dignes par leurs actions, ayment trop mieux gagner par douceur que par la force, pour estre ce chemin le plus court qu'aucun autre, & plus approchant de son naturel, du tout aliené de la violence & vengeance, mais si ialoux à l'observation de sa foy à laquelle elle n'auoit iamais manqué; qu'elle vouloit aussi la maintenir inuiolable, comme deuoit faire vn Prince qui craignoit Dieu, & aymoit son honneur, qu'elle ne pouuoit approuuer que lediect Duc parlast pour les Catholiques du Royaume, quand elle consideroit & iettoit les yeux sur ceux qui la seruoient & auoient combattu avec elle, depuis le deceds du feu Roy: lesquels en qualité & en nombre, surpassoient de trop loing les autres de tous estats; voire mesme des Prelats & Ecclesiastiques; pouuant dire estre assisté de beaucoup plus de Catholiques que d'autres, enseignez à ce faire autant par la loy de Dieu; la nature; & de la iustice de la

6

science qu'il ne pouuoit obeyr à vn Roy de contraire religion; soit qu'il tint ce langage par art, ou autrement: à quoy elle me repliqua sur le champ, qu'elle n'estoit toutesfois infidelle ny idolatre; qu'elle adoroit le seruice d'un mesme Dieu, & que la religion en laquelle elle auoit esté nourrie, n'estoit si differente de l'autre quelle d'eust estre incompatible, qu'en fin en tel changement qui importoit à la conscience, Dieu y deuoit operer, & non les hommes, se faire avec le temps instruire & non à coups d'espee: Que si du temps des Roys derniers l'on n'auoit peu gaigner ce poinct sur luy par force, ny par les appas de la Cour esbranler sa conscience; les armes d'Espagne, ny de tous ceux qui les fauorisoient y aduanceroient encore moins, maintenant que Dieu luy auoit tesmoigné tant de grace, qu'elle n'estoit toutesfois opiniastre, voulant ceder à la verité, & au desir de ses subiects, mais qu'il falloit l'instruire & l'auoir autrement qu'à coups de canon. Je luy dis sur cela que la cognoissance que l'on auoit, qu'il estoit Prince conscientieux, craignant Dieu, & affectionnant sa religion, estoit ce qui donnoit plus de crainte aux Catholiques de la leur, d'autant qu'ils ne se pouuoient persuader,

que sa Maiesté, laquelle estoit responsable de ses subiets, leur voulust maintenir & laisser viure en ceste religion, si elle croyoit qu'elle fust abusive; que i'estois vn mauuais Theologien pour respõdre pertinentement au propos de sa Maiesté: mais i'auois bien ouy dire mesmes à Beze au colloque de Poyssi, que nos creances estoient aussi esloignées l'vne de l'autre que le ciel estoit de la terre, mais que ie n'approuuois les argumens en ceste dispute du sang, ny des armes, mesmes contre sa personne, les cartes estant meslees, comme elles estoient: ains ie croyois certainement que nous aurions plustost defait l'Eglise de fond en cõble avec tels instrumens, que la purger comme l'on n'auoit que trop esprouué en la Chrestienté depuis cinquãte ans: mais aussi que sa Maiesté depuis ceste victoire, pour acheminer ceste instruction qui deuoit preceder la conuersion, sans plus mettre en auant les armes de ses ennemis pour s'en excuser, à cause de leur foiblesse; & si pour ce faire, il luy plaisoit appeller près de soy quelques Prelats & Docteurs de bonne vie, ie l'asseurois, que non seulement cela rejoüiroit & conseilleroit grãdement la France, mais aussi luy acquerroit & confirmeroit plus de villes & de seruiteurs, que tou-

tes les prosperitez du monde: la suppliant me permettre de luy dire que la ruine du Royaume ne seroit pas seulement impute'e aux factieux, ny aux ennemis; ains à elle, puis qu'il estoit en sa puiss'ce d'y remedier.

Ce propos fut cause que sa Maie'sté remit au lendemain matin à faire responce, & me dit qu'elle en vouloit deliberer avec ses seruiteurs, & ne rien faire sans leur aduis, me commandant de la suivre à Nangis, où elle s'acheminait.

Sa Maie'sté me commanda de retourner deuers ledit Duc, pour luy dire qu'elle auoit prins en bonne part ce que ie luy auois dit, que sa deliberation estoit d'embrasser & cherir tous ses subiects, selon leur merite, & mesme honorer & traiter ledict Duc, s'il vouloit luy ayder à mettre son Royaume en repos, cōme il pouuoit faire; qu'encores qu'il eust desia commencé à pouruoir au faict de la religion au contentement des Catholiques; toutesfois si l'on iugeoit estre necessaire d'y adiouster quelque chose, elle estoit preste à ce faire, ayant pris & consideré tout ce que ie luy auois remonst'ré sur cela, me dit qu'elle ne pouuoit traiter plus auant avec moy, parce que ie n'estois pas assez authorisé dudit Duc, & partant elle desiroit qu'il luy enuoyast des deputez garnis

de pouuoirs suffisans pour ce faire, qu'ils seroient les tres-bien venus, & qu'elle mettroit peine de leur donner contentement, pour le desir qu'elle auoit de deliurer son peuple d'oppression. Je luy respondis; que la charge que sa Maiesté me donnoit me sembloit tres-bien considerée & digne de sa prudence; car veritablement elle ne pouuoit traicter ces affaires qu'avec gens qui eussent pouuoir de les conclurre, comme il auoit tousiours esté pratiqué: Mais ie la suppliois de considerer que ledit Duc, pour estre chef du party, n'en pouuoit toutesfois disposer sans l'adujs & consentement commun; principalement en ce qui concerne la religion & la recognoissance de sa Maiesté, & partant il ne seroit necessaire qu'il les assemblast pour en aduiser & resoudre avec eux, sadite Maiesté n'estant apprentifue de l'authoirité qu'auoit vn chef volontaire, ayant souuent passé par là, que ledit Duc pouuoit difficillement faire ladite conuocation & assemblée, la guerre durant & sans passeport, à cause des dangers des chemins; suppliant sadite Maiesté d'y adujs & y pouruoir d'heure, s'il luy plaisoit aduancer les affaires; la remerciant au reste de la protection qu'elle me promettoit

en ma maison, en laquelle ie me retirerois apres que ie l'aurois veuë derechef pour recevoir les commandemens selon son intention.

Saditte Maieſté partit de la main, tout auſſi-toſt, & me repliqua qu'elle continueroit & ne ceſſeroit pour cela de faire la guerre: qu'elle ne vouloit point auſſi donner leſdits paſſeports, parce qu'elle ne vouloit laiſſer perdre le fruit de ſa victoire, ny donner moyen audit Duc de releuer les affaires, & mieux dreſſer ſa faction, comme il pourroit faire avec leſdits paſſeports & ceſſation d'armes, ſe reſouenant de la commodité qu'elle auoit autresfois receuë de choſe ſemblable du temps du feu Roy: & combien que ie la ſuppliaſſe tres-inſtaamment de croire qu'il eſtoit vray que ledit Duc ne m'auoit parlé de ceſte ceſſation d'armes, n'y deſdicts paſſeports, & que ce que ie luy en diſois venoit de moy, pour acheminer & abreger les affaires, comme celuy qui cognoiſſoit bien qu'il ne ſe pouoit rien faire autrement, ne antmoins elle me deſpecha avec ceſte reſponſe.

Dont ie fus parler à Monsieur le Mareſchal de Biron, pour l'autorité qu'il auoit, aupres de ſa Maieſté, luy repreſentât ce que

ieluy en auois dit, avec les responses, & ce que ie preuoyois qu'il en aduiendroit, le suppliant & conjurant par le serment qu'il auoit à l'Estat de seruir le public en ceste occasion, laquelle se perdant ne se recouureroit peut-estre iamais, pour les raisons que ie luy dis; & en tout cas me faire tant de biē que de se resouuenir du deuoir auquel ie m'estois mis en ceste occasion, cōme ie faisois de m'estre adressé à luy approchant sa Maiesté en ceste necessité; que i'auois ouy faire cōpte à ceux qui manioient les affaires de sa Maiesté, qu'en peu de iours elle prendroit Paris, & apres demeureroit facilement maistresse de toutes les autres villes du Royaume, sans composer avec ledit Duc; que ie leur auois dit qu'ils s'abusoiēt grandement & qu'on y trouueroit plus à faire, qu'à dire; toutesfois ils s'estoient mocquez de mes raisons, tant ils prenoient plaisir de se flatter en leurs esperances, & auoient peu d'experience aux affaires du monde, ou estoient ennemis de la paix.

Toutesfois apres plusieurs disputes & contestations, ledit Duc print resolution d'assembler ceux du party, à ceste fin d'ecrire par tout, d'enuoyer des deputez, sans neantmoins leur mander que ce fust pour la paix, mais seulement pour donner ordre par

leur aduis aux affaires de la cause. Et d'autant qu'il fut aduertý que les Espagnols faisoient recherche & pratique à part des gouuerneurs des villes de Picardie, il resolut d'y aller, tant pour y remedier, que pour en s'approchant de la frontiere y solliciter luy mesme lesecours, que le Prince de Parme luy promettoit.

DEVOY i'aduertis ledit sieur de la Verriere, auquel sa Maiesté m'auoit commandé d'adresser mes lettres, ensemble les despesches que ledit Duc auoit faiétes pour laditte assemblée, sans laquelle il m'auoit dit ne vouloir prendre autre resolution: i'aduertis aussi ledict sieur de la Verriere que ie suiuiuois ledit Duc en ce voyage, pour voir, s'il s'y presenteroit quelque occasion de bien faire: toutesfois que c'estoit chose dont i'auois plus de doute que d'esperance, veu ce qui se faisoit & passoit, & les propos que l'on tenoit, & les preparatifs de guerre qui se faisoient, priant sur cela ledit sieur de la Verriere de m'ayder à conseruer la parole que sa Maiesté m'auoit donnée de sa protection en ma maison, parce que ie preuoyois que i'en aurois bien-tost besoin, mais qu'il print garde en ce faisant, qu'on ne me voulut obliger de faire rendre par mon fils la place qu'il auoit en

garde, d'autant que son honneur qui m'estoit plus cher que sa vie, ne me pouuoit encore permettre d'y consentir.

PAR sa réponse il me manda que l'on approuuoit ladite assemblée & mon voyage, mais que l'on en craignoit la longueur, partant l'on desiroit que ie m'employasse à l'aduanancement, & acceleration de l'une & de l'autre, à l'occasion des accidens qui en pourroient naistre, ou bien que ledit Duc de Mayenne voulust se contenter d'en conferer seulement avec aucuns des principaux de son party & traiter avec eux sans faire vne si grande assemblée, & garder plustost place aux absens: au reste quel'on l'auoit de rechef assure de me donner ladicte sauuegarde, que ie me retirerois sans parler de mon fils, lequel toutesfois personne ne croyoit que ie voulusse qu'il print le party du Roy d'Espagne; puis que ie ne vouloisy entrer, la lettre estoit du mois d'Auril: Depuis il me confirma le semblable par vn autre du troisieme May, lesquelles i'ay receus en la ville de Peronne l'vnzieme dudit mois, au retour d'un voyage que ledit Duc auoit fait en la ville de Cambray, en laquelle il auoit esté traité & receu somptueusement de Monsieur de Balagny sept ou huit iours

durant. Ce fut là qu'il fit iurer & promettre par escrit aux Gouverneurs & Capitaines desdites villes de Picardie de demeurer vnis avec luy, & ne traiter à part avec les estrangers, & ne se separer de luy à leur sollicitation, ou d'autres. Je dressay la cedulle qui fut signee, dequoy i'advertis ledit sieur de la Verriere par lettres du douziesme May en respondant aux siennes precedentes ; y adioustant que ie ne voyois pas que monsieur le Duc de Mayenne peust tenir ladite assemblee dans la fin d'iceluy, comme il s'estoit propose à mon retour de Melun, à cause de la difficulté des chemins, de l'aduis que l'on auoit donné audit Duc de l'approchement de sadite Maiesté & de son armee sur la ville de Paris, dont il estoit si transporté qu'il ne pensoit plus qu'à trouuer les moyens de la secourir, que chacun confessoit comme il m'auoit escrit, que la guerre ruinerait à la longue le Royaume & la religion, mais que personne ne mettroit la main telle qu'il falloit pour la faire cesser ; que ie scauois que ledit sieur Duc de Mayenne estoit resolu de tout perdre plustost que de traicter à part avec sa Maiesté : partant qu'on n'en fit point d'estat, mais au con-

traire de voir tout aller de mal en pis, si l'on ne facilitoit ladite assemblée, comme l'on pouuoit faire par vne cessation d'armes quelque temps, laquelle modereroit les cœurs que la guerre nourrissoit en alteration, & pourroit engendrer vne bõne paix, que i'estimois bien que sa Maiesté blasmeroit ce remede comme preiudiciable à son seruice : toutesfois ie l'asseurois que s'il estoit reietté, que le Royaume seroit bientôt remply de tant d'estrangers, que ledit sieur Duc ne pourroit plus disposer ny de foy ny de ses amis, ce que ie luy mandois franchement afin d'en aduertir sa Maiesté, ou d'en vser comme il verroit estre à faire pour le mieux; adioustant que i'estois marry de ne pouuoir donner meilleur conseil ny mieux faire, mais que i'estois bien deliberé quand lesdits estrangers entreroient de me retirer: ie n'eus responce à ladite lettre. Dequoy ie me plaignis au sieur d'Alferan, lequel fut prins en vne course que fit sa Maiesté vers Laon, où ledit Duc commençoit à recueillir & mettre ensemble ses forces, luy disant que i'auois grand regret dequoy l'on faisoit si peu de compte des aduis que ie donnois pour le bien du Royaume; que ie l'attribuois à la défiance que l'on auoit de moy, & du peu de cognois-

sance qu'on auoit de mon affection au public. Ledit sieur du Pleffis avec lequel i'auois negocié par le commandement de sa Maiesté, dit qu'il regrettoit vostre absence de la Cour, pour vostre experience & prudence, & pour la creance que nous auions l'un de l'autre : d'autant que ie voyois que sa Maiesté alloit perdant vne occasion de pacifier le Royaume, qu'elle ne recouureroit peut-estre iamais, à cause de la venue du Duc de Parme, en ce Royaume, dont il ne falloit plus douter, ainsi que i'auois appris de ceux qui auoient accompagné ledit Duc de Mayenne à Condé, où il auoit veu ledit Duc de Parme: car i'en auois voulu faire ce voyage pour ne me trouuer en lieu où tels marchez se faisoient, le priant d'en aduertir sa Maiesté, cōme ie sçeus depuis qu'il auoit fait; mais que l'on l'auoit prise en mauuaise part, comme si i'eusse voulu prescrire à sadiète Maiesté, ceux desquels elle deuoit se seruir, blasmer & controoler les autres, de sorte qu'au lieu de seruir au public & à moy mesme, ie fis tout le rebours, comme il arrive souuent aux marchands qui nauigent en ceste mer des affaires publiques, ayant le vent contraire comme ont ceux qui ont perdu leurs places de la Cour.

C E qui engendra contre moy plus d'en-
uie & de mescontentement que ie ne meri-
tois, & que le seruice de sa Maiesté ne le re-
queroit, de maniere que quand sur la cer-
titude de la venue dudit Duc de Parme,
i enuoia y demander à sa Maiesté le passe-
port, & la sauuegarde qu'elle m'auoit pro-
mis i'en fus esconduit & me fut escrit par
Messieurs le Marechal de Biron, du Pleffis
& de Reuol, & depuis par M. de la Verriere
& par monsieur de Chemeraut, ausquels ie
m'estois adressé, que l'on auoit fait vn
mauuais rapport de moy au Roy, pour le-
quel il auoit refusé lesdits passeport & sau-
uegarde; ioinct que l'on ne pouuoit goustier
mon intention & ma retraicte, laissant les
miens derriere, ce qu'on disoit pour mon
fils, ou pour mieux dire pour la place qu'il
gardoit. Ce fut au mois de Iuin que ceste
responsete me fut faicte par homme que i'a-
uois enuoyé exprés en l'armee de sa Maie-
sté pour obtenir lesdits passeport & sauue-
garde, adioustant ledit sieur de la Verriere
que mes amis estoient d'aduis, du nombre
desquels il me mandoit que vous estiez,
d'amener mon fils au seruice de sa Maiesté
auec moy, ou plustost faire redre audit Duc
la place, ou bien promettre à sa Maiesté
pour luy de la mettre entre ses mains apres

la reduction de Paris, que ledit sieur de la Verriere estimoit infallible, disant qu'on n'auroit iamais autre creance, si i'en vsois autrement que ie ne fusse participant du conseil & dessein des Espagnols, & que ma retraicte fust autre que simulée.

I' AVOIS desia prins congé dudit Duc de Mayenne, lequel i'auois laissé en la ville de Laon, & m'estois aduancé à Soissons, tant i'estois asseuré desdicts passeport & sauuegarde, sur la parole que sa Maiesté m'en auoit donnée, & la sincerité de laquelle i'y procedois. Quand ie receus lesdites lettres dont ie demeuray tres-estonné & confus, me voyant bien loing du compte que i'auois fait, & mon fils remis en ieu contre ce que ledict sieur de la Verriere m'auoit si souuent escrit: l'on m'imposoit aussi auoir fait ou escrit certaines choses, que l'on disoit ne ressembler ny correspondre aux bons propos que i'auois tenus, comme m'escriuit ledit sieur du Plessis, sans s'expliquer dauantage, dont ie fus plus scandalisé que du refus dudit passeport: car c'estoit vne calomnie ou vn artifice inuenté par mes malvueillans, lesquels pretendoient par ce moyen de me desesperer du tout, ou de me contraindre d'engager en ma retraicte

L'honneur de mon fils, ce qui me fit rechercher de parler audit sieur de Chemeraut, comme ie fis bien-tost apres, au lieu de Villiers-costerefts, croyant apprendre de luy les fondemens de ceste imposture & rigueur: mais comme celuy qui n'en sçauoit le subiect, il ne m'en peut rien dire: ce que voyant, ie le priay d'asseurer sa Maieité que ie n'auois dit, escrit, ny faict chose, pour laquelle elle me deust refuser le passeport qu'elle m'auoit accordé à Melun; lequel ie ne recherchois pour crainte que i'eusse de la perte de Paris, ny du succez des affaires de la ligue, ou autre necessité; pource que ie sçauois que ledict Duc deuoit estre bien-tost secouru si puissamment; que l'on porteroit plus d'enuie à ceux de son party, que l'on n'auoit occasion d'en auoir compassion; & que si ie m'y voulois engager à bon & scient, ie trouuerois non seulement qui me donneroit à viure plus cōmodement que non pas en ma maison; mais aussi de faire du mal. & nuire à qui mespriseroit mon seruice: que mon intention n'estoit & ne seroit iamais de conseiller à mondit fils de faire chose que ie ne voulois pas faire, c'est à dire, d'estre Espagnol, mais bien de ne precipiter sa resolution aux despens de sa reputation, comme

comme l'on vouloit que ie luy fisse faire : que i'eusse veu sadite Maiesté allant en ma maison comme elle m'auoit commandé, & luy auois promis, & luy eusse dit chose qui eust peut-estre plus seruy à ses affaires que la ville de Pontoise ou la retraicte hon- teuse de mondit fils: parce que ie scauois que ledit Duc n'estoit encôres si engagé aux estrangers, qu'il n'y eust moyen de trai- ter avec luy sur la crainte qu'il auoit de per- dre Paris, & son mescontentement des lon- gueurs & dilations desquelles le Duc de Parme vsoit à le secourir, dont si sa Maie- sté perdoit l'occasion, ie m'asseurois qu'elle en auroit tel regret vn iour qu'elle le reprocheroit à ceux qui en seroient cause.

I'EN escriuis quasi autant audit sieur de la Verrieres respondant à la dernière lettre, me resiouyssant & loüant Dieu d'auoir cogneu par cet eschantillon, le pouuoir qu'a- uoient mes malueillans de me nuire de- uant que de m'estre plus auant engagé & mis à leur mercy; Car ie ne pouuois attri- buer à sadite Maiesté, laquelle abonde en bonté, vne rigueur si grande contre vne personne qui vouloit s'engager avec ses ennemis, plus pour s'acquitter enuers son Prince & sa patrie, que par nécessité.

MONSIEVR le Duc de Mayenne estant à Peronne eut aduis de la mort de feu Monseigneur le Cardinal de Bourbon, toutesfois il creut que ce bruit estoit vn artifice de ses ennemis pour esmouuoir les Parisiens à se rendre plustost; de sorte qu'il n'en fit conte, mais estant à Reims il en eust certitude. Sur cela quelques vns luy proposoient qu'il deuoit rechercher d'embrasser vn Prince de la mesme maison, entre ceux qui faisoient profession de la religion catholique, comme vn moyen tres propre pour reünir les Catholiques contre sa Maiesté, & ceux de la religion, rompre les pratiques & desseins des Espagnols, qui estoient odieux à tout le monde, aduancer ses affaires particulieres sans enuie, voire mesme faire durer la guerre assez long-temps pour luy donner loisir de dresser sa partie en ce Royaume selon son desir, dont on luy disoit les raisons & moyens qui estoient ce semble assez capables, & faciles: toutesfois il ne les peut iamais gouster, & respondit si froidement à ceste ouuerture, que les autheurs d'icelle ne s'y vouloient embarquer plus auant, se persuadant pouoir encore mieux faire les affaires avec les forces qu'il attendoit, que par ce moyen. Lesdits sieurs de Chemerault &

de la Verriere m'escriuirent lors chacun vne lettre faisant encore mention de la paix en termes generaux, sans toutesfois m'eclaircir du mescontentement quel'on auoit de moy, & des raisons pour lesquelles ledit passeport m'auoit esté refusé, & aussi peu de ladite cessation d'armes.

IE leur fis response & principalement audit sieur de la Verriere, que la paix ne se pouuoit traiter durant la guerre, parce qu'elle empeschoit l'assemblée susdite, sans laquelle il ne falloit point attendre qu'il se fit aucune chose comme ie luy auois souuent escrit, partant que c'estoit peine perdue de plus parler de rechercher l'une & l'autre, que ie scauois aussi la necessité de Paris, voire sa perte, quand elle aduiendroit, & rendroit les choses encores plus irreconciliables qu'elles n'estoient, d'autant que ledit Duc n'estoit deliberé de ceder à tel accident, duquel toutesfois il n'auoit pas encores eu telle crainte qu'ils en auoient d'esperance en leurs armées; mais que si sur l'incertitude d'un tel euenement l'on perdoit l'occasion d'engager ledit Duc & le party à ladite paix: ie luy voulois bien dire derechef que l'on y auroit regret, & partant le priois d'aduertir sa Maiesté de ne mespriser les ou-

uertures que l'on auoit faictes aux sieurs de Vitry & de Bournonuille, par lesquels l'on auoit fait tenir quelques propos de la paix, & au demeurant ne me laisser plus longtemps en suspens dudit passeport, pour ma retraicte, afin que ie n'en importunasse plus personne, & que ie prisse party.

L'EDIT sieur de Mayenne receut lors quinze cens Espagnols du regiment commandé par Dom Anthoine de Quiroga qui auoient esté mutinez, lesquels estoient en tres-bel equipage comme ceux qui auoient touché de grandes sommes de deniers pour r'entrer en seruice; ils ne demandoient comme ils disoient que d'estre logez en lieu où il y eust de l'eau, & qu'ils n'auoient besoin d'autre chose, s'enquerans d'une chose, si sa Maiesté les voyant, les attendoit; mais ils ne tarderent gueres à nous faire sentir & paroistre qu'ils n'estoient pas si sobres & vaillans, qu'audacieux & bien vestus.

LORS le sieur de la Verriere me manda que l'on auoit surpris vne lettre que i'escriuois à ma femme, par laquelle ie l'asseurois entre autres choses de la venuë dudit Duc de Parme & de son armee, laquelle il disoit auoir tellement irrité sa Maiesté contre moy, qu'elle ne m'auoit voulu accorder

qu'un passeport tel qu'estoit celuy qu'il m'enuoyoit, par lequel il m'estoit seulement permis d'aller à Alincourt, ou à Pontoise avec mon train ordinaire, & y demeurer tant qu'il plairoit à sa Maïesté, ledit passeport contresigné, Rusé, lequel il me conseilloit d'accepter & ne laisser pour lesdites clauses d'abandonner ledit Duc de Mayenne comme il tenoit Paris pour perdu, il adioustoit que cela n'empescheroit la paix, pourueu qu'elle fust demandee avec submission & humilité: sa lettre estoit du 17. Iuillet.

IE luy renuoyay ledit passeport dès le lendemain, car ie ne fus conseillé de l'accepter ainsi conditionné, puis que sa Maïesté estoit si mal edifiée de moy, & qu'on prenoit en si mauuaïse part tout ce qui en venoit, comme on auoit faict la lettre, par laquelle ie luy mandois auoir certainement aduertir ma femme de la venue dudit Duc de Parme, parce qu'elle estoit vraye, & que plusieurs autres que moy l'auoient escrit, mais nō peut estre avec regret, comme moy, ainsi que l'on auoit peu cognoistre par la mesme lettre que l'on auoit prise & trouuee si mauuaïse, par laquelle i'auois adiousté audit aduis, qu'une bonne paix seroit meilleure que ledit secours, duquel

neantmoins ie n'eusse esté en peine d'ad-
uertir madite femme enfermee dans Paris,
si l'on m'eust enuoyé le passeport que i'a-
uois continuellement sollicité depuis qua-
tre mois, lequel m'auoit esté promis par sa
Maiesté: que ie ne pouuois que deplorer le
malheur de la France & le mien premier,
voyant le public desesperer de la paix, &
moy cōtrainct de suivre ceste armee estran-
gere pour retourner en ma maison, si i'y
voulois iamais demeurer en seureté, puis
mes ennemis auoient eu le pouuoir de me
faire refuser ledit passeport. En ce temps il
en fut refusé ou reuocé vn à mōsieur l'Ar-
cheuesque de Lyon encores plus mal à pro-
pos que le mien pour le bien du public: car
si deslors il fust venu trouuer ledit sieur de
Mayenne, comme il auoit proposé, il eust
trouué les choses plus disposées à traiter
pour la necessité de Paris, & du mesconten-
tement que ledit Duc auoit des longueurs
du secours du Duc de Parme, qu'il ne fit au
voyage qui luy fut permis à la fin d'y faire
avec monsieur le Cardinal de Gondy: Car
ils trouuerent ledit Duc de Parme, à vne
iournee de Meaux, & M. de Mayenne si
encouragé de ce secours, qu'il n'estoit plus
capable de la paix.

L'ON accuse quelques-vns de ce refus

dont ie ne puis parler qu'incertainement, mais en verité il ne seruit qu'à aigrir & animer dauantage les parisien & ceux qui leur cōmandoient, lesquels cōme par le retour dudit sieur de Lyō en ce tēps ils eussēt esté assurez de la bōté de sa Maiesté, & ne l'eussent esté de la venuë dudit Duc de parme, car il estoit encores en Flandres, & Monsieur de Mayenne si foible qu'il n'osoit passer Seine, peut-estre qu'ils eussent esté cause de sauuer la ville de peril: & que l'on eust attaché vne negociation qui nous eust donné la paix generale. Car ledit Duc de Mayenne ne la vouloit perdre, & n'eust permis qu'elle eust cōposé sans luy, & si estoit quasi desesperé de la pouoir secourir par la force, & de la sauuer autrement que par vn traité: mais c'est grande imprudence de perdre les occasiōs de seruir & secourir le public, principalement quand elle depend de plusieurs. Car il aduient rarement qu'elle se recouure, parce qu'il faut peu de chose à faire changer d'aduis à vne multitude, comme l'on esprouua bien-tost apres en ceste occasiō: car quand lesdits sieurs Cardinal de Gondy & de Lyon, arriuerēt à Meaux, ils ne seruient de riē que de cōfirmer les habitans de ladite ville en leur obstination, à cause de l'esperance qu'ō leur auoit donnée de les secourir

bien-tost; ioinct qu'il n'estoit plus au pou-
voir dudit Duc de Mayenne de disposer des
affaires; & aussi qu'il eust esté mal seant de
rendre laditte ville de Paris à la veüe du se-
cours, apres auoir enduré & laissé passer 5.
mois de temps sans y vouloir entendre.

LORS l'on m'enuoya vn passeport de sa
Maiesté pour me retirer en ma maison à la
requeste & poursuite de mon pere, expres
venu en Cour pour ceteffect; mais iene
pouuois plus m'en ayder, parce que i'auois
promis audit Duc de Mayenne, apres tant
de refus que l'on m'auoit faict, de ne me
retirer, que ie n'eusse veu ce qui aduien-
droit du secours de ladite ville de Paris. Da-
uantage ie voulois essayer de garantir les
maisons de mes amis qui estoient entre
Meaux & Paris, del'orage de ladite armée
estrangere, surquoy neantmoins i'eus tres-
mauuaise fortune: car toutes celles que i'a-
uois enuie de sauuer, furent pillées, iusques
à l'Abbaye de Malnoüe qui auoit esté tres-
bien conseruée durant le siege, laquelle
fut saccagée par lesdits estrangers avec grā-
de insolence & impieté; de sorte que ie
perdis deffors la bonne opinion que i'auois
de la conduite dudit Duc de parme, la-
quelle soit qu'il le fit par art ou autrement,
fut si confuse durant ce voyage, que ie

puis dire avec verité n'auoir iamais veu tant de desordre en nos armées Françoises qu'en celle-là : & faut que ie vous die vne particularité, c'est qu'ayant prié ledit sieur Iean Baptiste de Tassis nouuellement reuenu d'Espagne de secourir laditte Abbaye, il y menades gens de guerre, par le commandement dudit Duc de Parme qui acheuerent de saccager en ma presence ce que les autres auoient laissé, dont ie ne peus iamais auoir iustice, pillerent aussi en deux iours toutes les Eglises, depuis Lagny iusques à Paris, que sa Maiesté auoit conserué entieres durant ledit siege, ce qui excita plusieurs clameurs & maledictions du peuple contre laditte armée, de laquelle ils s'attendoient de receuoir tout autre traictement qu'ils nous reprochoient en passant par les villages.

L'ON discouroit diuersement du succès aduenu entre ces deux armées, & disoit-on que si sa Maiesté eust gardé & defendu le passage de Claye, dont l'abord estoit tres-difficile : à cause d'un ruisseau qui y passe, qui est accompagné d'un marés fascheux, & laissé quelque caualerie à l'entour de Paris pour empescher l'entrée des viures & la sortie des habitans : elle eust acculé ledit Duc de Parme, l'eust contraint

prendre vn autre chemin ou de combattre en ce passage avec desauantage; quoy faisãt peut estre que les Parisiens qui n'en pouuoient plus, eussent esté contraincts de composer & venir à la raison. Ledit Duc de Parme craignoit fort estant à Meaux, lors que l'on luy representa le chemin qu'il falloit qu'il tint, que sa Maiesté prist ce conseil de sorte qu'il fut tres aise quand il trouua ce passage abandonné, encores plus quand il sceut que sadite M. auoit leué son siege & venoit au deuant de luy, & n'auoit laissé aucunes forces aupres de Paris, & neantmoins qu'elle luy donna loisir les deux armées se voyans, de retrancher à la teste de la sienne au village de Ponponne, où ils estoient logez; car il vit ledit siege leué, qui estoit ce qu'il cherchoit, sans estre contrainct de combattre. Sur cela il print Lagny par force, à la veue de sa M. quasi sans que son armée eust autres alarmes que de petites escarmouches qui se faisoient à la teste des deux armées, dõt il se mocquoit: ceste prise accommoda son armée qui souffroit desia assez audict ponponne, aussi fut elle cause que celle de sa Maiesté se desbanda & retira incontinent, laquelle alla presenter vne escalade à Paris, qui faillit à reüssir. Je ne pretends blâmer personne en disant l'opinion sus-

dite & ce qui est aduenu; car ie sçay qu'il est plus facile de reprendre que de bien faire en toute chose, & principalement au fait de la guerre, où ce qui s'entreprend avec plus de cōsideration succede souuēt le plus mal, autāt parla faute de ceux qui obeyssent, que des chefs, soit que les vns executent mal leur charge, ou que les autres rencontrans ce qu'ils n'ont pas preueu, demeurent confus. Sa Maiesté avec ceux qui la conseilloyent leuant le siege, s'attendoit de combattre l'ennemy, & d'un coup mettre fin à leurs affaires: & de faict la Maiesté se presenta d'abordee, comme si elle eust voulu combattre, & peut estre que si lors elle eust enfoncé ledit Duc sans marchander qu'elle l'eust bien empesché, car il n'auoit encores commencé ses trenchees. Mais quand il s'apperceut que sadite Maiesté se logeoit, & sçeut qu'elle n'auoit rien laissé deuant Paris, il commença à se retrancher, & vser de telle diligence, qu'en vingt-quatre heures il eut acheué. Nous vismes à ce que peuuent l'ordre & l'obeyssance en vne armee; car ledit Duc n'auoit aucuns pionniers, les gēs de guerre firēt seuls ceste besongne, mais les chefs y mettoient les mains cōme les moindres, & traualloiet par ordonnance: de sorte qu'il n'y auoit aucun embarrasse-

ment entre eux, d'autant que les quartiers estoient departis aux compagnies, lesquelles se releuoient & rafraichissoient l'une apres l'autre par heures, à mesure qu'elles auoient aduancé la besongne qui leur estoit baillée par les ingenieux en la presence dudit Duc de Parme, & des principaux de son armée: nos François les vouloient imiter, comme ceux qui pourestre logez à la teste en auoient plus de besoin, mais ils ne faisoient rien qu'approcher des autres, & ne traualloient que par acquit & confusement.

TANT ya que monsieur de Mayenne arriua à Paris le 18. ou 19. du mois de Septembre l'armée de sa Maiesté s'estant retirée au delà de la riuere d'Oise: & combien que les habitans de ladicte ville eussent toutes occasions de nous receuoir ioyeusement, en consideration de ladicte deliurance, & de la gloire par eux acquise en la deffense de leur ville: toutes-fois ils estoient si combattus de la faim, & des maux qu'ils auoient soufferts, qu'ils nous regardoient d'un œil plus pitoyable qu'allegé: ne plus ne moins que ceux qui sortent d'un peril contre leur esperance, sont encores plus estonnez que ioyeux, sentans plus le mal qu'ils ont enduré, qu'ils

ne recognoissoient bien qui leur arriue, & font si troublez d'apprehension & de douleur qu'ils mesprisent leur deliurance. Mais comme tels accidens font leurs effects selon la nature & disposition des cœurs où ils agissent: nous en voyons aussi sortir plusieurs de ceste agonie; transportez de rage & d'un desir effrené de se venger & mal-faire à vn chacun, & les autres si mattez du passé & succez de l'aduenir, qu'ils auoient honte dece que les autres faisoient gloire, & ne pouuoient nous regarder, ny nous eux sans soupirer.

Je n'escri point les necessitez & les extremitez qui furent endurées, parce que ie n'en puis parler que par ouy dire, qu'elles ont esté publicées par ceux qui les ont veuës & supportées, mais ie confesseray que ie n'eusse iamais creu que ladite ville eust peu tant patir; & que si i'ay iamais esté abusé en chose, ç'a esté en celle cy, & au iugement que i'en faisois, me resouenant du peril, auquel on disoit ordinairement à nos Roys, que ladite ville estoit quand seulement les marchez se trouuoient deux fois sans bleds: mais les maux qui nous arriuent par force se supportent plus doucement que ceux que nous estimons nous aduenir par nostre faute, chacun se resoluant d'endurer ce qu'il

ne peut euer: à quoy l'on adiouste le desir & le besoin que l'on a d'en vser ainsi pour conseruer le sien & euer le'pis, mesme quand il s'agit de la religion, laquelle a sur plusieursvne puissance merueilleuse, toutesfois j'attribuë bien autant ceste patience ou constance au naturel commun des Parisiens qu'à toute autre chose, car ils sont ordinairement plus timides que courageux, & si esclaués de leurs biens & commoditez, & pour ceste raison se discordans en ce qui concerne le public, qu'ils s'accommodent plus volontiers au temps, qu'ils ne regimbent contre le mal. Aussi voyons nous que peu de gens ont ordinairement esté cause dès mouuemens & changement aduenus en ladite ville, laquelle a esté plus preseruee de Dieu que des habitans, és perils esquels elle s'est trouuee, & veritablement nous pouuons dire que Dieu y est aussi bien seruy qu'en lieu du monde.

IE n'y demeuray que deux iours, car i'auois prins congé du Duc de Mayenne pour me retirer en ma maison de Villeroy, en laquelle ie me rendis le iour mesme que le Duc de Parme assiegea Corbeil: là me vindrent trouuer le sieur de Fleury mon beaufrere, & l'Abbé de Chesy avec lettre de monsieur le Cardinal de Gondy, & de mō.

sieur le Chancelier, par lesquelles ils me prioient tant en leurs noms que de plusieurs autres Seigneurs, estant au seruice de sa Maiesté, de reprēdre les erres de ma premiere poursuite, pour le repos du Royaume, & leur dōner aduis de ce qu'ils doiuent faire de leur costé. pour y seruir, disant qu'il ne falloit se rebuter pour les choses passées, ny laisser à bien faire au public pour des considerations priuées, qu'il y auoit plusieurs heures au iour, & que les cœurs & les volōtez des Princes estoient suiets au changemēt comme les occasiōs s'en presentoient. Que chacun de part & d'autre auoit esprouuē la difficulté de vaincre son ennemy par la voye des armes tant les partyes estoient puissants & bien defendus, partant qu'il falloit en chercher & trouuer quelques autres pour sortir de nos miseres; qu'ils m'asseuroident que sa Maiesté estoit maintenant plus disposée d'y entendre que iamais, comme estoient ses principaux seruiteurs, partant qu'il n'estoit plus question que d'y faire entendre lediēt Duc, enquoy chacun estimoit que ie pourrois mieux seruir que nul autre, tant pour m'y estre desia employé, que pour la confiance qu'ils auoient de l'affection que ie portois au bien du Royaume, pour lequel à ceste cause ils me

coniuroient d'entreprendre ceste charge, en laquelle ils me promettoient de me seconder & assister de tout leur pouuoir, comme ils me promettoient que feroient tous les autres bons seruiteurs de sa Maïesté, laquelle particulièrement me scauroit gré du deuoir que i'y ferois, sans qu'il fust plus au pouuoir de personne de me trauerser auprès d'elle, & reietter sur moy les fautes des autres, ny attribuer à la necessité publique ou priuee mes poursuittes comme cy deuant il auoit esté fait & assez impudemment par gens qui ne me cognoissoient pas, & comme ceux qui s'estoient promis tout autre issuë du siege de Paris que celle qui estoit aduenue.

APRES auoir informé bien particulièrement lesdits sieurs de Fleury & de Chesny du passé, tant de ce qui auoit esté commencé par moy que par d'autres concernant la paix, ie leur dis que la vie me defaudroit plustost que la volonté de seruir à vn si bon œuure, recognoissant plus que iamais comme i'auois fait dès le commencement, que si la guerre duroit elle ruinerait en fin la religion Catholique & le Royaume; que ie l'auois aussi predict & remōstré à tous ceux qui de part & d'autre auoient pouuoir d'y remedier; mais que i'auois esté plustost blas-

mé

mé que creu, comme si i'auois esté poussé à ce deuoir pour faire mes affaires particulieres & non les publiques; que cela m'auoit assez despleu, mais non rebuté ny changé d'opinion ny de volonté de seruir au bien; rendu vn peu plus circonspect & retenu en ceste action que deuant, pour de volee ne me laisser transporter à l'aduenir à mon affection, ny à la necessité publique comme i'auois faict: ioinct que i'auois recogneu mes espales estre trop foibles pour porter ce fardeau qui estoit trop pesant, d'autant que les interests priuez auoient maintenant plus de puissance sur les François; que les raisons & consideratiōs publiques: dauantage que ie n'estimois point que la paix se peust traicter durant la guerre, pour ce que ledit Duc de Mayenne ne pouuoit ny vouloit y entendre sans ceux du party; avec lesquels il ne pouuoit communiquer sans les assembler: ce qu'il ne pouuoit bonnement faire durant la guerre à cause des dangers des chemins; comme il auoit esprouué depuis cinq mois, qu'il les auoit mandez en vain, ainsi que i'auois souuent dict & escrit à sa Maiesté & à ses seruiteurs; dont aussi l'on auidit faict peu de compte: & toutesfois il estoit manifeste que si la guerre ne cessoit, ledit Duc seroit plustost

Q

contrainct de traicter avec les Espagnols que de composer avec sa Majesté, pour ce qu'il ne pouuoit plus se deffendre ny maintenir seul sans eux, & eux ne l'assisteroient plus qu'ils ne fussent asseurez de luy : au moyen dequoy il me sembloit qu'il falloit faire deux choses pour bien acheminer les affaires. La premiere que sa Maiesté & ledit Duc commissent & deputassent cinq ou six personages d'honneur, pour traicter ensemble, sans plus faire manier les affaires par vn seul, & en cachette, comme il auoit esté pratiqué iusques à présent & l'autre accorder dès à présent vne surseance d'armes pour certain temps pour faciliter ladite assemblée, afin de commencer à nous adoucir & reconcilier ensemble. Que si on trouuoit bon ce chemin, ie m'y engagerois volontiers avec les autres, si l'on m'en iugeoit digne : sinon ie supplerois ces Messieurs d'en estre excusé, parce que ie ne pouuois esperer que les choses succedassent bien, y procedant autrement: que c'estoit l'aduis que ie pouuois donner à ces Seigneurs qui les auoient enuoyez vers moy, lequel ie desirerois qu'ils prinsissent en bonne part; & neantmoins ie volus voir ledit Duc de Mayenne, & luy faire entendre ce que lesdits sieurs

de Fleury & de Chesý m'auoient rapporté deuant leur parlement, afin de descouvrir son inclination pour les en instruire.

S V I V A N T cela ie fus trouuer ledit Duc au siege de Corbeil, qui me dit, que monsieur le Chancelier auoit desia mandé à madame de Nemours sa mere, par Iean Baptiste, que l'on appelloit le compere qui souloit estre premier maistre d'hostel de la Roynie, cela mesme qu'il m'auoit faict dire par les sieurs de Fleury & Chesý, & sur ce qu'il demandoit que iefusse enuoyé à Noisy, pour en conferer avec les seruiteurs de sa Maiesté, en la presence de monsieur le Cardinal de Gondy, asseurant que ce voyage reüssiroit au bien du public, & de la religion, à quoy ledit Duc adioustoit, qu'il auoit desia promis à ladite Dame de m'y enuoyer, me priant de prendre ceste peine : mais ie luy respondis que ie n'y vonlois aller seul pour n'estre subiet à desadueu & me faire moquer de moy comme i'auois fait, partât qu'il en deputast d'autres, ou que te n'yrois point. Je m'apperceus bien que ledit Duc n'approuuoit ceste assemblée sous couleur qu'elle donneroit ialousie aux Espagnols & à leurs adherans, mais qu'il desiroit que l'on fit vne cessation

d'armes : i'apprins aussi de Monsieur de Rosne, qui estant allé n'aguères à Pontoise querir de la poudre & des balles à canon, il auoit dit à mon fils sur vne lettre de Madame de la Roche-Guyô, laquelle auoit assez de part aupres du Roy, faisant mention de la paix, qu'il fit mettre en auant par le moyen de son pere, vne cessation d'armes, comme vn moyen tresà propos & necessaire pour paruenir à ladite paix: de quoy ie fis lors peu de conte, estimant qu'on ne s'y arresteroit, car il me sembloit que ce faict deuoit estre manié plus solemnellement; dont à mon retour ie priay lesdits sieurs de Fleury & de Chesy, lesquels i'aduertis de ce que i'auois appris de monsieur de Mayenne, & dudit sieur de Rosne, de faire remonstrance à mondit sieur le Chancelier, afin qu'il tint la main que les affaires fussent traittes par conference entre personnes d'autorité, publiquement, & non secrettement, pour mieux engager les parties, autrement l'on ne feroit rien de bon.

DEUX iours apres le partement de Ville-roy, desdits sieurs de Fleury & de Chesy, apres la response susdite, arriva vers moy vn homme de mon pere enuoyé exprès pour me faire sçauoir qu'il auoit veu la Ma-

iesté à Magny, laquelle luy auoit dit en la presence de monsieur le Marechal de Biron estre si desiruse de la paix, qu'elle estoit contente de commencer par vne cessation d'armes, pour donner relasche à ses subiets, & moyen audit Duc de conferer avec les partisans sans lesquels il disoit ne pouuoir rien faire.

PARTANT qu'il n'estoit plus question que d'y disposer ledict Duc, & mettre la main à l'œuvre, ayant comme il auoit, parole de sa Maiesté, & sur ce me commanda d'en parler audit Duc, de l'exhorter d'y entendre & d'en entreprendre la commission, & à ceste fin l'aller trouuer à Pontoise, où ils s'acheminoit, & si i'en faisois difficulté, luy enuoyer vn passeport dudit Duc, avec lequel il le viendrait trouuer à Paris, ou en l'armée pour luy en faire l'ouverture: m'admonestant toutesfois de ne perdre ceste occasion d'assister le public en sa necessité en laquelle il se trouuoit, vsant des termes & commandements de pere; dequoy i'aduertisincontinent ledict Duc, qui estoit encores au siege de Corbeil, lequel me permit incontinent ce voyage me pressant de l'entreprendre, & accorder la dite cessation d'armes, sans laquelle il disoit ne pouuoir assembler ceux du party,

& moins traicter sans eux. Je le suppliay encores à ce coup, de ne m'y enuoyer seul pour les raisons susdites: toutesfois ie ne peus iamais gagner ce poinct sur luy, estant en cela conforté par tous ceux qui le conseilloyent, & mesmes par Messieurs de Lyon & Ianin; ce qui me despleust grandement, ioinct qu'il me sembloit que leurs raisons lesquelles estoient seulement fondées sur le mescontentement que l'on auoit à Rome, en Espagne, & en plusieurs villes de ce Royaume, que ledit Duc feist traicter publiquement avec sa Maiesté, estant de contraire religion, ne meritoient d'estre balancées avec le bien que l'on pouuoit esperer pour la religion & pour le Royaume par vne publique negociation.

TOUTEFOIS ie ne peus rien profiter, quoy voyant ie me resolut de voir Monsieur mon pere pour le contenter, & luy en dire mon aduis, prenant charge dudit Duc de traicter & accorder ladite cessation d'armes accompagnée d'un commerce general, d'un reglement tant pour le labourage que pour la leuée des deniers publics durant icelle. Le Cardinal Caietan partit en ce temps de Paris pour s'en aller en Italie à cause de la mort du Pape Sixte cinquieme

qui nous l'auoit enuoyé, & nous laissa l'Euesque de Plaisance creature du Duc de Parme en qualité de Vice-legat, dont il exerça la charge sans pouuoir vallable & contre les formes du Royaume. Car puis-que le Pape, qui auoit delegué ledit Cardinal, estoit decedé, son pouuoir cessant, comme il faisoit, il ne pouuoit aussi subdeleguer vn autre; ioinct qu'en ce Royaume nous n'admettons pas volontiers telles delegations; aussi sa commission ne fut presentee au Parlement, & se contenta d'entreprendre ceste faute pour s'autoriser & s'accommoder.

LEDIT Cardinal laissa à son partement entre les gens de qualité vne opinion toute contraire à celle qu'ils s'estoient promise à son arriuee: car il se monstra durant son séjour si partial pour le seruice du Roy d'Espagne, qu'il mesprisoit les conseils de ceux qui n'y adheroient, & ne faisoit conte des autres. L'on a voulu dire que sa Sainteté n'estoit pas trop satisfaicte de luy, cōmençant à cognoistre, que nostre guerre panchoit bien autant du côté de l'ambition que de religion.

I E partis donc de ma maison pour m'en aller à Pontoise avec la susdite charge sans estre retenu des bruslemens & rauages que

faisoient tous les iours les estrangers, iusques aux portes d'icelle, & qui estoit remplie de toutes sortes de personnes iusques à trois ou quatre mil qui s'y estoient retirez avec leurs femmes, enfans & bestiaux, pour leur seureté. Mon pere m'attendoit à Pontoise, lequel me confirma de bouche ce qu'il m'auoit escrit, & aduertit sa Maiesté de mon arriuee, ensemble du rapport que ie luy auois fait de l'intention dudit Duc, & de la charge que m'auoit donnee sadite Maiesté, qui luy manda auoir cōmandé à monsieur le Marechal de Biron, & Messieurs de Turenne & du Pleffis de conferer avec moy, & qu'ils se trouueroient pour ce faire dès le lendemain à Buy proche d'Alincour, où arriva ledit sieur de Fleury, qui me dit de la part de monsieur le Chancelier, qu'il se résouïssoit de ma venuë, & qu'il en esperoit tout bien, & que sa Maiesté auoit député lesdits sieurs pour parler à moy, ayant iugé à propos qu'il n'en fust point, d'autant qu'il en pourroit mieux fauoriser ma negotiation aupres de sa Maiesté laquelle estoit lors à Gisors.

CESTE assemblee & conference commençadonc au lieu de Buy le quinziesme iour d'Octobre entre les susdits Seigneurs & moy, le maistre de la maison y assistant, &

ledit fleur de Fleury, leur fut représenté tout ce qui s'estoit passé en la poursuite de la paix, & la bonne volonté que les chefs auoient d'y entendre; & recogneu qu'il falloit commencer par vne cessation d'armes pour quelque temps, laquelle fut pour ceste cause arrestée de part & d'autre, & sur ce discours de la forme & des conditions, & particulièrement des qualitez qu'on donneroit aux chefs, du departement & leuées des deniers publics, de la liberté & seureté du commerce, & du labourage au soulagement du pauvre peuple, du renuoy hors du Royaume des forces estrangeres, de la deliurance des prisonniers de guerre, où il fut faict mention de celles de Messieurs de Guise & d'Elbœuf, & de Madame de Longueuille & sa suite, & de la restitution & iouissance des biens saisis, & de l'ordre qu'on tiendroit pour faire executer & garder ladite cessation d'armes, des lieux où elle s'estendoit, du temps qu'elle dureroit, ce qui fut debattu & discoursu diuersement: mais en fin il fut artesté que chacun mettoit son aduis par escrit pour en communiquer plus meurement, & s'en accorder à vn autre iour.

DES le lendemain ie leur enuoyay par

le fleur de Fleury ce que i'en auois proiet-
té & escrit: dont depuis ie conferay avec
eux au lieu de Preaux près Gisors, où ils
amenerent monsieur de Reuol. Mais d'au-
tant que sa Maiesté estoit partie dudit Gi-
sors, & que ie n'estois marry de sçauoir l'in-
tention dudit Duc, sur l'aduis que ie luy
auois donné de nostre premiere confere-
ce, deuant que passer outre, nous ne con-
clusmes ny accordasmes rien, & seulement
recogneusmes discourans sur chacun article
de l'escript que i'auois dressé, par où à peu
prés nous en deuions sortir, si nos chefs
continuoient à vouloir faire ladite cessation
d'armes.

SOVDAIN que sa Maiesté fut reuenue
audit Gisors, lesdits Seigneurs me renuoye-
rent querir, & manderent aussi à mon pere
de s'y trouuer, lesquels me dirent par la
bouche de monsieur le Marechal de Biron
assez succinctement, qu'encores que sa
Maiesté fut aduertie, que monsieur le Duc
de Parme s'en retournoit avec son armee au
pays Bas, & qu'il estoit en si mauuais estat,
que de long-temps il ne pourroit reuenir
en ce Royaume, de sorte qu'elle ne pou-
uoit faillir qu'elle n'en receust vn grand ad-
uantage: toutesfois que sa M. auoit tant de
pitié de son pauvre peuple, & estoit si rem-

plie de bonté enuers ses subiects, qu'elle ne vouloit point laisser de leur donner la paix, si ledit Duc s'y vouloit resoudre : mais qu'elle ne pouuoit aucunement goustier la dite cessation d'armes qui auoit esté proposée : par ce qu'elle luy estoit trop preiudiciable, d'autant que c'estoit accroistre ses suiets à la desobeyssance, & vn moyen de rafraischir les viures dans les villes qui en auoient nécessité, comme celle de Paris; donner temps & loisir audit Duc de Parme de dresser ses forces, en ce faisant reculer plustost que d'auancer la paix generale, laquelle si on vouloit pouuoit estre aussi tost concludë, & apres plus facilement executée & mieux receuë que non pas la dite cessation d'armes. Mais d'autant que i'auois souuent dit, que le Duc ne pouuoit traiter sans l'aduis & consentement de ceux de son party, lesquels il ne pouuoit assembler durant la guerre à cause des dangers des chemins, ils offroient des passeports de sa maiesté pour les aller querir; & faire venir seurement, lesquels seroient expediez en la forme qu'ils aduiseroient avec moy, si ie m'en voulois contenter: adoustant que ce moyen auoit esté pratiqué en autre temps: mais que durant nos guerres ciuilles, l'on n'auoit iamais faict cessation

d'armes generallyment : partant que sa Ma-
iesté ne s'y vouloit point accommoder.

IE luy respondis que l'on m'auoit man-
dé, & fait venir exprés pourtraitter ladite
cessation d'armes, que ledit Duc m'auoit
sur cela enuoyé & donné charge de l'ac-
corder, croyant que sa Maiesté fust resoluë
comme on luy auoit escrit, mais puis qu'il
estoit autrement & que l'on auoit changé
d'aduis, & que maintenant ils faisoient vne
autre proposition ie ne pouuois y respon-
dre sans sçauoir l'intention dudit Duc, le-
quel à ceste cause ie retournois trouuer le
lendemain avec la permission de sa Maiesté
& la leur; & neantmoïs qu'il ne falloit lais-
ser à faciliter les moyens de faire la paix
pour la retraitte dudit Duc de Parme, & de
son armée, parce que de long-temps elle ne
recouriroit par armes l'aduantage qu'elle
auoit perdu deuant Paris : que c'estoit tou-
siours à recōmencer, que tant plus la guer-
re dureroit, plus sa Maiesté y perdrait, car
chacun de part & d'autre la faisoit à ses des-
pens; & plus le mal est inueteré & plus il
est difficile à guarir : que i'estimois que les
Espagnols n'en feroient aucunement mar-
ris, parce qu'ils ne s'y estoient formelle-
ment opposez quand on leur en auoit par-
lé.

IE receus le soir mesme vne lettre dudit Duc, par laquelle il me defendoit d'accorder ladite cessation d'armes, d'autant que ledit Duc Parmene le trouuoit à propos, que les habitans de Paris en murmuroient comme disoit le Preuost des Marchands, & aussi que l'Euesque de Plaisance que ledit Legat auoit laissé ne l'approuuoit : partant il me prioit seulement d'obtenir la liberté du commerce & la seureté du labourage. Par là ie reconneus que de part & d'autre l'on ne s'accorderoit que trop à reietter les moyens d'acheminer & faciliter la paix.

ESTANT aupres dudit Duc ie luy fis entendre ce que i'auois faict avec la dernière responce & ouuerture qui m'auoit esté faicte de la part de sa Maiesté, laquelle il prit resolution d'accepter, apres plusieurs disputes & considerations, se permettant qu'outre lesdits passeports, que l'on promettoit de luy bailler, l'on accorderoit aussi le cōmerce & le labourage qui estoit ce à quoy il tendoitle plus.

DONC ledit Duc ayant pris resolution d'accepter lesdits passeports, pour enuoyer aux prouinces, & assembler le party, il me pria de faire encore ceste office, m'asseurant de rechef qu'il ne desiroit rien tant

que de faciliter ladite assemblée, pour composer les affaires: il me donna encore charge de faire instance du commerce & du labourage, & d'asseurer vn chacun de sa bonne volonté à la paix, mesmes me la bailla par escript.

Auec lequel ie me resolus de faire encore le voyage, iugeant estre necessaire d'auancer ladicte assemblée, pour en tout cas leuer audit Duc l'excuse de traiter ce qu'il faudroit sur icelle.

I E fus à Mante pour cela, où ie trouuay Monsieur le Marechal de Biron qui estoit sur son partement pour aller en Anglettere & Allemagne querir le secours qu'il en emmena depuis, & M. le Chancelier qui se trouua en son lieu en la conference, en laquelle nous accordasmes la forme desdits passeports, lesquels ne furent deliurez suivant nos Memoires, mais seulement furent expediez pour deux mois, pour plus auancer ladite assemblée, comme chacun iugeoit estre necessaire de faire, afin de preuenir les pratiques & recherches des forces estrangeres quel'on faisoit de part & d'autre: toutesfois il me fut promis quel'on les prolongeroit, si l'on cognoissoit qu'il fust necessaire. Nous fismes vn reglement pour la liberté, & seureté du labourage, qui fut

depuis approuué & publié de part & d'autre ; mais nous ne peûmes conuenir dudit commerce general, pour les difficultez que l'on me fit , & recogneufmes que l'on n'auoit aucune enuie de nous accommoder : toutesfois ils ne voulurent pas m'en esconduire du tout, pour ne nous effaroucher, mais s'exculoient de n'auoir pouuoir de passer outre, & me promirent d'en escrire à sa Maiesté, laquelle estoit allée apres ledit Duc de Parme qui estoit en fin party, nonobstant les remonstrances de ceux de Paris, pour s'en retourner en Flandre avec son armée, me priant d'attendre l'adite response, & cependant enuoyer audit Duc de Mayenne lesdits passeports afin de s'en seruir, comme ie fis. De sorte que ie me retiray à Alincourt aupres de mon pere, où ie receus la nouuelle de la prise de Corbeil, & du sac de ma maison, laquelle durant le dit siege auoit seruy de retraite à plusieurs seruiteurs de sa Maiesté ; laquelle il auoit aussi prise en sa protection, & honorée d'une sauuegarde, & estoit encore remplie de plusieurs mesnages sans iamais auoir fait la guerre ny refusé la porte & acceds aux seruiteurs de sa maiesté, ny mesmes desobey à ses commandemens, toutesfois l'on y mit vne garnison qui y demeura six semaines.

MON seiour audit Alincour attendant la susdite responce, fut cause d'une grande faute qui fut faicte ou par malice, ou par ignorance par ceux auxquels ledit Duc donna charge de dresser ou enuoyer aux prouinces les lettres pour faire ladite assemblee, suiuant lesdits passeports que ie luy auois enuoyez, car elles portoient mandement d'une conuocation des estats generaux du Royaume, dont ie n'auois eu aucune charge de parler, & n'en auoit aussi esté fait aucune mention, moins aussi d'une autre clause portée par lesdites lettres, par laquelle ledit Duc donnoit occasion de croire qu'il vouloit assembler le party, plus pour eslire vn Roy que pour autre chose.

DE QUOY ie fus le premier aduertiy, & certes par hazard, car ledit Duc ny pas vn des siens ne m'en manderent rien : mais estant allé faire vn tour à Paris, en attendant lesdites responses de sa Maiesté pour voir M. de la Chastre qui m'y auoit conuié, vn Gentil homme seruant dudit Duc, lequel il auoit depesché en Prouence & en Languedoc avec lesdites lettres, me vint trouuer pour scauoir de moy comme il en deuoit vser, dont il disoit auoir esté mal instruit par ceux qui les luy auoient baillées: auquel ie dis que lesdites lettres auoient esté mal-faictes;

faictes, que ie n'auois eu charge de prendre lesdits passeports pour l'effect auquel l'on les employoit, & qu'il ne les deuoit porter: aussi que ce n'estoit l'intention de ceux qui les auoient accordez & demandez, & particulierement que c'estoit me faire tort. Que les porteurs d'icelle couroient fortune d'estre arrestez, & prins estant descouuerts, & que ie serois le premier à les condāner quand on les iugeroit. Que ledit Duc receuant lesdits passeports m'auoit expressement escrit & asseuré sur la remonstrāce & supplication que ie luy en auois faicte, & qu'il n'escriroit ny manderait rien aux prouinces en vertu d'iceux qui peust offenser sa Maiesté ny ses seruiteurs, & toutesfois ie voyois le cōtraire; dont ie ne luy conseillois de se charger, & luy dis que ie m'en plaindrois à Madame de Nemours, de Montpensier & du Maine, qui estoient en la ville, & ceux qui les assistoient, cōmme ie fis dès le iour mesme: j'en fis aussi vne bonne despesche audit Duc & à Monsieur le President Ianin.

LESDITES Dames ordonnerent la retention desdites lettres: cependant ie reuins à Pontoise, & à Alincourt d'où ie donnay aduis à Monsieur le Chancelier, & à Monsieur le Mareschal de Biron de ceste faute, & depuis leur enuoyay la responce mesme

R

que Monsieur le President Ianin me fit à la plainte & depesche que ie luy en auois faite, par laquelle il me mandoit que cela auoit esté fait par inaduertence & non par malice, que l'on y pouruoiroit, & que l'intentiõ dudit Duc estoit tres bonne, qu'il estoit seulement necessaire que iela visse pour faire reformer lesdites lettres en faisant prolonger lesdits passeports, d'autant que le terme d'iceux estoit expiré quasi deuãt qu'ils fussent receus où l'on les auoit enuoyez.

MESDITS sieurs le Chancelier & Marechal de Biron me firent responce qu'ils auoient trouué ceste depesche tres-mauuaise, & bien esloignée de l'esperance que ie leur auois donnée de l'intention dudit Duc: mais puisque ledit President m'auoit rescrit qu'il la reformeroit quand il me verroit, qu'ils me conseilloyent d'aller trouuer promptement ledict Duc, afin qu'il y fit remédier.

VERITABLEMENT Monsieur, ceste depesche auoit esté mal considerée & escrite, car iamais il n'auoit esté parlé desdits estats generaux, & moins d'eslire vn Roy: c'est chose aussi que sa Maiesté se fust bien gardée d'accorder, si elle se fust seulement aperceue que l'on eust tiré à ce but par le memoire aussi que ledit Duc me bailla, que i'ay

encores, pour accepter lesdits passeports, il ne fit aucune mention de tout cela : & pour maintenir & cōuoquer lesdits estats, il eust bien fallu plus grand nombre de passeports que ie n'en pris : car vous sçauiez qu'il faut escrire à tous les Baillifs & Seneschaux du Royaume, & ie n'auois leué que vingt ou vingt cinq passeports, tant pour le dedans que pour le dehors, où nous auions accordé qu'ils seroient enuoyez.

L'ARRIVAY à Soissons la veille de Noël, audit an, 1591. où ie trouuay ledit Duc, auquel ie fis ma plainte & remonstrance de l'expedition & enuoy desdites lettres, dont il ietta la faute sur ceux qui les auoient dressees, & sur le peu de loisir qu'il auoit eu de les considerer à cause qu'elles auoient esté faictes en chemin, & lors qu'il estoit accablé d'affaires avec ledit Duc de Parme, & pour faire la depesche du President Ianin qu'il auoit enuoyé en Espagne, & des continues alarmes que sa Maiesté leur auoit donnees iusques à Guise. Mais qu'il estoit contēt de les faire reformer, en m'assurant de n'auoir rien promis audit Duc de Parme qui l'obligeast à ruiner le Royaume, ny ses amis, sans l'aduis desquels il se garderoit bien aussi de promettre aucune chose à qui que ce fust, qui importast au general de la cause

dont il ne se partiroit iamais.

Plusieurs qui estoient aupres de luy le destournoient de ladite assemblée, laquelle il disoit estre fort suspecte aux Espagnols, desquels ils luy remonstroient qu'il auoit plus grand besoin que iamais, & luy deuoit estre aussi en particulier plus dommageable qu'utile: d'autant qu'en telle assemblée publique, l'on s'estudie ordinairement de diminuer l'autorité & puissance de ceux qui commandent: toutesfois il passa par dessus leurs raisons, & fit dresser vne forme de lettres, laquelle i'adressay au sieur de Fleury, pour faire voir à sa Maïesté, luy donnant aduis de la disposition en laquelle ledit Duc estoit.

SA Maïesté fit changer quelques mots ausdites lettres, qui n'importoient à leur substance, offrans en cas qu'on les voulust enuoyer selon la reformation, de rafraischir & prolonger lesdicts passeports pour tel temps qu'il seroit aduisé, encore qu'elle n'eust que trop d'occasion de se defier de ladite assemblée, ayant surpris des lettres qui alloient à Rome qu'il confirmoient en ce soupçon: neantmoins elle vouloit passer par dessus tout cela, pour faciliter la paix & ne diuertir ledit Duc à y entendre, puis qu'il continuoit à protester, qu'il ne pou-

uoit rien faire sans ladite assemblée.

LEDIT sieur de Fleury eut charge de faire cest office enuers sa Maiesté, laquelle luy commanda de parler luy mesme audit Duc sur ce propos, pour mieux entendre & concevoir son intention, dont i'aduertis ledit Duc qui fut conseillé de plusieurs de le voir & faire infinis voyages, cōme s'il eust esté question de conclure la paix: toutes-fois il le vid en public & parla à luy, dont ledit sieur de Fleury retourna assez satisfait.

MONSIEVR de Neuers estoit lors à Soissons, qui m'auoit mandé qu'il desiroit parler à moy, mais ledit Duc ne le voulut permettre, dont ie fus tres marry pour le respect que i'ay tousiours porté audit Duc de Neuers, & l'esperance que i'auois de profiter avec luy pour le public.

L'ON promit audit sieur de Fleury, que l'on luy enuoyroit apres son partement vn memoire des passeports qu'il falloit faire rafraischir avec vn double de ladite lettre reformee, signee & approuuee dudit Duc.

LEDIT sieur de Fleury trouua la Cour partie de Sélis, & separée de sorte qu'il ne peut executer sa charge, & fut contraint la suivre iusques aupres de la ville de Chartres,

laquelle sa Maieſté alla de là aſſieger : ledit Duc ne laiſſa de luy enuoyer leſdites lettres & memoires par vn trompette expreſ pour en auoir reſponſe plus ſeulement. Le ſieur de Videuillle arriua en ce temps là à Soiſſons, lequel auoit veu Monsieur le Chancelier & monsieur Do, & conſeré de nouveau du commerce par le commandement dudit Duc, où il n'auoit rien profité, parce qu'ils auoient reſuſé de comprendre le bled, le vin, & le foin, tant ils craignoient accommoder Paris, qui en auoit certainement neceſſité : toutesſois ils luy donnerent apres eſperance qu'ils pourroient changer d'aduiſ, apres en auoir parlé à ſa Maieſté, laquelle ils allerent trouuer audit ſiege de Chartres.

LEDIT Duc ayant ouy ledit ſieur de Fleury, ſur le ſoupçon que ſa Maieſté auoit conceuë de ladite aſſemblee, fondee ſur ce qu'elle apprint par leſdites lettres interceptes, que cela ſeul auoit eſté cauſe du retardement deſdits paſſeports, luy reſpondit que depuis l'auoir veu il n'auoit changé de volôté, & qu'il deſiroit ayder à la paix de tout ſon pouuoir, pourueu qu'elle ſe peuſt faire avec l'honneur de Dieu, & la conſeruation de la religion : mais que ne le pouuant ſans frapper coup, comme il auoit

tousiours dit, il auoit desiré ladite assemblée, de laquelle toutesfois il ne pouuoit nier, que plusieurs du party n'eussent prins ombrage, comme ceux qui auoient diuerses fins & opinions en la conduite & resolution des affaires publiques; qu'il estoit cōtrainct quelquesfois pour contenir chacun en office & conseruer son credit, d'escrire & parler des choses qui se presentent diuersement; toutesfois qu'il n'auoit qu'un but, qui estoit celuy mesme qu'il auoit tousiours déclaré, dont il appelloit Dieu à tefmoin; que sa Maiesté n'estoit apprentifue des peines & trauerfes; auxquelles estoient subiects ceux qui commandoient à des volontaires, comme celuy qui auoit passé par là; que cerraînement l'on n'en dispoist pas comme l'on vouloit, qu'il desiroit doncques le repos du Royaume, comme à la fin l'on connoistroit par effect., mais puisque sadite maiesté prenoit tant de ialousie de ladicte assemblée, & faisoit difficulté de bailler ses passeports pour l'aduenir, il ne le vouloit presser dauantage, & neantmoins mettroit peine de ne laisser pas de ce faire sans cela, qu'il ne vouloit respondre aux conseils & opinions de ceux qui s'y trouueroient, non plus qu'aux escrits & lettres d'un chacun: mais qu'il l'asseurerait

qu'il ne manqueroit iamais à son deuoir, & que la lettre qu'il auoit escripte à l'Euesque d'Amiens dont on se plaignoit, n'estoit du tout semblable à la coppie qu'il auoit apportee comme il estoit facile de verifier sur la minute qu'il representeroit, & mesmes sur l'original qu'il disoit estre tombé en leurs mains, d'autant qu'il leur conserueroit le chiffre pour la deschiffrer quand on s'en voudroit esclaircir. Et d'autant que ledit sieur de Fleury, luy auoit faict instance d'enuoyer à Chartres, où il disoit ce deuoir faire par le commandement de sa Maiesté vne notable assemblée, en laquelle l'on pourroit encores traiter du commerce, & auroit supplié donner ceste commission à Monsieur de Videuille & à moy? il luy respondit, encore qu'il desirast grandement satisfaire au desir de sa Maiesté & des Catholiques qui la desiroient, qu'il ne pouuoit toutes-fois ouuertement enuoyer en ladite assemblée, sans par trop ombrager ceux qui le secouroient, lesquels il ne vouloit mescontenter à cause du besoing qu'il en auoit; que toutes-fois si à bon escient l'on vouloit traiter dudit commerce pour ladite ville de Paris, comme souuent il auoit esté proposé, il nous prioit volontiers ledict sieur de Videuille & moy

d'aller inques là : mais il ne pouuoit dōner d'autre charge, que de respondre en general de sa droite intention au bien du Royaume, avec la conseruation de la religion; parce qu'il ne pouuoit passer plus auant sans ses amis, ainsi qu'il auoit tousiours declaré; & sur cela congedia ledit sieur de Fleury par le moyen duquel nous receusmes le passeport bien tost apres.

Ledit sieur de Fleury alla à Chartres pour aduertir sa maiesté & ceux de son conseil de ce que dessus; cependant ie demeuray en sa maison oisif : & afin que ie n'obmette rien en ce discours, sur ceste occasion, i'employeray le temps pour vous rendre compte de la prise & reduction de Chasteau-Thierry, pour ce que ie sçay qu'il a esté parlé diuersement, & mesme à mon desauantage, & tous vous en diront la verité, comme ie ferois de la prinse dudit sieur de Videuille, aduenue comme il s'acheminoit à ceste negociation avec le passeport de sa maiesté, si vous n'en auiez esté mieux informé qu'un autre, comme celuy duquel il fut tres-bien seruy & secouru en son besoing.

Vous noterez doncques, monsieur, s'il vous plaist, que ie n'estois à la suite dudit Duc, lors qu'il inuestit ladite ville de Cha-

steau-Thierry, pour m'auoir laissé en ladite ville de Soissons, dont iene fuisse party pour le venir trouuer, sans l'arriuée dudit sieur Fleury, lequel il me manda l'y conduire, & le feusmes trouuer audit siege, ayant d'abord gaigné les faux-bourgs de la ville des deux costez de la riuere, où son armée estoit logée avec luy tres commodement, ayant tellemēt surpris ceux de dedās, qu'ils n'auoient peu les brusler ny les debatre long temps: aussi estoient ils assez mal pourueus de gens de guerre pour ce faire, & mesmes pour bien defendre la ville qui a tousiours esté estimée, comme certainement elle est, vne des plus mauuaises places du Royaume: toutesfois nous trouuāmes que lesdits assiegez s'estoient assez gaillardemēt defendus ayant prins vne piece dedans la batterie dudit Duc qui l'incommodoit grādemement.

CHACUN se retira au Chasteau, contre lequel ledit Duc dressa sa batterie, & deux iours apres le Vicomte de Comblisy m'en uoya vn biller, par lequel il me prioit de parler à luy. Je trouuay la place si remplie de femmes & d'enfans, que ie cogneus bien qu'ils ne pouuoient gueres durer; avec cela aussi commença deslors de composer, & d'autant qu'il estoit occupé ail-

leurs, me laissa son pere qui me proposa des conditions que ie luy dis qu'on n'accorderoit iamais, car il demandoit que la place luy fust laissée en garde, comme à luy appartenante, à la charge de n'en plus faire la guerre; encore vouloit il qu'on luy donnast loisir d'en aduertir sa Maiesté; à quoy il s'opiniastra tellement, que ie fus contrainct de me retirer sans rien faire, estant mandé dudit Duc, apres auoir contesté plus de deux heures avec luy. En partant ie luy dis que s'il n'estoit pressé de composer, il faisoit mal d'en parler, parce que cela decourageoit ses gens, & scauois bien que ledict Duc n'accorderoit iamais ce qu'il demandoit. Le le disaussi audit sieur de Comblysy, lequel me pria d'obtenir vn passeport pour faire sortir sa mere & sa femme, avec les autres femmes qui estoient au Chasteau, dont il disoit estre en plus grand soucy que de la batterie qui estoit presté à iouer, & n'auoit esté retardée que pour ma consideration: & de fait Madame Pinart se vint ietter à mes pieds toute esplorée, me priant de l'amener avec moy, ce que ie n'osay entreprendre sans congé dudit Duc, dont ie luy fis requeste: mais il m'en refusa, & fit com-

mencer la batterie, laquelle s'adressant à vne tour, & vn pignon d'une gallerie qui n'auoit esté terrassée, fit bien tost iour. Les estrangers estoient logez au pied du Chasteau, & fussent entrez dans la ville tost apres, si la batterie eust continué, mais ledit Duc la fit cesser à ma requeste: & sur ce que ledit sieur Pinart & de Comblysy, me prierent de faire pour eux telle cōposition que ie voudrois, ie l'obtins dudit Duc le plus honorablement & aduantageusement qu'il me fut possible, tant pour eux & leurs gens de guerre qui les assistoient, que pour les habitans; & vous assure qu'elle fut faite au grand regret desdits estrangers, car ils cognoissoient tres-bien ledit aduantage: Mais ledit Duc me vouloit faire ce plaisir, & fit accompagner luy mesme ledit Pinart & sa suite, quand ils sortirent iusques au dehors de l'armée, de laquelle il ne m'eust esté possible de les garantir autrement. Voila la verité de ceste composition, que ie puis prouuer par escrit, pour laquelle ledit Pinart & son fils ont souffert ce que vous scauez. Ce qu'on leur pouuoit imputer estoit d'auoir refusé les gens de guerre, que l'on disoit leur auoir esté offerts quelques iours deuant ledit siege: Mais ils s'excusoient sur la mauuaise volonté qu'ils di-

soient ſçauoir bien que ceux qui leur commandoient leur portoient, lesquels auoient faiſt auparauant ce qu'ils auoient peu, pour les deſnicher de la place, & auoient iuré de ne leur pardonner en ceſte occaſion : & quoy que ce ſoit, ie vous iure en homme de bien n'auoir eu durant le ſiège aucune intelligence avec ledit ſieur Pinart & ſon fils, que celle que ie vous ay representee; & dauantage n'auoir iamais veu perſonne ſi aigre, & contraire à la ligue que le pere, dont il ne ſe peut garder, qu'il n'en donnaſt cognoiſſance audit Ducquaud il ſortit & l'accompagna : & ſi ceux qui auoient entrepris de deffendre la breche de la ville euſſent fait leur deuoir, ie croy certainement que monſieur de Mayenne ſe fuſt retiré ſans la prendre. Voila à quoy ſont ſubieſts en ce Royaume ceux qui changent de profeſſion, & ont faute d'amis & de ſupport à la Cour : Car ie puis dire, que i'ay veu aſſaillir, forcer, & rendre infinies places qui n'auoient eſté ſi bien defenduës & dont le peril n'eſtoit toutesfois à beaucoup pres ſi grand que celui-cy : mais l'on auoit beſoing de la bource du pere, & croy que ledit ſieur de Videuille n'euſt eſté quitte de ſa priſe à meilleur compte que les autres ſi la foy & bonté de ſa Maieſté ne

les eussent garantis de la hayne, tant est grande l'enuie de ce temps, & prend-on plaisir de courir à vn affligé que l'on a veu en prosperité.

Après la deliurance du sieur de Videuille, & le retour de Chartres du sieur de Fleury, par lequel ie receus des lettres de M. le Chancelier, & de monsieur le Marechal de Biron, n'y ayant trouué sa Maiesté, ie m'acheminay à Estampes suiuant leur mandement où se trouua ledit sieur de Videuille; & eusse bien desiré que monsieur le Cardinal de Gondy eust prins la peine d'en faire autant, comme ie l'en auois supplié, afin de nous ayder à faciliter les affaires: mais il s'en excusa, ayant à mon aduis mauuaise opinion du succeds de nostre negociation. Nous passâmes iusques à Dourdan que ledit sieur Marechal tenoit assiégué. Ledit Duc m'auoit mandé, n'auoir iamais ouy le propos que le sieur de Rosne auoit tenu audit sieur de Fleury, lesquels aussi ledit sieur de Rosne tournoit en risée suiuant sa coustume:: de sorte que ledit Duc me prioit de parler seulement du cōmerce dont il nous auoit donné charge, sans s'engager plus auant, ce qui fut cause que mon voyage fut du tout inutile: car les sieurs de Chiurny & de Biron n'auoient aucune

charge ny enuie d'accorder ledit cōmerce, & attendoient de nous toute autre chose, partant chacun se tint sur les paroles generales, avec plus de defiances les vns des autres qu'il n'y en auoit ce me semble de suiet: car ils estimoient que nous fissions les fins, à cause de ce que ledit de Rosne auoit dit au sieur de Fleury, & nous ne voyant rien de l'esperance qu'on nous auoit donnée de nostre voyage, au moyen dequoy apres nous estre assemblez deux iours durant, nous nous separasmes, remettant à consulter de toutes choses avec ceux qui nous auoient enuoyez. I'auois apporté le chiffre, de laquelle auoit esté escritt la lettre de l'Euesque d'Amiens de laquelle a esté cy deuant parlé, afin de la verifier; mais lesdits sieurs n'auoient l'original, de sorte que cela fut remis à vne autrefois dont l'on ne s'est depuis souuenu, non plus que des autres discours que nous eumes ensemble: ce fut au commencement du mois de May, de l'an 1591.

Nous retrouuasmes monsieur du Mayne à Reims, qui fut plus marry du refus du cōmerce que de toute autre chose: dont i'aduertis ledit sieur de Fleury, & qu'il ne falloit plus s'attendre que ledit Duc fit parler de la paix, que les deputez des Prouinces, qu'ils disoient auoir mandé les attendant

tous les iours ne fussent venus, d'autât qu'il s'arrestoit à ne vouloir traicter sans eux, pour les raisons susdites. Et me souuient, Monsieur, que vous pristés la peine estant à vostre maison, dem'escrire vne tres-aigre lettre sur ce subiet; ne vous pouuant conten-ter des difficultez que faisoit ledit Duc de traicter, ou du moins esbaucher les affaires, en attendant son assemblée: pour garantir l'estat du peril qu'il alloit courre à l'arriuee des armées estrangeres que chacun atten- doit, laquelle ie fis voir audit Duc, cuidant l'esbranler; car c'estoit mon aduis qu'on en vîst ainsi: mais ie n'y gagnay rien s'excu- sant tousiours sur ce qu'il ne vouloit don-ner ialousie ny mescontentement à ses amis dedans ny dehors le Royaume, quoy qu'il en peust aduenir.

Le sieur de Landriano Milannois arriva inopinément en la ville de Reims, en ce temps là enuoyé par le Pape Gregoire xiv. de la maison des Sfondrate n'agueres au Pontificat, chargé d'offres & d'asseurances du secours, & d'un nouveau mädement de sa Sainteté, adressant aux Catholiques qui assistoient la Maïesté, & specialement aux Ecclesiastiques, par lequel ils estoient exhortez & commandez d'abandonner la Maïesté, & sortir des villes qui la re-
co-

recognoissoient à peine d'excommunication:& combien que ledit mandement fut iugé de plusieurs tres-rigoureux & arriué tres-mal à propos, à cause de la prosperité des affaires de sa Maiesté, toutesfois il fut incontinent publié à la sollicitation de ceux qui vouloient nourrir la guerre: dont aucuns Ecclesiastiques furent scandalisez, encores qu'ils fussent tres-affectionnez au party, car ils disoient que le Pape deuoit encourager plustost ceux qui residient aux villes de sa Maiesté d'y demeurer que d'en sortir; parce que c'estoit quitter le champ aux heretiques, qui estoit ce qu'ils demandoient, & se faisans abstraire le peuple d'abandonner leurs biens, maisons & familles, qu'il estoit à craindre qu'ils esleussent l'un plustost que l'autre, car ils'en verroit peu en ce temps qui voulussent mourir de faim pour obeyr à sa Sainteté; que les Ecclesiastiques mesmes ne le feroient pas: de sorte que ledit mandement confirmoit plustost les Catholiques aupres de sa Maiesté qu'il ne les estrangeoit au mespris du saint siege, comme il estoit aduenue des precedentes, & d'autant plus que les affaires de sa Maiesté estoient en meilleure estat qu'auparauant: Que c'estoit tres-mal fait de desesperer chacun de la paix, les

affaires du party estās si découſuës qu'elles estoient, & deuāt quel'on vit les moyens de les redreſſer; bien aſſeurez que nos maux estoient ſi enracinez qu'ils ne pouuoient plus estre guaris par charmes ou paroles, ny crainte de l'indignation de ſa Saincteté: de ſorte que les huguenots & les eſtrangers qui auoient coniuré la ruine de la religion, profiteroient ſous ombre 'du deſeſpoir qu'apporterait ledit mandement, duquel ſi on les euſt creuſ l'on euſt ſurſis la publicatiō apres la victoire. Mais ledit Landriano auoit charge expreſſe de le fulminer, dont il ne voulut rien rabattre, tant il estoit mal informé de nos affaires, & ſe comporta en l'execution de ſa commiſſion à la mode de Rome, où il leur ſemble que toutes choſes doiuent paſſer par leur censure & iugement, encores que ſouuent ils ſe fondent plus ſur le vray ſemblable que ſur le profitable. Ils s'eſtoient perſuadez que la France tomberoit au ſeul bruiēt de la leuee & venuē des forces que ſa Saincteté auoit reſolu d'enuoyer en ce Royaume contre ſa Maieſté, & auoit fait ledit Landriano expreſ cōmandement, comme ſi la crainte & apprehenſion deſdites forces euſſent deu l'autoriſer, & rendre les affaires ſelon leur deſir: mais l'euēnement leur apprit bien toſt que la France ne veut

pas estre maniée de ceste façon.

L'ADVERTIS ledit sieur de Fleury de tout cecy, afin qu'il sceust que nos folies alloient ruinant toutes choses: ce fut lors que le pauvre marquis de maignelay seruit d'exemple & d'enseignement à plusieurs, & qu'il fut mené deuant la ville de la Fere, laquelle il auoit acquise au party, au hasard de sa vie sur vn soupçon que l'on auoit de luy, qu'il traittoit avec sa maiesté & monsieur de Longueuille; ce fut le Vi-Seneschal de mont-limar nommé Collas, qui fit ce bel exploit de guerre, auquel ledit marquis se fioit plus, qu'à personne de la ligue. Il estoit accompagné du Lieutenant des gardes dudit Duc, mais veritablement les Capitaines dudit marquis & le peuple de ladite ville furent cause de son mal-heur plus que tous autres, tant ses fautes auoient attiré sur luy l'ire de Dieu: car ceux-là estoient ses creatures qu'il auoit esleuées de peu, & preferées à d'autres, & ceux-cy auoient esté mal traittez de luy depuis la prise de ladite ville, de sorte que les vns par malice & les autres par animosité coniurerent tellement le soupçon que ledit marquis auoit commencé à donner de luy audit Duc, par mescontentement & la frequentation

de luy & des siens avec ceux du party contraire, que ledit Duc laissa aller à y remedier par l'enuie dudit Vi-Senechal accompagné dudit Lieutenant des gardes, auquel il donna charge estant en ladite ville, de faire tout ce qu'ils iugeroient estre necessaire pour la conseruer, & neantmoins ie croy certainement que ledit Marquis, comme ieune & mal aduisé, vouloit plustost faire peur de luy audit Duc afin de l'exciter de l'honorer de plus grande charge, que prendre le party de sa Maiesté, ioinct que ledit Duc luy auoit promis de conferer avec ledit sieur de Longueuille: aussi n'a-on depuis sa mort peu rien faire prouuer contre luy qui ait peu condamner sa memoire d'infidelité, ny excuser les autres de ce marché, quelque diligence qu'on y aye faicte, dont ie parle comme celuy qui a veu les depositions mesmes & les informations qu'ils ont produittes, lesquelles condamnent plustost les auteurs, qu'elles ne les deschargent. Mais l'heure dudit Marquis estoit arriüée: i'estois avec ledit Duc quand il en receut la nouuelle, de laquelle ie vis tomber les larmes des yeux: & s'il n'eust depuis donné la charge de la place audit Vi-Seneschal comme il fit, du moins qu'il n'eust mieux iustificié en la iustice l'acte qu'il

auoit commis, il eust beaucoup faict pour sa reputation,

Son excuse estoit qu'il ne pouuoit auement se conseruer; ie croy qu'il s'en est repenty depuis assez de fois, tant pour le respect dudit Marquis que pour la consequence d'un tel acte, que pour s'estre depuis ledit Vi-Senechal monstre plus affectionné ausdits Espagnols, qu'à luy, il ne faillit pas aussi de se defaire bien tost des Capitaines dudit Marquis qui l'auoient trahy, ne se pouuant fier en eux apres vn tel forfait, qui est le iuste payement qui est deu à telles personnes.

LEDIT Duc partant de Reims alla reter vne entreprise sur Compiègne qui ne reüssit pas, fut en la ville de la Fere, où il establit ledict Vi-Senechal; de là il arriua à Amiens où arriua Dom Diego d'Ibarra pour resider aupres de luy de la part du Roy d'Espagne: d'Amiens il fut contrainct de courir à Roüen à cause de l'intelligence qui estoit entre le Comte de Tauanes qui y commandoit, & de Monsieur de Villars Gouverneur du Haure, auquel il donna la charge du premier qu'il retira & emmena avec luy tres à propos pour conseruer ladite ville, comme il apparut depuis par les euenemens: cela fait il donna iusques à Pon-

toise pour executer vne autre entreprise sur Mante, qu'il faillit aussi, & reprit le chemin de Beauuais, Amiens, & Peronne, pour gagner Ham : d'autant que sa Maieſté auoit assiegé Noyon, laquelle elle print en peu de temps à la veuë dudit Duc, & des forces estrangeres que ledit Duc de Parme luy auoit laissées, lesquelles estoient commandées par le Prince d'Ascoli assisté dudit Diego d'Ibarra, faisant peu de compte des commandemens dudit Duc; lequel ie suivis en tout ce voyage, attendant le retour d'Espagne du President Ianin en ceste belle assemblée, sans laquelle ledit Duc protestoit tousiours ne pouuoir prendre party. Or ledit President Ianin arriua en la ville de Ham, où l'on sceut en mesme temps la nouuelle de la fortie & euasïõ du Chasteau de Tours de Monsieur le Duc de Guise, aduenü au iour de nostre Dame du mois d'Aoust, s'estant faict descendre & deualer avec vne corde par deux de ses gens de la fenestre du grenier en bas, comme chacun disnoit en la ville, & au chasteau, & fut recueilly par le trompette de Monsieur de la Chastre qui l'attendoit hors le Fauxbourg, dont il fut conduit à Bourges. Ceste nouuelle resiouyt grandement les estrangers, lesquels, en verité monstroient estre tres-mal satis-

faits dudit Duc de Mayenne, partant luy desiroient moins d'autorité.

LE President Ianin auoit esté enuoyé en Espagne pour descourir au vray l'intention du Roy Catholique sur les affaires de France, que Jean Baptiste de Tassis & Rossieux auoient celé audit Duc, comme ie vous ay cy-deuant dit. Ledit Duc se persuadant tousiours que quand le Roy auroit esté bien informé de la verité des affaires, que non seulement il ne s'embarasseroit en la conqueste du Royaume pour luy ny pour sa fille, comme aucuns disoient qu'il vouloit faire, mais aussi que ayant esgard au pouuoir qu'il auroit au party & à ses traux & merites, il se resoudroit à le favoriser plustost que nul autre : & encores que ledit President ne se promist pas d'en rapporter contentement, comme celuy qui cognoissoit bien la disposition des choses : neantmoins pressé, voire forcé qu'il fut d'entreprendre ce voyage, il s'y resolut volontiers, esperant qu'il dissuaderoit le Roy Catholique du dessein susdit, ou bien qu'à son retour l'on traiteroit : & croy à la verité que l'intention dudit President estoit tresbonne, & partant que le voyage estoit tresnecessaire, toutesfois il ne seruit ny à

l'un ny à l'autre effect, tant il estoit difficile d'effacer des cœurs des Princes, les conceptions qu'ils affectionnoient. Car encores que ledit President se fust estudié de représenter au Roy de tres-grandes oppositions & difficultez qu'il rencontreroit à son dessein, tant de la part de la Maïesté que du party mesme duquel il vouloit s'ayder, voire de toute la Chrestienté, & sur ce fit la chose comme impossible, en luy représentant & faisant apres considerer les autres moyens qu'il auoit d'asseurer la religion en ce Royaume, & le recompenser de ses peines & frais avec beaucoup moins de peril & despens, & trop plus de gloire & d'auantage pour luy, & pour le party : neantmoins au lieu de profiter il s'apperceut qu'on se desioit de luy, comme s'il eust proposé telles difficultez expresses pour fauoriser ledit Duc, & non pour estre veritables & bien fondees. Quoy voyant ie luy ay ouy dire qu'il fut cōtrainct pour ne rompre & perdre du tout ledit Duc avec le Roy, ou reuenir sans resolution de se laisser entendre à ses ministres, ce nonobstant ses raisons ils vouloient traicter leurs desseins : il estoit donc necessaire pour ne perdre la religion, que tout ce qu'ils y employoient qu'ils l'entreprissent

auant tant de forces & moyens, que tant par crainte & necessité; que par force d'argent & de bien faicts, ils en peussent venir à bout, surquoy ils resolurent & l'asseurerent qu'ils feroient incontinent entrer en ce Royaume deux puissantes armées, payees & accompagnées d'artillerie, viures & autres munitions nécessaires, & suffisantes pour reprendre & forcer les places de sa Majesté, & en mesme temps l'acculer en quelque lieu avec son armée dont l'une seroit commandée par ledit Duc de Mayenne, & l'autre par celuy de Parme, ou tel autre chef que sa Maiesté Catholique choisiroit, à la charge que l'on assembleroit les Estats du party en mesme temps, pour leur faire approuver le dessein dudit Roy, lequel leur seroit exposé par ses Ambassadeurs. Voyla la substance de la réponse que rapporta ledit President, lequel voulut voir ledit Duc de Parme deuant que d'entrer en ce Royaume, pour sçauoir au vray quel ordre & acheminement l'on auoit donné à ce que dessus, dont il luy donna plus d'assurance que depuis il n'en vit d'effect. Or si ledit President auoit esté deceu de son esperance enuers ledit Roy d'Espagne, il ne le fut moins à son retour du fruit qu'il s'estoit promis de recueillir aupres dudit

Duc. Car non seulement il ne l'esbranla de l'opinion en laquelle il l'auoit laissé, mais ie sçay que ledit Duc se plaignoit, qu'il ne l'auoit pas biẽ seruy en ce voyage, soit qu'il le creust ainsi en se flattant luy-mesme, ou se laissant flatter ou abuser, ou bien qu'il fust marry que l'on sceust & cogneust que le Roy d'Espagne eust fait si peu de conte de luy, dont ie vis ledit President en peine, combien qu'il eust tousiours esté, & fust encores le plus affectionné, franc & digne seruiteur qu'eust ledit Duc, enuers lequel ie cuide bien que la nouuelle de la deliurancedu Duc de Guise son nepueu rendoit encores ce desplaisir plus sensible. Or ie ferois tort audit President si i'obmettois à vous dire que passant par la ville de Marseille allant en Espagne il fit vn tel deuoir & office enuers lesdits habitans de Marseille contre les menées du Duc Sauoye qu'il y trouua, qu'il les renuersa entierement. Car il esperoit s'en rendre maistre, & n'y auoit faute de partisans : mais comme le peuple entendit que le Duc de Mayenne desiroit bien que le pays s'aydast du Duc de Sauoye contre les ennemys communs, mais non que ladite ville ny les autres se separassent du Royaume pour qui que ce fust, vn chacun s'en resioiuit & print

bien-tost le party; de sorte que ledit Duc de Sauoye s'embarqua avec ledit President pour aller en Espagne, où il reconnut comme fit ledit President, que l'on auoit aussi peu d'enuie qu'il deuint maistre de la ville de Marseille que de la France, soit que ledit Roy d'Espagne fist estat que ladite ville ne luy pouuoit eschapper avec le reste du Royaume, ou que l'accroissement de son gendre luy fust aussi suspect qu'aux autres; i'adiousteray encores icy que ledit Duc de Mayenne n'a iamais desiré quel'autre prist pié au pais de Prouence, luy ayant dés le commencement refusé vn pouuoir pour y commander, qu'il a long temps poursuiuy, & l'eust volontiers acheté & payé bien cherement.

APRÈS la prise de la ville de Noyon ledit Duc du Mayne alla à Reims & de là en Lorraine, tant pour conferer avec ledit Duc des affaires publiques, & de ce que luy auoit rapporté d'Espagne ledit President Ianin, que pour receuoir des forces de cheual & de pied, que le pape Gregoire quatorziesme enuoyoit à son secours sous la charge de son nepueu, que l'on nommoit le Duc de Montemartiano: lesdites forces estoient composées d'eviron mil hommes de cheual, & quinze cens de pied Ita-

liens, & quatre mil Suiffes. La caualerie estoit mieux en ordre que le reste. Mais apres auoir faict monstre & parade en l'armée du dit Duc, elle se deffit incontinent, & ne seruit quasi de rien. C'estoit toutesfois les forces avec lesquelles ils discouroient à Rome que sa Maiesté & ses seruiteurs donneroient bien-tost du nez en terre, & que les bulles & fulminations de sa Saincteté apportées & publiées par ledit Landriano deuoient estre executées.

LE Roy receut au mesme temps l'armée d'Allemands que Monsieur le Vicomte de Turenne auoit leuée, & pour laquelle il auoit depesché l'année precedente; lorsque sa Maiesté refusa la cessation d'armes que ie poursuiuois. Elle estoit forte principalement de caualerie, avec laquelle sa Maiesté vint courir iusques auprès de Verdun, où ledit Duc de Lorraine, & du Mayne estoient venus avec lesdites forces de sa Saincteté & quelques autres, du pays Bas, & de Luxembourg, ceste course fut sans effect de remarque.

MONSIEUR le Duc de Lorraine faisoit demonstration d'estre fort las de la guerre, & encores plus mal-content des Espagnols: son pays estoit aussi merueilleusement ruiné, il parloit souuent des moyens

de pacifier le Royaume avec ledit Duc du Mayne & nous, mais sans resolution, seulement ils promirent de ne traiter du general l'un sans l'autre. Et d'autant que le Roy d'Espagne auoit remis au Duc de Parme l'accord & resolution de toutes choses, & que l'on estimoit qu'il entreroit bientôt en France, Monsieur de Lorraine enuoya avec Monsieur de Mayenne Monsieur le Comte de Vaudemont son fils accompagné du sieur de Bassompierre pour assister à la negotiation que l'on pretendoit faire avec luy, non comme il disoit en intention d'accorder ce que le Roy d'Espagne desiroit, mais seulement d'entendre la proposition & les conditions d'icelle; car ledit Duc de Lorraine faisoit demonstration d'estre fort contraire à ce dessein, & ne le pouoir goûter aucunement; neantmoins il soustenoit tousiours n'y auoir moyen de traiter avec sa Maiesté tant qu'elle seroit de contraire religion, & estoit bien empesché d'en trouuer vn bon entre ces deux extremitez.

Si tost que sa Maiesté se fut retirée du costé de Sedan, où elle fit le mariage de M. de Turenne avec l'heritiere de la maison, ledit Duc du Mayne r'entra en France & se vint rendre à Montcornet, passant par Re-

tel, où arriua ledit Duc de Guise accompagné de M. de la Chastre & de peu de noblesse au regard de ce que l'on en esperoit.

LA deliurance de ce Prince auoit esmeu les cœurs & releué l'esperance des zelez, lesquels iettoient incontinent le principal fondement sur luy, comme gens qui se lassoient dudit Duc du Mayne, se promettant tout ce qu'ils desiroient, tout ainsi que s'ils eussent peu disposer des volonteés des plus grands Princes, & les ranger à leurs opinions, tât leur ignorance estoit profonde, & leur presumption extreme, comme sceut fort bien remarquer ledit sieur de la Chastre : de sorte qu'ils ne parloient plus dudit Duc qu'en desdain, chose qui n'estoit desagréable à ceux qui desiroient la paix : car ils esperoient que leur insolence ioincte au peu de conte que lesdits Espagnols faisoient de luy, & au mescontentement qu'ils auoient du succés du voyage dudit sieur Ianin : En fin ils luy ouuriroient les yeux & le feroient resoudre de sortir des mains des vns & des autres. Sur cela Boucher Docteur en Theologie, le sieur de Masparault & Senault arriuerent audit lieu de Retel, enuoyez par ceux de Paris avec des cayers & demandes qui presupposoient desia quelque change-

ment ou malheur en ladite ville. Car ils parloient insolemment, se plaignans de ce qu'on leur auoit osté le conseil de l'Vnion & le seau, dont sous main ils accusoient ledit Duc, & publiquement blasmerent ceux qui l'assistoient au nombre desquels ie n'estois pas espargné, ny ledit sieur President Ianin qui eut de grandes paroles avec eux. A la fin ie fus appellé à la resolution de leurs demandes, où l'on eût assez de peine à les contenir, ils estoient couuertement supportez des Espagnols, & sur tout dudit Dom Diego d'Ibarra, neantmoins ils ne rapporterent que des responses generales, aussi ne leur en pouuoit on donner d'autres sans faire tort au public, & sur tout à l'autorité dudit Duc, dont toutesfois ils firent contenance d'estre aucunement satisfaits: mais l'on apperceut bien tost apres qu'ils dissimuloient, voire qu'ils couuoient quelque meschef; car Messieurs Brisson President, l'Archer Conseiller au Parlement, & Tardif Conseiller du Chastelet furent pendus par ceux de leur caballe. Comme lesdits Boucher & Senaut estoient près de ladite ville, ledit sieur de Masparault estant demeuré près dudit Duc, l'on dit que leur dessein estoit de changer & cribler le Parlement, & le dresser à leur mode, pour

apres disposer du nom & de l'autorité d'iceluy cōtre ledit Duc de Mayēne, & mesme faire reuoquer son pouuoir à l'arriuee en France dudit de Parme, & apres chercher vn Roy à leur poste ; dont ledit Duc de Mayenne eut le vent, ce qu'il fit resoudre d'accourir en la ville pour chastier les mutins, & renuerser leurs desseins. Il estoit à Laon, quand il sceust ceste nouuelle, dont il fut fort troublé, il auoit laissé l'armee audit Montcornet, & encores que ce coup l'eust picqué iusques au vif pour les susdites causes, son esprit fut agité de diuerles considerations, & le vit-on en bransle de ne passer outre ; mais en fin il fut emporté de l'enormité du fait, de l'apprehension de son particulier, & des aduis que Madame de Montpensier & monsieur de Belin luy donnerent, par lesquels ils luy manderent qu'allant à Paris, non seulement il puniroit les coupables, mais aussi asseureroit du tout à sa deuotion ladite ville ; cōme il aduint. Car il fit prendre & chastier ceux qu'il voulut, s'empara de la Bastille où le Procureur le Clerc, dit Buffy, qui a tant malheureusemēt fait parler de luy, commandoit, & punit tellement la grandeur & enormité de ce forfait, que chacun aduoüoit qu'il estoit ioté, honoré, craint & aymé des Princes
pau

paux Citoyens & Bourgeois, mais aussi ce ne fut sans estre detesté & maudit par ledit Dom Diego d'Illarra, lequel estoit audit Moncornet, quand ledit Duc partit de Laon pour venir à Paris, le suiuit neantmoins en telle diligence sçachant sa resolution, qu'il le ioignit entre Meaux & laditte ville en laquelle il entra avec luy: il estoit vne grande partie des habitans sortis au deuant de luy, lesquels à leur contenance monstroient estre tres aises de sa venuë, esperans qu'il feroit punir les auteurs de ce faict, qui auoit remply la ville de crainte & de deuil. Mais ces factieux furent si effrontez qu'ils vindrent en corps à pied au deuant de luy iusques à Saint Anthoine des champs, ayans les visages rians & asseurez comme meurtriers lesquels deuant sa venuë, auoient esté si impudens que de se presenter à mes Dames de Nemours & de Mont-pensier, & à ceux du conseil dudit Duc qui estoient en la ville pour leur faire aduotier ce bel exploit, que ledict Dom Diego excusoit tant qu'il pouuoit, pressant & importunant ledit Duc & ceux qui l'assistoient d'en faire de mesme, mais il n'y gaigna rien, car ledit Duc en fit prendre quatre, lesquels furent pendus & estranglez dans la salle basse du Loure. Cette execution fut faicte

T

sans forme ny ordre de Iustice; contre mon
aduis: car ie desirois que la Cour les iugeast,
& que la punition en fust publique, pour
seruir d'exemple aux autres; mais d'autres
iugerent plus à propos d'en vser autrement,
à cause que le Parlement estoit la partie of-
fensée, qui estoit encore si effarouché que
difficilement les condamneroit; que l'e-
normité du faict requeroit vne prompte &
extraordinaire punition, & que les prison-
niers estoient recogneus auteurs conuain-
cus d'icelle: ioint que l'on ne vouloit à la
verité en tout tant authoriser le Parlement,
par ce que ledit Duc ne se fioit pas trop
d'iceluy, n'y approfondir le faict iusques
au bout, pour n'estre pas contraint d'en
chastier plus grand nombre ny manifester
dauantage la cause de son courroux, le-
dit Bussi encores qu'il fust plus coupable
que les autres, en fut quitte pour la Ba-
stille, qu'il remit entre les mains dudit
Duc, lequel pardonna aussi aux autres les-
quels l'ont depuis recogneu, comme sont
coustumiers de faire ceux que l'on tire du gi-
bet contre raison; car ils n'ont cessé de le per-
secuter secrettement & publiquement: sau-
uer aussi la vie à vn malfaiteur, c'est l'oster
à plusieurs gens de bien, & offencer Dieu
& le public.

APRES ceste execution ie me retiray à Pontoise, voyant que ledit Duc retournoit en l'armée y attendre ledit Duc de Parme, pour aller secourir la ville de Roüen que sa Maieſté tenoit aſſiegée.

PRENANT cōgé de luy il me pria aſſeurer ceux que ie verrois, qu'il eſtoit plus aſſeſſionné & diſpoſé à la paix : & certes ie le croyois: car il me ſébloit qu'il en auoit plus grande occaſion que iamais, voyant que l'ô l'auoit voulu deſauthoriſer à Paris, & que tous les factieux auoient les yeux tourneſ ſur M. ſon nepueu: toutesſois cōme il auoit lors l'eſprit du tout bandé à ſecourir laditte ville de Roüen pour la cōſequence d'icelle, il me dit qu'il ne vouloit rien faire qui peult ſeruir d'excuse audit Duc de Parme de le retarder, cognoiſſant n'y pouoir paruenir ſans luy, & que l'autre n'y procedoit deſia que trop lentement, ioinct qu'eſtant ledit Duc de Guiſe demeuré en l'armée, il craignoit offencer dauantage leſdits Eſpagnols & qu'ils ne l'authoriſaſſent à ſes deſpens; partant il ne dôna charge aucune de rechercher ladite paix, ſeulement aſſeurer vn chacun en termes generaux de ſa bonne volonte, comme i'ay dit.

OR Mōſieur, vous deuez ſcauoir que l'Abbé de Chesy, ayant eſté pris priſonnier par

la garnison de Meaux retournant d'Alincourt en son Abbaye qui est près de chasteau-Thierry, encores qu'il y eust vn passeport dudit Duc que ie luy auois fait donner, estoit pretendu par ceux qui le tenoiēt de bonne prise, & craignant qu'ils le traitassent mal le fis enuoyer à Moncornet, où discourant avec luy des affaires puliques, ie luy dis le regret que i'auois du peu de conte que l'on faisoit de la paix de part & d'autre, que les grands qui estoient aupres du Roy se deuoient eschauffer plus qu'ils ne faisoient, & mesmes les Princes du sang, lesquels perdoient plus que nuls autres à ceste guerre apres le Roy : Car encores qu'ils fussent Catholiques ils deuoient croire qu'aduenant le decez de sa Maiesté ils feroient aussi peu recogneus de la ligue qu'elle, d'autāt que les chefs de la ligue auoient plus d'enueie de faire leurs affaires que celles d'autrui, & que quand tels morceaux tomberoient entre Princes armez, ils suiuroient plustost leur appetit que la raison: que si ie voyois Monsieur le Cardinal de Bourbon ie luy en dirois franchement mon aduis, & qu'vn tel œuure qui estoit plus difficile & important à la religion, mesmes à leur maison qu'oncques se fut présenté, deuoit estre entrepris par personne de gran-

de authorité si l'on vouloit qu'il reüssit : & si les autres s'y morfondoyent , comme il estoit aduenü à ceux qui s'en estoient meslez comme moy iulques alors, toutes-fois que ie m'y rembarquerois encores tres-volontiers comme i'estimerois que feroit de nostre costé monsieur le President Ianin , & ledit sieur de Videuille, si ledit sieur Cardinal l'entreprenoit, parce que nous croyons qu'il desiroit le bien , & qu'il ne s'y embarqueroit qu'à bonnes enseignes , & que sa Maiesté respecteroit son entremise plus que nul autre: dont ie priois d'aduertir ledit sieur Cardinal au plustost, d'autant que ie craignois que l'on print quelque resolution à la venue dudit Duc de Parme qui nous rendist irreconciliables pour iamais : ce que ledit sieur de Chesy fist , quand il fut retourné en son Abbaye par vn de ses gens. Car il n'y pouuoit aller à cause du danger des chemins, par lequel ledit sieur Cardinal le renuoya, & m'escriuit sur ceste occasion de l'aller trouuer à Humieres où il estoit lors, & receus la lettre quelques iours apres estre arriué à Pontoise, me mandant que sa Maiesté à laquelle il auoit faict sçauoir l'aduís que luy auoit donné ledit sieur de Chesy, trouuoit bñ qu'il me vist : toutesfois

ie m'en excusay, d'autant que ledit Duc du Mayne, lequel estoit desia party de Paris, pour retourner au camp, ne m'auoit permis de ce faire, ny donné pouuoir de conferer ny traiter de ladite paix à personne, cōme ie vous ay dit deuant, de sorte que ie craignois y allant de moy mesme le faire inutilement, & luy preiudicier à cause de la ialousie desdits Espagnols ; & du siege de Roüen. Mais ledit seigneur Cardinal m'en uoya monsieur de Bellosane à ma priere, auquel ie dis les propos que i'auois tenus audit Abbé de Chesy, les raisons qui m'auoient meu, l'assurance que ledit Duc m'auoit donnée de sa bonne volonté, les raisons d'icelle fondees principalement sur le mescontentement desdits Espagnols, & sur la ialousie de son nepueu, mais qu'il estoit necessaire de sçauoir au vray si sa Maiesté vouloit estre Catholique, deuant qu'entrer en matiere, par ce que ie sçauois que ledit Duc ne traitteroit iamais avec elle, tant qu'elle perseuereroit en la religion. Que i'auois desiré voir monsieur le Cardinal pour estre esclaircy de ce point, croyant qu'il sceust mieux l'intention de sa Maiesté que personne, & sur ce l'implorer d'employer son credit enuers elle pour aduancer vn si bon œuure, & si ceste difficulté ne pouuoit

estre surmontée, aduiler par quels autres moyës l'on pourroit faire cesser la guerre, d'autant qu'elle continuant, le Royaume, couroit fortune de changer de main, & la religion de se perdre, luy disant sur celale dessein des Espagnols, les menées qu'ils faisoient en ce Royaume, & l'estat qu'ils faisoient d'y estre assistez de sa Saincteté; dõt ledit de Bellosane me dit, qu'il aduertiroit ledit sieur Cardinal de mō affectiō & droite intention à la conseruation de la religion & du Royaume: il me donna assurance en partant, qu'il ne falloit, point douter qu'il ne desirast employer tout son credit enuers sa Maiesté pour aduancer sa conseruation, de laquelle elle luy auoit dōné souuent bōne esperance; ioint qu'il cognoissoit certainement, n'y auoir autre moyen de conseruer la religion & le Royaume en leur entier, que celuy-là. l'escriuis ces propos audit sieur Ianin comme à celuy que ie scauois desirer & rechercher les moyens de renuerfer les desseins desdits Espagnols, toutesfois ie recogneus par sa responce, qu'il auoit si mauuaïse opinion de la conuersion du Roy, qu'il estimoit estre plus à propos de traiçter avec ledit Cardinal, qu'avec sa M. si l'on ne le pouuoit separer d'elle avec les Catholiques qui l'assissoiçt, remōstrant

que par ce moyen l'on n'auroit que faire desdits estrangers pour deffendre la religion, & partant qu'ils ne ruineroyent l'estat, comme ils auoient delibéré, croyant que ce chemin estoit plus court & plus seur que celui de la conuersion de sa Maiesté.

TOUTESFOIS comme il nous conduisoit à la paix, de mesme ie ne pouuois esperer que ledit sieur Cardinal ny lesdits Catholiques quittaissent sa Maiesté, qu'ils ne fussent au moins esconduits & desesperéz de sa conuersion, & que ledit President me prioit seulement de sonder sur ce l'intention dudit sieur Cardinal, sans m'asseurer que ledit Duc fust bien resolu de traicter avec luy. Je m'aduisay de proposer vne trefue, durant laquelle l'on pourroit conferer avec lesdits Catholiques du party de sa Maiesté, des moyens d'asseurer la religion & l'Estat, & enuoyer deuers sa Saincteté, pour sçauoir son intention sur la conuersion de sa Maiesté, esperant qu'en gaignant le temps l'on arresteroit le cours des menées desdits Espagnols, & qu'il n'esperoit autre remede à nos maux. Mais ledit sieur President l'annin me manda par sa responce, que ceste voye estoit trop longue & incertaine

par ce que de part & d'autre l'on ne vouloit parler de trefue, que le saint siege estoit vacquant, & qu'il ne falloit esperer que le Pape qui seroit fust moins contraire à sa Maiesté que les precedens, ny que les Espagnols cessassent leurs pratiques, quoy que l'on fit; mesmes quand sa Maiesté changeroit de religion, ioinct que ledit Duc ne pouuoit consentir qu'on traictast en son nom avec sa Maiesté tant qu'elle seroit de contraire religion, & qu'il n'en eust conferé avec eux du party, comme il auoit tousiours déclaré; au moyen dequoy il persistoit à dire qu'on traittast avec ledit sieur Cardinal de Bourbon pour renuerser les desseins desdits Espagnols, qui aspirans maintenant ouuertement à la Couronne, pressoient merueilleusement ledict Duc de traicter avec eux, ne voulans secourir Roien qu'il ne leur promit faire eslire leur Infante, comme ceux qui vouloient profiter de la necessité publique, & partant traictoient ledict Duc indignement: Toutesfois qu'il s'en estoit defendu iusques alors, mais il estoit à craindre qu'à la longue il ne se laissast emporter: de sorte qu'il estoit necessaire de mettre promptement en ieu ledit sieur Cardinal ou quelque autre Prince de la maison Catholi-

que, encores que l'Euesque. de Plaisance Landriano, Nonce du feu Pape & les Deputez des Estats estans arriuez, ayant eu le vent de ce conseil furent si insensez, que de le blasmer; toutesfois ils estimoient qu'estant conclud & effectué chacun l'approueroit par amour ou par force, tant il seroit trouué & iugé vtile, pourueu que ce Prince Catholique fust aussi suiuy des Catholiques, & des villes principales, & que recognoissant sa Maiesté: me prioit d'entreprendre & poursuiure viuement ce traicté sans m'arrester à sa Maiesté, si promptemēt elle ne quittoit sa religion, à la requeste de ceux qui la seruoient, & ne s'attendre plus d'estre cōuié dudit Duc, car il en estoit plus esloigné que iamais, mais si sa Maiesté vouloit prendre ceste resolution, ledit Duc donneroit sa foy à tel Prince Catholique qui seroit choisi aupres de sa Maiesté, tel que pourroit estre monsieur le Duc de Neuers, de la recognoistre avec tous ceux du party qui le voudroient suiure incontinent apres sa conuersion, & pouruoyant aussi aux seuretez de la religion & de sa maison à conditions raisonnables. Ceste responce m'empescha grandement voyant d'un costé en quels termes estoient les Espagnols avec ledit Duc, & de l'autre que l'on de-

mandoit vne parolle d'assurance du Roy de sa conuersion, comme te faisois grande difficulté qu'il voulust donner, & que l'on me prioit & pressoit sur cela de rechercher monsieur le Cardinal de Bourbon & traicter avec luy, estant incertain, comme i'estois de son pouuoir non moins que de son vouloir, ioinct que ie sçauois que ledit Duc s'estoit tousiours monstré fort peu affectonné à ce party: de sorte que ie faisois conscience de m'y embarquer, & d'y plonger ledit sieur Cardinal, attribuant ce conseil & mandement audit President Ianin plustost qu'à la volonté dudit Duc; au moyen dequoy ie me contenteray de faire sçauoir audit sieur Cardinal ce que l'on desiroit de sa Maiesté sur sa conuersion, & à son refus l'euie qu'on auoit de traicter avec luy, mais ce ne fut pas sans luy en mander mon opiniõ, afin qu'il prist garde à luy & n'eust occasion de se plaindre de moy à l'aduenir, comme pourra tousiours tesmoigner ledit Abbé de Bellosane, lequel combien qu'il cherchast tous moyens d'aduancer la grandeur de son maistre, faisoit pareil iugement que moy de ceste ouuerture.

MADAME de Longueuille fut lors mise en liberté, avec Madame sa belle fille, &

Mesdamoiselles ses filles, par le moyen dudit Duc de Mayenne, lequel fut en cela trauersé de plusieurs; de sorte que ladite Dame qui s'attendoit d'en estre quitte pour vingt-cinq ou trente mille escus, à quoy du commencement elle auoit esté taxee, sous pre-texte d'ayder à payer la rançon de monsieur d'Elbeuf detenu prisonnier à Loches par monsieur d'Espernon, fut contraincte s'obliger encores pour pareille somme, moyennant certaine promesse que luy fit ledit Duc, sans lequel elle n'eust encores esté quitte à si bon marché. Elle auoit esté arrestee en la ville d'Amiens apres la mort de monsieur de Guise, avec sa fille & monsieur le Comte de saint Pol son second fils, lequel depuis s'estoit sauué, comme elle mesme auoit eu enuye de faire par deux fois, & auoit esté traittee tres-indignement durant sa prison, de laquelle elle n'eust esté encores deliurée sans l'evasion de monsieur de Guise; car on disoit qu'elle estoit retenuë pour luy. Ceste Princesse n'auoit iamais faict mal ne desplaisir à personne, estant innocente de tout ce qui estoit aduenü à Blois, & n'estant venuë en picardie que pour accompagner monsieur de Longueville son fils qui en estoit gouuerneur, sans penser à autre chose, qu'à faire plaisir à

ceux du pays, neantmoins elle n'auoit peu esuiter le malheur commun, qui luy auoit esté d'autant plus grief qu'elle scauoit ne l'auoir merité, & que monsieur son fils faisoit la guerre au pays pour sa Maiesté: mais i'ay souuent admiré la constance avec laquelle madite Dame la Duchesse, la belle fille & mes Damoiselles ses filles auoient supporté leur captiuité; certes si ie nel'eusse veu, ie ne l'eusse peu croire, & puis dire que rien ne les auoit tant trauaillees durant icelles, que l'ennuy de Madame leur mere, & que toute autre sorte de peril & d'afflictions n'auoient seulement peu esbranler leur courage, ny leur faire changer de contenance & de langage.

COMME cecy se manioit, mon pere m'enuoya vne lettre du sieur de Bussy, par laquelle il luy mandoit que l'on ne trouuoit pas bon que ie traitasse de la paix avec ledit de Bellosane, & que si i'auois charge de negotier ie m'adressasse droit à sa Maiesté, laquelle m'oyroit volontiers. Je respondis que ledit Abbé m'auoit dit estre venu parler à moy par la permission de sa Maiesté, & que mondit sieur le Cardinal ne faudroit de luy rendre compte de nostre conference; que ie ie n'auois aucune charge de negotier avec sa Maiesté, mais que ie ne

me pouuois garder de rechercher la paix pour l'affection que ie portois au Royaume: que la guerre à la longue diuiferoit en plusieurs pieces, comme i'auois dit audit de Bellosane, avec mon aduis du chemin qu'il falloit tenir pour y remedier, duquel i'estois prest encores à communiquer avec tel autre que sa Maiesté ordonneroit, & que i estois bien marry n'auoir moyen de mieux faire: mais que puis que sa Maiesté nel'auoit à gré, ie ne passerois plus outre. Ledit sieur de Buffy repliqua qu'il n'estoit ja besoin que personne parlast à moy de la part de sa Maiesté, puis que ie n'auois charge de traicter.

TOUTESFOIS quelques iours apres le sieur du Plessis frere dudit sieur de Buffy-estât venu au camp à Mante manda le sieur de Fleury mon beau frere qui estoit arriué fraichement à Alincourt, auquel il dit la bonne volonté de sa Maiesté à la paix, & que si ie pouuois auoir charge de monsieur de Mayene d'en traicter avec luy, il estimoit qu'estans ensemble nous ferions quelque chose de bon, dont ie le priay dem'aduer-tir comme il fit, & moy le dit Duc dès le lendemain par vn trompette exprès.

DESIA l'armee Espagnolle commandee par le Duc de Parme estoit entree en ce

Royaume pour secourir la ville de Roüen, & auoit contrainte sa Maiefté, laquelle s'estoit acheminee au deuant avec sa caualerie seulement, de quitter le logis d'Aumalle, où elle auoit este blessée; auoit aussi prins Neuf chastel, & tellement encouragé les assiegez qu'ils auroient renuersé les tranches de l'armée de sa Maiefté, & gagné quelque pieces d'artillerie, y commandant feu monsieur le Mareschal de Biron: sur quoy ledit Duc de Parme s'estoit retiré iusques à Abbeville, faisant contenance de vouloir assieger Dieppe, comme si ladite ville de Roüen ne deuoit plus auoir besoin de luy, mais expres pour attendre quelque renfort, & enuoyer vers l'armée de sa Maiefté; en laquelle il estimoit que les François ne demeureroient quand ils verroient que l'occasion de combattre seroit passée. Ce n'est vne des moindres parties d'un Capitaine de sçauoir prendre aduantage, & mesnager ceux qui luy arriuent, & executer ce qu'il entreprend. Ledit Duc de Parme estoit en cela tres-diligent & soigneux, comme sont ordinairement ces vieux & experimentez Capitaines, de sorte qu'il s'estudioit plus à esuiter & refroidir l'ardeur & furie de nos François, qu'à les surmonter, comme il fist

paroistre deuant la ville de Cambray quãd Montaigneur frere du Roy la secourut, mais non si heureusement qu'aux deux voyages de France, car au premier il en perdit ledit Cambray tout à faict, avec le temps qu'il y auoit employé deuant, & aux deux autres il sauua les villes de Paris & de Roüen à poinct nommé.

IE croy bien que ce bon succès de Roüen fut cause en partye de la recherche que fist lors ledit sieur du Plessis m'estant apparu souuent tels conseils estre nez de pareille occasion; dont sa Maiesté n'estoit pas mieux seruie, car ce qui se faict hors du temps, comme en aduersité est attribuee à vne impuissance & necessité, plustost qu'à prudence & bonne volonté, & partāt n'est iamais si honorable ny vtile: toutesfois ledit Duc de Mayēne estoit lors si mal mené des Espagnols, lesquels le pressoient plus que iamais de promettre la Couronne à leur Infante, & si incommodé de sa personne à cause de son indisposition, qu'il me manda de bouche par mon fils, & depuis par lettre escrite par ledit President Ianin, que luy & les Princes & Seigneurs qui estoient avec luy, estoient disposez de recognoistre le Roy, & traicter avec luy s'il vouloit estre Catholique, assseurer la religion

& le party, & luy proceder de bonne foy sans déguisement, mais qu'il ne le pouuoit prier ny requérir par escrit public de ce faire, de peur que les Espagnols sous ce pretexte, ne se faussent à l'instant de plusieurs bonnes villes, esquelles ils auoient de grandes intelligences & pratiques, à quoy l'on pouuoit mieux remedier si rien n'en estoit sceu iusques à l'entiere resolution; outre plusieurs autres considerations, qu'ils se remettoient deuant les yeux assez cognus d'un chacun, adioustans estre l'office des Princes qui estoient aupres de sa Maiesté de faire cette poursuite, & de l'esclaircir de son intention; offrant de donner toute l'assurance qu'ils pourroient desirer, & recognoistre sadite Maiesté se faisant Catholique, me priant d'en conferer avec Monsieur de Neuers ou autre ayant pouuoir, & qu'ils en donneroient leur foy, pourueu que dans peu de iours ils en eussent la resolution, ou bien de traiter avec un Prince de la maison de Bourbon, si ledit Roy persistoit en son erreur: par la mesme lettre ledit President m'aduertissoit de la promotion au Pontificat de la personne du Cardinal Aldobrandin Florentin; de la prudence duquel il disoit que l'on pouuoit attendre un grand

secours pour la pacification de nos troubles : toutesfois il protestoit que nostre mal ne pouuoit plus attendre son remede, par ce que les Espagnols pressoient merueilleusement ledit Duc & les autres Princes & Seigneurs qui estoient avec luy de leur dire la resolution, auant que de se separer, & qu'il estoit à craindre estant separez, que chacun traittast à part avec eux, aux conditions qui regardoient le profit particulier & la ruine publique, proposant sur ce vne surseance d'armes, pour cinq ou six mois affin d'obuier à tous inconueniens.

CESTE lettre fut escrite par ledit President Ianin au commencement du mois de Mars, & deuant qu'il eust receu celle, par laquelle ie luy auois donné aduis des propos que ledit sieur du Plessis auoit tenu à mon beaufrere : il m'enuoya aussi certains articles d'un traicté que ledit Duc de Mayenne auoit desia faict proposer ausdicts Espagnols, dont ie fus en grand' peine, encores que ledit President me mandast qu'ils n'auoient esté mis en auant que pour les auancer. Car par iceux on s'obligeoit d'eslire leur Infante à certaines cōditions du tout indignes de nostre nation, & de trop foible & debille estoffe pour soustenir vn tel

bastiment, dont ie feusse party à l'heure mesme, pour aller dire mon aduis, audit Duc, comme il m'en pressoit, sans l'esperance que i'auois de voir ledit sieur du Plessis. Partant ie me contentay de r'escire audit President, lequel estoit tousiours tres-contraire au dessein desdits Espagnols : & croy, qu'il ne faisoit rien en cela qu'à bonne fin.

MONSIEVR, iamais negociation ne fut plus difficile à enfourner que celle cy de la paix, car chacun disoit la vouloir, mais personne ne vouloit faire ce qui estoit necessaire pour y paruenir : le Roy faisoit difficulté d'asseurer sa conuersion, & ledit Duc de traiter avec luy sans cette assurance, c'estoit mettre sa Maiesté en peine, voire l'offenser que de s'adresser aux Catholiques qui le suiuiuent, & pour ce poinct, parce que sa Maiesté ne vouloit estre par eux pressée ny contrainte en sa conscience, de crainte que son refus les desbauchast & refroidist de son seruice, & ceux de sa religion deffendoient ou excusoient plustost ceste difficulté, qu'ils ne vouloient ayder à la surmonter : & n'y auoit pas moins de peine à persuader ledit Duc de se departir de cette demande, & se contenter de semondre sa Maiesté de ladite conuersion, ou

de remettre le tout au Pape, & cependant entrer en traitté avec sa Maiesté pour deliurer le Royaume des estrangers & de la guerre ; cela estoit cause qu aucuns iettoient les yeux sur les autres Princes de ladite maison de Bourbon, comme vn moyen tres propre entre ces deux difficultez, pour sauuer la religion de l'estat, & que d'autres excusoient aucunement ceux qui en vouloient prendre vn de la maison de Lorraine ou vn estranger. Mais tout bien considéré l'on trouuoit autant ou plus de peril en ces deux derniers chemins qu'au premier, où souuent les desesperez tendent ; l'on abandonnoit au temps & à la fortune, ou pour mieux dire au bon vouloir de Dieu, le succeds des affaires.

ME trouuant en cette perplexité il aduint deuant le retour du trompette, par lequel i'auois enuoyé audit President la despelche qui faisoit mention du sieur du Plessis, que le sieur de Lomenie fut prins & emmené à Pontoise où i'estois ; & comme ie scauois qu'il approchoit de sa Maiesté, ie luy voulus bien dire la peine en laquelle i'estois de la poursuite des Espagnols, & qu'il n'y auoit plus personne qui y peust remedier que sa Maiesté, par ce qu'on m'auoit escrit que s'il luy plaisoit asseurer sa conuersion,

il y auroit moyen d'asseurer sa recognoissance, comme ie m'offrois de faire plus particulièrement entendre à monsieur le Duc de Neuers en la presence de monsieur le Cardinal de Gondy, si sa Maiesté l'auoit agreable, lesquels i'estimois desirer le repos du Royaume, & y pouuoir grandement, mesmes à cause du credit que leurs parens auoient avec Monsieur le Duc de Florence, lequel l'on disoit deuoir auoir grande part aupres du nouveau Pape, sans l'ayde duquel ie cognoissois estre quasi impossible de composer les affaires, tant elles estoient embarrassees & trauersees desdits Espagnols, & de leurs adherans: dequoy ie le priay d'aduertir sa maiesté; par ce que ie ne scauois s'il me seroit permis de voir le dit sieur du Plessis à cause de sa religion, & craignois que le mal deuint cepédant incurable.

Sur ce propos sa Maiesté despescha incessamment le sieur de la Verriere audict sieur Cardinal & à moy, pour nous faire aboucher, sans parler de monsieur de Neuers nous donnant esperance d'embrasser les conseils qui luy seroient donnez, par lesquels elle pourroit avec honneur satisfaire au desir des Catholiques, & s'ayder de l'autorité & puissance de la Sainteté en ceste occasion.

aussi son intention estre de se reünir à l'Eglise Catholique par le moyen de ladite instruction, & eust agreable que les Catholiques qui l'assistoient enuoyassent deuers le Pape pour estre secouru de son bon conseil & autorité en ladite instruction, & cependant qu'il fust aduisé secrettement aux moyens d'asseurer la religion Catholique & les communantez du party de la ligue, pour en vler soit apres ladite conuersion ou deuant, si l'on iugeoit qu'il fust besoin pour descharger tant plustost le Royaume du fardeau de la guerre par vne surseance d'armes ou autrement. Ledit de la Verriere porta à sa M. ceste ouuerture, & i'e dōnay aduis audit Duc de Mayēne par vn hōme exprés.

A mon retour à Pontoise ie trouuay mon trompette avec la responce dudit Duc, sur l'aduis que ie luy auois donné dudit sieur du Pleffis par laquelle non seulement il me promettoit de voir & conferer avec luy, mais aussi l'asseurer qu'il estoit prest de recognoistre sa Maiesté, & faire faire le semblable par ceux sur lesquels il auoit pouuoir, si elle vouloit donner assurance de se faire Catholique apres son instructiō, offriāt en ce cas de me donner pouuoir des à present de traiēter des conditions & d'en tomber d'accord pour les obseruer & accomplir.

de bonne foy apres sa conuerſion, & meſmes s'employer ſous main enuers la Saincteté pour la faciliter, ſuiuant ce qu'il m'auoit mandé & prié de dire; en quoy il perſiſtoit avec ſes amis, encores que le ſieur de Giury euſt depuis fait ſcauoir à monsieur de la Chastre ſur ce qu'il l'auoit prié de l'eſclaircir, ſi ſa Maiesté changeoit de religion, luy offrant en ce cas de la recognoiſtre, qu'il ne s'y falloit pas attendre, & que ſa Majesté vouloit eſtre recogneuë & apres ſe faire inſtruire. Ce que ledit Preſident me manda auoit fort refroidy nos Princes: toutesſois il eſperoit que ſa Maiesté ſe reduiroit, ou croiroit qu'il n'auoit dit ſon ſecret audit ſieur de Giury; ſür tout ledit Preſident me recommandoit de la part dudit Duc, le ſecret de ceſte entreueuë & negociation pour les raiſons ſuſdites, & pource que j'auois demandé vne lettre eſcrite de la main dudit Duc pour ma deſcharge, il me promettoit par la ſienne de me l'enuoyer comme il fit, & la receus depuis par les mains dudit ſieur de la Chastre.

M. le Duc de Neuers qui auoit deſiré & failly de me voir allant à Cöpiegne, me faiſoit eſcrire tous les iours qu'il n'y faudroit s'en retournant, me pria de m'y diſpoſer, m'aſſeurant que noſtre entreueuë ne ſeroit

inutile au public, & me mandoit que vous y assisteriez, ensemble Messieurs le Cardinal de Gondy, l'Euesque du mans, & de Ramboüillet, & croy qu'il faisoit estat que ce seroit en vostre maison, dont ie me resiouyssois, ne pouuant esperer que tout bien d'une telle assemblée, toutes-fois ceux qui voyoient ledit sieur du Plessis manderent que sa maiesté ne vouloit point que ie visse ledict Duc, dequoy i'estois en grande peine: car d'un costé ie ne voulois desplaire à sa Maiesté; d'autre ie ne desirois manqueraudit Duc, ny à vne telle compagnie: dauantage ie ne voulois descourir audit Duc la ialousie que ie cognoissois que l'on auoit de luy, de peur de brouiller le monde: encores il aduint que le retour d'iceluy, & le iour qu'il me manda l'aller trouuer, se rencontrerent au iour que ie receus laditte depesche de Monsieur du Mayne, & que ie deuois aller trouuer ledit sieur du Plessis: surquoy ie pris party de voir ledit sieur du Plessis le premier, pour apres me conduire enuers ledit Duc, selon que ie ferois avec luy.

Ledit sieur du Plessis se rendoit à Buy où ie le fus trouuer sous pretexte de visite: ie luy dis les propos que i'auois tenus

au sieur de Lomenie, ce que le Roy m'auoit mandé par le sieur de la Verriere, l'aduis que Monsieur le Cardinal de Gondy & moy auions donné à sa Maiesté, & audit Duc de Mayenne, & ce que ledit president Ianin m'auoit escrit de la bonne volonté & inclination d'iceluy Duc, & des autres princes de sa maison à la paix, de laquelle ils estoient d'aduis que ie traitasse avec luy, parce qu'ils s'asseuroient qu'estant seruiteur tres-affectionné de sa Maiesté; & tres-adiuisé, il y feroit son possible: toutes-fois ie luy dis que ledict Duc m'auoit faict escrire qu'il ne pouuoit traicter avec sa Maiesté qu'elle ne me donnast dès à present assurance de changer de religion apres son instruction, mais qu'il estoit prest de traicter avec elle de bonne foy, satisfaisant à ce poinct, qu'il estoit donc au pouuoir de sa Maiesté de faire cesser la guerre en ce Royaume, & de se faire recognoistre d'un chacun, que ce faisant elle renuerseroit les menées des Estrangers, qui estoient fort grands & aduancées, elle contenteroit les Catholiques qui de part & d'autre murmuroient quasi également de la perseuerance de son opinion, & saueroit la couronne. Il me respondit que sa Maiesté estoit toute disposée & persuadée

à la paix, qu'il n'en falloit point doubter, que s'il n'estoit question que de l'achepter & payer de son propre sang, elle en seroit tres liberale, non pour crainte de ses ennemis, mais pour la compassion qu'il auoit de ses subiects; toutesfois qu'il estoit prince craignant Dieu, & tres ialoux de sa reputation, partant difficile à forcer en sa conscience, & à luy faire faire chose indigne deluy, comme il luy sembloit que feroit ceste parole d'assurance que l'on vouloit qu'il donnast presentement du changement de sa religion: Car ce seroit faire trop bon marché de l'une & de l'autre, que de faire vne telle promesse deuant que d'estre instruiet & bien informé & esclaircy s'il erroit, ou non en la religion de laquelle il faisoit profession; que cela sentiroit plustost son Atheiste que son Catholique, & qu'il ne faisoit aucune difference entre aller à la Messe du soir au lendemain sans instruction, & de le promettre dès à present, deuant ne scachant encores quel effect elle feroit en sa conscience; que si ledit Duc s'abeurtoit à cela non seulement il ne vouloit la paix, mais euidoit en ce faisant troubler sa Maiesté avec ses seruiteurs, à quoy toutesfois il luy seroit facile de remedier; mais qu'il approuuoit & loüoit

grandement ceste ouuerture que ledit sieur Cardinal de Gondy & moy auions faicte, laquelle il m'asseuroit que le Roy accepteroit, partant qu'il n'estoit plus question que de sçauoir si ledit Duc en feroit autant, dōt il luy sembloit qu'il en falloit attendre la response deuant que de passer plus outre en ceste negociation, pour laquelle il feroit ce qu'un gentil-homme deuroit faire, quand ce ne seroit que pour confondre ceux qui l'accusoient de ne desirer la paix. Son aduis me sembla tres-bon, partant nous prismes resolution de nous reuoir apres la reception de ladite response: mais apres auoir entendu les raisons pour lesquelles ie desirois voir Monsieur de Neuers, non seulement il les approuua, mais iugea qu'il estoit necessaire, pour le seruice de sa Maiesté, que ie fisse ce voyage & m'en pria.

Au moyen dequoy ie m'y acheminay dès le lendemain, & fus coucher en vostre maison, de laquelle ie trouuay ledit Duc party, de sorte que ie fus contrainct de passer iusques à Montfort. Monsieur, il vous pleust me dire les sages propos que vous auoit tenus ce Prince, les discours qui s'estoient passez entre luy & ledit sieur Cardinal de Gondy & vous, dont ie bus grande

ment consolé, comme en verité ie fus de le voir : de sa grace il me receut humainement, il auoit faict prouision de raisons, pour me persuader à la paix, fondée principalement sur le besoing que la religion & la France en auoit, & l'aduantage que Monsieur le Duc de Mayenne & ceux qui l'assistoient en tireroient : mais il trouua que i'estois tout persuadé, & que ie n'auois besoing sinon qu'on m'adressast vn chemin propre pour y arriuer : sur cela nous discourusmes des difficultez, & luy proposay l'expedient que ledict sieur Cardinal & moy auions ouuert, lequel ie luy dis que le sieur du Plessis m'auoit asseuré que sa Maiesté approuueroit : & mesmes me pria, sçachant que ie le voulois voir, d'en conferer avec luy, dont il fut tres-content, comme ils luy vouloient escrire par vne lettre dont il chargea le sieur de Fleury. En verité il se tint tres-entier au seruice de sa Maiesté, blasmant les conseils de ceux qui propoisoient vn tiers moyen pour sortir d'affaires, dont il soustenoit que l'on ne pouuoit venir à bout que par le moyen de la conuersion de sa Maiesté, faictes toutesfois dignement : par ainsi ie le laissay peut-estre plus satisfait de la Cour, qu'il n'auoit peu estre en partant d'icelle,

contrel'oppinion de ceux qui iugeant de la volonté d'autrui par la leur n'auoient desiré que ie le visse, comme ie vous dis repassant exprès de vostre maison, où i'eus le bien de vous voir, comme ie fis le mesme iour ledit sieur Cardinal de Gondy, lequel deslors ie suppliy d'entreprendre le voyage de Rome, puisque sa Maiesté l'approuuoit, afin de representier à sa Saincteté l'estat veritable de la France, & le besoing extrefme que la religion auoit, qu'elle interposast son autorité & prudence pour faire cesser la guerre, quel'ambition & malice Espagnolle y nourrissoit avec trop d'imprudence & de foiblesse pour prosperer, & esperant que ledit Duc de Mayenne n'auroit moins agreable que sa Maiesté prist ceste charge, veu que ledit President Ianin m'auoit desia escrit qu'il estoit deliberé de fauoriser sous main enuers sa Saincteté l'instruction & conuersion de sa Maiesté si elle s'y vouloit disposer : & comme ledict sieur Cardinal a tousiours affectionné le bien public, il me donna bonne esperance d'entreprendre volontiers le voyage, si sa Maiesté & ledict Duc luy faisoient paroistre de le desirer.

Partant estant retourné à Pontoise, ie

depeschay vers ledict Ducle sieur de Castelnau qui commandoit en laditte ville en l'absence de mon fils pour la fiance que i'auois en luy, exprés pour l'aduertir de l'ouuerture que ledit sieur Cardinal & moy auions aduisé de faire, pour donner acheminement aux affaires, de l'assurance que ledict sieur du Plessis m'auoit dounée de la volonté de sa Maiesté, des propos que Monsieur de Neuers m'auoit tenus, de la deliberation d'aller à Rome dudit sieur Cardinal, s'il l'auoit agreable, & de mon auis sur le tout: & comme il me sembloit qu'il ne deuoit insister dauantage sur l'assurance qu'il auoit demandée que sa Maiesté donnast désà present de sa conuersion, puis qu'elle s'en excusoit sur sa conscience, laquelle il n'estoit honnestes ny seur pour la religion de violenter, mais qu'il deuoit se contenter qu'elle se soubmit d'estre instruite de l'autorité du saint Pere à la poursuite des Catholiques qui l'assistoient, d'autant qu'il falloit esperer que Dieu ne lairroit l'ouurage imparfaict estant vne fois acheminé; & quand par la faute de sa Maiesté il en arriueroit autrement, que ce seroit par sa faute & son dommage, au contraire l'honneur & la iustification des armées dudit Duc, lequel en tout cas ne

pouuoit errer , aduenant qu'on se remist à
la Saincteté & au sainct Siege du point
de la religion, dont il estoit le premier iuge
& principal tribunal, qu'il falloit seulement
aduiser aux moyens de faire cependant
cesser la guerre, afin de pouuoir conduire
toutes ces choses comme il conuenoit, &
en soulageant le peuple tirer le Royaume
du peril auquel les estrangers s'efforçoient
de le precipiter: qu'apres la responce sur la-
dicte proposition, i'en ferois ouuerture &
instance audict sieur du Plessis s'il auoit
agreable, & mettrois peine d'esbaucher
les affaires, en attendant que l'on y em-
ployast d'autres qui eussent les espauls
plus fortes que ie n'auois pour ce fardeau,
lequel ie recognoissois trop lourd pour ma
portée, le suppliant donc me r'enuoyer en
diligence ledit sieur de Castelnau avec son
intention. Toutesfois il me le r'enuoya
deux ou trois iours apres sans responce à
tout ce que dessus, sous pretexte du be-
soin qu'il disoit auoir de faire aduancer
mon fils avec sa garnison pour l'accompa-
gner au dernier secours que le Duc de Par-
me & luy vouloient donner à Roüen:
Mais Monsieur le President Ianin m'es-
criuit par luy qu'il m'enuoyeroit la res-
ponce dans trois ou quatre iours. En ve-
rité

verité le dit Duc ne pensoit alors qu'à recourir ladite ville & à ne perdre l'occasion de la foiblesse de l'armée de sa Majesté, dont il estoit bien aduerty; il estoit aussi si mal de sa personne, qu'il ne pouvoit bonnement entendre aux affaires: comme ie sceus de Monsieur de la Chastre qui vint passer en ce temps par Pontoise s'en retournant en son Gouvernement, lequel i'auois prié m'asseurer derechef de son intention à la paix & qu'il estoit prest de faire traiter secrettement les conditions d'icelles avec sa Majesté moyennant la susdite promesse & assurance de sa conuersion, mais non autrement pour les raisons predites, & m'apporta la lettre dudit Duc écrite de sa main, portant pouuoir de cōferer avec ledit sieur du plessis, de laquelle i'ay fait mention cy-deuant: toutesfois par ce que ledit Duc n'auoit encore receu la despesche que ie luy auois faite, par ledit sieur de Chastelnau, quand ledit sieur de la Chastre s'estoit separé de luy, ie ne prins ce qu'il me manda par luy pour sa dernière resolution.

Le sieur de Vitry estant party du camp enuiron ce temps, vit sa Majesté à Gisors, ou es enuiron, à laquelle le bruit courut qu'il auoit demandé vn passeport pour luy

& ledit sieur de la Chastre & moy, comme si mōsieur du Mayne luy eust donné charge de me prendre à Pontoise & mener avec luy deuers la Maieſte, m'enuoya ledit passeport ; & toutesfois ledit sieur de la Chastre m'asseura n'auoir eu ceste commissiō, aussi passa il à Paris dès lendemain. Ce bruit qui courut par tout incontinent appresta à parler à plusieurs du mescontentement de sa Maieſté, & du desplaisir à ceux qui desiroient la paix, mesmes offēça & mit en peine ledit Duc de Mayenne à cause desdits Espagnols.

MONSIEVR, plusieurs se ſōt faiçts de feste en cet affaire qui n'auoiēt aucun pouuoir de ce faire, dont l'on a fait plus souuent de conte que des autres, pour ce qu'ils s'estudioient plus à complaire à ceux auxquels ils s'adressoient, qu'à dire la verité & decourrir la playe, chose qui a aussi souuent nuy au public, & à ceux qui de bonne foy s'efforçoient de seruir : car on mesprisoit leur aduis & attribuoit on à art & malice leurs poursuittes, cōseils & actiōs, de quoy se sont grandement seruis les ennemys du Royaume qui n'estoient en petit nombre de part & d'autre, & a' esté besoin à ceux qui s'entremettoient de la paix, faire prouision de constance & de patience, pour

conseruer iusques à la fin : ce que ie ne dis-
tât pour ledit sieur de Vitry que pour d'au-
tres qui s'y sont bien embarquez plus
auant que luy, & qui toutesfois n'y appor-
toient l'affection qu'il a tousiours faict : car
comme Gentil-homme vraiment Fran-
çois il a tousiours desiré & affectionné le
bien & le repos du Royaume, encore qu'il
ne fust des plus mal dressez ny apointez à
la guerre, comme celuy qui gaignoit bien
ses despens.

I E fus en grande peine de la responce
dudit Duc ; à la despesche que luy auoit
portee ledit sieur de Castelnau, parce qu'el-
le tarda à venir dont ie sçauois que ledict
sieur du Plessis se plaignoit, & que l'on cō-
mènçoit à me blasmer, comme si i'en eus-
se esté cause, & ne sçauois à qui m'en pren-
dre, estimant que ledict Duc n'auoit ap-
prouué nostre ouuerture, & qu'il tardoit la-
dite responce expres pour me desguiser
son intention ; mais à la fin nous sceusmes
que ce retardement estoit venu de la faute
d'un lacquais de Monsieur de Grammōr,
auquel ledit President Ianin auoit baillé à
porter ladite responce pour m'estre plus
seurement renduë, par cé qu'il auoit un
passeport de sa Majesté, & toutesfois ledit
lacquais nous dit que passant par Pontoi-

se ayant rencontré des coureurs & reconnu la lettre du President Ianin escrite en chiffre, il l'auoit rompuë & iettée craignāt d'estre surpris avec icelle, dont i'aduertis soudain ledit President, lequel m'enuoya incontinent vn autre double d'icelle. L'original auoit esté escrit dès le 14. Auril, & toutesfois ie n'en receus la copie que le 25. laquelle estoit accompagnée d'une autre lettre dudit President du 22. dudit mois. Desia Roüe auoit esté secouru, sa Maiesté ayant esté contrainte faire place au Duc de Parme, pour auoir esté surpris, & sō armee estant trop foible pour combattre, & combien que sa Maiesté ne tardast gueres à se rapprocher dudit Duc le pressant grandement de venir aux mains; & que plusieurs estimassent, qu'il ne s'en pouuoit desdire, d'autant que sa Maiesté l'auroit acculé cōtre la riuere de Seine à Caudebec, où elle est tres-large & difficile à passer à cause du flux de la mer qui y vient, toutesfois il s'en desme la honnestement, par le moyē d'un pont composé de plusieurs grands bateaux liez ensemble, qu'il dressa aupres dudit Caudebec, sur lequel l'on passoit prés de trois cens hommes à cheual à chacune fois, conduits avec des cordages & à voiles assez industrieusement, & de flogea vn ma-

tin avec des forces qu'il auoit retenuës près de luy, & eurent bien tost gaigné Roüen, sans aucunement seiourner, encore qu'il fust blessé d'une arquebusade receüe deuant ladite ville de Caudebec qu'il auoit assiegee & prise, apres qu'il eust secouru Roüen, il se rendit à Paris à si grande traite que sa Maiesté ne le peut ioindre: Monsieur il ne passa loing de vostre maison où vous estiez, partant vous sçauiez quelle diligence il fit.

OR la responce dudit Duc fut escrite au nom dudit President Ianin, & portoit qu'il auoit veu & faict voir & considerer à M. du Mayne mes lettres, les raisons y contenues, & les moyens qui y estoient representez, pour traicter, qu'il ne pouuoit plus reietter le remede qui venoit d'Espagne, qu'il craignoit plus que tout autre mal qui peut arriuer; que ledit Duc luy auoit donné charge de m'escire qu'il estoit tousiours disposé de traicter avec le Roy qu'il nommoit de Nauarre, en auoit conféré avec M. de la Chastre, pour me dire & chercher avec moy les moyens plus propres pour y paruenir: vray est que lors pour fõdement dudit traicté, il vouloit estre du tout asseuré de la conuersion de sa Maiesté; & neantmoins ie leur auois mandé qu'il n'en pou-

uoit rien promettre avec certitude auant son instructiō, qu'ils iugeoient bien qu'en ce faisant, sa conuerſion pourroit eſtre ſuſpecte, & qu'il y auoit plus d'aſſeurāce pour la religion demeurant huguenot que s'il ſe diſſimuloit: mais auſſi qu'ils auoient crainte que s'ils eſtoient contraints de traicter ou ſa. re. ſurſeance d'armes avec ſa Maieſté, ne changeant point de religion, que pluſieurs priſſent le party d'Eſpagne, qu'il falloit maintenant regarder ſi les moyens que i'auois propoſez les pouuoient garantir de cet inconuenient. le principal ſur lequel ledit ſieur du Mayne ſ'arreſtoit, eſtoit que ſecrettement l'on fuſt d'accord des aſſeurances, tant pour la religion & pour le party, que pour luy & ceux de ſa maiſon: cela eſtant arreſté par vn traicté fort ſecret, l'on pouuoit aſſez conduire le reſte fort aiſement, qu'il falloit lors commencer non par vne declaration ouuerte de la paix, de crainte que le Pape qui n'en auoit eu communication n'en fuſt offenſé, enſemble pluſieurs de leurs amis qui eſtoient eſloignez & le Roy d'Eſpagne meſme, n'eufſt trop d'occaſion de ſe plaindre, & faire le pis qu'il pouuoit parmy eux, mais pour vne ſurſeāce d'armes pour le reſte de l'année, ou pour ſix mois ſeulement, aux

conditions que chacun demeurast sous son party : cependant que les Catholiques qui estoient avec sa Maiesté enuoyroient si bon leur sembloit, (comme il estoit du tout necessaire ainsi qu'il estoit porté par l'aduisque ie luy auois donné) deuers le Pape, pour l'exciter à trouuer bonne l'instruction que desire sa Maiesté & y apporter son autorité, que de leur part ils y pourroient enuoyer aussi, sous pretexte de luy faire entendre les raisons qui les auoient meus à faire ladite trefue ; & là dessus luy représenter le miserable estat du Royaume, les desseins qui se preparoient pour le ruiner, & disposer sa Saincteté par raisons de receuoir sa Maiesté si elle vouloit se reconcilier à l'Eglise, comme le moyen plus propre pour conseruer la religion ; faire aussi que sa Saincteté interposast son autorité enuers le Roy d'Espagne pour luy faire approuuer ce conseil, & enuoyer à cet effect deuers luy en ce Royaume quelques Cardinaux sages & bien instruits de son intention, pour moyenner le bien de toute la Chrestienté ; qu'il feroit en mesme temps tous efforts enuers les Espagnols, & les Estats, (il entendoit ceux du party que l'on vouloit assembler) pour y disposer vn chacun, de ce qu'ils esperoient

obtenir, car ils feroient trouuer à l'assemblée non seulement les deputez, dont il y en auoit plusieurs de mal choisis, mais le plus grand nombre d'hommes de qualité qu'ils pourroient trouuer, comme Monsieur de Lyon qui estoit mandé instamment, Monsieur de Rieux, Monsieur Senecy qui estoit desia là, & Monsieur le Cardinal auquel on auoit escrit, & qui auoit promis d'y venir, lesquels sans doute s'accommoderoient à tout quand ils auroient entëdu mes raisons. Ce qui estoit donc expedient de faire en diligence, estoit que ie conferasse pour aduiser aux moyës des seuretez pour la religion & pour le party & que y ayant de l'incertitude sur la conuersion de sa Maiesté, elle deuoit estre donnee plus grande, mesmes pour le party que sa Maiesté ny ses seruiteurs ne deuoient estre de leur part retenus en cela, que l'on ne persuaderoit iamais à ces Princes de traicter, s'ils ne voyoient deuoir estre mis en estat de ne pouuoir estre aisement ruinez, de crainte que ayant posé les armes ils peussent iamais faire entreprise : il n'y auoit point d'apparence, parce que personne apres tant de miseres n'y seroit plus disposé, que lesdites assurances pouuoient estre des places des gouuernemens

qu'ils tenoient, de ne mettre point des garnisons aux villes qui auoient fuiuy le party, & autres que ie pouuois bien confiderer, entre lesquelles ils mettoient l'interuention du Pape, dudit Roy d'Espagne, & autres Princes leurs amis: Pour le particulier dudit Duc qu'il en auoit souuent discouru, & qu'il voyoit qu'il pouuoit interrompre ce bon œuure, & apporter peut estre ce changement en la volonté des vns & des autres; c'estoit que l'on vouloit aller voir promptement vers Roïen & faire leuer le siege, ou combattre, & par ce moyen avec quelque raisonnable subiet & utilité se mettre en plus grand espoir de repos. L'on auoit respondu que quinze iours de temps se couleront pour le moins, auant que d'en pouuoir estre d'accord, & que peutestre au bout du temps il ne se feroit point, & cependant avec ce loisir sa Maiesté se pourroit fortifier de toutes les garnisons, où lors ils auroient de l'aduantage, que ledit Duc de Parme disoit ne vouloir perdre ayant pris vne entiere resolution de combattre, laquelle il croyoit veritablement plus qu'il n'auoit iamais fait, que l'on s'estoit aussi souuenue de la trefue que sa Maiesté auoit fait proposer apres le siege de Paris leué, lors qu'elle pensoit que

ledit Duc de Parme deust faire ſejour en France, & qu'elle auoit châgé d'auis, tout auſſi toſt qu'elle auoit eſté aduertie qu'il vouloit ſortir; qu'elle en pouuoit bien faire autant maintenât fortifiée par le temps, & ſe ſeruir d'un tel aduantage, pour prendre Roüen, qu'il n'y auoit que reſpondre à telles raiſons, que peut eſtre le ſiege de Roüë ſe leueroit ſans combattre, & quand l'on ſeroit près les vns des autres chacun pour ſe racheter de peril ſe diſpoſeroit à la ſurſeance, que s'ils en voyoient l'occaſion ils ne la perdroient.

MAIS quoy qu'il arriuaſt, il ſuffiſoit pour maintenât qu'ils auoient retardé le traité deſdits Eſpagnols, que i'euffe à m'eſclaircir des moyens pour aſſeurer la religion & le party, & donner contentement audit Duc de Mayenne, & à ceux de la maiſon, qu'ils aſſembleroient le plus grand nombre de gens qu'ils pourroient, & croyoient que mal gré tous ceux qui auoiēt mauuaiſe intention ils prendroient quelque bon conſeil. Que ſi M. le Cardinal de Gondy qui eſtoit ſage & de grand iugement auançoit cependant ſon voyage à Rome, ce ſeroit touſiours pour le mieux, qu'ils y dépêcheroyent des poſtes en attendant qu'ils y enuoyaffent vn hōme d'autorité, qu'ils in-

struïroient bien, pour seruir en ce que le-
dit Duc luy auoit dōné charge de m'escri-
re pour ce regard. Quand à ce que l'on luy
auoit mandé du mariage de M. le Comte
de Soissons. & du peu d'intelligence qu'ō
disoit estre entre sa M. & luy, si sa M. ne se
vouloit faire Catholique, ils estimoient que
c'estoit vn remede subsidiaire, duquel sa
M. se deuoit seruir secrettement pour les
affoiblir & rompre les desseins qui se pro-
posoient, & mesme celuy de M. de Guyse,
dont le temps les esclaireiroit, qu'il ne se
vouloit opiniastrer contre ceux qui auoient
plus de iugement que luy. Mais qu'il con-
tinuoit à dire avec plusieurs autres qui e-
stoient de cet aduis, que les Princes du sãg
ioincts ensemble avec les Catholiques sau-
ueroient la religion & l'estat avec honneur
& seureté par tout, & que pour vn si bon
effect il luy sembloit qu'on ne luy deuoit
refuser aucunes villes ny autres conditions
qu'ils voudroient demander avec raison.
MONSIEVR, ce sont les propres termes
de la lettre dudiçt President escrite à
Noyon le 14. iour d'Auril que i'ay voulu
vous représenter, pour auoir esté le fon-
dement sur lequel fut bastie la negociatiō
que ie fis depuis, à quoy i'adiousteray son
autre lettre du 22. escrite à Roüen, qui

accompagnoit le duplicata.

IL me mandoit par icelle qu'il m'auoit enuoyé l'original de ladite responce par le laquais du sieur de Grandmont, comme estimât le moyen plus seur qu'aucun autre parce qu'il auoit vn passeport, & que les lettres qui s'adressoient à moy deuoient à son aduis passer sans soupçon: qu'il auoit grand desplaisir de ceste faute, laquelle il eust plustost réparée s'il en eust esté aduertty, iugeât assez que pour le public & pour mon particulier vn retardement estoit dommageable, & suiet à mauuaise interpretation, me priant de ne l'imputer à luy, ny à M. du Mayne qui auoit creu qu'il y auoit plus de seureté en celaquais, qu'en toute autre persône qu'il m'eust peu m'euoyer. Que Roïen auoit esté secouru depuis sans combat selon son desir, qu'ils auoient bien sceu aussi que les forces du party contraire estoient inegalles aux leurs, quoy qu'on leur eust mandé de diuers endroits, & que le Roy estoit trop sage & bien conseillé pour tenter le hasard foible: que s'ils eussent temporisé, il y eust eu plus de difficulté: que les affaires estoient maintenant en estat pour en deliberer avec loisir pour y prendre bonne resolution, que M. de Mayenne auoit des irresolutions, mais

croyoit que fortifié de bons conseils il suiroit tousiours celuy que nous iugerions le meilleur : le principal estoit qu'il y eust des gens de bien en ceste assemblée que l'on vouloit faire laquelle estoit fort pressée des Espagnols, & desirée du Duc sans remise, pourueu que l'on y peust auoir des gens de qualité. Que M. de la Chastre luy auoit donné aduis de nostre conférence, & comment à Paris l'on tenoit que M. le Comte de Soissons se deuoit separer du Roy, que plusieurs Catholiques se ioindroient avec luy, & mesmes que le Roy d'Espagne luy auoit desia donné vne somme d'argent pour faire la guerre aux huguenots; que le mesme aduis luy auoit encores esté donné d'autres endroits, que le dit sieur de la Chastre luy escriuoit que cela pourroit beaucoup faire de desseruir à M. de Mayenne, & pour son regard il estimoit qu'il pourroit bien diminuer son autorité, mais aussi qu'ils asseuroient le party des Catholiques, & seroit cause indubitablement si nous estions bien sages, de la ruine des huguenots: toutesfois que le dit sieur de Mayne auoit grande occasion de se plaindre du Roy d'Espagne, s'il estoit vray qu'il eust dressé ceste partie, ses ministres ayant tousiours reietté les ouuertures

qui leur auoiēt esté faites pour ceux de ceste maison là, pour maintenant les rechercher à leur desceu; qu'il recognoissoit; que plusieurs Catholiques se laissoient de sa M. & encores du dessein auquel on craignoit qu'ils fussent contraincts de se precipiter, qu'il preuoyoit quoy que l'on dit de la foiblesse de ceste maison de Bourbõ, qu'ils seroiēt à la fin les mieux suivis de tous; qu'il ne laissoit toutesfois de preferer mon iugement au sien, partant me prioit donc de le tenter & conférer secrettement, & preparer la matiere en attēdāt ladite assemblée, qui seroit sans delay dans la fin du mois de May, pour resoudre, moyennāt la grace de Dieu, tout ce que les gens de bien trouueroiēt le meilleur, & que de leur costé il feroit cequ'il m'auoit mādē, par la precedēte lettre, de laquelle il m'enuoyoit le double par le porteur d'icelle. Que l'on auoit fort publié en l'armée de sa M. le traicté qui se faisoit avec moy, & que M. d'Antragues en auoit escrit vne lettre à vn sien amy, qui estoit tombée és mains de madame de Guise qui l'auoit enuoyée audit Duc de Parme, pour le mettre en soupçon de M. du Mayne que c'estoient artifices qui ne valloient rien, qui nuisoiēt à tous & ne seruiōt à persōne. Que sa M. auoit dit à plusieurs & mesmes

au cōmandeur de la Rōmaigne qu'on luy parloit tous les iours de la paix, & que c'estoit pour tromper, qu'il m'asseuroit que M. du Mayne estoit esloigné de to⁹ par artifices, & qu'il n'ẽ vouloit point vler à mes despēs, ny tous y participer pour chose du monde, mesmes, à mon preiudice, qu'il prioit Dieu seulement que nous puissions aussi biẽ faire qu'il estoit assuré que luy & moyen auĩs bõnevolõtẽ; que leur armée deuoit attaquer Caudebec pour faire entrer des viures dās Roüẽ avec plus de facilité, que le Card. de Plaisance estoit en ladite ville, lequel il n'auoit point veu, mais auoit sceu son aduis estre de choisir l'Infāte pour Royne, & la marier avec M. de Guise, que les Espagnols vouloient le premier, & non le dernier, & non pas avec les autres Princes Frāçois, s'ils en estoient creus, chose toutesfois qu'ils ne se deuoient promettre; qu'il confereroit avec ledit sieur Cardinal, mais qu'il croioit qu'il n'y feroit riẽ, qu'il l'auoit desia fait avec M. Bernard député de Bourgogne, lequel auoit beaucoup de creance avec les autres deputez, ce qu'il estimoit auoir faict avec plus de fruiẽt.

CETTE derniere lettre me sembloit plus froide que la precedẽte; elle estoit faite aussi de puis auoir secouru Roüẽ, les bõs

& mauuais succeds ayāt souuent changé,
non seulement nos conceptions mais aus-
si nos paroles, tesmoignage tres certain
& manifeste du fonds de nos intentions:
toutesfois ie ne voulus laisser de voir ledit
sieur du Pleffis apres la reception desdites
lettres, ce fut le lendemain audit Buby,
aueclequel ie ne voulus vser d'autre cere-
monie, que de luy faire lire les mesmes let-
tres que i'auois receuës, excepté seule-
ment l'aduis qui faisoit mētion dudit sieur
d'Antragues, afin qu'il vist aussi clair que
moy, que luy mesme iugeast quel estat
nous en deuions faire, pour faciliter ce que
nous desirions tant: il fit demonstratiō de
se contenter desdites lettres, voyant qu'on
me donnoit charge par icelle d'entrer dès
à present en conference, des moyens d'as-
seurer la religion, le party & les particu-
liers, sans plus remettre les choses apres la
conuersion de sa Maiesté, comme on auoit
toufiours fait, qui estoit ce à quoy il auoit
toufiours aspiré & n'auoit encore peu par-
uenir, partant il m'asseura que le voyage
de Rome le feroit, que sa Maiesté feroit
son deuoir pour cōtenter le Pape, & qu'el-
le aduanceroit son instruction de façon
que l'on en verroit bien tost les effects,
mais insistoit d'auācer aussi le fait desdites
seuretez,

seuretez dō il estoit d'auis que l'ō fut resolu
mesme deuant ceste assemblée que l'on de-
uoit faire, disant qu'autrement il n'en pou-
uoit bien esperer, approuuant neantmoins
que le tout fust tenu secret, comme le desi-
roit ledit Duc, & sur ce me pressa & coniu-
ra de mouuoir les conditions generales & par-
ticulieres, afin de gagner le temps: mais ie
m'en excusay luy disāt; que i'en estois mal
informé, qu'il en sçauoit autant que moy,
puis qu'il auoit sceu ce que l'on m'en auoit
escrit, & aussi que ie ne voulois seul entre-
prendre ce fait qui estoit trop espineux &
embarrassé. partant qu'il eust patiēce que ie
fusse assisté de quelquvn mieux instruit des
pretentiōs dudit Duc: d'ailleurs l'on me re-
commandoit tant le secret en ceste nego-
ciation, que quād ie me voudrois emāciper
d'y entendre plus auant, ie desirois qu'il
me donnast la foy & parole du Roy pour
ce regard, sçachant comme on en vloit or-
dinairement à la Cour, & que si ie pouuois
bien faire au public, ie ne voulois au moins
nuire au particulier dudit Duc, ny luy don-
ner occasiō de se plaindre de moy mesme,
voyāt qu'il se plaignoit desia par la derniere
lettre dudit Presidēt, que l'on en auoit dō-
ne aduis à Madame de Guise, sans toutes-
fois nommer l'auteur, & que sa M. mesme

l'auroit dit au cōmandeur de la Romaine.

LEDIT sieur du Plessis me dit qu'il ne me donnoit ceste parole sans vn exprès commandement de sa Maiesté, mais qu'il luy en escriroit & qu'apres sa responce il me manderoit. ce qu'il pourroit faire, & moy me resoudrois aussi de ce que i'aurois à faire pour le mieux.

MONSIEUR, i'auoistelle enuie d'acheminer ceste negotiation, & y engager ces Princes, que ie me resolus si ledit sieur du Plessis me donnoit la foy de sa Maiesté, de tenir ce fait secret, d'entrer en matiere, mais de le faire comme moy-mesme, & sans y obliger ledit Duc, esperant que ledit sieur du Plessis ne faudroit, comme tres-aduisé, de me donner moyen par ces responce de contenter ledit Duc, ioint que ie craignois perdant ceste occasion de ne m'estre à l'aduenir permis d'en vser.

PARTANT si tost que ledit sieur du Plessis m'eut assure de la parole de sa Maiesté, ie mis en auant comme de moy-mesme & sans escrire les articles qui s'ensuiuent. Je demanday que l'instruction du Roy fust assuree, & qu'il fit telle declaration de son intention & desir sur sa conuersion à l'Eglise Catholique Apostolique & Romaine, que chacun eust occasion d'en

esperer contentement: que l'exercice de la religion Catholique fust restably où il auoit esté discontinué, & ladite religion conseruée & maintenuë & entretenuë par tout en son entier, & les Ecclesiastiques tenus en tous leurs droicts, franchises, libertez, priuileges, biens & possessions: estre faict vn reglement sur la presentation & nomination aux benefices estans à la nomination du Roy, conforme aux saincts Canons, decrets & aux ordonnances cy-deuant faictes à la requeste des Estats generaux du Royaume; que s'il estoit à propos de tolerer à ceux de contraire religion l'exercice d'icelle, que l'on s'obligeast au moins de ne faire dauantage pour eux, sous quelque pretexte que ce fust; que ce qu'ils auoient lors de la guerre commencée l'an mil cinq cens octante cinq que toutes choses faictes & passées depuis la mort de feu Monsieur de Guise fussent oubliées, sans estre loisible de faire recherche pour quoy que ce fust, excepté toutesfois les cas enormes reseruez par les precedents Edicts entre personnes de mesme party, pourueu que la mort du feu Roy ne seruist de pretexte pour trauailler ceux qui en estoient innocens: & restablir l'honneur & la memoire de feus messieurs le Car-

dinal & Duc de Guise, sans toutesfois offenser celle dudit feu Roy, casser les Arrests & iugemens donnez de part & d'autre depuis la guerre, auquel les parties n'auroient contesté : remettre vn chacun en la iouissance de ses offices, charges & benefices, pour en vser comme l'on faisoit deuant la mort dudit Duc de Guise: faire vn reglement pour la prouision aux offices de ce Royaume, afin d'éuiter qu'ils ne fussent à l'aduenir donnez à ceux de contraire religion, sans en cela oublier les gouuernemēs, capitaineries, & toutes autres charges de villes, mesmes les Ambassades : conseruer les habitans des villes en leurs droits, priuileges & fráchises : faire sortir les gens de guerre qui y estoient, & n'en tenir qu'aux villes de la frôtiere; n'en mettre point du tout aux villes qui seront nômées & accordées pour la seureté du party, ou expressement reseruées & spécifiées par le traicté, deliurer les prisonniers sans rançon, rendre les meubles aux proprietaires les trouuant en nature, conuenir particulièrement à qui demeureroient les offices, benefices, gouuernemens, & charges ausquelles il auroit esté pourueu de part & d'autre depuis la guerre, pour obuier à toutes disputes, pouruoir au soulagement du peuple, regler la gendarmerie &

infanterie avec les officiers dicelle, & en ce faisant entretenir & soldoyer certain nombre de compagnies à ceux qui auoient fuiuy le party, promettre de tenir les Estats Generaux, pour asseurer les choses susdites à l'aduenir, les assembler de six en six ans, tant pour cet effect que pour donner ordre par leur aduis aux affaires publiques, & mesmes aux abus qui se commettoient en l'administration des finances, faire interuenir en cetraicté pour la seureté d'iceluy nostre S. Pere, & tels Princes estrangers qu'il seroit aduisé.

LE luy fis aussi quelque ouuerture des moyens de contenter en particulier ledict Duc de Mayenne, & les autres Princes de sa maison, comme de ioindre au gouuernement de Bourgongne celuy de Lyonnois, & en donner vn autre à Monsieur de Nemours, ayant recogneu que ledit Duc auoit cela tresà cœur, luy laisser la disposition des benefices & offices d'iceluy, l'honorer de quelque charge d'importance en ce Royaume, conseruer son gouuernement à ses enfans, & luy donner moyen de payer ses debtes, traicter honorablement sa maison, conseruer à M. de Guise l'Estat de grand Maistre, le gouuernement de Champagne, & à Messieurs ses freres les benefices que

tenoit feu Monsieur de Guise, leur donnant aussi moyen de s'entretenir, & payer leurs debtes, & en faire autant pour Monsieur de Mercœur en Bretagne, pour Monsieur d'Aumale en Picardie, & principalement aux places du party, pour Monsieur d'Elbœuf en Bourbonnois, & pour Monsieur de Ioyeuse en Languedoc, pour Monsieur de la Chastre en Berry & Orleans, pour Monsieur de Villars en Normandie, pour Monsieur de saint Pol en Champagne, pour Monsieur de Rosne en l'isle de France, & ainsi des autres du party sans oublier ceux qui le meritoient: ie luy parlay aussi de comprendre en ce traitté les estrangers qui auoient secouru le party, remettant toutesfois à parler desdits interests particuliers, en ce qui concernoit lesdits estrangers, quand i'en serois mieux instruit, & adiouster encores ausdites propositions generallesce qui me seroit mandé.

Nous discourusmes sur lesdits articles ledit sieur du Plessis & moy, comme vous sçavez que le subiect le requeroit, mais d'autant que nous n'auions pouuoir de faire mieux, nous promismes l'un à l'autre d'en aduertir les chefs, & d'en faciliter l'accord de tout nostre pouuoir, & cependant que

les voyages de Rome seroient auancez cōme chose necessaire pour paruenir à nostre but: ledit sieur du Plessis se departant me promist de rechef au nom de sa Maiesté de tenir secret tous nos discours & les ouuer- tures que nous auions faictes.

P'ESCRIVIS dès le lendemain audiēt sieur President ce que i'auois fait, afin d'en aduertir ledit Duc, pour auoir lettres apres de son intention, le priant de ne m'abandonner en ceste entreprise, en laquelle ie m'estois embarqué à son adueu, poussé de tres-bonne volonté de bien faire au public, & aux particuliers, laquelle ie recognoissois estre plus espineuse & difficile qu'autre qui se fust encore présentée, & partant auroit besoin d'espaules plus fortes que les miennes.

Et d'autant que le messager que ie luy auois enuoyé ne reuint dans le temps qu'il m'auoit promis, ie luy fis vne recharge par vn trompette exprez, le pressant de me respondre & ne me laisser en incertitude: toutesfois d'autant que les deux armées estoient logées à la veüe l'vne de l'autre, chacun estoit si embesongné que l'on ne pensoit qu'au peril present, & neantmoins ledit President ne laissoit de m'escrire par toutes ses lettres, qu'il se desioit plus que

iamais de la conuerſion du Roy , qu'il ne croyoit pas auſſi que le Pape l'aprouuaſt iamaïs, & partant craignoit, que nous amuſans à ce chemin nous perdiſſions la religion & l'eſtat, remettant encores en ieu celuy des autres Princes du ſang, dont ie fus en tres-grande peine, tirant argument d'un changement ou refroidiſſement de la volonté dudit Duc, & quel'on vouloit reietter ſur moy & ma pourſuite le blaſme du mal qui en reſſiſſeroit, & ſur ce fonder quelque autre reſolution, ce qui fut cauſe que i'eſcriuis franchement audit Preſident que i'auois pris & ſuiuois le chemin d'un homme de bien, que ie m'y eſtois embarqué au mandement dudit Duc, receu par les lettres qu'il m'auoit de ſa part eſcrites, croyant fermement que c'eſtoit noſtre honneur, de buoir, & aduantage, de traiter avec le Roy deuant tous autres pourueu qu'il vouluſt eſtre Catholique, & que peuſſions conſeruer la religion, d'autant que la couronne luy appartenoit, & qu'en traitant avec d'autres nous ne ferions ceſſer la guerre, & partant n'aſſeurerions ny ſauuerions le Royaume: qu'en tout cas mon aduiſ auoit touſiours eſté de tenter ce chemin, deuant que d'en chercher d'autre pour pluſieurs raiſons que i'auois representées.

souuent, ausquelles ie perseuerois plus que iamais ; ioint que ie n'auois occasion de croire, que ledit Duc ny Messieurs ses parens, & tous ceux dont ils estoient assistez fussent plus affectiōnez au dernier moyen qu'à l'autre, n'ayant perdu la memoire de ce que ie leur en auois ouy dire, le suppliant me vouloir enuoyer la derniere volōté dudit Duc, & s'il approuuoit que ie ne poursuissie plus auant la negociation commencee par son commandement, me le mander librement sans me bailler le change me chargeant d'une autre ; car ie protestois, que ie la refuserois tout à plat, comme celui qui ne vouloit seruir d'instrument de tromperie ny de giroüette pour tourner à tous vents.

Ma premiere lettre fut escrite du dernier d'Auril, & cette recharge le sixiesme May, & le 10. ie receus la responce dudit President, dattee du 8. laquelle contenoit ce qui s'ensuit. Il me mandoit n'auoir encore peu parler à M. du Mayne si particulierement qu'il estoit besoin de ce que ie luy auois escrit, d'autant qu'il estoit tousiours au champ de bataille près l'ennemy, & auoit l'esprit du tout bandé & occupé à la guerre sans intermission, & aussi que ledit President estoit tombé en vn soupçon extreme des Espa-

gnols, & de ceux qui ne vouloient point la paix, qu'il en estoit regardé de plus pres que iamais, mais qu'il en choisiroit l'opportunité, & au plustost : adioustant qu'il voyoit aussi si peu d'avantage pour ledit Duc, & d'assurance pour le party par les articles dont' i'auois conferé; qu'il estimoit estre plus à propos de les luy celer maintenant, & differer iusques à ce qu'il en eust conferé avec moy, ou qu'il m'en peust mander quelques particularitez : qu'il falloit que ie creusse, encores que le bien de la paix fust autant desirable audict Duc qu'à nul autre, que son esprit estoit assez souuent trauersé de ceux qui luy imprimoient plusieurs grandeurs imaginaires pour l'en destourner, & que l'une des principales raisons qui le portoient à ce traicté, estoit que l'on luy persuadoit tousiours que le Roy disoit à vn chacun pour luy raporter, qu'il vouloit luy faire vn si bon, honorable & vtile traictement, pour sa grandeur, son bien & sa maison, qu'il ne le pourroit esperer de qui que ce fust; que sa Maiesté auoit encores tenu les mesmes propos il n'y auoit que deux iours, au milieu de la campagne, entre les armées au Baron de Luz, avec lequel il auoit parlé vne bonne heure, elle en auoit autant dit aussi à monsieur de Vitry

& à M. le Mareſchal d'Aumont, lequel s'eſtoit plaint, de ce que cet affaire ſe traictoit avec ledit ſieur du Pleſſis huguenot & grandement ſuſpect aux Catholiques, tant pour ce que les huguenots ne vouloient la paix, craignant que les Catholiques qui aſſiſtoient ſa Maieſté ne la fiſſent deſaduantageuſe pour eux, parce qu'il auoit vn gouuernement que la guerre rendoit meilleur que ne feroit la paix, qu'il ne voyoit rien auſdits articles qui apportast autre commodité ou aſſurance audit Duc: qu'il auoit tant de deſir de la paix qu'il ne mettoit en conſideration la miſere & le meſpris de la Ligue, apres qu'elle feroit concluë avec ſa Maieſté, mais embrasseiroit le public ſeulement, me priant de le croire & de bien prendre les difficultez qu'il me faiſoit: que c'eſtoit pour rendre l'affaire plus facile, qu'il eſtoit bien raifonnable, que le Roy & les ſiens, leſquels deuoient retirer pour iamais l'autorité, l'honneur & le profit de la paix, donnaſſent quelque contentement audit Duc & aux Princes qui les feroient iouir de cet heur, qu'ils ſeroient contraints par la confirmation de la guerre acheter cherement, & peut-eſtre ne l'auoir iamais: qu'ils traictoient non comme vaincus, mais comme puiffans, en eſtat de

faire aussi tost ruiner leurs ennemis qu'eux lesdits Princes; qu'ils le faisoient comme gens de bien qui vouloient garantir le Royaume du peril qu'il couroit par la continuation de la guerre, aux perils & à la ruyne d'eux mesmes: partant leur desir à l'embrasser rendoit vn tesmoignage de leur preud'homme non de celle de leurs ennemis, que l'vtilité seule y pouuoit porter, sinon qu'ils monstraissent la recherchant vouloir laisser aller quelque chose pour vne fois à ceux qui ne pourroient iamais rien esperer du regne du Roy, auquel ils se soubmettoient par ladite paix. Que ie disois que le fondement sur lequel il falloit bastir la paix, c'estoit la conuersion de sa Maiesté, & qu'à ceste fin il estoit bon d'enuoyer en diligence à Rome, qu'il le trouuoit necessaire; mais que i'adioustois qu'il falloit faire des articles doubles, scauoir les vns en cas que le Roy se conuertist, & les autres en cas contraire, & toutesfois ce deuoient estre articles secrets qui ne deuoient estre publiez, ce luy sembloit, qu'apres ladite conuersion, sans laquelle aussi monsieur du Mayne n'entendoit que ledit traicté eust lieu, ainsi les autres à faute de la conuersion estoient inutiles: qu'il n'auoit peu induire monsieur du Mayne à

traicter sans icelle, & que quand il le feroit, il ne seroit fuiuy de personne; que les Catholiques aussi qui estoient près de sa Maiesté ne demandoient point qu'on traitast ny qu'elle fust recogneuë, sinon au cas qu'elle fust Catholique: que monsieur de Longueville & M. le mareschal d'Aumont leur auoient faict dire au nom de tous les Princes & Seigneurs Catholiques seruans sa Maiesté, que si monsieur de Mayenne & ceux de la Ligue offroient de la recognoistre à condition qu'elle se fist Catholique dedans vn temps, qu'ils consentiroient, promettroient & s'obligeroient de leur part, au cas qu'elle n'y satisfist dedans ledit temps de la quitter, & de se ioindre avec eux, pour ensemble aduiser à la conseruation de la Religion & de l'Estat. Que ceste obligation auoit bien plus de seureté pour eux, & seroit aussi plus honorable que la forme du traicté duquel i'auois escrit, me priant de le considerer. Qu'ils auoient fait vne ouuerture sur cette occasion, qui estoit, induire lesdits Princes & Seigneurs Catholiques d'enuoyer de leur part vers M. de Mayenne, & le Duc de Parme, pour leur faire entendre qu'ils estoient Catholiques, desirās cōme eux conseruer la Religion, avec offres de deputer

aucuns Seigneurs pour en conferer & traiter avec eux au contentement mesme du Roy d'Espagne: que M. le Marechal d'Aumont auquel le Baron de Luz en auoit communiqué en la campagne avec assez de loisir, approuuoit ce moyen, s'estoit présenté luy mesme pour estre vn des deputez, disant que sa Maiesté n'empescheroit ceste voye, que là dessus il en auoit de son costé communiqué au Duc de Parme & aux Espagnols, & quoy qu'il leur eust peu dire, mesmes que ce seroit vn moyen pour separer les Catholiques d'avec sa Maiesté, affin de donner plustost lieu à ceste conference avec leur gré, il ne leur auoit peu persuader, non pas à celuy qui estoit le plus sage d'entr'eux, qui estoit Iean Baptiste de Tassis: que ceste ouuerture & conference nous eust mis au chemin d'vne surseance d'armes, & en fin d'vn traité bien certain, mais que Dieu ne l'auoit voulu permettre. Que là dessus on me deuoit mander pour estre auteur d'vn si bon œuure, auquel il m'eut tres-volontiers assisté, qu'il auoit veu par mes lettres que ledit sieur du Plessis ne vouloit point de surseance d'armes maintenant, que c'estoit contre ce qu'ils auoient desiré; qu'ils le faisoient, ou pour ce qu'ils pensoient auoir maintenant quelque ad-

uantage en cela, & qu'ils tesmoignoient qu'ils ne remettoient iamais rien de leurs vtilitez, que pour ce regard ils esperoient si bien se garantir de mal & inconuenient, qu'ils esperoient faire voir dedans peu de iours, que l'aduantage leur demeureroit: qu'ils ne cedoient pas maintenant au Roy en bonté & nombre de forces: mais peut-estre qu'ils fuyoient le combat pour des considerat ons, & que sa Maiesté en auoit de contraires qui luy faisoient le desirer, que l'autre raison qui pourroit faire craindre audit sieur du Pleffis ladite surseance d'armes estoit, que ce loisir deuoit estre employé à l'instruction & conuersion de sa Maiesté, apres lequel s'il ne la faisoit il ne la falloit plus esperer, ce qui separeroit d'avec sa Maiesté les Catholiques: qu'il auoit cogné par le discours de mes lettres, que pour les villes de seureté l'on n'en vouloit point donner, & que sa Maiesté aux villes Catholiques qu'elle tient, de la fidelité desquelles elle se vouloit asseurer par la force, & non par la bien-veillance, y vouloit tenir des garnisons; que ie considerasse de là son but & intention.

Q V E si on ne voyoit cela aussi clair que luy, il en dissimuleroit pour n'en remuer aucunes difficultez, qui puissent retarder la

paix, tant il la desiroit : que pour le particulier de M. de Mayenne l'on offroit son Gouvernement, & quelques moyens de payer ses debtes par les mains, mais qu'il pourroit recommander au Roy pour les benefices qui vaqueroient en son gouvernement, & le feu Roy luy auoit promis auant la mort de feu monsieur de Guise luy donner vn breuet secret, par lequel il luy accordoit de pouruoir aux benefices, offices, capitaineries & charges dudit gouvernement à sa nomination, que ie ne parlois point de tout cela, ny de l'engagement du domaine pour l'argent qu'il auoit employé; ny pour rendre ledit gouvernement hereditaire pour luy & les enfans, & des places qui estoient tenuës par les ennemis, des charges & grades qui le mettoient hors du cōmun; ains au rang des Princes de sa qualité, dont il auoit quelquesfois conféré avec moy : qu'il estoit besoin luy tenir autre langage, pour l'induire à traicter, que ie le iugeasse & que ie creusse, que quand il n'y auroit autres difficultez que celle qu'il feroit, il n'y en auroit point : que i'adioustois qu'il falloit faire vn Edict d'abolition ou oubliance des choses passees, pour ce qui estoit de la prise & continuation des armes, qu'ils ne vouloiēt pas estre traictez à la huguenotte, leurs,

leurs armes estant trop iustes, que toute abolition presupposoit vn crime, & laissoit tousiours quelque notte sur ceux ausquels on la donnoit, qu'ils desiroient que chacun creust auoir eu de l'honneur & de la raison à la prise des armes, & qu'ils auoient beaucoup de peine à les quitter, au moins ne vouloient-ils pas se condamner eux mesmes en receuant vne abolition, qu'il y auoit des moyens pour ce regard plus honorables pour eux, & qui n'offenceroiét personne; qu'il faudroit aussi reestabli la memoire de feu Monsieur de Guise & de son frere, parler sur la mort du Roy comme il conuenoit sans toucher audit Duc, ny cōtre ceux qui viuoient, ou s'en taire du tout, & se cōtenter de quelques mots qui fussent coulez en la narration dudit traitté, non pas au dispositif, où ils feroient paroistre qu'ils n'y auoiét point participé, que ceste paix ne deuoit pas estre vn simple Edit des sujets à leur Roy, mais vn traitté par lequel ils le recognoistroiét pour Roy à certaines cōditions, ayans eu sujet & raison de ne le pas faire du viuāt de M. le Cardinal de Bourbō, ny depuis pēdant qu'il estoit huguenot; que pour le regard des gouuernemens il n'estoit pas raisonnable que les Princes de Lorraine les eussent tous, qu'il y en auoit ausquels l'õ ne

pouuoit les dénier parce qu'ils les auoient desia; des autres qu'il falloit voir si l'õ pourroit y adiouster dauantage que ceux qui en auoient, comme M. de Mercœur, de Nemours, de Guise, de Loyeuse & autres, ie creusse que dans vn tēps, cōme de cinq ou six ans, ils demāderoient qu'il fust pourueu aux places qu'ils tenoiēt à leur nominatiō, aduenāt le deceds pēdāt ledit tēps de ceux qui les tenoiēt, que ceste seureté estoit l'vne des principales que l'on leur pourroit donner, & qu'ils ne cōsentiroyēt iamais qu'aux villes & places qu'ils auoient occupées par force, ou qui auoient suiuy leur party, on ostast les Capitaines & gouuerneurs qui y estoient de presēt, pour y remettre les anciēs qui estoient leurs ennemis, qu'il faudroit vne cōferēce bien particuliere pour s'en esclarcir, que c'estoit chose estrāge que l'õ fit difficulté de rendre à M. de Guise sa charge de grād Maistre, & à ses freres les benefices de M. le Card. de Guise leur oncle, qu'il sēbloit en traitant ainsi qu'ils fussent desia les maistres, mais que personne ne croioit où il en estoit, & qu'il me pouuoit asseurer que si l'õ parloit de ceste sorte ausdits Princes ils s'en esloigneroiēt du tout, & se rēdroient pour iamais irrecōciliables, car ce premier refus encores qu'õ vint à l'accorder apres, les of-

fenferoit par trop; que ce n'estoit sans raisõ
qu'ils auoiẽt demãdẽ de cõprẽdre en leurs
societez les Princes estrangers, car de ceux
du dedãs qui estoient du party ils sçauoiẽt
quelle estoit leur affection enuers eux, &
quelle seroit l'autoritẽ de sa M. sur eux a-
pres qu'elle seroit recogneuẽ pour Roy.
Toutesfois voulãt qu'ils s'en abstinsent il
estoit raisonnable qu'ils fussẽt au moins cõ-
pris en la paix, & que l'õ fit l'vn maintenant,
& que l'autre demeurast en lógueur: car a-
pres que le traitẽ seroit fait ils ne pourroient
plus parler qu'avec supplicatiõ à celuy qui
seroit le maistre absolu, pour ne faire que
ce qui luy plairoit, où aujourd'huy ils auoiẽt
part en l'accord cõme parties presentes, &
peut estre que le Roy d'Espagne n'en vou-
droit point luy mesme, & qu'il trouueroit
plus de gẽs pour l'assister en ce Royaume &
le broũiller qu'il n'en seroit besoin; toutes-
fois qu'ils vouloiẽt tout faire avec hõneur,
& si en cas que ledit Roy d'Espagne voulut
consentir d'y estre cõprins il y auroit plus
d'assẽurãce, mais il ne l'esperoit pas, d'autãt
qu'il y auoit desia trop de gẽs de leur party
qui mõstroient ne se vouloir separer d'avec
luy, entre lesquels M. de Nemours estoit
l'vn, qu'il auoit mandẽ exprez que ie creu-
se, que si le Roy ne se faisoit catholique, plu-

sieurs feroient de mesmes, & que s'il vou-
loit auoir bon marché d'eux & rōpre tou-
tes mauuaises entreprises, il se deuoit faire
instruire dās quelques iours, puis se rendre
Catholique; que ie verrois grand change-
ment aux affaires, & la paix plaire à tant de
gens, que les contradicteurs auroient hon-
te de continuer la guerre, où il seroit ayse
de les ruiner, que pour luy il desiroit qu'el-
le se fit, mais qu'il preuoyoit vn million de
difficultez, lesquelles il ne sçauoit si l'on
pourroit iamais surmonter: il desiroit que
l'on prist ce chemin qu'il auoit obmis à me
faire response touchant le gouvernement
du Lyonnois, qu'il seroit difficile ou plu-
stost impossible de faire quitter à monsieur
de Nemours pour auoir desia basti en ice-
luy sa souueraineté, à laquelle ie creusse
qu'il n'oublioit rien pour paruenir, qu'ils
continuoient pour faire mander pour les
estats tous ceux qu'ils pensoient y pouoir
seruir, mesmes M. de Lyon, monsieur de
la Chastre, monsieur de Lisieux, monsieur
de Noyon, & autres de pareille qualité,
me priant de les aller voir, qu'il sçauoit que
i'estois trop constant pour me laisser sur-
mōter aux difficultez qui se presenteroient
en ceste affaire, que rien aussi ne l'empes-
cheroit d'y apporter tout ce que deuoit vn

homme de bien, iusques à sa vie propre, & qu'il desiroit tousiours se conduire à mon iugemēt plus que de tout autre. Ceste letre estoit escriite de Caudebec le 8. de May, laquelle estoit accompagnée encore d'un passeport, par où il me prioit prendre en bonne part sa responce; & croire des personnes qui faisoient des difficultez pour mieux disposer toutes choses à auoir bientôt la paix, qu'il en auoit depuis parlé à M. de Mayenne, mais nō avec tāt de loisir qu'il eust desiré pour l'occupation qu'il auoit, & qu'il estoit fort mal disposé, & cōtraint vouloir ou non, se retirer en quelque ville pour vn mois pour sa santé, qu'il ne perdoit le temps, qu'il estoit trauaillé tous les iours en cēt affaire avec ardeur, que i'essayasse seulement à faire espouser la religion Catholique à sa M. qu'il approuuoit ce cōseil cōme moy, & le iugeoit le plus certain remede: mais, où sa M. ne s'y accorderoit, à tout le moins qu'un de la maison se disposat à se ioindre à eux, & que M. le Card. de Gondy deuoit cependant auancer son voyage.

MONSIEVR, pour appointer vne querelle il faut que les parties narrent leur fait, dient leurs plaintes & raisons, & proposent libremēt leurs demādes, car il faut decouurir la playe qui la veut guarir, ie fus biē

ayse d'estre esclaircy par escrit, cōme ie fus par ladite lettre, de l'intention dudit Duc du Mayne tant sur le general que sur le particulier, pour donner quelque acheminement à ce traité, car c'estoit chose que ie n'auois encores peu gagner sur luy trois ans durāt que ie l'auois continuellement poursuiuy, d'autāt que le Duc auoit tousiours fait difficulté de s'ouurir, s'excusant sur ce qu'il en vouloit conferer avec les deputez des Prouinces & villes du party, ainsi que vous auez entendu par ce discours, toutesfois il faut que ie confesse que ie ne peus acheuer de lire ladite lettre sans soupirer, voyāt à quels termes la cōtinuation de la guerre auoit cōduit l'autorité Royale, & desolé ce Royaume: & m'auoit aussi en particulier reduit à malheur, me cōtraignāt pour bien faire au public de proposer des choses cōtraires, cōtre lesquelles ie soulois cy deuant me bander plus que nul autre, & vous assure que sur cela ie fus en doute si i'en aduertirois ledit sieur du Plessis, ou nō, craignāt qu'il prist en tres-mauuaise part, non seulement les demandes portees par lesdites depeschés, mais aussi que i'en fusse le parrain: neātmoins à la fin ie me resolus de cōmettre toutes choses à sa discretion & prudence, plustost que de faillir à lier ceste negotiatiō, cōsiderāt qu'un bon marché ne

se cōclud du premier coup, que les hōmes ne demeurent ordinaiemēt à vn mot : que pour en acheuer **■** il le faut cōmēcer, ioint qu'il me sembloit qu'ēcores que tout n'allast selon mon desir, i'auois toutesfois beaucoup gaigné d'auoir d'vn costé fait parler ledit Duc, & de l'autre engagé sa M. à rechercher les moyens de cōtenter le Pape, & partāt deuoir plustost descouurir que celer les difficultez afin de les surmonter, si ie pouuois, sans preparer, cōme à l'aduanture ie ferois si i'estois ainsi retenu, vne excuse de rupture aux vns ou aux autres, voire avec deux parties ensemblemēt, & à moy vn regret extrême d'auoir laissé eschapper ceste occasiō d'esleuer vn si bon œuure, ou du moins descouurir & faire cognoistre à vn chacun celuy qui y cōtrediroit, & à qui le blasme en deuroit estre dōné. Au moyē de quoy i'escris vn memoire contenant les principaux points de ladite lettre, que ie cōceus en rermes les plus doux dōt ie me peus aduifer, pour seulemēt dōner sentimēt audit sieur du Plessis de la responce que l'on m'auoit faicte, & des propositions que l'on faisoit, le priant d'en bien vser, & considerer qu'estant le Royaume si malade qu'il estoit, nō seulement il ne pouuoit estre guarý du premier coup, mais estre aussi necessaire.

que ceux qui vouloient y seruir auallassent doucement & sagement plusieurs mauuaises humeurs & amertumes, deuant que de surmonter cét humeur malin qui le troubloit; & partât qu'il n'eust pastant d'esgard à la consequence du remede qu'on proposoit, qu'au besoin extrême que le Royaume, & le Roy auoient de la paix. I'adressay ledit memoire audit sieur de Fleury pour la fiance que i'auois en luy, offrant d'aller encores trouuer ledit sieur du Plessis pour en cōferer avec luy plus particulièrement s'il iugeoit qu'il fust à propos, le suppliant aussi de tenir tout secret comme il m'auoit promis, s'il ne vouloit renuerfer entierement ceste negociation.

MAIS ledit sieur du Plessis se laissa tellement surprendre à ce chāgemēt, soit qu'il en eust esperé ou promis à sa M. tout autre chose, ou pour autre consideration, cōme les courtisans sont ordinairement suiects à diuers mouuemens, qu'estant sa M. arriuee comme ie croy à l'heure mesme, que cela luy fut dit à Buhy où il estoit, au lieu de temperer & adoucir les affaires, l'on m'escruiuit que d'abordee il auoit demãdé pardon au Roy en la presēce de plusieurs de sō cōseil, de la tresgrāde faute qu'il auoit fait d'auoir creu & esperé que la paix se feroit apres

auoir conferé avec moy; enquoy il cōfessoit s'estre grandement abusé, non par malice, mais par vn tres-ardent desir qu'il auoit eu de la paix, & d'y seruir sa M. que ie luy auois fait lire la responce que l'on m'auoit fait sur ce que nous auions deuât conferé, laquelle contenoit des demandes & conditions si honteuses pour sa M. si dommageables pour le Royaume, & si iniques en tout & par tout, que non seulement elles tesmoignoient que ledit Duc de Mayéne & les siens ne vouloient la paix, mais aussi estoit d'aduis que sa Majesté ne leur fit pas cest honneur de les ouyr, ny faire plus traicter avec eux, comme gens qui en estoient indignes, & qu'il estimoit estre engagé ailleurs, & partant ne faire parler de la paix que pour endormir sa Majesté, troubler ses bons seruiteurs & subiects, & donner ialousie aux Espagnols, pour en tirer plus d'argent, & amender leur marché avec eux. Sur cela on me manda, qu'il s'estoit mis à discourir & representer en la mesme compagnie tout ce qui s'estoit passé entre luy & moy, les lettres que ie luy auois faict voir, les ouuertures que ie luy auois faictes, & finalement tout ce que m'auoit escrit M. le President Ianin par sa derniere lettre, dont ie luy auois donné aduis, de façon que

l'on me dist que sa Majesté mesmes & ceux qui y estoient, demeurèrent quasi autant offencez de ces propos, que desdites demandes; en fin suiuant les enuies ordinaires de la Cour ie fus plutoſt blaſmé que loüé.

IE m'estois retiré à Pontoise, où l'on m'escruiſt ces choses, & que sa Majesté deſiroit parler à moy, & que i'eusse à me trouuer sur le chemin de Sélis quand elle iroit à Compiègne: l'on me donna aduis combien le bruiſt qu'auoit faiſt ledit ſieur du Pleſſis auoit changé les affaires, dont ie fus tres-marry, car ie n'attendois cela de luy, ce n'estoit pas aussi garder la foy du Roy qu'il m'auoit donnée, ny le moyen de guarir la playe, partant ie me reſolus d'aller droit à Alincourt, & chercher vn autre moyen de parler au Roy, qu'en la compagnie d'vn chacun, ſçachant que ledit Duc de Mayène ne le deſiroit, & qu'il ſeroit assez offeſé de ce que ce faiſt auoit eſté diuulgué par ledit ſieur du Pleſſis, d'ot ie ſçauois qu'il ſeroit bien-toſt aduertty: & d'autant que ſur la fiâce que i'auois dudit ſieur du Pleſſis, ie l'auois quasi aſſeuré que cela n'arriueroit point, ie m'attendois biē qu'il s'en prédroit à moy, & blaſmeroit ma credulité ou ma frâchiſe; car il m'auoit plus re-

commandé le secret en cette negotiation que tout autre chose, ce que ie iugeois de- uoir estre encore plus desiré de luy que ia- mais, par ce qu'il estoit demeuré à Roüen tres-malade, que ledit Duc de Parme & luy s'estoient separez tres-mal, contens l'un de l'autre, que l'on parloit d'aduancer M. de Guise à son preiudice, & d'oresnauant man- nier les affaires sans luy.

ESTANT arriué audit Alincourt, ie sçeus que sa Majesté estoit partie dudit Buhy vn iour plustost que l'on ne m'auoit mädé, par- tant ie ne le vis, mais i'enuoyay vers ledit sieur du Plessis qui estoit demeuré à Buhy pour sçauoir ce que i'auois à faire, luy man- dât que ie desirerois aller à Roüen voir M. de Mayene & luy rendre cõte de ce que i'a- uois negocié, & m'esclaircir de sa derniere volonte, cõme il me sēbloit qu'il estoit ne- cessaire, & en estois aussi sollicité dudit sieur Ianin. Le Roy ayant laissé à Gisors Mes- sieurs les Mareschaux de Biron & de Bouil- lon & M. d'O, lesquels auoient assisté aux cõ- tes que ledit sieur du Plessis auoit fait à sa M. de nostre negociatiõ, au moins les deux premiers avec quelques autres. Ils m'escri- uirent & prièrent de les aller voir, affin de conferer avec eux de ce qui concernoit le bien du public, dont ils me mandoient que sa Majesté auoit trouué bon qu'ils com-

muniquassent avec moy. Le leur fis réponse que ce me feroit hōneur de les voir pour recevoir le commandement, tant sur le bien public que pour leur particulier service, & particulièrement leur dire mon aduis sur les affaires qui se presentoyent s'ils le desiroyēt, mais que n'ayant aucun pouvoir de Monsieur de Mayenne ny d'autre d'en traiter, ny d'y servir; ie les suppliois de m'excuser de ce voyage, que ie ne pouvois entreprendre, que comme personne priuée: neantmoins m'en ayant fait vne recharge expresse i'y fus, esperant qu'ils m'ayderoyent peut-estre à r'abiller ce que ledit sieur du Plessis auoit gasté: toutesfois ie ne le voulus faire sans son aduis, affin de ne le mal contenter d'auantage, puis que sa Majesté m'auoit mis entre ses mains. Il vint à Alincourt, & allasmes ensemble iusques à Gisors, sans me dire toutesfois ce qui s'estoit passé audit Buihy, ne le desespoir qu'il auoit du succès des affaires, mais seulement qu'il eust esté bien ayse, que i'eusse veu sa Majesté, comme il estoit necessaire, que ie veisse lesdits Seigneurs Mareschaux, avec lesquels ie ne fis pas grand profit pour ce regard, car ils auoient leurs goults tant differens les vns des autres, que combien qu'ils protestassent vouloir la paix, chacun

la desiroit à sa mode. Je le vis à part affin d'apporter moins d'vmbrage : & comme ie scauois qu'on leur auoit communiqué tout ce que i'auois negocié, ie leur en fis vne briefue repetition, les exhortant & suppliât de fauoriser ce bon œuure, ny permettre qu'il fust estouffé à sa naissance : & comme ils estoient tous deux maistres passez en matieſe d'affaires & negociation, ne s'estonner, ny se rebuter des premieres difficultez, mais ayder à les surmonter, m'estât aduis que le Roy ne pouuoit faire vn mauuais marché, s'il pouuoit recouurer l'obeyſſance qui luy estoit deuë, mettre son Royaume en paix & en bannir les armes estrangeres : qu'il auoit tousiours desiré & demandé que Monsieur de Mayenne parlât & demâdast pour le public & pour son particulier ce qui luy faisoit besoin, disant par tout le vouloir contenter, qu'ils s'estoit en fin ouuert non sans peine que sa Majesté & eux en fissent donc leur profit, & ne laissassent tomber le fruiet que l'on auoit eu tant de peine à cultiuer, croyant s'ils le mesprisoient qu'ils languiroient apres, & peut estre inutilement. Tous blasmerent ce voyage de Rome, trouuant le circuit trop long : & comme ie leur disois que le moyen de l'accourcir estoit, que sa Ma,

jesté auançaſt donc ſon inſtruction , & conuerſion ; ils me reſpondirent que c'eſtoit vn œuure de Dieu , qu'il falloir que le ſainct Eſprit & le temps y miſſent la main : l'on vouloit que l'on traittaſt ſans attendre la volonté du Pape ny ladite conuerſion , & l'autre que ſa Maieſté allaſt à la Meſſe apres s'eſtre faiſt inſtruire , ſans s'arreſter à ſa Saincteté , & tous eſtoient ce me ſemble ialoux , de ce que ledit ſieur du Pleſſis auoit ſeul negocié ce faiſt. Je leur diſ que s'eſtois'abuſer, d'eſperer que Monſieur de Mayenne conclud aucun traitté avec le Roy qu'il ne fuſt Catholique, ou que le Pape n'y euſt mis la main , & ie voyois qu'ils ne me donnoient aucune aſſurance de la conuerſion de ſa Maieſté , ny autres paroles que generales pour preſenter à Monſieur de Mayenne , lequel i'auois delibéré de voir bien-toſt , que ie craignois que cela le refroidiroit de la paix , & le iettaſt en des irrefolutions faſcheuſes ; prenant leur ſilêce pour vn meſpris , & leurs remiſes pour manquement de bonne volonté , ce que ie ne pourrois empêcher puis qu'on ne m'en donnoit le moyen ; dont ie me deſchargeois entre leurs mains , les ſuppliant de le dire au Roy , & ſe ſouuenir du regret que i'en auois. En fin ils m'aſſurerent puis

qu'il en falloit passer par là, qu'ils auanceroient le voyage de Rome, & feroient tout ce qu'ils pourroient enuers sa Majesté pour faire contenter Monsieur de Mayenne comme ils cognoistroient estre tres-raisonnable. Rencontrant Monsieur d'O, & Monsieur de Beaulieu par la rue, ils me demanderent s'il estoit vray que ie fusse d'accord avec Monsieur du Plessis du poinct de la Religion, par ce qu'il auoit dit que cela estoit resolu & qu'il ne restoit plus qu'à pouruoir aux interests particuliers: ie leur respondis que si pour auoir le iugement & la decision de ce poinct du Pape, l'on vouloit dire que nous en fussions d'accord, qu'il estoit veritable. Car nous nous y estions soubmis comme à celuy que nous recognoissions pour nostre chef en l'Eglise, & croyons ne pouuoir errer, estant assiste de Dieu comme il estoit, mais qu'il n'y auoit point d'autre accord pour ce regard, & que c'estoit abuser du Roy & se mocquer du public de luy donner esperance de la paix que sa Majesté ne fust Catholique, & que ceste difficulté ne fust vuidée au gré & contentement de sa Sainteté, croyant que ce poinct resolu l'on viendroit apres à bout facilement des autres, & principalement des interests

particuliers. Car il faudroit que chacun se contentast de raison ; quiconque lors ne le feroit seroit en danger d'estre mal suiuy , ce que ie luy priay faire entendre ainsi clairement par tout où il seroit à propos , d'autant qu'ils affectionnoient le seruice du Roy , le bien & salut du Royaume. Estât de retour à Alincourt, ie receus vne lettre dudit President Ianin, en laquelle il me mandoit que Monsieur de Biron leur auoit faict dire par le sieur de Courbouson, que chacun se scandalisoit de ce que Monsieur du Mayne faisoit traicter avec ledit sieur du Plessis, & qu'il voyoit bien que la ialousie que lesdits sieurs auoient l'vn de l'autre seroit cause de diuulguer ; & partant trauerser & destruire en tout les affaires : car chacun commenceroit d'en descouurir, & des plus particuliers projects que i'auois traitez avec ledit sieur du Plessis, lequel mesme ils sçauoient l'auoir dit & escriit à plusieurs, & qu'en passant à Vernon il auoit asseuré Monsieur le Cardinal de Bourbon auoir conclud le marché avec moy. Et que le premier article estoit, que le Roy seroit reconnu à la charge de se faire instruire dedans six mois, sans donner autre asseurance de sa conuersion, de quoy mesmes les Catholiques seruiteurs de sa Majesté murmuroient.

muroient: que ie pēfasse à ce qu'en diroient ceux du party, & mesmes nos zelés, qui les premiers auoient faiēt prier Monsieur de Mayenne ne passer si legeremēt par dessus les articles, apres auoir tant trauaillé & faiēt pour asseurer la Religion, la cōseruation de laquelle ils cognoissoient dependre de la-dite conuersion de sa Majesté, mandant le-dit sieur Presidēt que M. de Mayenne estoit fort mal content & courroucé de ces bruis dont il me prioit l'esclaircir au plustost, & mesmes de l'aller trouuer, pour cet effect. Au mesme temps l'on m'escriuit de Paris; qu'un personnage de qualité, que ie ne nōmeray point, parce qu'il est viuant, auoit enuoyé dire par homme exprés à mes Dames de Nemours & de Guise, que ledit Duc de Mayenne traittoit sans parler de Messieurs leurs enfans, & mesmes au preiudice de Mōsieur de Nemours, & que i'en estois le ministre pour l'interest que i'y pretendois pour mon fils; affin qu'elles aduissassent & pourueussent à leurs affaires; dōt elles firent beau bruit, belles plaintes & reproches audit Duc, qui aggrauoient sa maladie, & me faisoient du tout desesperer du progres de cette negociatiō, laquelle estoit si nécessaire à tous, & toutesfois si trauersée de toutes parts, que j'ay souuent creu

que Dieu nous auoit iugez indignes de iouir de la paix en nos iours. Delà ie fus à Roüen où ie trouuay ledit Duc commençant à se mieux porter. Il me fist d'abordée tres grande plainte des aduis que l'on auoit donnez de ma negotiation contre la foy qui m'auoit esté donnée, à laquelle il s'estoit confié apres moy, dont ils s'estoit tres-mal trouué, & s'en repentoit, mais qu'il en feroit son proffit, & seroit cy apres plus retenu qu'il n'auoit esté. Le luy dis par le menu, comment i'auois negocié & m'estois conduit en toutes choses depuis le premier pas iusques au dernier, tant avec ledit sieur du Plessis, qu'avec les autres que i'auois veus : Et comme il eut reconnu que ie n'y pouuois apporter autre soin & deuoir que i'auois faict, & aussi que ie n'estois moins picqué desdits aduis & bruits que luy, d'autât que le mal qui en arriuoit passoit premierement par dessus moy, qui auois les reins vn peu foibles pour vn tel fardeau : ie le suppliy de faire à ce Royaume le bien qu'il auoit proposé, que nous ne scauions pas seulement de quelle boutique lesdits bruits & aduis estoient sortis, mais que cognoissant que les auteurs d'iceux craignoient plus la paix qu'ils ne vouloient que l'on les creust,

& qu'il en ſçauoit les raiſons mieux que nul autre, qu'il eſtoit certain qu'ils en auoient vſé ainſi par art exprés pour le deſpiter, & luy nuire, non tant pour les conſideratiōs particulieres comme pour la cauſe publique. Que ie n'auois veu le Roy pour parler & reſpondre particulièrement de ſon intention, mais eſtant Prince bien aduiſé, & qui vouloit ſortir d'affaires, ie l'oſois aſſeurer que non ſeulement il ſeroit marry & offenſé deſdits bruits pour les raiſōs publiques, mais auſſi pour le peu de ſoin qu'on auoit eu de ſa parole, & partant qu'il nous en feroit raiſō, qu'en fin il ne pouuoit eſtre blaſmé & reprins d'auoir deſiré la paix avec l'hōneur de Dieu, qui deuoit eſtre le but de ſes armes : & quād il ſeroit ſçeu qu'il auroit remis au iugemēt de ſa Saincteté le poinct de la Religion comme il auoit faiēt, chacū l'en loüeroit pluſtoſt que de l'en reprendre. Car quelle autre meilleure reſponſe pouuoit-il faire, quel moyen & plus court chemin pouuoit-il prendre pour ne faillir point; euſt-il du tout reſtēt la paix, & rebutté ceux qui luy en parloient? c'eſt eſté vn trop mauuais conſeil, qui euſt eſté plus accuſé d'ambitiō qu'attribué à zele de Religion, & duquel ſes amis & compartiſans euſēt peu eſtre plus affligez, que pluſieurs

n'estimoient, qu'il ne pouuoit trop iustifier ses actions & intentiōs, quoy qu'il pretendit faire, que c'estoit le moyen de releuer ses amis de peine, & les lier à sa fortune, & affoiblir ses ennemis, qu'il scauoit quelle estoit l'affection que les Espagnols luy portoient: car Monsieur le President Ianin l'en auoit esclairey au retour d'Espagne, le dessein qui auoit causé la mort du President Brisson l'en auoit confirmé, & depuis les comportemens dudit Duc de Parme en son endroit, l'ayant delaisé à Roüen quasi cōme vn homme perdu, dequoy ils eussent esté bien aises d'estre despeschez; que desia le Card. de Plaisance & les Partisans desdits Espagnols parloient ouuertement de preferer Monsieur son nepueu à luy, voire d'en faire vn Roy avec l'Infante à ses despēs, se reuestissant & couronnant de ses traux, sans auoir esgard à ses merites, dont ils faisoient peu de conte, parce que c'estoit leur honneur; c'est à dire, qu'il ne vouloit laisser vsurper l'estat qu'estât tel leur but, & luy si mal avec eux sans espoir d'y estre mieux qu'à la ruine de la Frâce, pourquoy se pouuoit-il arrester d'auantage à eux, pouuant avec honneur & vtilité tres-grande pour luy & pour les siēs conseruer la religiō & le Royaume en leur

entier, que le Roy auoit promis & estoit resolu d'enuoyer à Rome pour contenter le Pape au faict de la religion, que ce deuoir engendreroit sa conuersion ou sa ruïne, d'autant que manquant à celle-là, il estoit tres-certain que les Catholiques qui le seruiœt ne faudroient de l'abandonner, dont s'ensuiuroit sa ruïne à la gloire dudit Duc, lequel aussi auoit meilleure part que tous autres en sa conuersion, si elle aduenoit; de sorte qu'il ne pouuoit faillir d'attendre quel seroit le succeds de ceste recherche, afin d'en faire son profit, mais qu'il feroit encores mieux de son costé, s'il le fauorisoit à Rome, comme quelques fois il m'auoit fait escrire, par ledit sieur President, auoir volonté de faire: que ie l'estois venu trouuer expres pour apres auoir rendu conte de ma negociation, sçauoir la deliberation, & ce qu'il vouloit que ie fisse tant pour le public que pour son particulier, estimant que sa Majesté n'espargneroit chose aucune qui fust en sa puissance, & iugeast resonnable pour le contenter.

MONSIEUR, si l'on m'eust donné de quoy ce faire, i'en eusse paré ma remonstrance laquelle eust bien eu meilleure grace, & n'eust peut-estre esté inutile comme elle fut: mais ie ne pouuois sans mentir en

la desguisât sortir des termes généraux, puis que M. le President Ianin m'auoit escrit ne luy auoir osé parler des premieres ouuertures que j'auois faict audir sieur du Plessis, & qu'il ne m'auoit faict donner aucune charge ny responce sur les dernieres. Or comme il est Prince tres-aduisé, il prit party incontinent, & me dit, qu'il reconnoissoit bien que le Roy ou ses seruiteurs ne vouloient point la paix, & qu'ils n'en auoient parlé que pour les ruiner, s'estant seruy de sa franchise pour le diuiser d'avec les siens, luy faire perdre l'honneur & le credit : Car il ne se passoit iour qu'il ne receust quelque aduis de l'alarme qu'on leur auoit donnee de ma negotiariõ, & du mescontentement d'un chacun: mesme il m'en fit voir plusieurs lettres de ses patens, qui se plaignoient qu'il faisoit ses affaires non seulement sans eux, mais à leur dommage, que Monsieur le Legat l'en blasmoit, partant comme faisoient les ministres du Roy d'Espagne, & plus qu'eux tous autres les deputez venus des Prouinces à son mandement, lesquels disoient tout haut que c'estoit vrayement trahir la cause que de preuenir le iugement & la resolution de l'assemblée, estant à la veille de la faire, comme ils l'accusoient de faire, & que chacun

alloit bastissant sur cela des desseins à part, tous à ses despens, où ie n'estois pas aussi oublié : que ie sçauois toutesfois qu'il n'auoit point eu l'intention mauuaise, comme il vouloit aussi respondre de la mienne, qu'il auoit desiré & demandé d'estre assureur de la conuersion du Roy qu'il nommoit de Nauarre, & des moyens de conseruer la religion & le party, qu'au lieu de ladicte assurance l'on auoit proposé de remettre le tout au Pape, ce qu'il auoit approuué, croyant comme ie luy auois remonstré, qu'il ne deuoit estre blasmé, & qu'il ne pouuoit faillir en ce faisant : qu'en parlant de son particulier, il n'auoit oublié celuy de Messieurs ses parens, ny le cōtētement & interest du Roy d'Espagne, & des autres Princes qui l'auoient secouru, nō plus que de ses autres amis, desquels aussi il ne se vouloit separer quoy qu'il peust arriuer, ayant mieux manquer à foy-mesme & à ses enfās, qu'à l'obligation qu'il leur auoit, ny à vn seul poinct de deuoir enuers la religion & le public, que les ouuertes qui auoient esté faiçtes estoient aussi venuës de moy & non de luy, non pour faire tort à personne, mais pour sonder quel moyen il y auoit de composer les affaires, qu'il me remercioit de la peine que i'en

auois prise , & m'asseuroit n'auoir pour tous ces bruits changé d'intention , tant il desiroit seruir au repos du Royaume en conseruant & assurant la Religion & le party Catholique, mais qu'il ne pouuoit plus traicter ny conferer avec personne des moyens d'y paruenir qu'il ne sceut l'intention du Pape sur l'instruction & cōuersion de sa Majesté, & qu'il n'en eust communiqué avec ceux du party, lesquels il esperoit assembler bien tost, pour prendre avec eux vne resolution sur le general, pour apres nes'en departir iamais : qu'il me prioit de voir sa M. toutesfois le plus à propos & secrettement que ie pourrois, pour luy dire sa deliberation, & que c'estoit le trōper que de luy promettre la paix, ny que ceux de la ligue le recogneussent iamais, qu'il ne fust Catholique, reconcilié à l'Eglise, estāt certain que quand il se dispenseroit d'en vser autrement, il seroit suiuy de si peu de gens, que les miseres publiques augmenteroient plustost qu'elles ne finiroiēt: parrant sa Majesté deuoit penser à elle, sans se flatter, ny plus s'attendre, qu'autre peust remedier au mal qu'elle : qu'il approuuoit pour ceste cause que l'on enuoyast à Rome, que monsieur le Card. de Gondy print ceste peine, & que le Marquis de Pisani y fust employé,

que de son costé il y depescheroit & feroit ce qu'il deuoit, mais que la diligence estoit tres requise, afin d'estre esclaircy de l'intention de sa saincteté, à l'ouuerture de l'assemblée, qu'il estoit resolu dedans vn mois, ou deux, au plus tard, qu'il me prioit luy faire sçauoir aussi le plustost que ie pourrois la derniere volonté & responce de sa Majesté, touchant sa conuersion, pource que n'en estant asseuré, il falloit qu'il aduisast à prendre quelque autre party, les choses ne pouuant plus temporiser, ny subsister en l'estat qu'elles estoient, à cause du mescontentement que les Espagnols auoient de ce qu'il ne les assistoit en leur dessein, selon leur desir, des forces & moyens desquels il ne pouuoit se passer, partant qu'il les vouloit mesnager & conseruer avec ses autres amis, qu'il en sçauoit & auoit le moyé, graces à Dieu, sans plus donner barre sur luy à ses ennemis, comme il auoit faict se fiant en leur parole, & pensant bien faire.

IL me semble n'y auoir que repliquer à ceste responce, veu le tort qu'on luy auoit faict, & le peu de moyen qu'on m'auoit donné de le contéter en sa protestation, de vouloir continuer à seruir à la paix de tout son pouuoir, ioint que ledit Presidēt Ianin avec lequel i'auois conferé plus particulie-

rement, m'auoit dit qu'il estoit attaché à ce but, & qu'il n'y auoit plus de moyen de l'en faire departir, dont il accusoit les auteurs desdits bruits, & les enuies & ialousies de la Cour, en laquelle i'appris que l'on auoit plus blasmé & trauersé ma poursuite qu'en nul autre endroit.

L O R S aucuns mirent en ieu vne nouuelle pratique avec M. le Cardinal de Bourbõ, mais ledit Duc ne s'y vouloit engager non plus que l'autre, soit qu'il n'en eüst point d'enuie, comme certainement il n'auoit iamais eu, ou qu'il craignist d'offencer les Espagnols & ses parens, en ce faisant, autãt que s'il prestoit l'oreille à sa Maiesté; car ils estoient aussi contraires à l'un qu'à l'autre; où qu'il vouloit remettre toutes choses à ladite assemblée, comme pourroit bien témoigner M. le Comte de Brissac, & d'autres qui y estoient employez.

D E là ie reuins à Alincourt, en deliberatiõ de voir sa M. & m'acquitter de la charge que ledit Duc m'auoit donnée, dont i'aduertis ledit sieur du Plessis, lequel me fit parler à Gisors, ce fut de nuit, afin d'estre moins veu, toutesfois chacũ ne laissa de le sçauoir le lendemain, apres luy auoir rendu compte sommairement de tout ce que i'auois negocié avec ledit sieur du Plessis, &

des moyens que j'auois tenus pour renforcer ceste negotiation. le luy dis les plainres dudit Duc fondees sur les faux bruits & le manquement de sa parolle, sa resolution de ne plus traicter ny faire conferer avec luy & ses seruiteurs qu'il ne sceust la volôté du Pape sur son instruction & conuersion, & qu'il n'en eust cōmuniq̃ué avec ceux du party, qu'il m'auoit asseuré n'auoir toutes-fois changé d'intention de bien faire, & que ie croyois en verité qu'il m'estoit encores engagé avec les Espagnols, mais que i'estimois qu'il seroit contrainct de ce faire bien-tost, si sa Majesté ne contentoit le Pape pour sa religion en se reconciliant à l'Eglise: car ie reconnoissois qu'il estoit resolu de ne faire iamais accord avec elle qu'elle n'eust changé de religion, me l'ayant dit ouuertement afin de l'en aduertir; & dauantage qu'il ne pouuoit plus prolonger ny remettre sa resolution à vn autre temps, tant il estoit pressé d'vn chacun, & cognoissois aussi que le party en auoit besoing: partant ie suppliois sa Majesté d'y donner ordre sans plus promettre autre chose, quoy que d'autres luy fissent entendre que ledit Duc m'auoit donné charge de luy mander fidellement sa derniere volonté, & la

responce qu'il me feroit pour sur icelle ad-
 uiser à ses affaires, afin de ne demeurer en-
 tre deux felles, au moyen dequoy ie la sup-
 pliois de me la faire telle que ledit Duc
 n'eust occasion de boucler avec d'autres,
 comme ie sçauois qu'il en estoit sollicité,
 luy representant sur cela combien il luy
 importoit d'esteindre ce feu à quelque prix
 que ce fust, & là où elle ne le pourroit faire,
 que l'on recôneut au moins n'estre sa fau-
 te, comme plusieurs l'en accusoient à cause
 de sa religion; que si elle auoit à changer el-
 le ne deuoit attendre à ce faire que le par-
 ty tout ensemble eust engagé sa foy ail-
 leurs, cōme il estoit à la veille de ce faire, &
 seroient contraints d'accomplir sous pre-
 texte de la religion & par nécessité: que sa
 M. aduançast donc les voyages de Rome
 cōme elle auoit arresté, que si elle n'y met-
 toit la main elle mesme, ie preuoyois qu'ils
 seroient rompus ou retardez, par ce que ie
 verrois plusieurs Catholiques & Hugue-
 nots qui ne les approuueroient, & neant-
 moins ores qu'ils deussent estre inutiles ie
 les iugeois estre du tout necessaires pour
 acheminer les affaires, & apporter quelque
 esperance & consolation aux gens de bien
 qui desiroient la paix, & non la subuersion
 de l'estat qui estoit abboyé d'infinis, de part

& d'autre, que ledit Duc m'auoit promis d'y empescher de son costé & faire vn bon office, mais i'estimois qu'il attendoit de mes nouuelles deuant que de faire partir les gens pour selon cela leur commander ce qu'ils auroient à faire.

SA Majesté me dit le desplaisir qu'elle auoit desdits bruits, qu'il ne sçauoit à qui s'en prendre, mais qu'elle recognoissoit assez n'y auoir faute de gens aupres d'elle cōme ailleurs, qui craignoient autant la paix & la prosperité de ses affaires, qu'elle la desiroit, & que ceste faute n'estoit venuë d'elle & de son consentement, ny à son aduis de ceux qu'il y auoit employez, voulāt entendre ledit sieur du Pléllis, que puis que M. de Mayenne ne vouloit continuer à traiter que le Pape n'eust parlé, & qu'il n'en eust eu communiqué avec ses partisans, qu'elle feroit partir au plustost M. le Cardinal de Gondy, & le Marquis de Pisàny, & qu'il ne feroit rien obmis de sa part pour contenter le Pape & les Catholiques qui affectionnoient son instruction, ie creusse qu'elle y marchoit de tres-bon pied, non pour crainte de ses ennemis ou pour mieux faire ses affaires, mais pour le desir qu'elle auoit de contenter ses subjects, les deliurer de la guerre & mettre son ame en repos,

comme elle feroit paroistre par effect. Mais que ledit Duc deuoit prendre garde que l'assemblée qu'il pretendoit faire fust compoſee principalement de perſonnes de qualité & d'honneur; autrement elle preuoyoit qu'il s'y prendroit des reſolutions tres-perilleuſes pour le Royaume & pour luy-meſme, qu'il ſe vouloit contenter de m'en donner aduiſ, eſtimant que Monſieur de Mayenne en feroit aduertir, & qu'il y pouruoyroit comme choſe qui luy importoit autant ou plus qu'à nul autre: que chacun luy diſoit que ledit Duc eſtoit ſi engagé avec les Eſpagnols qu'il ne ſ'en pouoit plus ſeparer, que le Comte de Briſſac l'auoit dit à ſainct Luc, que le Legat le diſoit tout haut, & qu'il ſe mocquoit de tout ce que ie diſois & faiſois, toutesfois qu'il ne ſe vouloit arreſter à tout cela, conſiderant les raiſons qui le deuoient garder de ſe jeter à tel precipice: la candeur & franchise de laquelle elle recognoiſſoit maintenant que i'y procedois, dont elle auoit plus de contentement qu'elle n'auoit eu cy deuant, auſſi que le temps deſcouuriroit aſſez-toſt la tromperie ou dommage de celuy qui en feroit l'auteur, ſans qu'il fut beſoin d'aller au deuant, que ſi ledit ſieur de

Mayenne se vouloit accorder avec elle, il s'en trouueroit tres-bien : car il le contenteroit d'honneurs & de biens, plus qu'il n'en tireroit iamais d'autre, & mesmes desdits Espagnols, lesquels le hayssoiēt & deschiroient autant qu'ils pouuoient, encore qu'il fut meilleur capitaine qu'eux tous ensemble, & qu'il eust trop faict pour eux, qu'elle me prioit luy faire sçauoir sa responce & volōté, de crainte qu'il nes'engageast ailleurs, & que ie continuasse à y faire tous bons offices, comme i'auois cōmencé, me promettant de le recognoistre: En verité la Maiesté me tint ce lāgage d'vne telle franchise & de si bonne façon, que ie creus certainement qu'elle parloit selon son cœur, me faisāt paroistre qu'elle auoit non seulement gousté mes raisons, mais aussi qu'elle auoit volonté de contenter les Catholiques: dont ie partis tres-satisfait, me contentant de la laisser en ceste deliberation, & la supplier sur tout d'aduancer lesdits voyages de Rome, comme chose necessaire pour donner allegement aux affaires.

APRES cela ie suppliy la Majesté me donner vn passeport pour me retirer en ma maison, en attendant ladite assemblee, & le retour de Monsieur de Mayenne à

Paris, parce que ie ne voulois y aller, tant à cause desdits Espagnols qui y estoient, lesquels Monsieur de Mayenne m'auoit dit y auoir esté receus contre sa volonté, & qu'il en sçauoit tres-mauuais gré au Preuost des Marchands, Escheuins, & mesmes à Monsieur de Belin, lesquels il disoit s'estre laissez surprendre en cela par ceux qui fauorisoient lesdits Espagnols, contre ce qui leur auoit mandé par le sieur du Bourg, lequel il auoit enuoyé vers eux exprés pour cet effect, & parce que ie ne voulois estre subiect de rendre compte de ce que i'auois negocié à autre qu'audit Duc du Mayne, de quoy allant là il seroit impossible de m'exempter à cause des bruits qui y couroient de ma negotiation, qui augmenteroient bien d'auantage quand l'on sçauoit que i'aurois parlé à sa Majesté, dont ie ne doutois point que toute la ville ne fust bien tost abreuee, comme il aduint. Sa dite Majesté m'accorda ledit passe-port, mais elle me fit promettre que si ie cognoissois que ledit Duc n'eust volonté de traicter avec elle, en pouruoyant au poinct de la Religion, comme aucuns disoient, que ie l'en aduertirois, afin qu'elle ne s'y attédit plus, & qu'elle aduifast à contenter ses subiects & pouruoir par autre voye à ses affaires.

LE bruiſt de ma negotiation auoit tellement eſineu tout le monde, que Monsieur de Mayenne me mada auoir eſté contraint d'en donner aduis par tout, aſſeurant vn chacun qu'il ne traitteroit rien ſans l'auctorité du Pape, l'aduis des Princes ſouuerains qui aſſiſtoient le party, & de l'aſſemblée qu'il eſperoit tenir bien-toſt, comme celuy qui auoit eu pour viſee de ſes actions ſa conſcience, ſon honneur & l'vtilité publique, ſans laquelle & le ſalut commun de tous, il n'en vouloit point eſperer pour luy, n'en auoit iamais recherché à part, & n'en rechercheroit iamais ailleurs qu'avec tout le party, & m'enuoya vn double de la lettre pour en reſpondre.

Mes Dames de Mont-penſier & Guiſe m'enuoyerent auſſi Bremont ſecrétaire, exprés pour me dire, qu'en traittant les affaires de Monsieur de Mayenne i'euſſe ſoin auſſi de celles de Monsieur de Guiſe, & meſme de propoſer ſon mariage avec Madame ſœur du Roy, moyennant quoy elles eſperoient qu'il recognoiſtroit le Roy & le ſeruiroit tres-fidèlement. Je fis reſponce audit Bremont, que Monsieur de Mayenne n'alloit pas ſi viſte en beſongne que leſdittes Dames penſoient, que i'auois bien diſcouru avec aucuns ſeruiteurs de ſa

rance de sa conuersion , neantmoins ie luy voulus mander que i'estimois qu'elle estoit resoluë de donner contentement aux Catholiques , puis qu'elle vouloit que Monsieur le Cardinal de Gondy & Monsieur le Marquis de Pisany allassent à Rome esperant que l'un engendreroit l'autre , affin qu'il bastist sa resolution sur ce fondement, sans s'arrester ailleurs : Je luy escriuis aussi que sa Maiesté en fin prist en bonne part le delay de negotier , qu'il auoit demandé pour auoir loisir d'enuoyer à Rome & conferer avec ses Partisans en ladite assemblée , sans oublier le commandement que sa Maiesté m'auoit faict, qu'il prist garde de la composer , de façon , qu'il n'eust occasion de s'en repentir pour son particulier , & pour le public de l'auoir conuoquee pour les raisons qu'il luy auoit pleu me dire.

A LLANT en ma maison ie vis ledit Cardinal de Gondy à Noisy pour l'informer de tout ce que i'auois faict, & appris depuis nostre veuë tant avec sa Maiesté qu'avec M. de Mayenne, & le supplier de haster son voyage , luy remonstrant combien il estoit pressé à cause de laditte assemblée, que ledit Due pretendoit commencer dans vn mois ou deux au plus tard , & de l'enuoy

qu'il faisoit à Rome de M. l'Euesque de Lisieux & Desportes, lesquels ie desirois n'arriver là plustost que luy, encôres que l'on m'eust asseuré qu'ils n'y estoient enuoyez que pour soubz main secourir & fauoriser le bien. Le sieur Zamet se trouua lors à Noisi, qui fit pareil office enuers ledit Cardinal que moy. Ledit Cardinal nous fit voir les lettres qui venoient d'Italie: par là on luy donnoit occasion d'esperer vn bon succès de son voyage, dont ie fus tres-aise: car c'estoit ce que ie desirois le plus, & reconnoissois aussi pouuoir plus auancer nostre repos, d'autant que s'il plaisoit à sa Sainteté d'entreprendre & fauoriser la dite assemblee, s'estoit sans doute que personne ne pourroit l'empescher, tant chacun estoit desireux & disposé de l'embrasser.

Le Cardinal de Plaisance & les Espagnols ne pouuoient goustier aucunement lesdits voyages de Rome, lesquels ils blasmoient & trauersoient ouuertement. Je m'apperceus bien tost aussi qu'ils vouloiêr ramadoüier ledit Duc de Mayenne voyant qu'il cômençoit à se bien porter, peut-estre contre leur esperance, craignant qu'il s'engageast à traiter avec sa Maiesté deuant laditte assemblee, de laquelle ils se pro-

mettoient merueilles, de sorte qu'ils refuserent à Monsieur de Guise le commandement des forces que le Duc de Parme auoit laïſſees en Champagne encores que ce fuſt en ſon Gouuernement; que ledit Duc en fiſt grande inſtance durant l'abſence & indispoſition de Monsieur ſon Oncle; & qu'ils euſſent grande enuie de l'aduancer, & vouloient que le ſieur de Roſne y comâdaſt en qualité de Mareſchal de Camp de l'armee. Ils commencerent auſſi à mettre en auant ſoubs-main pluſieurs ſortes d'honneurs & aduantages qu'ils diſoient vouloir faire audit Duc du Mayne, afin de le retenir: voyla le fruit que produiſoient les bruits que l'on auoit ſemez de ma negotiation, qui ont plus nuy au public, que n'y ſeruiront iamais les auteurs d'iceux.

LEDIT Duc eſtant marry & ayant failly l'entrepriſe de Quillebœuf priſt le chemin de Picardie par la ville de Beauuais, & enuoya à Paris ledit Preſident Ianin, où ie me rendis incontinent à ſa priere, & ſur l'aduiſ qu'il me donna, que ledit Duc y deuoit arriuer bien-toſt apres.

IL me dit que Monsieur de Mayne vouloit voir Monsieur le Duc de Lorraine, & aſſembler tous ſes parens aupres de luy,

pour aduifer & refoudre ensemble cequ'ils feroient en ladite afsemblée, deuant que la commencer, comme il vouloit faire au pluftoft, tant pour l'efperance qu'il auoit qu'elle feroit tres-vtile au public, & pour contenter ledit Cardinal de Plaiſance, & les Miniſtres du Roy d'Eſpagne, qui l'en preſſoient extremement, afin d'eſtre reſolu & eſclaircy de ce que l'on vouloit faire pour le Roy.

On parloit lors de tenir laditte afſemblée à Soiffons ou à Reims pour la commodité du Duc de Parme, lequel s'y deuoit trouver; mais Monsieur de Mayenne fut conſeillé de la faire tenir à Paris, ſans auoir eſgard aux dangers des chemins, ny à la charré & incommodité des viures, tant pour contenter les habitans de la ville qui en faiſoient tres-grande inſtance, & par ce moyen les conſoler & tenir en deuoir, dõt ils auoient beſoin, pour rendre laditte afſemblée plus libre, & ne hazarder laditte ville de Soiffons ou Reims. Car l'on conſideroit que ledit Duc de Parme y venant accompagné ſelon ſa couſtume, pouoit ſ'en faire maistre, & meſme tiendrait l'afſemblée en ſubiection, ce qui luy ſeroit difficile de faire en ladite ville de Paris, tant pour ſa grandeur que pour eſtre plus eſloi-

gnée de la Frontiere, & enuironnée de villes & places du party de sa Maiesté, remplies de forces & garnisons, desquelles en vn besoin l'on pouuoit estre assisté pour empescher vne violence; ioint que ladite ville de Paris estoit plus disposée au bien qu'elle n'auoit encore esté, combien que les zelez y continuaissent leurs ieux accoustumez sous la protection & faueur des garnisons Espagnolles, car le reste de la ville estoit las d'eux & de la guerre: ce fut ledit President Ianin qui fut autheur de ce Conseil pour les raisons susdites, & pour auoir recogneu que la presence dudit Duc en laditte ville y estoit necessaire pour la seureté d'icelle, à cause des diuers mescontentemens dont elle estoit agitée, les vns fondez sur la trop longue continuation de la guerre, & les autres sur ce que l'on n'espéroit assez tost vn Roy à leur poste.

Ce Conseil fut incontinent embrassé dudit Duc du Mayne, au grand déplaisir des Espagnols, qui vouloient nommément ladite assemblée estre tenue en lieu, où ils peussent estre fauorisez de l'armée qu'ils faisoient venir; & croy que si ledit Duc de Parme, lequel mourut en ce temps eust vécu, qu'il n'eust permis le changement que les autres ministres dudit Roy n'eurent

apres sa mort pouuoir d'empescher, ioint qu'ils furent persuadez par leurs partisans de ladite ville de Paris, lesquels comme ils n'ont iamais eu faute de presumption, cuidoient aussi estre assez forts pour tourner ladite assemblée à leur volôté & troubler laditte ville, mais ils s'y sont trompez comme en plusieurs autres choses, & tiens tres asseuré que ce coup fut donné tres à propos pour le salut du Royaume. Car si ladite assemblée eust esté tenuë ailleurs, l'on eust gourmandé les gens de bien, & tiens pour certain que l'on eust faict ceste Royauté, qui nous eust rendus irreconciliables pour iamais, & du moins lescdits estrangers se fussent rendus maistres de la ville où elle eust esté tenuë.

I e demeuray à Paris vn mois ou six semaines attendant la resolution: car ie la recognoissois d'importance, comme i'ay dit, & repris apres le chemin de ma maison, où i'entendis que nostre S. Pere auoit mandé à Monsieur le Cardinal de Gondy, & audit Marquis de Pisany, de n'aller à Rome, que Desportés auoit entierement trauersé leurs voyages contre l'esperance, voire l'assurance, que l'on m'auoit premierement donnée, puis moy audit Cardinal. Que le Cardinal de Pelleué venoit

en ladite assemblée pour y presider comme Archeuesque de Reims & Cardinal, plein de fiel & de haine contre la maison de France, & que de toutes parts l'on y faisoit venir des gens qui preschoient la guerre, & qu'il falloit promptement créer vn Roy au gré du Roy d'Espagne, que ledit Roy y enuoyoit aussi le Duc de Feria accompagné d'vn Docteur, exprés pour débattre nostre loy Salique, & nous demander la Couronne pour leur Infante. Qu'il faisoit entrer en mesme temps en ce Royaume vne armee nouuelle pour fauoriser ses partisans & ses desseins; lesquels estoient pour cet effect affectiōnez du Cardinal de Plaisance au nom de sa Saincteté, & que de toutes parts l'on faisoit des menées aux villes, & enuers les Princes de la maison de Lorraine pour faire vn effort à l'ouuerture de ladite assemblée, au contentement dudit Roy d'Espagne: de quoy ie fus tres-marry, cognoissant que le secours de Rome nous māquoit en ceste occasion, & que tant de ressorts estoient bādez contre le Roy, que les gens de bien auoient prou d'affaires à souffrir, & ne sçauoient en ceste perplexité quel conseil prendre pour y remedier, ioint qu'il ne nous apparaissoit encores aucuns signes de la conuersion de

sa Majesté. Je cognoissois bien que le general du Royaume estoit las de la guerre, que le nōbre de ceux qui desiroient la paix croissoit tous les iours, qu'il seroit tres-difficile faire goustier & recevoir aux Francois vne domination estrangere: qu'il ne seroit pas plus facile d'accorder lesdicts Princes au choix d'un de leur maison pour souuerain, ny de les faire departir de leurs esperances en faueur d'un Prince de la maison de France Catholique: Toutesfois comme sa Maiesté de son costé ne s'aydoit point, mais estoit soubs main blasmee & trauersée d'aucuns qui la suiuoient, en fin ie m'aduisay pour ne nous laisser du tout aller aux torrens de ceste confusion, de proposer & moyenner, que les Catholiques seruiteurs de sa Maiesté recherchassent ceux de ladite assemblée à l'ouuerture d'icelle, d'une confiance, pour ensemble aduiser aux moyens plus propres pour conseruer la Religion Catholique & le Royaume, esperant que non seulement elle seroit approuuee de part & d'autre, comme chose qui ne pouuoit estre iustement blasmee ny refusee, mais aussi qu'elle pourroit engendrer des effects qui nous deliureroient de ce peril, dont ie donnay aduis au sieur de Fleury mon beau-frere, afin

qu'il fit sçauoir à M. le Duc de Neuers, ou à tel autre qu'il aduiferoit estre à propos auprès sa M. que nous defaillant le secours du Pape, il ne nous restoit autre moyen de nous garantir que cestuy-cy, lequel fut incontinent & certes tres-soigneusement & soudainement embrassé & mesmes fondé tres à propos sur la declaration que fit publier lors M. le Duc de Mayenne, par laquelle il sembloit qu'il conuiast luy-mesme lesdits Catholiques à vne generale révnion pour mesmes effects. Sur cela i'aduançay mon acheminement à Paris expres pour en conferer avec M. de Lyon qui y estoit arriué, & ledit sieur President Ianin, lesquels à l'aborder approuuerent les aduis, & mesmes me prierent de faire exhorter lesdicts Catholiques d'en vser, comme i'escriuis soudain audit sieur de Fleury.

Je me trouuay à l'ouuerture de ladite assemblée expres pour fauoriser les conseils des gens de bien, & m'opposer aux autres, & fus appelé au cōseil quand la lettre & proposition desdits Catholiques fut faite pour obtenir laditte conference qui fut receüe, ouuerte & leuë desdits Cardinaux de Plaisance & de Pelleuë, & avec eux Dom Diego d'Ibarra Ministre du Roy d'Espagne, deux Prelats estrangers de la suite dudit Cardinal

de Plaifance, Messieurs de Lyon, de Rofne, de Belin, de Tauannes, Ianin, & quelques autres du cōseil dudit Duc, qui estoit au liēt malade: soudain apres la lecture faite par ledit President Ianin, ledit Cardinal de Plaifance se leua, & sans aucune consultation & deliberatiō, dit en cholere que ceste proposition estoit pleine d'heresie, forrāt de mains heretiques, & que ce seroit heresie d'y auoir esgard, & s'y arrester, partant qu'il falloit la regler & plustost faire punir celuy qui l'auoit apportee que d'y faire responce; ce qui fut approuuē dudit Cardinal de Pelleuē & grādement louē dudit Dom Diego: toutesfois sur ce qu'il fut remonstrē que ladite lettre ne s'adressoit pas seulement à M. de Mayenne, mais aussi à tous ceux de ladite assemblee, partant il falloit aduiser si l'on la leur cōmuniqueroit ou non deuant que de la rejeter, d'autant que le trompette d'icelle auoit dit à la porte de ladite ville qu'il estoit chargé d'un escrit de la part des Catholiques qui estoient aupres du Roy, adressant à ladite assemblee, de sorte que chacun en estoit desia abreuuē: Il estoit à craindre que les deputez se mescontentassent, si à l'ouuerture de ladite assemblee qui deuoit estre libre, l'on leur celoit vne telle chose, & qu'elle fust

supprimee sans leur communiquer: il fut aussi arresté que chacun y pëseroit & qu'il en seroit delibéré le lendemain, où encores que le Cardinal de Plaisance eust r'enforcé la partie de quelques-vns qui auoient concerté leurs opinions avec luy deuant que de venir-là, & fait prouision d'arguments pour fortifier la sienne: toutesfois il fut resolu que ledit escrit seroit apporté en laditte assemblée: ce que Monsieur de Mayenne fauorisa, & croy que sans luy il fust passé autrement, tant ceste ouuerture desplaisoit aux estrangers, & à leurs adherens. Je ne puis vous représenter les contestations & disputes que ceste proposition engendra en laditte assemblée; parce que ie n'y fus point, à cause des brigues & partialitez dont elle estoit ja remplie, lesquelles estoient ordinairement accompagnées de reproches, aigreur, & violences insupportables à vn esprit nourry au Conseil de nos Roys, comme i'ay eu l'honneur d'estre; ledit Cardinal de Plaisance qui y vouloit plustost regenter que presider, m'ayant quelques iours deuant commencé à attaquer, parce que ie m'opposois à vn certain serment qu'il vouloit que laditte assemblée fit à l'entree d'icelle, par lequel on s'obligeoit de ne faire iamais paix ny trai-

été avec le Roy de Nauarre, les fauteurs & adherens, lequel n'eust point de lieu, pour ce que ledit Duc sur la plainte & remonstrance qui luy fut faicte de la cōsequence d'iceluy l'empescha; ioint que l'on auoit commencé à en distraire & bannir ceux qui n'estoient du corps des trois ordres, contre l'ordre avec lequel l'on auoit premierement arresté de former & tenir ladite assemblee, & sur lequel les gens de bien s'y estoient embarquez: Car il auoit esté resolu que Messieurs du Parlement & des Comptes, & ceux du Conseil dudit Duc, ensemble les Princes, ceux qu'ils appelloient officiers de la Couronne, & les gouverneurs des Prouinces y assisteroient, & que chacun corps feroit sa voix à part, outre celle des deputez qui prenoient le nom des Estats, composez desdits trois ordres; ce qui auoit esté composé ainsi expres pour contrepoiser les voix de ceux-cy, lesquels estoient pour la pluspart factieux, necessiteux, & ennemis du repos public, affamez du bien d'autrui, sans experience ou iugement aux affaires publiques, esleus & venus expres pour fauoriser les desseins desdicts Espagnols: toutesfois ils auoient tant de pouuoir qu'apres auoir fait renuerfer la deputacion des Ecclesiastiques de Paris cōtre

les formes ordinaires, ils auoient aussi commencé d'exclure de ladite assemblée lesdites compagnies, du moins rendu leur assistance inutile, parce que leurs voix n'estoient plus comptées. Dauantage l'on ne donnoit loisir aux particuliers d'opiner, ie dis à ceux desdites compagnies que l'on vouloit assuiettir à suiure les opinions des grands, de sorte qu'un homme de bien ne se pouuoit contenter ny seruir au public; aussi tout dependoit plus du bon plaisir & vouloir dudit Duc de Mayenne; encore qu'il fust souuent trauersé de quelques-vns plus que de tout le demeurant: partant ie me contentay de faire en son endroit pour faire approuuer la proposition desdits Catholiques, l'office que ie deuois à ma patrie & au public.

Mais comme l'on estoit sur ceste deliberation M. de Mayenne partit de la ville de Paris pour aller receuoir l'armée que conduisoit le Comte Charles de Mansfeld, & pareillement le Duc de Feria avec son Docteur nommé Dom Inigo de Mendoza, & le susdit Iean Baptiste de Tassis, tous deputez pour le Roy d'Espagne pour venir en ladite assemblée, laquelle ledit Duc de Mayenne pria deuant que de partir ne deliberer des principaux affaires iusques à son

retour, lequel il promettoit, estre brief, remonstrât qu'il falloit attendre les Ambassadeurs de sa M. Catholique. M. de Guise son nepueu, & plusieurs autres personna- ges de qualité & deputez des prouinces qui estoient encores en chemin, deuant que de mettre en auât le poinct, pour lequel principalement ladite assemblee auoit esté conuoquee, qui estoit de l'eslection & choix d'un Roy, comme chose qui importoit à tous & qui requeroit un cōsentement vniuersel de tous ceux du party, & nommément dudit Roy d'Espagne, sans l'ayde duquel cōme le party ne s'estoit iusques alors maintenu, il estoit encores impossible de se defendre à l'aduenir, ni faire ladite election sans luy: à quoy il adiousta qu'il estoit necessaire aussi d'aller receuoir leur armee & l'employer à son arriuee, qu'elle estoit forte & gaillarde pour faire quelque bel exploit, qui fauorisast les vœux de ladite assemblee, laquelle en fin il ayma mieux laisser là, que de laisser prendre à un autre le commandement de ladite armee, avec laquelle venant à faire quelque chose de remarque, il esperoit aussi s'en rendre plus recommandable; ioint qu'il n'estoit sans ialousie, que M. son nepueu prist ceste place sous pretexte de son absence.

LEDIT

LE DIT Duc m'assura auant que partir que ladite conference auroit lieu, donna charge à ses amis de la fauoriser & faire approuuer en ladite assemblée, non à mon aduis qu'il pensast qu'il en deust succeder ce qu'il aduint, mais parce qu'il n'estoit content du Cardinal de Plaisance, ny des Espagnols, lesquels monstroient plus de faueur à son nepueu qu'à luy, & auoient des desseins contraires aux siens: il vouloit auoir plusieurs cordes en son arc pour se faire respecter & s'en seruir au besoin, estimant qu'il luy seroit facile de rendre ladite conference inutile, toutes les fois qu'il voudroit. Neantmoins ie croy qu'après son partement elle eust esté renuersee, si Messieurs de Lyon & Ianin ne s'y fussent viuement employez, avec les gens de bien qui estoient encores en ladiète assemblée: Car ledit Cardinal de Pelleué ne la pouuoit gouster, & lesdits Espagnols avec leurs partisans y contredisoient ouuertement, & les Cours souueraines n'y estoient appellez qu'à la discretion d'aucuns, & quand elles y alloient leurs voix estoient debattuës. Mais à la fin ledit Cardinal de Plaisance se laissa persuader sur ce que l'on luy remonstra que ladite conference ne pouuoit estre reiettee sans faire murmurer

la noblesse & le tiers estat qui la desiroient & affectionnoient, comme ceux qui estoient las de guerre, ne goustoient volontiers le dessein desdits Espagnols & se persuadoient de pouuoir par ceste conference gaigner vn grand aduantage pour la religion & leur soulagement, d'autant qu'elle estoit demandee par les Catholiques du party contraire, afin d'aduiser avec eux au moyen de conseruer la religion & le Royaume, dont ils esperoient qu'il aduiendrait ou que le Roy de Nauarre seroit contraint d'obeyr à l'Eglise, ou que lesdits Catholiques l'abandonneroient. De sorte que si maintenant l'on venoit à les priuer de ceste esperance en reietrans d'autorité leurs aduis & moyens, il seroit à craindre qu'ils fissent pis, attribuant ce refus à ambition plustost qu'à zele de religion, comme plusieurs publioient desia sur les difficultez que l'on y faisoit, dont on le taxoit plus que nul autre. Mais que si l'on vouloit leur laisser esprouuer ce remede, il leur reussiroit tout autrement, qu'ils n'esperoient, car ils seroient par iceluy rendus plus capables d'en embrasser apres vne autre, pourueu que l'on n'employast en ladite conference quelques personnes de la fidelité desquelles l'on fust bien assure au party, comme

il estoit facile de faire ; Car il n'y auoit aucune apparence que le Roy fust pour quitter sa religion , estant bien aduertý qu'il n'auoit consentý l'ouuerture de laditte conference que pour contenter & amuser lesdits Catholiques , au nom desquels elle auoit esté proposée ; & allentir aussi la resolution de nostre assemblee , faisant desia dire sous main audit Duc de Mayenne qu'il la falloit reietter & empescher , comme chose qui en fin leur estoit à tous deux plus desaduantageuse que autrement : qu'il y auoit peu d'apparence d'esperer que lesdits Catholiques quittassent le Roy par le moyen de ladite conference , refusant sa conuersion : car premierement il n'y employeroit que gens qui seroient du tout à sa deuotion , lesquels ne rapporteroient de ladite conference autre chose que ce qu'il leur commanderoit. Secondement comme les deputez de nostre dite assemblee n'auoient charge de promouoir ladite conuersion , mais seroient plustost aduertis sous main de se monstrier esloignez d'en faire compte , ils estimeroient que les autres se garderoient bien de la proposer , & quand ils feroient autrement , il y auoit tousiours moyen de la faire esuanoüir , & s'en demesler , en r'enuoyant le

tout au Pape au sainct siege, de la volonté & des commâdemens duquel il protestoir mourir plustost que de se departir. Tiercement, cependant l'armee estrâgere approcheroit & feroit quelque effect qui releueroit les courages & l'esperance des peuples, intimideroit les Politiques, & fortifieroit les Zelez, que le Duc de Feria viendroit aussi avec sa suite, lequel avec les propositions qu'il deuoit faire au nom de ce grand Roy, & les moyens que l'on disoit qu'il auoit, rendroit toutes choses plus aisees & faciles qu'elles n'estoient; en fin que l'on pouuoit se conduire en laditte conference de façon que le party en seroit plustost fortifié qu'affoibly. Ce sont les raisons auxquelles le Legat se laissa vaincre: Ioint qu'il craignoit d'en estre blasmé à Rome, & tenu en France pour estre du tout Espagnol, comme il sçauoit que plusieurs desia le depeignoient, dont il estoit marry; parce que cela rendoit sa conduite si suspecte, que l'autorité de nostre S. Pere avec laquelle il agissoit, en estoit moins respectée.

LE Roy fit en ce temps-là vn voyage à Tours qui luy fut tres-preiudiciable, car il donna loisir à ses ennemis de prendre la ville de Noyon, qui fut lors attaquee par

ledit Duc du Mayne & le Comte Charles, & fut contraint de leuer le siege de deuant Selles en Berry avec peu de reputation, & certes tres-mal à propos, sur l'enfournement de cette assemblee de Paris : or il deuoit se monstrier plus puissant que iamais, pour renuerfer les menees desdits estrangers : cela ioint aux defauteurs que le Cardinal de Gondy & le Marquis de Pisany retenoient de sa Saincteté, haussioient grandement les cœurs ausdits estrangers & à leurs adhe-rens, lesquels estoient encores fortifiez non seulement de la diuision & mauuaise intelligence que l'on scauoit estre entré les Princes de la maison de Lorraine, lesquels en leur assemblee & conference de Reims, s'estoient plustost diuisez & trompez, que resolus & accordez, mais aussi de certaines recherches & petites menees qu'aucuns du party de sa Maiesté faisoient parmy nous. D'auantage la mort du Duc de Parme, ores qu'elle eust affoibly le party d'un grand chef de guerre, auoit toutesfois tellement remis Monsieur de Mayenne en goust desdits Espagnols, que chacun s'aperceuoit qu'il vouloit se r'apatrier avec eux, esperant que le Roy d'Espagne apres la perte d'un tel Capitaine & seruiteur se relascheroit de ses premiers desseins, les-

quels ne pouuoient estre conduits par les autres ministres avec telle autorité que par l'autre ; ou bien qu'il n'y auroit plus de difficulté qu'il n'eust cy apres la principale & entiere charge des forces & deniers que ledit Roy enuoyroit en France , avec quoy il pourroit faire tellemēt les affaires, que s'il n'obtenoit le premier lieu, il s'establiroit si bien au second, que celuy qui seroit esleu Roy ne le seroit en effet plus qu'à luy. Toutesfois comme ledit Duc ne peut, ou voulut se resoudre de quitter du tout les esperances de l'un, dont il s'estoit tousiours repeu pour s'attacher à l'autre, rencontrant à Soissons ledit Duc de Feria, accompagné dudit Docteur & de Ieā Baptiste de Tassis, ils traiterent avec luy comme à celuy duquel ils ne se pouuoient bonnement fier, & luy avec eux comme personne qui estoit irresoluë de ce qu'elle deuoit faire : de façon qu'il eut beaucoup de peine d'en tirer de l'argent, & fut contraint de leur promettre des choses qu'il ne leur obserua, ainsi qu'ils ont publié depuis.

Je m'estois retiré à Pontoise apres le parlement de Paris de M. de Mayenne, attendant la resolution de ladite conference & le retour dudit Duc, me recognoissant inutile en ladite ville de Paris en son absence,

LE Roy reuint trop tard pour secourir Noyon, mais aussi ladite armee estrangere se desist en ce siege, de façon qu'elle ne peut rien entreprendre depuis, dont les Parisiens se plaignoient grandement, par ce qu'ils n'en receurent aucun soulagement, comme on leur auoit promis, & à son arri- uée elle eust esté employee plus près d'eux, dequoy ils accusoient ledit Duc, dont Don Diego d'Ibarra & les Zelez faisoient grand bruit, comme s'il l'eust empesché exprés, pour tenir tousiours ladite ville en necessité, luy faire de plus en plus detester la guerre & la desesperer du secours d'Espagne: toutefois il est certain que ce fut le sieur de Rosne qui fut cause plus que nul autre que ladite armee fut employee contre ladite ville de Noyon, laquelle il auoit failly à sur- prendre quelques iours deuant, & la vou- loit auoir pour sa retraicte: i'estime aussi que ledit Comte Charles ne se sentant trop fort, fut bien ayse d'estre arresté sur la frontiere sans s'engager plus auant dans le Royaume.

LADITE conference arrestee de part & d'autre, Monsieur, vous fustes mandé en vostre maison par le Roy, pour y seruir, cer- res au grand contentement des gens de bié des deux partis, pour vne probité & ex-

perieće aux affaires, non moins recogneuë & desirée d'un chacun, que necessaire en cette tourmente & confusion publique.

D E S L O R S aussi nous commençâmes non seulement à mieux esperer des affaires, mais aussi à y voir vn meilleur acheminement que deuant: car comme vous eustes ioint la prudence à la force, ce qui n'auoit encores esté pratiqué, la raison surmonta bien-tost la passion, & fut le voile leué qui couuroit les artifices & desguisemens, avec lesquels le public & les particuliers auoient esté abusez de part & d'autre iusques alors, à quoy si on eust pourueu plus-tost, nos maux n'eussent pas tant duré. La conference fut commencée sur la fin du mois d'Auril, & cette premiere petite tréue aux enuirs de Paris accordée deuant le retour dudit Duc de Mayenne qui n'en fut pas content, soit qu'on se fust plus aduancé, ou que l'on eust plus entrepris qu'il ne desiroit, ou que la ioye qu'il trouua qu'en demenoient les Parisiens luy apportast quelque crainte & apprehension de l'aduenir.

I e ne fus comme vous sçavez à l'ouuerture de ladite conference, parce que ie ne fus compris au premier nombre des deputez, pour lesquels on auoit demandé

passerport encores que l'on m'eust mandé que ledit Duc de Mayenne m'auoit nommé & escrit de m'y trouuer de sa part : mais M. de Belin y fut employé à la place que l'on m'auoit ordonnée, par l'aduis d'aucuns, que pour mon absence il fut iugé à propos d'en vser ainsi, & pour cōplaire aussi aucunement ausdits Espagnols & Zelez, lesquels ne m'y desiroient pas ; car i'estois trop decouuert d'eux : toutesfois i'y fus adiousté du depuis, mais ayant recogneu qu'on se vouloit seruir de ladite conference, plus pour abuser le monde que pour biē faire au public, ie voulus attendre le retour à Paris de M. de Mayenne deuant que d'y retourner pour me ioindre aux Conseils des gens de bien auprès de luy, sans aller en ladite conference, cognoissant, comme i'ay dit que l'on n'y marchoit de bon pied.

MONSIEVR, vous sçauetz mieux que personne quelle en a esté la conduite, & ce qui s'est passé, partant il ne m'appartient d'en parler deuant vous, ie diray seulement que la patience dont sa Maiesté vsa en icelle par vostre aduis & des gens de bien qu'elle y employa durant & depuis le siege de Dreux, fut cause d'un grand bien, car chacun commença à louer sa bonté & à reco-

gnoistre & detester la foiblesse, la presumption & l'impudence desdits Espagnols, mesmes quand ils s'opposerent à la trefue proposee au nō de sa Maïesté, par le moyen de laquelle l'on eust sauué ladicte ville de Dreux, qu'ils ne peurent secourir faute de forces: mais ils aymerent mieux boire cette honte, que d'appreuer ou tollerer ladicte trefue, tant ils craignoient qu'elle engendrast la paix, voyant le peu de cōte que l'on auoit fait de leurs propositions, & que ledit Duc de Mayenne ne les assistoit en leurs pretétions comme ils desiroiēt; ioint qu'ils esperoïēt suiuant leurs premiers cōseils nous persuader & auoir plustost par necessité que par raison, tant ils se défioient de nous & d'eux mesmes, & cognoissoient mal nostre naturel François.

NEANTMOINS ils furent si mal auisés & temeraires, qu'ils ne laisserent de faire proposer & deduire en pleine assemblee les droits & pretentions de leur Infante sur ce Royaume, & demander la couronne pour elle & l'Archiduc Ernest les mariant ensemble; dont aussi ils furent moquez & blasmez d'un chacun, mesmes repris d'aucuns qui leur auoient esté affectionnez, voyant contre leur esperance qu'ils

nous vouloiet faire violer nos loix , & rendre nos maux eternels pour cōtenter leur ambition , & se garantir à nos despens sous pretexte de pieté , encores estant fables, hays & mesprizez comme ils estoient, & nous pressez & desesperez comme nous estions , tout ainsi que s'ils eussent eu à faire à gens perdus & sans sentiment , & memoire des belles & pretieuses protestatiōs qu'ils nous auoient faictes du commencement de la guerre, que leur Roy ne prerendoit rien en ce Royaume , & qu'il ne nous assistoit que par zele de religion , & pour empescher le regne d'un Heretique sur un peuple si Chrestien qu'estoit celuy de la France. Ce qui leur fut depuis reproché assez à propos en yne assemblee particuliere par un Prelat qui les auoit tousiours creus à leur parolle, leur disant qu'ils auoient par cet acte descouuert leur turpitude, dequoy ils furent plus scandalisez que dissuadez.

TOUTESFOIS voyant que nos oreilles Françoises ne pouuoient entendre ceste domination du tout estrangere , ils offrirent peu apres qu'elisant leur Infante Roynne ils la mariroient à un Prince François , en y comprenant ceux de la maison de Lorraine , au choix de leur Roy , lequel ils rendirent apres en secret

à Monsieur le Cardinal de Lorraine ou à M. le Duc le Guise, cuidant par ce moyen nous faire franchir le sault qu'ils desiroiēt. Cecy fut receu diuersement, & vous assure que s'ils eussent esté aussi ruzex, qu'ils pensoient estre, la beste estoit prise, car l'on leur offroit sur cette ouuerture d'ellire dès à present en ladite assemblée ladite Infante Roynne, coniointement & solidairement avec le Prince susdit, que sa Maiesté Catholique choisiroit pour l'espouser; à condition toutesfois que la declaration & publication seroit surmise iusques à ce que ledit mariage fust accomply: & pource qu'ils remonstrent, qu'ils ne vouloient que ladite Infante pour sa dignité partist d'Espagne deuant laditte declaration. L'on adiousta que laditte assemblée dès à present despecheroit ou donneroit pouuoir à M. de Mayenne de deputer certains Ambassadeurs ou procureurs qui passeroient en Espagne avec le Prince, que ledit Roy d'Espagne choisiroit pour gendre pour y faire manifester laditte declaratiō, & recognoissance, au nom de tous, en contractant & effectuant ledit mariage, mais ils reiectoient ledit offre comme indigne de la Maiesté de leur Roy, & de l'obligation que le party luy auoit.

I E m'estois rencontré par hazard en vne
 compagnie particuliere où cecy auoit esté
 proposé, que i'auois contredit tant que i'a-
 uois peu, non que i'eusse opinion que ledit
 Roy d'Espagne fust pour iamais marier sa
 fille à vn desdits Princes, mais pour ce
 qu'on vouloit que ladite assemblée fist dès
 à present ladite eslection, & donast sa pro-
 curatiō pour ce faire, cōsiderant que quād
 laditte resolution auroit esté passée enco-
 res qu'elles fust conditionnee, toutesfois
 qu'il seroit apres facile d'en oster ou chan-
 ger la cōditiō, & de la faire obseruer sous
 pretexte du bien public; partant que ladi-
 te Infante iouïroit seule de laditte esle-
 ction sans faire ledit mariage: car quand la-
 ditte assemblée seroit separee apres auoir
 déterminé cette eslection, personne ne
 pourroit deffendre l'execution conforme
 au decret d'icelle, & si elle nous auroit ren-
 dus irreconciliables à iamais avec le Roy
 & les Princes du sang: neantmoins ma re-
 monstrance fut inutile, car non seulement
 il fut arresté que l'on feroit ladite proposi-
 tion aux Ambassadeurs dudit Roy, mais
 aussi que l'on n'en diroit rien en ladite as-
 semblée generale qu'apres leur respon-
 se: dont ie fus si scādalisé, qu'à l'heure mes-
 me ie prins congé dudit Duc de Mayen-

ne , luy disant ne vouloir demeurer en lieu où l'on fit si bon marché de l'honneur & des loix de nostre nation, & de tout le Royaume ensemble à la ruïne de nostre religion.

LA ville estoit en grande crainte & rumeur de tous ces traictez , voyant qu'ils estoient escoutez & fauorisez des grands, ce qu'il n'estoit permis à personne d'y contredire : le Parlement plus que tous autres s'en alteroit & esmouuoit dauantage, quelques vns sollicitoient Monsieur de Mayenne de prester l'oreille à vne pratique qui se faisoit soubs le nom de Monseigneur de Bourbõ; combien que i'estime qu'il en fust ignorant, avec lequel ils le conseilloyent de traicter pour se deliurer desdits Espagnols, lesquels vouloient preferer tout le monde à luy, & n'estre contrainct aussi de composer avec sa Maiesté, estant de contraire religion, d'autant qu'il ne pouuoit plus maintenir le party sans Roy : l'on luy disoit que ledit Cardinal seroit suiuy des Catholiques qui seruoient le Roy, que plusieurs villes du party de sa Maiesté en feroient de mesmes, & qu'il asseureroit mieux & plus honorablement sa fortune avec luy qu'avec tous les autres. Cecy passa si auant que l'on escriuit & fit on signer des articles au-

dit Duc, qui furent baillez à vn personnage d'honneur pour en estre porteur audit sieur Cardinal, ie ne fus employé en ceste negotiation ; toutesfois elle me fut communiquée, & me sembloit que ledit Duc y entroit mal volontiers, mais aucuns esperoient qu'à la fin il s'y resoudroit & que chacun en feroit de mesmes, iusques aux Espagnols ; ie n'estois de leur aduis, ains preuoys que ledit Cardinal feroit tropé : dont me plaignant à vn de ceux à qui ce traicté auroit esté descouuert, il me dit que soit que l'on abusast ou non ledit Cardinal, il falloit mettre peine de le retirer, parce que l'on affoibliroit d'autant le Roy de Nauarre & troubleroit-on ses affaires, dequoy ie ne me peus garder de me plaindre & mesme en dire mon aduis à vn gentil-homme seruiteur dudit Card. qui oyant parler de ce traicté s'estoit adressé à moy, & m'auoit cōuié de ce faire en hōme de bien. Je veux croire que ledit sieur Cardinal, comme i'ay creu, ignoroit cette pratique ; mais il est certain que ceux qui se disoient ses seruiteurs qui la poursuiuoient, ne voyoient goutte aux affaires ny aux volonteiz de M. de Mayēne & des autres Princees du party : celuy auquel lesdits articles furent confiez, ne fut pas si tost party de Paris que ledit Duc se

repentit de la charge qu'il luy auoit donnee, & l'enuoya prier d'en differer l'exécution, de sorte que bien luy prist de ne s'y estre ingeré legerement, ce qu'il fit par prudence & conseil, car il eust esté responsable du mal qui en fust arriué s'il s'y fust embarqué, dont il eut eu grand regret, car il y alloit à la bonne foy : mais les mescontentemens publics que lesdits Espagnols reconnoissoient qu'on auoit d'eux, avec l'aduis qu'ils eurent du traicté susdit qui se brasloit avec ledit Cardinal, furent cause qu'ils declarerent, apres auoit refusé l'offre cy deuant dit, qu'il leur auoit esté fait, que le Roy d'Espagne marieroit plustost & sacrifieroit sa fille avec M. de Guise pour le bien de la Religion, que de manquer à vn seul point de son deuoir pour ce regard, pourueu que dés à present elle fust elleuë Royne & luy avec elle Roy de France, esperant par ceste proposition qui estoit tres-advantageuse & honorable à la maison de Lorraine, non seulement assoupir lesdits mescontentemens & traictez cōtraires à leur dessein, mais aussi obtenir facilement la dite eslection de laditte assemblee : Et veritablemēt plusieurs d'abordée s'en resiouyrent, cuidant auoir ville gaignee & que c'estoit chose qui deuoit estre embrassée d'vn chacun

chacun. A quoy tels se laisserent aller qui auparavant n'auoient fait cas de toutes les ouuertures & promesses desdits Espagnols, transportez d'affection enuers ledict Duc de Guise. Cecy estonna M. de Mayenne, soit qu'il creust que lesdits Espagnols vouloient tromper Monsieur son nepueu & le party, ou qu'il n'eust pas enuie qu'il fust preferé à luy : sur cela il fust conseillé de demander ausdits Espagnols quel pouuoir ils auoient de leur Roy de faire ladite proposition, & de la dire, s'ils l'auoient & le monstroient qu'il y cōsentiroit, & s'assemblerent pour cela en la maison du Cardinal de Plaisance, où celuy de Pelleuë se trouua avec les Ministres dudit Roy d'Espagne & quelques autres, & luy firent voir vn endroit de leurs instructions qui faisoit mention de ladite ouuerture par forme d'alternative, soit que ladite alternative y eust esté adioustee par eux exprés; ou nō, mais il aduint que ce qu'ils esperoient leur donner gain de cause les en esloigna plus que deuant, & accreut leur honte : Car ledit Duc de Mayene par ialousie ou autrement s'opposa lors ouuertement à ladite election, mesmes avec alteration: le Parlement s'aduança aussi de dōner vn Arrest contre icelle, qui fut tres-magnanime & de grāde effi-

cace enuers vn chacun, l'assemblée mesmes en fut plus diuisee & troublee que deuant: car plusieurs creurent que ce party auoit esté mis en auant par lesdicts Espagnols pour esbloüir la cōpagnie & la conduire cōme insensiblement à l'election de ladite Infante, & par cōséquent à la ruine de l'Estat, sous l'allechement dudit mariage, lequel ils ne pouuoient croire que le Roy d'Espagne eust aucune enuie de ce faire, pour les raisons qui y contredisoient. Ledit Duc plus que nul autre soustenoit cette opinion, demandoit d'estre mieux assuré dudit mariage deuant qu'il fust procedé à ladite election, voir aussi les forces & deniers nécessaires pour la soustenir, & pareillement qu'il fust procedé à la recōpense de ses peines & traux, qu'il faisoit valoir; & comme ledit Duc auoit plus de credit en ladite assemblée que tous autres, & que son opinion estoit plausible, il accoisa facilement cest resolution assisté des Politiques, au grand regret des zelez & des seruiteurs dudit Duc de Guise, lequel neantmoins se monstra en ceste occasion plus sage & temperé que son aage & le subiect ne le permettoient, dont il fut grandement loüé & estimé: lesdicts Espagnols creurent que ledit Duc de Mayenne auoit poussé le

Parlement à donner leur Arrest: mais cela n'estoit point, car ladite Cour auoit prins ce conseil d'elle mesme, meüe de son honneur & deuoir, comme gens qui aymoient mieux perdre la vie que manquer à l'un & à l'autre en ceste occasion, en conuiuant au renuersement des loix du Royaume, dont par leur institution ils sont protecteurs, & à ce faire obligez par les sermens de leurs receptions, apres aussi par l'accueil que receut Monsieur le President le Maistre, & ceux qui l'assistoient dudit Duc de Mayenne, & ceux qui l'accompagnoient quand il luy porta ledit Arrest, & fit la remonstrance de la Cour qu'il n'y auoit consenty, & s'entendoit tres-mal avec icelle, dõt ceste action fut d'autant plus loüee que le peril en estoit plus grand, & certainement elle seruit grandement: & faut que ie die que le Royaume en demeure obligé à ladite Cour.

Cette varieté & diuersité de demandes & propositions desdits estrangers faictes si à coup, offensa plusieurs personnes, descouurit leur ambition avec leur foiblesse & impudence, ce qui les redit encorer plus mesprizez que deuant, chacun croyant qu'ils n'auoient mis en auant Monsieur de Guise, que pour faire eslire plus facilement leur Infant, diuiser nos chefs, perpetuer nos mi-

feres sous pretexte de pieté; l'on trouuoit sur tout estrange qu'ils eussent entrepris ce fait mal garni de forces, d'argent & de réputation, comme ils estoient : car lors leur armée s'estoit retirée & mutinée par faute d'argent, le Roy venoit de prendre Dreux à leur barbe, & n'auoient dequoy donner à viure à personne, ils viuoient eux mesmes tres-mécaniquement ; de sorte que tels qui estoient venus disposez de les fauoriser & seruir en payant, les maudissoient voyant qu'il n'y auoit rien à gagner avec eux : toutesfois ils estoient si impudens, ou nous tenoient pour si sots & stupides, qu'ils s'offensoient & disoient s'esmerueiller dequoy nous refusions & faisions doute seulement de sacrifier à leurs fumées, nos consciences, nos libertez & nos biens.

Et comme nous estions en ces perplexitez, Dieu ayant compassion de la France & de nous, voulut toucher le cœur du Roy de la cognoissance de nostre Religion, qui estoit le seul remede à nos maux qui nous restoit. Ceste nouuelle fut receüe de ceux qui sans passion desiroient la conseruation de la Religion & du Royaume, avec autant d'allegresse que si l'on leur eust donné la vie, & comme naturellement nous dou-

rons de ce que nous desirons, iusques à ce que nous voyons l'effect reüssir, chacun discouroit de ce changement, entre l'esperance & la crainte, non sans émotion & alteration, mais diuersement: les Estrangers & leurs adherens faisoient prouision de moyens pour descrier & trauerfer yne si sainte & loüable resolution, blasmant couuertement ceux qui s'en resiouissoient, & s'efforçoient de faire desgouter mesmes sa Maiesté, laquelle n'ayant legerement & à demy pris ce party, se rendit à saint Denys, où elle fut admise & receüe en l'Eglise par les Prelats & Docteurs assemblez pour cet effect, avec les ceremonies & solemnitez qui y furent gardees, où vous estiez pour en parler mieux que nul autre. Et comme apres tant de Deelarations & protestations que Monsieur le Duc de Mayenne & plusieurs du party auoient faictes & publiques de recognoistre sa Maiesté apres sa conuersion, rien ne pouuoit plus nous excuser de ce faire, si nous ne voulions estre tenus pour meschans & ennemis de nostre patrie, & de nostre Religion. Ceux qui craignoient ceste recognoissance, mirent en auant qu'il estoit necessaire de consulter avec le Pape de ce faict, & que sa Maiesté receut l'absolution des mains

mesmes de sa Saincteté pour rendre sa con-
uersion vailable, ne l'osans-ouuertement
reietter du tout. Et combien que plusieurs
souponnerent, voire creurent que ceste
difficulté de remise au Pape, auoit esté pro-
posée autant pour empescher l'effect de ce
bon œuure, que pour le rendre entier &
parfaict: toutesfois comme chacun creut
aussi que sa Maiesté n'auoit point franchy
ce fait, pour apres refuser ce deuoir & res-
pect enuers sa Saincteté & le sainct Siege,
l'on embrassa ce Conseil qui fut aussi tost
approuué & bien receu de sa Maiesté & de
ses seruiteurs avec grande prudence &
franchise, au grand contentement des gens
de bien.

Partant il fut aduisé de faire vne cessa-
tion d'armes pour trois mois, durant la-
quelle on enuoyroit vers sa Saincteté de
part & d'autre pour sçauoir son intention,
ie fus mandé & employé en ce traicté avec
vous, Monsieur, & les autres Seigneurs
qui y furent deputez, où sa Maiesté fit
bien paroistre qu'elle desiroit à bon escient
arrester le cours des miseres publiques, car
elle traicta quasi du pair en toutes choses
avec ledict Duc de Mayenne, sans auoir es-
gard à sa dignité ny à son autorité, com-
me l'on a veu par les articles qui furent ac-

cordez & publiez; ce qui fut blasmé d'aucuns, qui ont depuis esté cogneus par les euuenemens auenus, & que sa Maiesté auoit esté tres-bien conseillée. C'est grande prudence aussi de ceder quelquefois au temps & aux occasions qui se presentent, car par ce moyen l'on éuite souuent de grands perils, lesquels passez l'on recouure apres facilement, voire au double, ce que l'on y a mis. Si sa Maiesté eust voulu s'opiniastrer & ne traicter avec ledit Duc du Mayne que comme avec son subiect, iamais il n'eust accordé la trefue, quoy aduenant l'assemblée de Paris ne se fust separée sans traicter avec lesdits Espagnols & faire vne Royauté: Car le party ne pouuoit plus soustenir la guerre sans faire l'vn ou l'autre, ce qui eust perpetué nos miseres, & eust à l'adventure osté le moyen & la commodité à ceux qui ont depuis recogneu sa Maiesté de ce faire, car personne n'auoit encores bien concerté ceste deliberation & execution, & si peut-estre que plusieurs eussent creu n'estre iuste ny honorable de ce faire, si la guerre eust tousiours duré, mesmement estant recongneuë saditte Maiesté estre seule cause du refus de laditte trefue pour sa particuliere consideration: Car tout le peuple luy eust imputé le mal'heur

public & eust excusé sur la necessité tout ce que ledit Duc eust fait pour se defendre au contraire de ce qui est aduenü. Car pour auoir sa Maiesté si franchement & librement accordé ladite trefue & la prolongation d'icelle, & ledit Duc refusé de traicter la paix durant icelle avec sa Maiesté, elle a tellement iustificié ses intentions & ledit Duc cōdamné les siennes, qu'elle a acquis & luy perdu plus de seruiteurs & de villes en trois mois qu'ils n'eussent peut-estre en dix ans, tant la iustice & le droit ont de puissance sur les hommes, spécialement apres que les maux les ont fait sages.

Depuis ladicte cessation d'armes ie me suis trouué avec vous aux deux assemblees & conferences qui ont esté faictes à Andresy, & à Milly, pour aduiser aux moyens de pacifier le Røyaume, comme de part & d'autre nous disions auoir volenté de faire, où vous sçauiez qu'il auoit esté proposé, debattu, & comme accordé plusieurs poincts & articles concernans le general & le particulier, qui nous donnoient esperance d'un meilleur succeds que celuy qui s'en est ensuiuy, & croy certainement que s'il nous eust esté permis de conclure & parfaire le marché que nous l'eussions faict lors tres-aduantageux pour la

religion, voire pour ceux de la Ligue, tant vous nous faisiez paroistre sadite Maiesté estre disposée d'accorder pour ce regard tout ce qu'honnestement l'on pouuoit desirer d'elle, dont ie ne diray les particularitez, car vous les sçauiez comme moy, & me semble aussi qu'il suffit d'en parler en termes generaux. Mais comme il fut dit & arresté qu'il falloit attendre la volonté du Pape deuant que passer outre, il fut aussi resolu & promis que chacun feroit son deuoir enuers sa Saincteté en faueur de la paix publique: pour moy ie l'entendois & croyois ainsi, parce que ie cognoissois que c'estoit nostre deuoir, le bien & aduantage de tous.

Que ledit Duc de Mayenne m'auoit asseuré que c'estoit son but, qu'il me sembloit qu'il auoit trop maltraicté les Espagnols pour s'attendre plus à eux, & que Monsieur le President Ianin estoit employé à cette negotiation, qui estoit celuy de tous ses seruiteurs & amis auquel il se fioit le plus, & qui cognoissoit mieux aussi l'interieur de son cœur, comme ie dis audit Duc, quand il me pria d'aller à Androsy; & partant que ie ne voulois prendre autre asseurance de son intention, allant en cette commission que la cōpagnie dudit Presidēt,

avec lequel il ne falloit craindre que ie fusse desaduoué, comme i'auois esté auparavant; ioint qu'il me sembloit, qu'il estoit trop aduisé & bien conseillé pour laisser perdre à cette fois l'occasion & les moyens qu'il auoit de s'accommoder avec sa Maiesté, comme ie luy auois souuent dit de sa part, & par son expres commandement qu'il feroit si tost qu'elle seroit Catholique; luy remonstrant qu'en ce faisant il assureroit grandement nostre religion, qu'il ne fortifiroit pas moins le party Catholique, iustifieroit ses armes & les nostres, nous deliureroit de la tyrannie des estrangers, qui auoient iuré sa ruine & la nostre, acquereroit vne gloire immortelle, obligeroit à luy non seulement la France, mais aussi toute la Chrestienté qui gemissoit avec nous de nos miseres.

Qu'il demeureroit en ce faisant chef non seulement de ceux de son party, mais avec le temps des autres Catholiques qui auoient suiuy sa Maiesté, pour à l'aduenir accourir à luy & se r'allier au premier effort que l'on entreprendroit contre la religion, comme ceux qui attribuoient à sa conduite & à ses armes l'honneur & le gré de la conseruation d'icelle, & mesmes de la conuersion de sadite Maiesté, qu'il ne

deuoit craindre d'auoir faute d'autorité & de seurété tandis qu'il y auoit des Huguenots en ce Royaume, à cause de l'enuie & inimitié que leurs portoient les Catholiques, lesquels seroient plus vnis en paix qu'en guerre, d'autant que le besoin qu'ils auoient en icelle les vns des autres les faisoient viure & compatir ensemble, cequ'ils feroient difficilement sans cela : de sorte que lesdits Catholiques auroient soing de luy & de sa grandeur comme de leur protecteur : bref, qu'il retiendrait les villes du party à sa deuotion & ses amis interessés à sa conseruation s'il leur procuroit ladite paix, sans laquelle ie n'estimois pas qu'il les peust longuement conseruer apres la conuersion de sa Maiesté, tant chacun estoit las de la guerre, & mal edifié des Espagnols; qu'il ne deuoit point douter aussi que le Pape & le Roy d'Espagne n'eussent soin de luy apres ladite paix autant & plus que deuant. Car comme il auroit moins de besoin d'eux, il en seroit plus estimé & recherché, comme il se pratique ordinairement entre les Roys & Princes, lesquels n'affectiōnent que ce qui leur est necessaire, & mesprisent ordinairement ceux qui ne se peuuent passer d'eux, qu'ils trauerseroiēt & empescheroiēt ladite paix de tout

leur pouuoir deuant qu'elle fust concludë. Mais quand elle seroit vne fois accordee & publiee s'ils ne l'approuuoient soudain, ie m'asseurois qu'ils ne s'y opposeroient ouuertement, & qu'avec le temps ils s'y accommoderoient: car ce que la passion empesche pour vn temps est en fin emporté par la raison & l'vtilité, soit que sa Saincteté s'opposast à l'vnion de toute la France & que le Roy d'Espagne se voulust charger d'une telle querelle sur la fin de ses iours, espuysé d'hommes & d'argent comme il estoit. Je ne pouuois, & me sembloit aussi qu'il ne deuoit croire l'un ne l'autre, le premier estant obligé comme pere commun d'auoir trop de soin de ce Royaume très-Chrestien pour n'en desirer le repos avec la cōseruation de la religion: & l'autre trop mal voulu en iceluy avec ses ministres pour esperer à l'aduenir d'y faire ses affaires, mesmement apres ladicte paix, mais quand ils en vseroient autrement, que l'experience apprendroit bien tost à l'un, & la necessité à l'autre, qu'ils auroient pris vn tres-mauuais & perilleux conseil pour la religion Catholique & leurs propres Estats, comme pour toute la republique Chrestienne. Que tous Messieurs ses parens s'attacheroient aussi à sa fortune de bonne vo-

lonté ou par necessité. Car cōme ils le veroient accompagné & suiuy en cette resolution, ainsi qu'il seroit indubitablement des principales villes du party & des gouverneurs d'icelles, ils se garderoient bien de demeurer derriere, ny de perdre cette occasiō de pouruoir aūec luy à leur seureté & à leurs affaires, que ie ne sçauois pas quel aduantage on luy feroit, car c'estoit chose de laquelle il n'auoit encores esté parlé, mais que ie ne doutois point qu'on ne luy accordast en hōneurs, en charges & dignité, & en argent, pour luy & pour les siens, tout ce qu'honnestement il pouuoit desirer & demander, & que le tout ne se fist au gré d'vn chacun de part & d'autre, tant seroit grand & estimé son merite enuers le public moyennant ladite paix. Que ie luy conseilloyis bien de se contenter plustost de mediocrité, que de se surcharger d'ēuie, parce que l'vne estoit plus seure que l'autre; qu'il auoit des enfans qu'il aymeroit, à la fortune desquels il deuoit penser, cōme de la sienne: Ioint que i'auois toute ma vie remarqué que ceux qui auoient voulu precipiter la leur l'auoient plustost reculee qu'auancee, chaque fruit voulant estre cueilly en sa saison pour estre de bonne garde. Qu'il ne m'appartenoit de luy re-

presenter l'Estat du Royaume ny celuy de la Cour, parce qu'il en estoit à mon aduis mieux informé de l'un & de l'autre que ie n'estois; mais qu'il me sēbloit luy pouuoir & deuoir dire en conscience, que s'il l'espluchoit & bien consideroit, il trouueroit plustost matiere d'esperer que de craindre à l'aduenir. Partant, i'estois seulement d'aduis qu'il eust soin de conseruer sa reputation, maintenir les Catholiques, mesnager ses vieux amis, en acquerir d'autres, bien allier ses enfans, faire prouision d'argent, & se tenir loing de la Cour apres auoir faict ladite paix, asseuré ce faisant d'estre à l'aduenir plus recherché, vtile & necessaire que iamais, sans d'auantage s'opiniastrer à poursuiure par les armes vn dessein pour s'aggrandir, qui estoit plus imaginaire que bien fondé, au peril de la Religion, du Royaume, de sa reputation, de ses amis, de sa vie, & de ses enfans, blasmé, enuié, & trauersé d'un chacun dedans & dehors la France iusques à ses propres parens, plein d'iniustice & d'impossibilitez de luy esprouuees, & encores mieux recogneu de tous, croyant si cette fois il ne s'en departtoit que chacun l'abandonneroit pour traiter sans luy avec le Roy, ou

avec celuy d'Espagne, dont plusieurs estoient desia recherchés, & à mon aduis res-
solus, cognoissans n'y auoir plus de salut
enuers luy, estant mal comme il estoit a-
uec les Espagnols, & sans resolution de
ce qu'il auoit à faire enuers sa Majesté:
que s'estoit bien faict de rendre au Pa-
pe le respect qu'il auoit proposé, deuant
que de conclurre tout à faict à ladicte
paix, & la publier; mais qu'il ne deuoit
pas laisser cependant de la faire esbau-
cher, de façon qu'il n'y eust plus rien à
redire tant pour le general que pour le par-
ticulier, quand il receuroit l'intention de
sa Saincteté, laquelle embrasseroit bien
plustost le party de nostre repos, quand el-
le scauroit auoir esté pourueu à la seureté
de nostre religion par aduis commun des
Catholiques, que quand on seremettroit
à sa Saincteté, d'autant qu'elle feroit diffi-
culté, & peut-estre conscience de se char-
ger de ce soin & d'une telle enuie, mesmes
estant tenuë de court par les Espagnols
comme elle estoit: Ioint que sa Sain-
cteté ne pouuoit iuger ny cognoistre si
bien que nous ce qui estoit necessaire
de faire pour ce regard, pour estre loing de
nous, & luy auoir tousiours esté la ve-
rité des choses desguisee: que la reuerence

que l'on portoit en ce Royaume à sa Sainteté & au saint Siege, estoit grande, mais qu'il estoit certain que tel bien ne feroit desormais assez fort pour maintenir le party en vnion contre les efforts de la necessité, & le degoustement que l'on auoit desdits Espagnols, mesmement si sa Sainteté mesprisoit l'obeïssance & submission de sa Majesté, comme aucuns osoient desia dire qu'elle feroit; estant certain que ceux qui s'attacheroient à ce pretexte pour faire durer la guerre sans auoir egard à la conuersion de sa Maïesté, en feroient mauuais marchands, d'autant que la longueur & rigueur de nos maux nous auoient ouuert les yeux & rendus plus sensibles que nous n'estions au commencement de la guerre, que transportez de zele ou de passion nous croyons en paroles, & pouuoir mieux conseruer la religion & asseurer nos fortunes par la guerre que par la paix. Partant ie le suppliois & conseillois de l'embrasser viuement, & s'y conduire de façon, que si Dieu nous vouloit tant punir qu'elle ne se fit, que chacun sceust & cognust au moins n'auoir tenu à luy, affin de n'attirer sur luy le blasme, la haine & malediction publique, que ne pouuoient eüiter ceux qui l'empeschoient.

IL fit demonstration de prendre en bonne part ma remonstrance, m'assura qu'il desiroit la paix de cœur & d'affection, qu'il ne tiendrait à luy qu'elle ne fust faite, cognoissant que c'estoit encores le meilleur moyen de tous ceux qui se presentoient pour conseruer la religion & assseurer sa fortune, à cause de la foiblesse & mauuaise conduite desdits Espagnols, avec lesquels il me disoit ne pouuoir plus compatir, & principalement avec Dom Diego d'Ibarra qui estoit insupportable, mais qu'il falloit conduire & manier les choses dignement, affin de contenter le Pape, & que le Roy d'Espagne & ses amis dedans & dehors le Royaume n'eussent occasiõ de se plaindre de nous, apres auoir employé pour le party ce qu'ils auoient mis; & aussi qu'il estimoit ce poinct estre des moins importants pour assseurer la religion & sa fortune, & que le salut public dependoit principalement de l'vnion & bonne intelligence du party avec sa Sainteté & ledit Roy d'Espagne, laquelle il ne pouoit conseruer s'il concludoit ce traité sans eux; partant qu'il enuoiroit vers eux gens expres pour cet effect, & qu'il ne cesseroit de poursuiure ce bon œuvre qu'il ne fust resolu. Que ce seroit aussi le bien du

E c

Royaume comme celuy de la Religion & de toute la Chrestienté, que la paix fust faicte generale pour donner relasche à la France, & moyen aux Princes Chrestiens de s'opposer aux armées du Turc, dont la Chrestienté estoit menacée; ioint qu'il ne pouuoit croire que le Pape approuuast la paix en France pour reietter la guerre sur le Roy d'Espagne, qu'il respectoit & craignoit par trop, tant pour le pouuoir qu'il auoit en Italie, que pource qu'il le tenoit pour le plus seur appuy & protecteur de nostre religion & du saint Siege, contre ledit Turc & les heretiques; au moyen dequoy il ne pouuoit se separer du Roy d'Espagne sans offencer sa Sainteté, ny la mal contenter sans manquer à son deuoir, & peut-estre diuiser le party, & rendre inutile & honteux l'accord qu'il feroit, chose qu'il vouloit éuiter au peril de sa vie: Mais qu'il esperoit que chacun s'accommoderoit à l'vtilité publique, à quoy le Roy de Nauarre pouuoit plus ayder que personne, en contentant sa Sainteté, & luy donnant occasion d'approuuer sa conuersion, qui estoit le poinct auquel il falloit principalement trauailler & pourueoir, comme il me prioit de faire entendre aux deputez de sa Majesté en

ceste conference, protestant qu'il y procederoit de bonne foy, & en homme de bien, & qu'il ne me donneroit la peine d'y aller ny à Monsieur de Bassompierre, ny à monsieur le President Ianin, s'il n'auoit enuie de bien faire.

LADITE conference d'Andresy engendra celle de Milly, comme i'ay dit, nous discourusmes assez franchement & rondement des moyens de faire la paix, & contenter ceux qui y pouuoient seruir, toutesfois sans rié accorder ny resoudre, parce que nous n'auions charge ny pouuoir de ce faire, voulans par ce discours nous attendre à la volonté du Pape, enuers lequel chacun promettoit faire son deuoir. M. de Belin se trouua en ceste derniere assemblée au lieu de Monsieur de Bassompierre qui s'é estoit allé en Lorraine: l'on pourueut du mieux que l'on peut aux plaintes & cōtrauentions de la trefue qui auoit esté bien receuë & embrassée du general du Royaume, mais estoit mal obseruee des Gouverneurs des villes & prouinces, & des gens de guerre, trop accoustumez à leur profit & au pillage, de sorte que le pauvre peuple en fut plus oppressé que soulagé, il fut parlé en ceste derniere assemblée de prolonger encores pour quelque temps la-

dite trefue, pour donner plus de loisir d'envoyer à Rome, car ceux qui y devoient aller n'estoient encores partis, & toutesfois le temps accordé par icelle estoit ja fort avancé.

SA Maiefté parla aussi au President Iannin à Fleury, & sembloit que toutes choses fussent disposees au bien, chacun faisant demonstration de l'affectionner, & d'estre marry de ce qui se faisoit au contraire : les peuples quoy qu'ils fussent mal traictez s'en esiouyffoient, esperant d'estre bientôt deliurez de leurs maux, comme faisoient les habitans des villes & quasi toute la noblesse, & les Ecclesiastiques du Royaume, les factieux & ceux qui vivoient de la guerre ou profitoient du mal d'autrui seuls s'en attristoient, & la trauerfoient par diuers moyens, comme par predications, factions, menées, escrits, rapports, & plusieurs autres attentats, à quoy il estoit difficile de remedier, tant la guerre auoit accru la licence & despraué nos meurs; ioinct que les grands au lieu de se formaliser comme ils devoient, y conuiuoient plustost qu'autrement, sous pretexte de conduire les affaires doucement, mais à mon aduis fort imprudemment, & quelquesfois à mau-

uaife fin.

A v retour dudit voyage de Milly, monsieur de Mayenne me pria de reuoir sa Maiefté, pour luy parler de la prolongation de ladite trefue, laquelle il disoit estre necessaire, pource qu'il auoit aduifé de prier monsieur le Cardinal de Loyeuse de prendre la peine d'aller à Rome pour seruir le public en ceste occasion, esperant qu'il seroit tres-vtile & propre, à cause de son bon zele, de sa qualité & suffisance, & comme il estoit en Languedoc, c'estoit chose à laquelle il ne pouuoit pas pourueoir dedans le temps de laditte trefue; ioinct que les Ambassadeurs de sa Maiefté n'estoient encores hors du Royaume. Ledit Duc me renouela lors l'assurance qu'il m'auoit donnee de sa droite & sincere intention & resolution à la paix, vsant de termes plus exprés qu'il n'auoit encores faict, iusques à me prier d'en resoudre: ce qui me fit encores plus volontiers entreprendre ceste commission. Je fus trouuer sa Maiefté à Fontaine-bleau qui me receut de sa grace tres-humainement, vous y estiez, Monsieur, mais elle voulut auant que d'entendre ma charge, que ie vissé vne depesche à Rome du Card. de Plaisance, qui auoit esté prise & enuoyee

E c iij

à la Maieſté & fraiſchement deſchiffree : elle me fut leuë en voſtre preſéce & de Meſſieurs de Schöberg, de Sancy & de Reuol, le ſieur de Zamet que ie trouuay à Fontaine-bleau y fut appellé; elle eſtoit fort longue & particuliere, accôpagnée de la copie d'un certain ſerment faiët à Paris le 23. du mois de Iuillet, entre les mains dudit Cardinal ſur les ſainctes Euāgiles en la preſence du Duc de Feria, & des autres miniſtres du Roy d'Eſpagne, par ledit Duc de Mayenne, du Cardinal de Pelleuë, des Ducs de Guiſe, d'Aumale & d'Ellebœuf, les ſieurs de la Châtre, de Roſne, & de ſainët Paul, en qualité de Mareſchaux de France, & de Tournabō Florétin, agët du Duc de Mercœur; par lequel eſtoit porté que recônoiſſant pour pluſieurs grandes conſiderations n'eſtre à propos de faire alors vne Royauté Catholique, mais pluſtoſt la differer à vn autre tēps plus opportun; cependant eſtoit neceſſaire que le party Catholique ja compoſé, dreſſé & eſtably, depuis quelques années de l'vnion generale des Catholiques, dont depuis auoit eſté chef dudit Duc de Mayenne, demeurast entier & ferme en ſa premiere reſolution; d'épeſcher pour tousjours la ruïne de la Religion Catholique Apoſtolique & Romaine en ce Royaume

de France, & pour la maintenir, conseruer & restaurer, s'opposer à tous les ennemis d'icelle & leurs fauteurs, & extirper l'heresie autant que faire ce pourroit. Ledit Duc de Mayenne comme Lieutenant de l'Estat & Couronne de France & les autres dessusdits iuroient sur les saintes Euan-giles és mains dudit Cardinal de Plaisance comme Legat de sa Sainteté, & promettoient sur leurs paroles de Princes & de gentilshommes, & sur leur foy & honneur de maintenir inuiolablement la ligue Catholique, & ce qui est compris sous icelle, & de se tenir liez & vnis pour l'effect susdit, comme ils auoient faict iusques à present, & ne s'en departir iamais pour quelque cause que ce fust, ny de s'accoster en general ny en particulier du Roy de Nauarre, ny faire paix avec luy, quelque acte de Catholique qu'il fit; promettant encore sa Majesté Catholique vne armee de douze mil hommes de pied, & dix mil cheuaux, & semblablement des commoditez pour maintenir quelque temps la cauallerie & infanterie Françoisse que l'on pourroit mettre ensemble, & estre aussi d'accord des conditions de proceder, sans aucun retardement, à l'eslection de la susdite Royauté Catholique, laquelle

n'auoit peu estre pour lors : & si aucune d'eux refusoient encore de ce faire , les autres seroient tenus & obligez les abandonner, de ne les tenir plus en aucune maniere du nôbre des vnis dessusdits , pour la conseruation de la religion, ains leur estre ennemis, & sans auoir esgard à eux, passer outre sans difficulté à ladite eslection de Royauté Catholique, ledit Duc de Mayenne promettant en particulier & en general, que pour effectuer ladite eslectiō les Estats generaux se tiendroient ensemble , ainsi nommoient ils l'assemblee de Paris , & qu'aucune personne d'iceux ne s'en separeroit , ou qu'ils seroient tenus à Paris ou ailleurs, selon qu'il seroit trouué plus conuenable, pourueu qu'il fust pourueu de la part de sa Majesté Catholique de huit mil escus par mois , pour distribuer ausdits Estats, par les mains de leur President, cōprenant ledit Duc de Mayenne, comme Lieutenant general de l'Estat & couronne de France, le susdit party en general, & plusieurs Prouinces, villes & cōmunautez, en ce compris le Duc de Nemours, le Comte de Brissac & le sieur de Villars , & tons les autres , lesquels il asseuroit qu'ils se tien-droient obligez cōme s'ils se feussent trouuez presens, & eussent soubs-signé la mes-

me escriture avec ledit Duc de Mayenne, s'obligeant particulièrement & les autres susdits soubssignez pour les prouinces, villes & places qu'ils auoient en charge, & faisant le semblable, lors ledit sieur Legat de la part de sa Sainteté & le Duc de Feria pour sa Maiesté Catholique, qu'ils continueroient la protection dudit party pour le bien & conseruatiō de la religiō, comme ils auoient faict iusques alors, en foy de quoy ils auoient tous signé ladite promesse de leurs mains, & à icelle faict apposer le seau de leurs armes en ladite ville de Paris le 23. Iuillet 1593.

Vous scauez Monsieur, si ie demeuray estonné apres la lecture dudit serment, lequel estoit si contraire aux paroles dudit Duc de Mayenne, & aux assurances qu'il m'auoit donnees de son intention à la paix, & mesmes à ce qu'il nous en auoit faict dire & traicter en nos conferences, que du commencement i'eus opinion qu'il auoit esté faict à plaisir, ou seulement proietté sans auoir esté effectué, iusques à ce que i'ouy lire les lettres dudit Legat surprises avec ledit sermēt du 24. dudit mois de Iuillet, par lesquelles il rendoit si bon & particulier compte des assemblees, allees & venuës faictes tant pour cela que de tout

ce qui s'estoit passé à Paris, des raisons mortuës dudit serment, & de ceux qui y auoient esté embesongnez, & de plusieurs autres particularitez qui descriuoient la verité du faict, qu'il ne fut plus question que de soupirer & de me plaindre de la fortune publique, & de la mienne, me voyant embarrassé avec des gens qui faisoient si peu de compte de l'une & de l'autre; dequoy ie fus si scandalisé, qu'à l'heure mesme ie me resolus de n'accomplir la charge que ledit Duc m'auoit donnée, d'aller prendre congé de luy, & ne me mesler plus de ses affaires. Toutesfois vous ne fustes de cét aduis, ny ces messieurs qui estoient presens, pour l'opinion que vous auiez de moy, que ie pouuois encores seruir de quelque chose à remettre & composer les affaires, recognoissant que sa Maiesté, ny vous autres messieurs comme bien conseillez, n'estiez d'aduis de rompre encores la poursuite ny priuier le Royaume de l'esperance de la paix, nonobstant les sermens, considerant que ledit Duc pourroit peut-estre auoir changé d'opinion, veu les propos qu'il auoit faict tenir par le President Ianin, & le mauuais predicament auquel il apparoissoit par lesdites lettres du Legat, questoient avec luy les Espagnols, &

aussi que la tromperie sur le mariage de Monsieur de Guise avec leur Infante, & leur foiblesse & imprudence estoient aucunement descouvertes par les mesmes lettres, estimant qu'estant communiquées à l'oncle & au nepveu sans leur faire paroître l'aigreur, leur pourroient eschauffer à la paix plus que devant : au moyen dequoy ie fus conseillé & persuadé de la consideration publique, de ne rompre encores avec eux, mais asseurer de retirer profit de ceste occasion pour porter les affaires au but des gens de bien, à quoy notamment seruit bien, à me faire resoudre de n'auoir trouué esdites lettres les noms de Messieurs de Bassompierre & Ianin, me promettant de les auoir pour compagnons en ma plainte & en mon mescontentement, comme en effect ils estoient à l'iniure qui m'auoit esté faite, puis que nous auions esté depuis employés ensemble aux traitez de la trefue de la paix, & asseurer & ioin-dre de la bonne volonté dudit Duc, sans toutesfois auoir eu cognoissance ny communication aucune dudit serment, comme en verité ie n'auois eu en sorte quelconque.

Le sieur Zamet & moy leusmes à part dudit Duc lesdites lettres & ce serment l'un

apres l'autre, deuant que de luy faire paroistre aucune alteration : & comme il recogneut tant par la suite & substance d'icelles que par les originaux , que vous nous auiez confiez , qu'elles estoient veritables , & qu'il n'y auoit moyen de les desguiser , changer ny adiouster , il fit contenance de n'estre moins offensé dudit Legat , pour la façon de laquelle il parloit de luy par icelles , qu'estonné & marry de la descouuerte dudit serment, aduenüe contre son attente & tres-mal à propos pour ses desseins. Lors i'adioustay ma plainte particuliere en termes les plus exprés & praignans dont ie me peus aduiser , comme celuy qui estoit piqué iusques au sang du tort qu'il m'auoit fait , non de m'auoir celé ledit serment , mais de s'estre depuis seruy de ma credulité & franchise, non moins que de mon honneur & de ma foy , pour amuser le monde en beaux traictez , ausquels il m'auoit employé apres auoir couru sa fortune cinq ans durant avec toutes les incommoditez & ruïnes de mes biens, & mesme de ma reputation , qu'il estoit impossible de plus : laquelle plainte i'accompagnay encores d'une remonstrance que ie luy fis de son auenglemēt , pour ce qui le concernoit luy mesme , de ce qu'encores qu'il recogneust par

infinies preuues & effects , la haine que le Legat & lesdits Espagnols luy portoient avec leurs adherens , leur malice & pernicieuse intention enuers le Royaume, avec leur foiblesse & imprudence au soustien & à la conduite des affaires, il ne vouloit toutesfois se despestrer de leurs mains , ains continuoëit à se laisser beffler par eux , pour destruire la Religion & le Royaume , & se rendre le plus miserable homme du môdes; qu'il voyoit maintenant par lesdites lettres quelle foy & credit il deuoit adiouster aux belles parolles dudit Legat , puis qu'il faisoit si peu d'estat de sa parolle & de ses promesses , encores qu'elles fussent si solennelles , le tenant pour le plus grand trompeur du monde , & pour tel le depeignoït au Pape & à Rome ; quoy qu'il s'attendist apres cela que sa Saincteté fauorisast ses desseins, & que son Legat fist ses afres , quelle apparence y auoit-il de l'esperer , aussi s'estoit-il bandé ouuertement pour M. son Nepueu, en quoy l'on descouuroit par sa depesche qu'il perseueroit plus candidement & fidellement que plusieurs n'esperoient , car il estoit soupçonné de s'entendre du tout avec les ministres du Roy d'Espagne, pour abuser ce ieune Prince de l'esperance du mariage de leur infan-

te; ne pouuant croire qu'estant personnage clair-voyant & bien informé des affaires du monde, il eut opinion que ledit mariage se deust iamais effectuer, & toutes-fois il apparoissoit le contraire par lesdites lettres, car il accusoit lesdits ministres de ne proceder en ce faict rondement, & soit qu'il le fist pour plaire au Pape à sa descharge, ou iouïant au plus fin à l'vsage du pays, ou qu'en verité il fust marry de la tromperie desdits ministres à l'endroit de ce Prince, qu'elle esperance deuoit-il plus auoir d'aduancer sa fortune par son moyen. Car si la Saincteté affectionnoit celle de M. de Guise, la mauuaise odeur que ledit Legat donnoit encores de luy à sa Saincteté ne luy faisoit changer d'aduis: d'ailleurs il ne deuoit esperer, ny vouloit faire son profit de la tromperie & honte de Monsieur son Nepueu, estant en si mauuais predicament en uers le Legat & les ministres du Roy d'Espagne; ioint qu'il donneroit iuste occasion à sondit Nepueu de luy reprocher son malheur, outre qu'il pensoit en auoir, dont il pourroit aduenir plus de mal au party, à sa personne & aux siens que de bien; & d'autant que i'auois aprins à Fontainebleau la prinse de Lyon & de M. de Nemours: ie luy dis encore que chacun la

luy imputoit, publiant qu'il s'estoit aidé de M. de Lyon, & du mescontentement que la ville & le pays auoient des deportemens dudit Duc, pour le chasser de son gouuernement, affin de l'adiouster au sien par la guerre ou par la paix. Qu'il pouuoit penser sur cela comment sa conuioitise estoit blasonnée, puis qu'elle n'espargnoit son propre sang, le fils bien aymé de la mere; laquelle il deuoit faire estat de voir dorenavant fondre en larmes & seicher d'ennuys & de despit à ses pieds, sans auoir toutesfois le pouuoir de la deliurer, ny la contenter, d'autant que l'on ne dispoisoit du peuple comme l'on vouloit, & estoit encores plus difficile de bien reparer vne iniure faicte à vn Prince, mesmement quand elle estoit fondée sur ses propres fautes & delits, executée par inferieurs, & attribuee à ses plus proches, que cecy auoit renouvelé la memoire des propos tenus par le sieur Alfonse Corse sur la mort de Messieurs ses freres, dont l'on disoit qu'il auoit montré peu de sentiment, l'ayant en puissance, & y adioustoit-on encores l'assassinat du Marquis de Maygnelay, de la charge & despoüille duquel il auoit reuestu l'auteur d'iceluy. Que ioignant maintenant à ce que dessus l'opposition qu'il auoit pu-

bliquement & fraichement faicte à son-
dit Neveu encore qu'elle fust grandement
excusée des clair voyans & gens de bien,
le tout ensemble faisoit quasi tenir de luy
vn mesme langage tant à ses amis qu'à ses
ennemis, veritablement à son grand desad-
uantage, dont il ne deuoit point douter
que luy & les sienstost ou tard ne receuf-
sent & sentissent à bon escient le domma-
ge, & ne verroient point qu'il y eust autre
moyen de se garantir qu'en faisant la paix,
par laquelle il deliureroit la religion de pe-
ril, se tireroit des mains du Legat & des
Espagnols, purgeroit ses actions passées,
mettroit l'esprit de sa mere en repos, & la
personne de son frere en liberté avec hon-
neur, auanceroit la fortune dudit Duc son
Neveu, feroit & assseureroit la sienne
comme il voudroit, & obligeroit le Roy-
aume & le party Catholique à l'honorer, &
le Roy à l'aymer & respecter eternelle-
ment, qu'il estoit encore en sa puissance
de ce faire, d'autant qu'encore que sa Ma-
iesté fust à bon droit tres indignée & mal
edifiée dudit serment, & de la façon de la-
quelle il auoit esté depuis procedé avec el-
le, toutesfois sadite Maiesté s'estoit pro-
mis que quand il auroit veu & bien confi-
déré la depesche dudit Legat, le peu d'esti-
me

me qu'il feroit de luy, avec ce qu'il pou-
uoit esperer desdits Espagnols, il traite-
roit apres avec elle plus sincerement qu'il
n'auoit faiët, comme elle m'auoit donné
charge de luy dire; & qu'en ce faisant elle
ne laisseroit de le gratifier, & faire pour
luy comme celuy qu'elle vouloit honorer
& contenter plus qu'il ne pouuoit iamais
esperer de l'estre desdits Espagnols: adiou-
stant pour fin que pourueu qu'il print ce
party, & fist paroistre par effect, & y mar-
cher de bon pied, i'auois opinion que sa-
dite Maiesté accorderoit la continuation
de la trefue encores pour vn mois ou deux,
affin de donner loisir à Monsieur de Ne-
uers d'acheminer son voyage & sa legation
à Rome. Ledit Duc commença sa respon-
se en soupirant, me demandant s'il estoit
vray que sa Maiesté eust nouuelles certai-
nes de l'emprisonnement de M. de Ne-
mours, parce qu'il en auoit bien quelque
aduis, mais il ne le pouuoit croire, & en
estoit en grande peine, tant pour le respect
de Madame sa mere, que pour plusieurs au-
tres raisons qui importoit grandement
au public & à son particulier, encore que
ledit Duc se fust mal comporté en son en-
droit, iusques à suborner ses seruiteurs, &
prendre bien auant en son gouuernement:

toutesfois il ne pouuoit qu'il ne fust marry de ce qu'il luy estoit aduenü, ne doutant point que cela fist parler beaucoup de gens à son desauantage, mais qu'il y apporteroit tel remede que les effects iustificeroient son intention, protestant ne luy estre arriué accident de long-temps, dont il eust receu plus d'affliction que cestui-cy. Et veritablement ie m'apperceus bien qu'il en estoit grandement trauaillé, & tant qu'il en oubliait le demeurât; Mais apres auoir reprins ses esprits il me dit qu'il auoit esté contrainct de faire ledit serment pour arrester le cours de cette Royauté, que poursuiuoient ledit Legat, les Espagnols, & leurs partisans avec tant d'ardeur & de violence, que s'il n'eust vsé de ce moyen, ils l'eussent peut-estre decerné sans luy, tant qu'ils estoient dépités de la conuersion de sa M. & recogneu que ce coup renuerseroit leurs desseins: que si ladite Royauté eust esté faicte, le Pape eust esté obligé de la soustenir, & partant refuser à sa M. son absolution, ce qui eust perpetué nos calamitez: car il n'eust esté apres en sa puissance d'y remedier: mais qu'estant toutes choses entieres comme elles estoient demeurees par ceste inuention, ils ne pouuoient garder sa Saincteté de receuoir sa Majesté, qui

estoit le poinct auquel il estoit necessaire de pouruoir sur tous autres, d'autant que l'obtenans, tous moyens & pretextes de troubler le Royaume & sa Maiesté cessoient; qu'il auoit delibéré d'y ayder & seruir de tout son pouuoir cōme il auoit souuent promis, mais que M. le Cardinal de Loyeuse qu'il vouloit faire chef de cette negotiation, ne pouuoit faire ce voyage deuant l'expiration de la trefue, partant falloit aduiser à la continuer, cōme il m'auoit prié de remontrer à sa Maiesté: qu'il enuoiroit avec ledit Cardinal Messieurs de Senecé & Ianin, qui luy estoient tres confidens & desiroient le bien du Royaume, de sorte qu'il ne falloit seulement qu'auoir patience sans s'arrester audit serment, lequel estoit fait à la requeste du Legat, & entre ses mains, deuoit estre du tout remis & differé au Pape, sous le bon plaisir, duquel il auoit entēdu & protesté le faire & nō autrement, mesmes estimoit qu'ō le trouueroit ainsi escrit en l'original, si ledit Legat pour fauoriser les Espagnols ne l'auoient fait obmettre expres, comme il y auoit en la copie que ie luy auois aportee ce mot de Catholique, où il estoit fait mention de ne recognoistre le Roy de Nauarre, quelque acte qu'il fist pour faire trouuer

le serment à Rome moins rigoureux : Qu'en fin il n'estimoit estre obligé par le dit serment de desobeyr à sa Sainteté, quand elle auroit receu & absous sa Maiesté, ny de reietter la paix, pourueu qu'il recogneust le pouuoir faire à l'honneur de Dieu & en saine cōscience. Que s'il eust eu autre intētion il ne m'eust employé en ces traictez ny M. le P. Ianin, que ledit Legat mesme ne faisoit estat dudit serment, comme l'on voyoit par ses lettres, par lesquelles il n'espargnoit lesdits Espagnols, ayant ouy parler qu'il vouloit continuer la trefue, desespéroient desia de cette Royauté & de l'accomplissement dudit sermēt, encores qu'ils assēurassent que l'armee & les moyens qu'ils auoient promis par iceluy seroient prests à la fin d'icelle. Qu'il alloit aussi faire débander les deputez des Estats, signe euident de son intention : car quand ils seroient vne fois separez il n'y auroit plus moyen d'essire vn Roy. Partant le principal estoit de fleschir le Pape, le ioindre à nostre desir, & estre assēuré de luy auant l'expiration de l'aditte trefue : car s'il falloit recommēcer la guerre, il seroit contraint de s'ayder encores desdits Espagnols, lesquels luy encheriroient leurs dārees plus que iamais, mesmes voudroient

estre payez auāt la main , & luy pour auoir moyen de se deffendre seroit forc   de les contenter : au moyen dequoy il prioit ses amis de plaindre plustost sa condition & luy ayder    c  duire les affaires    bon port , que des'offenser de ses actions , estant toutes forcees comme elles estoient ; qu'il ne m'auoit rien dit dudit serment , & n'en auoit aussi communiqu   audit President , parce qu'il scauoit bien que nous n'eussions iamais approuu   l'ysage de ce remede , & qu'il auoit iur   aussi de n'en parler qu'   ceux qui l'auoient fait avec luy , & sur tout de ne le nous c  muniquer ny    Monsieur de Bassompierre pour la ialousie extreme que ledit Legat & les Espagnols auoient de nous ; qu'en fin son intention estoit bonne, qu'il m'en assureoit derechef & le feroit paroistre par effect , speciallement enuers sa Saintet   : mais qu'il estoit necessaire d'obtenir laditte prolongation, non pour vn ou deux mois , mais plustost pour quatre, affin de ne precipiter les affaires , si l'on ne vouloit aduancer celles desdits Espagnols , dont il me pria d'aduertir sa M. par vostre moyen , & d'en auoir response bien-tost , parce qu'il n'en estoit assur   , il falloit qu'il se preparast plustost    la guerre qu'   despescher    Rome.

Et d'autant que vous m'auiez prié comme i'ay desia dit, avec ces Messieurs qui vous assistoient en ces affaires, de ne desespérer ledit Duc ny rompre avec luy, i'acceptay encores ceste commission, & vint vous trouuer à Estampes, où sa M. vous auoit laissé expres pour entendre la réponse dudit Duc & la recharge qu'il m'auoit donnée, laquelle ie vous representay telle que ie l'auois receuë, dont vous me promistes d'aduertir sa Maiesté, & me faire sçauoir sa volonté.

DEPVIS vous & M^{rs}ieur de Reuol vin-tes à Poissy, où ie me trouuay, & accordasmes que ladite trefue seroit continuee encores pour deux mois, sçauoir est Nouembre & Decembre, toutesfois que la publication ne s'en feroit que pour vn mois, que dans le dixiesme Nouembre elle seroit publiee pour l'autre, ce que sa Maiesté voulut estre ainsi passé pour certaines considerations qui importoiët pour son seruice: pareillemēt il fut accordé que l'on s'assembleroit dedans 8. iours audit Poissy pour donner ordre aux contrauentions de ladite trefue, dont chacun de part & d'autre se plaignoit; & sur ce vn bon reglement pour la faire mieux observer à l'aduenir. Cecy fut traité & accordé le 13. d'Octobre, de-

quoy i'aduertis ledit Duc qui m'en enuoya la ratification, laquelle ie vous fis tenir, comme vous fistes apres celle de sa Maiesté, mais ie ne me voulus engager en la conference desdites contrauentions, tant le serment & l'acte de Lyon m'auoient donné mauuaise opinion du succès des affaires, comme plusieurs autres lesquels n'eussent iamais creu que ledit Duc eust voulu vser de tels moyens pour auancer les siennes.

Monsieur de Belin fut depesché de luy à sa Maiesté en ce temps là, sur l'aduis qu'il eut que sadite Maiesté estoit allee à Dieppe expres pour faire la guerre à monsieur de Villars, en faueur du sieur de Boisroyer qui commandoit au fort de Fescamp, lequel sa Maiesté disoit s'estre donnée à elle deuant la trefue, & partant ne pouuoit l'abandonner audit sieur de Villars qui luy faisoit tous les iours la guerre, pour la supplier de n'vsr de voye de faict en ceste defence pour n'alterer les affaires, mais faire que le tout fust traité amiablement, & par les deputez conformement aux articles de la trefue, laquelle ne pouuoit estre rompuë en vn lieu qu'elle ne le fust par tout. Je n'estois aupres dudit Duc quand ledit sieur de Belin fut depesché: Car i'estois

demeuré à Pontoise expres pour me mieux excuser de la conference susdite, que l'on deuoit faire audit Poissy, mais ie sceus que ledit Duc auoit donné charge audit sieur de Belin de sonder sadite Maiesté, sur vne plus longue prolongation de ladite trefue que celle qui auoit esté accordée iusques à la fin de l'année, disant ne pouuoir dans ledit temps auoir nouvelles de Rome & d'Espagne, d'où il falloit qu'il eust aduis deuant que de traicter la paix. Et combien que i'eusse aduertty ledit Duc que vous trouueriez audit lieu de Poissy au temps que nous auions ordonné pour donner ordre ausdites contrauentions, afin qu'il fit aussi trouuer ses deputez : neantmoins ie ne vous en manday rien par ledit sieur de Belin, qui passa à Mante près de vostre maison, où vous estiez demeuré exprez pour vous acheminer audit Poissy, sans vous donner aduis de son passage, ny de l'occasion de son voyage, dequoy estant retourné à Paris ie fis plainte audit Duc sur celle que chacun faisoit, de ce que l'on differeit tant à pouruoir ausdites contrauentions : toutesfois il voulut attendre le retour dudit sieur de Belin deuant que d'enuoyer audit Poissy, soit qu'il fust en peine de ce feu, que l'on disoit qui

s'alloit allumer du costé de Normandie à cause du differét d'entre le sieur de Villars & Boisfroyer, ou qu'il s'attendit d'obtenir la susdite plus longue prolongation de ladite trefue par le moyen dudit sieur de Belin, lequel luy en auoit donné quelque esperance : & combien que ie luy remonstrasse qu'il ne s'y deuoit attendre, veu les difficultez que sa M. & ceux de son conseil auoient faites d'accorder les deux moyens que i'auois obtenus; neantmoins comme c'estoit le but auquel il aspiroit par dessus tout autres il croyoit que ce que ie luy en disois, & le sieur Zamet qui en parloit comme moy, procedoit plustost de mauuaise volonté que de iugement, en quoy le confirma plus que deuant le rapport que luy fit ledit sieur de Belin au retour de son voyage: Car il luy dit que s'il luy eust donné pouuoir de traicter ladite prológation, il la luy eust rapportee pour tel temps qu'il eust voulu; mais que ne luy ayant commandé que de sçauoir sur cela l'intention de sa Maiesté, il n'auoit voulu s'y engager davantage, & quand au differend dudit sieur de Villars, n'eut agreable son entremise, comme celuy qui ne vouloit que l'on sçeuist gré à autres qu'à luy de ce qui en succederait : mais voyant qu'il ne pouuoit estre

assisté dudit Duc, des Espagnols, ny de Monsieur de Guise en ceste querelle, d'autre chose que de belles parolles & promesses, il en fit depuis luy mesme l'accord avec sa Maiesté, auquel i'ay ouy dire que vous fustes employé, de sorte que ledit sieur de Belin ne rapporta de son voyage qu'une lettre de sa Maiesté adressante à vous, par laquelle elle vous mandoit de donner iusques à Paris si ledit Duc vous en prioit, & cogneussiez qu'il fust à propos, de quoy ayant eu la communication, ie fus d'aduis que ledit Duc parlast à vous, pour luy mesmes vous dire ses raisons sur ladite plus longue prolongation, de laquelle continuoit à faire plus grande instance que jamais, & apprendre aussi de vous la disposition de sadite Maiesté sur icelle, ce qui fut cause que vous vintes en ladite ville bien-tost apres, où vous parlastes par deux fois audit Duc, & ne tint à vous qu'il ne print autre conseil sur le traicté de la paix, que celui qu'il auoit fuiuy iusques alors, sans plus s'amuser aux contrauentions de ladite trefue comme il faisoit: car vous luy dites qu'on auoit eu peine de faire approuuer celle qui auoit esté accordée par sa Maiesté, contre l'aduis quasi de tous ses seruiteurs, lesquels estoient blasmes

dedans & dehors le Royaume & sa Maie-
sté aussi, comme de chose que l'on esti-
moit auoir faict tort à sa reputation & à ses
affaires; ioinct que sa Maieité esperoit estre
aduertie par M. de Neuers de l'intention
de nostre sainct Pere deuant que ladicte
trefue fust expirée, pource qu'il sçauoit
qu'il estoit arriué à Rome, & que selon
qu'il manderoit à sa Maieité elle se resou-
droit de ce qu'elle auroit à faire, mais que si
en cinq mois que ladicte trefue deuoit du-
rer, ledit Duc ne pouuoit enuoyer à Ro-
me & sçauoir la volonté du Pape, c'estoit sa
faute & non celle de sa Maieité, laquelle
pour ce regard s'estoit acquittee de son
deuoir comme elle auoit promis, encores
que ledit Duc de Neuers, auquel elle en
auoit donné la charge fust tât pour la qua-
lité que pour son indisposition moins por-
tatif que les autres: que sa Maieité ne pou-
uoit endurer que son peuple payast la tail-
le à deux partis plus longuement de son
consentement, comme elle auoit souf-
fert iusques alors, esperant que la trefue
engendreroit la paix; par le moyen de la-
quelle elle pouruiroit à son soulagement
plus commodemēt, mais qu'elle ne voyoit
pas à son grand regret les choses estre pour
ce regard plus aduancées qu'elles estoient

le premier iour, ains au contraire auoir assez d'occasion de croire que l'on auoit recherché ladicte tre fue que pour mieux se preparer à faire durer la guerre: que si ledit Duc eust eu volonté de bien faire, il en feroit autrement: car chacun sçauoit qu'il en auoit le pouuoir, & que tout dependoit de luy, ioint que sa M. estoit resoluë passer tout ce qu'honnestement elle pouuoit accorder pour le contenter, tant au general qu'au particulier, comme elle luy auoit fait souuent dire: Mais aussi qu'il estoit delibéré de ne se repaistre plus de parolles, & qu'il falloit des effects.

Qv'ELLE auoit rendu au Pape & au sainct siege l'honneur & le respect qui leur estoient deubs, & tels l'on leur auoit desiré; & si la faction d'Espagne estoit si forte à Rome que sa M. n'y peust estre receuë, il estoit question de sçauoir en ce cas ce que ledit Duc pretendoit faire, & s'il traicteroit ou non, d'autant que selonc cela sa M. seroit conseillée de se gouverner en son endroit, le priant de bien peser ce faict auant que d'y faire response, afin de ne perdre ceste occasion, & d'obliger à luy sadite Maiesté & toute la France, voire la Chrestienté, avec beaucoup de gloire & d'vtilité pour luy & pour les siens, laquelle estoit encores entre

ses mains adioustant que s'il continuoit à remettre au Pape ce que l'on sçauoit dépendre de luy entierement, sans parler de luy plus clairement, qu'il n'auoit faict jusques à lors, sa M. feroit mauuais iugement de son intention : de sorte que vous n'auriez moyen, à vostre grand regret, de seruir au repos du Royaume selon vostre desir.

MONSIEVR, vous amplifiastes ce discours de plusieurs autres raisons tres-considerables fondees sur le besoing que le Royaume auoit de la paix, & toute la Chrestienté de l'vnion des Princes Chrestiens pour s'opposer aux armées du Turc : Toutesfois vous ne peustes esbrâler ledit Duc, la premiere & la seconde fois que vous parlastes à luy : de sorte que vous en partistes tres-mal edifié, comme il vous plut me dire, & moy audit Duc, lequel pour cela ne s'en esmeut pas dauantage, & me semble qu'il attribuoit les difficultez que vous luy auiez faictes sur la continuation de laditte trefue, qu'il affectiõnoit plus à vn commun aduis que nous auions prins ensemble, vous, le sieur Zamet & moy, qu'à la verité du faict, d'autant que nous luy en auions autant dit que vous, & que ledit sieur de Berlin luy en auoit donné toute autre esperan;

ce, de laquelle neantmoins vous ne voulustes le reietter entierement, le voyant si aheurté à ce point, afin comme ie croy, d'en remettre la resolution à sa Majesté & luy faire sçauoir & à moy son intention dedans huit ou dix iours au plus tard, ce que vous ne peustes faire à cause de l'esloignement de sadite Majesté qui estoit encores à Dieppe, & de vostre indisposition, mais ledit Duc m'enuoya à Pontoise apres vostre partement afin d'estre plus près de vous, où ie receus vos lettres du 25. Nouembre, par lesquelles vous me mandiez que ie vous reuerrois bien-tost auprès dudit Pontoise, nous dōnant tousiours peu d'esperance de la prolongation de ladite trefue, mais bien esperant de traicter à bon escient la paix, si l'on y vouloit entendre, comme l'on pouuoit faire deuant que la trefue fust expiree, dedans lequel temps vous esperiez estre assure de la volonté du Pape, concluant que sa Majesté desiroit & auoit tant de besoin de la paix, que vous estimiez qu'elle ne precipiteroit rien.

Ie presentay vostre response audit Duc, laquelle luy donna plustost esperāce d'obtenir laditte prolongation qu'elle ne l'en desespéroit, en verité contre mon aduis, tāt il est difficile d'arracher de l'esprit d'un

Prince l'opinion d'une chose qu'il affectio-
ne, partant il me pria de retourner à Pon-
toise pour vous voir, se persuadant que ie
vous persuaderois de faire à la fin ce que
vous n'avez enuie ny peut-estre pouvoir
de ce faire, quoy que ie luy peusse dire au
cōtraire: & cōme il cogneut que i'auois be-
soin estre en cela persuadé autant que vous
mesmes, parce que ie n'estois assez eschauf-
fé à son gré, il vſa d'un artifice nouueau
pour me remettre en trainet, c'est qu'il me
voulut faire croire qu'il auoit tant faict
auec monsieur son nepueu qu'il l'auoit du
tout gagné & tourné à la paix, de sorte
qu'estant maintenant bien vnis en ce des-
sein, si sa Maiesté luy dōnoit le loisir de cō-
duire les affaires, il ne falloit point douter
qu'elles ne succedassent heureusement; &
sur ce il me dressa vne partye pour me fai-
re parler à Mōsieur son nepueu, lequel s'en
acquitta, de façon qu'il ne me donna pas
grande occasion de croire qu'il eust ceste
volonté: toutesfois ie ne laissay pas de re-
tourner à Pontoise, afin d'auoir ce bien que
de vous voir, ioint que i'eusse en verité de-
siré que l'on eust prolongé ladite trefue en-
cores vn mois, pour leuer toute excuse
audit Duc, & en ce faisant le mettre de plus
en plus en son tort, estimant que cela ne

pouuoit estre que tres-vtile au public.

M A I S quand ie vous vis vous me fistes bien cognoistre qu'il ne se falloit plus attendre à ladite prolōgation, me disant que sa Maiesté auoit de nouveau descouuert par plusieurs autres lettres qui auoient esté prises, que ledit Duc ne la demandoit. que pour donner loisir aux Espagnols de s'armer, & au sieur de Mōtpefat faire le voyage d'Espagne où ledit Duc l'auoit enuoyé, ce qui vous estoit confirmé par la demeure en France du President Ianin, lequel au lieu d'estre allé à Rome avec le Cardinal de Ioyeuse, & le sieur de Senecé comme il auoit promis de faire, s'il cognoissoit, comme il disoit, que l'on voulust bien faire, n'auoit pas passé Lyon, & auoit laissé aller les deux autres, ausquels l'on n'auoit tant de defiance qu'en luy.

I E reuins à Paris exprés pour dire audit Duc que sa M. estoit resoluë de ne continuer ladite trefue le mois de Decembre passé, afin qu'il ne s'y attendist plus, & luy conseillay d'entendre à la paix sans plus remettre le traicté à vn autre temps, luy disant que si la guerre recommençoit sans estre assisté de forces suffisantes pour s'opposer à celles du Roy, & sur tout deliurer la ville de Paris de captiuité, que plusieurs,
tant

tant de bonne volonté que par nécessité se separeroient du party, & composeroient avec sa Majesté ; à present qu'elle faisoit profession de la religion Catholique, & que ceux qui demeuroient constans dans le party, traitteroient encores sans luy avec les Espagnols, lesquels recherchoient vn chacū de ce faire: dont ie luy disois, qu'entre autres ils s'estoient adressez à mon fils, lequel ils auoient fort pressé de traiter avec eux à son desceu, combien qu'il fust recogneu d'eux & d'vn chacun luy estre tres-affectionné, par où il pouuoit cognoistre quel estoit leur but, ce qu'il deuoit esperer d'eux, & quelle seroit sa cōdition s'il aduenoit que chacun traitast sans luy avec sa Majesté ou avec lesdits Espagnols, comme ie sçauois que l'on feroit.

Tout cela ne le peut detourner de son premier chemin qui estoit d'attendre les nouuelles de Rome & d'Espagne deuant que prendre party: de sorte qu'il se resolut de s'ayder encore de Monsieur de Belin pour tenter derechef s'il pourroit auoir la dite trefue, cuidans que ie l'en desespérois expres pour le contraindre de faire la paix: ioint que ledit sieur de Belin continuoit à luy en donner esperance, mais à son

retour il en desespéra du tout ledit Duc, lequel neantmoins ne changea d'aduis; ains pria ledit sieur de Zamet de tenter encore ce remede, nous disant que Monsieur le Legat & luy, auoient depesché à Rome le sieur Montorio pour deuancer ses deputez, & faire que le Pape luy permist de traiter avec sa Maiesté. Toutesfois ie sceus qu'il luy auoit donné autre charge, & que de nouveau il s'estoit laissé persuader, que le Pape & le Roy d'Espagne ayant veu n'auoir peu faire eslire Monsieur de Guyse, demandoient qu'on eust le fils aîné dudit Duc moyennant le mesme mariage de l'Infante; ce qui auoit esté aposté pour renuerfer la paix avec sa Maiesté, laquelle il luy faisoit remontrer ne se pouuoir eûiter, que par ce moyen: enquoy il se laissoit entretenir du sieur Iean Baptiste de Tassis, lequel comme plus fin luy donnoit esperance que son maistre y condescenderoit, pourueu que la chose fust bien conduite. Cestuy-cy ayant eu ceste astuce, embouché des partisans d'Espagne qui enuironnoient ledit Duc, que de luy faire croire qu'ils affectionnoient son contentement & la grandeur de sa maison, plus que toute autre chose, au lieu que Dom Diego d'Ibarra

faisoit le contraire avec ledit Duc de Feria, lesquels se monstroient plus affectionnez à Monsieur de Guyse, tout cela ne se faisoit que pour les abuser tous deux, & par ce moyen nous faire franchir le saut de ceste Royauté affin de perpetuer nos miseres.

QVOY voyant & que la trefue alloit expirer, de sorte qu'il falloit se resoudre de recommencer la guerre à sa Majesté, ou s'accommoder avec elle, comme celuy qui estoit entré en la ligue par necessité, & qui y estoit depuis demeuré pour seruir au repos de son pays pour auoir esprouué ceste guerre, ie prins congé dudit Duc le 23. de Decembre & me retiray à Pontoise avec les miens, pour les disposer à recognoistre sa Majesté avec moy, puisque Dieu luy auoit faict la grace de se renger au giron de l'Eglise, que ledit Duc ne vouloit faire la paix, & que le dessein des Espagnols estoit d'vsurper & diuiser le Royaume & le destruire. Et partant ie suppliy derechef ledit Duc de mieux aduiser à ses affaires, & considerer que l'esperance de la paix auoit contenu plusieurs villes & personnes au party & en bõne opinion de luy, qui s'en separeroient & murmureroient contre luy quand la trefue expireroit,

tant pour estre lassez de la guerre que pour ne vouloir porter les armes contre sa Majesté puis qu'elle estoit Catholique, suivant en cela leurs protestations & declarations souuent reïterees, & publiques de sa propre bouche & par escrit, dequoy il seroit difficile qu'elles fussent retenues pour le respect du Pape, sur lequel ledit Duc s'excusoit, puis que sa Majesté estoit mise en deuoir de le contenter; ioinct que l'on estimoit que sa Saincteté ne luy pouuoit iustement refuser son absolution, la demandant d'un cœur penitent, & si humblement qu'elle faisoit; de sorte que si sa saincteté en faisoit difficulté, comme desia l'on commençoit à dire sous main qu'elle estoit resoluë de faire, l'on l'imputeroit au pouuoir qu'auoient à Rome les Espagnols, ayant veu que le Legat fauorisoit ouuertement leur pratique & desseins: que ie ne voulois pour mon regard que la guerre me surprist à Paris, tant pour ce que ie voulois estre en lieu où ie fusse libre pour disposer de moy, comme Dieu me conseileroit, que pour ce que ie ne pouuois compatir aux humeurs dudit Legat & dedit Espagnols, lesquels ie tenois auteurs & cause de la ruine du party Catholique & de la France, que de demeurer aupres

de luy sans y adherer , ce seroit me perdre & me faire mocquer de moy , & d'auantage luy faire tort , parce qu'en recommençant la guerre il seroit contraint d'espouser entierement leurs passios, deuenir leur esclau , ou d'estre abandonné de toutes parts. Que si ie voyois qu'apres cela il nous restast encores quelque sorte d'esperance de faire paix , ie ne laisserois de m'y employer comme i'auois faict depuis la mort du feu Roy, que ie l'auois suiuy & accompagné exprés ; Mais qu'il ne s'y faudroit plus attendre apres ladite trefue , la fin de laquelle apporteroit vn merueilleux changement aux affaires , que ie ne voulois plus luy représenter les malheurs qui luy en arriueroyent , par ce qu'il y deuoit voir plus clair que moy , & que ie les luy auois remonstré si souuent , que i'estimois l'en auoir importuné. Mais seulement que ie luy voulois dire que s'il n'estoit retenu comme il disoit , que du respect qu'il portoit à sa Saincteté en ce traicté , l'on pourroit peut-estre obtenir de sa Majesté que tout seroit faict sous le bon plaisir d'icelle , afin de la contenter : adioustant que i'estimois qu'il feroit plaisir à sa Saincteté d'en vser ainsi, afin de la soulager au iugement qu'on luy auoit remis, auquel chacū reco-

gnoissoit qu'elle estoit agitée & combattue de diuerſes conſiderations, conſeillant que ſi apres la trefue il ne trouuoit moyen de contenter & retenir les villes au party, elles luy eſchapperoient plus viſtes qu'elles n'y eſtoient venuës apres la mort de Meſſieurs ſes freres, tant l'ambition & la foibleſſe des Eſpagnols, avec les maux qu'elles auoient endurees par noſtre conduite en toutes choſes leur auoient faiët deſirer, & leur faiſoit maintenant approuuer la conuerſion de ſa Maieſté, cōme eſtāt l'vnique, plus prompt & aſſeuré remede à leurs calamitez, le ſuppliant ſi mes raiſons & remōſtrāces ne pouuoient l'eſmouuoir, au moins ſe reſouuenir quelques fois du deuoir auquel ie m'eſtois mis de l'aſſiſter, cōſeiller & ſeruir en cettē occasion, l'aſſurant que ie regretterois eternellement de n'auoir peu acquerir, en cinq ans que ie l'auois accompagné, plus de creance en ſon endroit pour ſon propre bien & ſeruiſe, non moins que pour conſeruer la Religion & le Royaume.

LEDIT Duc auoit derechef depeſché M. de Belin deuers ſa Maieſté, cuidant obtenir à la fin ladite prolongation, & vouloit que l'attendiſſe ſon retour auant que partir: mais ie le ſuppliai de m'en excuſer, ſça-

chant que ledit sieur de Belin n'en rappor-
toit qu'un refus, & craignant qu'il aduint
quelque chose qui rendit mon parlement
plus difficile & moins honneste: partant
ie me retiray à Pontoise, où on eut ce bien
de vous voir bien-tost apres, avec Mon-
sieur de Sancy, où se trouua ledit sieur Za-
met qui reuenoit de Mante. Là ie vous as-
seuray de ma deliberation apres l'auoir
esté de vous, qu'il ne failloit plus esperer de
tresue generale, mais ie vous priay de
m'en faire accorder yne particuliere pour
Pontoise, tant pour me donner moyen
de gagner mon fils & ceux de sa garnison,
que pour auoir loysir de voir qu'elle reso-
lution Monsieur de Mayenne prendroit
à Paris, apres auoir entendu la volonté du
Pape, & ce que Monsieur de Neuers en
rapporteroit sans poser les armes con-
tre sa Maiesté, laquelle la nous accorda
pour trois mois, dont i'aduertis Mon-
sieur de Mayenne qui la ratiffia, mais à
regret, à cause de ce qui estoit aduenu
à Meaux, où les habitans auoient reco-
gneu sa Majesté avec Monsieur de Vi-
ttry leur gouverneur, dont ledit Duc estoit
tres-offensé, & non sans cause, car la decla-
ration de ceux de ladite ville refueilla les
courage des armées, leur fist gouter

les raisons qui les auoient meus, avec le bon traitement que sa Majesté leur auoit fait, de façon que plusieurs commencèrent à detester la guerre & les auteurs d'icelle, avec le desir d'en sortir.

Ce que j'entrepris de remontrer audit Duc, tant par ledit sieur Zamet, que par lettres que ie fis présenter par Pasquier que j'auois l'aisné à Paris; luy faisant dire qu'à l'exemple des habitans de Meaux qui auoient esté des plus entiers & affectionnez à la Ligue, chacun l'abandonneroit s'il ne traitoit la paix, & n'y employoit des personnes publiques, telles que pouuoient estre Messieurs du Parlement & les Magistrats de la ville de Paris, afin de donner occasion à tout le monde de croire qu'à ce coup il y marchoit de bon pied; car ses plus chers amis ne se fioient quasi plus en luy non plus que ses ennemis, tant il estoit descheu de reputation à cause de sa foiblesse & de la mauuaise conduite de sa fortune: de sorte que l'on disoit par tout à haute voix qu'il ne pouuoit faire la guerre, & toutes-fois ne vouloit faire la paix, transporté de son interest particulier, sans auoir esgard au public, ny à ceux qui l'auoient assisté; à quoy ie ne recognoissois point qu'il peust remedier qu'en attachant vne ne-

gotiation publique telle que dessus : partant ie le supplioys des'y resoudre, & pour ce faire, aller luy mesme au Parlement leur en faire l'ouuerture & priere, & ne perdre vne seule heure de temps, mais il n'en fit compte non plus que des remonstrances pour la paix, qui luy furent faictes lors par ceux du Parlement, desquels il s'offensa, s'excusant tousiours sur le Pape, & se promettant qu'à la fin il obtiendrait ladite trefue, pour laquelle il enuoya derechef Monsieur le Comte de Brissac, & le sieur Zamet vers sa Maiesté chargez de nouvelles offres ainsi que i'ay entendu, dont sa Maiesté fist aussi peu de compte que des premieres, disant tousiours qu'il vouloit faire la paix tout à faict, ou la guerre, sans plus s'amuser ausdites trefues, tant elle auoit mauuaise opinion de la volonté dudit Duc.

Sur cela sa Maiesté alla à Chartres, où elle se fist sacrer au grand plaisir & contentement d'un chacun: & le Cardinal de Plaisance publia vne lettre adressante aux bons Catholiques, par laquelle il leur faisoit sçauoir que nostre S. Pere n'auoit admis & receu M. de Neuers, que comme Prince d'Italie, & non en qualité d'Ambassadeur de sadite Maiesté, à laquelle il

nous aduertissoit qu'il ne donneroit iamais absolutiõ quoy qu'elle fist, dequoy chacun fut extrememēt scandalisé & offencé, car par sa lettre il ne rendoit aucunes raisons de ce reffus, qui estoient iugé de tous trop rigoureux, pour celuy qui tenoit lieu de Pere commun des Chrestiens, mesmes à l'endroit d'un tel Prince que sa Maiesté, laquelle l'auoit recherché avec tant de submission & d'humilité: de sorte que la rencontre de ces deux actions sçauoir du sacre de sa Majesté, & de ladite declaration, fist resoudre plusieurs personnes de reconnoistre sa Maiesté encore plustost qu'elles n'eussent faict, voyant d'un costé que sadite Majesté faisoit ce qu'elle deuoit, & pouuoit, pour asseurer ses subiects de sa veritable & entiere conuersion, & de l'autre que ledit sieur Cardinal nous desesperoit entierement de l'assistance de sa Sainteté en sa faueur contre toute raison, par où nous nous voyons plongez pour iamais en un abyfme de calamitez au peril de la religion, sans nous faire apparoir d'aucun moyen ny remede propre pour nostre consolation.

DE QUOY chacun veit aussi bien-tost sortir des effects par la resolution que prindrent les principales villes, du

Royaume, de recourir à sa Maiesté & luy iurer fidelité & obeyssance, comme feirent plusieurs Seigneurs & Gentils-hommes, lesquels iugerent ne deuoir plus differer à ce faire, sous pretexte d'attendre la volonté de sa saincteté, puisqu'elle auoit condamné sa Maiesté sans l'ouyr, comme nous apprenions par la lettre dudit Legat imprimée; ioint que sa Maiesté auoit communiqué aux saincts Sacremens de l'Eglise, & faict les sermens accoustumés aux sacres de nos Roys.

Monsieur, vous sçauéz que Dieu m'a faict ceste grace que i'ay esté des premiers qui se sont rengez au deuoir, auquel comme il a pleu à sa Maiesté me receuoir tres-fauorablement par vostre moyen & de mes autres amis, qui s'y sont employez, ie vous ay voulu aussi adresser ce compte de mes actions durant ma miserable fortune; tant pour vous tesmoigner l'obligation que ie recognois vous en auoir, que pour vous donner occasion de me continuer vostre amitié, de laquelle ie sçay que vous n'honorez pas volontiers ceux qui ont l'ame trauersee: ie iure aussi que ie ne la rechercherois, si en ma conscience ie sçauois m'en estre rendu indigne, voire ne demeurerois

en ce Royaume ny pourrois viure ailleurs en aucun repos, tant i'abhorre vn malefice, & suis ialoux de mon honneur: ce que nous faisons par force & necessité ne nous doit entierement estre imputé, mesmes quand en nostre cheute nous nous efforçons de l'amender en seruant au public, comme vous voyez par ce discours que i'ay mis peine de faire.

Ie sçay bien que l'on m'a long temps blasmé de la poursuite de laditte paix, voyant qu'elle estoit infructueuse, comme si i'eusse eu part à l'artifice dont elle a esté accusée; les vns croyans que i'auois tel pouuoir aupres dudit Duc qu'il faisoit vne partie de ce que ie luy cōseillois, & les autres que ie le deuois abandonner dès le commencement, que ie deuois auoir recogneu qu'il ne marchoit de bon pied: i'excuse les vns & les autres, car en verité ayāt esté nourry aux affaires, voire si i'ose dire dedans le sein des Roys, la raison vouloit que ledit Duc fist plus de compte de mes conseils qu'il n'a fait, & de l'autre, mō deuoir m'obligeoit le quitter les voyāt mesprizez: car i'aduouë n'auoir peché par ignorance, mais le succeds des affaires, & ma derniere resolution me iustificient assez, estant certain que ie n'eusse esté si vtile au

public que ie cuide auoir esté, si i'en eusse vsé autrement, comme ie m'asseure que tesmoigneront tous ceux qui ont suiuy ce changement qui est aduenu, ie n'en recuse vn seul: dauantage ie ne me fusse satisfait moy-mesme, ny peut-estre contenté sa Maieité & mes amis, comme i'estime auoir faict.

Car il me fust demeuré vn regret, & à l'adventure vn perpetuel reproche d'estre aucunement cause de la longueur de nos calamitez publiques si i'en eusse abandonné la Cour, cependant que par raison & iugement le Roy mesme & ceux qui le seruoient, comme plusieurs gens de bien qui seruoient le party de M. de Mayenne, croioient que ie pouuois y seruir; l'on eust dit que i'eusse preferé mon particuliet au public par timidité, ou pour ma commodité; dauantage ie ne sçay si deuant la conuersion de sa M. i'eusse peu persuader aux miens de faire ce qu'ils ont faict pour le seruice de sa M. tant ils estimoient leur honneur estre engagé à suiure l'opinion commune de la guerre, laquelle estoit coloree du pretexte de la Religion.

L'aduouë bien auoir recogneu dès le commencement, que ledit Duc n'auoit pas grande enuie de faire la paix, mesmes lors

qu'il refusa de faire semondre sa M. de se faire catholique, car c'estoit le chemin qu'il y failloit tenir pour y paruenir : mais aussi ie descouurois en mesme temps qu'elle estoit la cause qui l'en degoustoit, & si ie me suis trôpé en quelque chose ça esté d'auoir esperé que le temps & l'expérience luy feroient changer d'aduis; aussi s'il n'est aduenu ç'a esté plus par vn vray iugement de Dieu que par raison : car ie puis dire que le ciel & la terre ont comme à l'enuie l'un de l'autre combattu son dessein depuis le commencement iusques à la fin, & neantmoins chose quelconque n'a peu l'en diuertir, & souuent a esté pour cela, mais à tort, accusé d'irresolution au fort de la constance, lors que la nature, les vœux d'un chacun, & mesmes ses propres paroles & actions le couuroient & desguisoient entierement, & spécialement aux yeux de ceux qui discouroient & iugeoient des choses, parce que luy estoit plus honorable & utile, comme ie confesse auoir fait souuent.

MAIS le desir de regner & tenir le premier lieu, a tousiours transporté ce Prince, s'estant promis de pouuoir par les armes & sa vertu, atteindre à ce degré pour luy & pour les siens, fauorisé du pretexte de la religion, lequel luy auoit acquis la bien-veil-

lance publique , & assisté des forces & moyens du Roy d'Espagne , & peut-estre que s'il eust eu plus d'heur , prou de gens n'eussent fait cōscience d'excuser, voire fauoriser son dessein, à cause des aduantages que dieu luy auoit mis en main, lesquels dōnoient occasion de croire qu'il vouloit faire vn changement en cet Estat, comme d'aduatūre il fust aduenū, s'il n'eust rencōtré sa M. laquelle a eu le courage de defendre la iustice de sa cause, assisté de Dieu & de sa noblesse, mais ledit Duc se deuoit au moins departir apres la bataille d'Iury, en laquelle il esprouua sa fortune; ou bien au retour d'Espagne du President Ianin, par lequel il fut esclaircy que le Roy d'Espagne pretendoit à la couronne pour luy & pour sa fille, & sur tout apres la conuersion, de sa M. que le pretexte de la religion avec la bienveillance publique luy manquoient avec les moyens & la faueur du Pape & dudit Roy d'Espagne, les ministres desquels vouloient qu'on preferast à luy M. son nepueu. S'il eust prins ce party comme il en estoit conseillé par tous ceux qui l'aymoiet, quelle gloire n'eust-il acquise? Il eust iustificié la memoire des siēs, ses actions passees, & celles de ses amis & du party : l'on luy eust attribué vne grande partie de l'honneur de la

conuerſion de ſa Maieſté, la France eult eſtimé luy deuoir ſon ſalut & ſon repos: quelle fortune auſſi n'eult-il faiçte? car il eult vny à luy d'un lien indiſſoluble, les bonnes villes du Royaume, auſquelles il auoit commandé, & la nobleſſe qui l'auoit ſuiuy; pluſieurs eſtimét auſſi qu'aucuns catholiques qui ont ſuiuy ſa Maieſté ſe fuſſét apres ce deuoir tres-volontiers attachez à ſa fortune pour aſſeurer les leurs, ſuiectz à ce changement, comme ſont ordinairement celles qui ſe forment durant vne telle guerre & confuſion, qu'a eſté la noſtre depuis 5. ans, & ſi le Roy traictant avec luy eult accordé quelque aduantage aux Catholiques comme i'eſtime qu'il eult faiçt, l'on luy eult donné l'honneur & le gré, de ſorte qu'il eult eſté difficile d'empêcher qu'il eult eſté recogneu à l'aduenir chef du party Catholique en ce Royaume, & que par ce moyen il n'eult conſerué ſes intelligences eſtrangères, lesquelles ſe fuſſent d'autant plus volontiers entretenues avec luy qu'eſtant ſon credit & pouuoir plus grand & aſſeuré, ſon amitié eult eſté auſſi plus vrile: d'auantage le Roy eult eſté contrainct pour auoir la paix de luy accorder, & à ceux de ſa maiſon & autres ſes amis & partiſans, pluſieurs auantages particuliers,

particuliers, qui l'eussent rendu plus puissant que iamais, dont il eust esté difficile voire impossible que sa Maiesté l'eust privé quand elle l'eust voulu faire, principalement tant que la diuersité de la religion eust duré en ce Royaume: car ce pretexte eust tousiours seruy d'arboutant & d'appuy à sa conservation: bref il pouuoit par la paix s'establir avec tant d'honneur & telle aüthorité & puissance que saditte Maiesté n'eust gueres moins eu besoing de luy & de son seruice, qu'il eust eu de sa bonne grace & bien-veillance, le Royaume estant en l'estat qu'il est.

MAIS Dieu n'a voulu qu'il soit ainsi succédé; pour manifester sa iustice: neantmoins ie diray que si vn autre que ledit Duc eust conduict ces affaires, que le Royaume eut plus paty qu'il n'a fait: car certainement il a tousiours contredit aux violences publiques & priuees, & à la dissipation de l'Estat, dequoy se plaignoient ceux qui vouloient rendre nostre guerre perpetuelle, & à dire le vray, il a fait paroistre auoir trop bon naturel pour durer & comparer avec telles sortes de gens, lesquels vouloient à quelque prix que ce fust ruiner le Royaume, cuidans s'agrandir aux despens d'un chacun.

M A I S le bon heur de la France s'y est opposé, fauorisé de la grace de Dieu qui s'est seruy de la magnanimité & vertu de sa Majesté, à laquelle apres sa diuine bonté, la gloire en est deuë principalement. Toutesfois, Monsieur, la playe est encores ouuerte de sorte que sa Maieité a besoin d'estre mieux seruie que iamais pour la garde du tout, car vn petit accident la peut rendre aussi dangereuse que deuant. Sur tout nous deuons supplier sa Maieité de mieux mesnager sa personne qu'elle n'a fait, car en sa conseruation consiste le salut du Royaume, elle a voulu iusques icy & peut-estre qu'il a esté necessaïre se hazarder pour asseurer les autres, mais il faut que d'oresnauant que les autres se hasardent pour l'asseurer. Car s'il en mesaduenoit nos maux deuiendroient à l'instant plus perilleux que iamais. C'est peut-estre ce qui nourrit & entretient encores le reste des factions qui nous troublent, voire qui en preparent de toutes nouuelles, non moins dangereuses que les autres; vous y voyez plus clair que moy, & sçauiez encore mieux par quel moyen l'on y peut remedier, partant ie m'en tairay & mettray fin à mon discours. Je vous supplieray le prendre en bonne part, & croire qu'il est veritable, &

ie demeureray eternellement.

Vostre seruiteur, DE NEYVILLE.

Les presens Memoires acheuez d'Imprimer l'Imprimeur en a recouuré une copie plus ample que celle dont il s'estoit seruy, de laquelle il a tiré les lieux cy dessous, qui seruent à rendre cét ouurage plus parfaict, & font voir que Monsieur de Villeroy y auoit mis la main plus d'une fois.

PAg. 214. li. 5. apres ce mot, *d'oppression*, adioustez.

Av resté qu'elle loüoit la resolution que ie prenois de me retirer en ma maison quand la paix seroit desesperee : que c'estoit le vœu d'un homme de bien obligé à la France comme i'estois, & qu'elle me donneroit pour ce faire routes les assurances & sauuegardes qui me seroient necessaires; Mais qu'elle vouloit que ie la visse encor' vne fois auant que me retirer, quand ce ne seroit que pour luy rendre compte de la response & volonté dudit Duc.

Pag. 216. lig. 23. apres ce mot, *la paix*,

H h ij

adioustez, Tout cela me seruit fort peu, car ledit sieur Marechal pechoit en ceste opinion aussi bien que les autres, & sa Maiesté mesme estoit de cet aduis, encore qu'elle me fit vne ample declaration de sa bonne volonté au repos public & au contentement particulier dudit Due, comme de sa grace elle fit en mon endroit.

Je retournay encores à Soissons vers ledit sieur Duc de Mayenne à qui ie rendis compte de tout ce que dessus, sans toutes-fois luy dire ce que i'estimois le pouuoir aigrir & esloigner du desir de la paix: ie cogneus bien qu'il n'estoit pas trop cōtent de mon retour, & que ie luy eusse faict plus de plaisir de gaigner ma maison; & que durāt mon absence aucuns luy auoient fait trouuer mon voyage tres-mauuais & preiudiciable à sa reputation & au party, à cause que les zēlez qui possedoient lors la ville de Paris & les estrāgers, en monstrent estro mal contents, nonobstant les lettres de desadueu qu'il leur auoit escrit, à quoy il estimoit que moy n'estant aupres de luy il les confirmeroit de plus en plus.

Pag. 252. lig. 29. apres ce mot, *parlé*, adioustez.

Nous nous separasmes là dessus, certes à mon grand regret, parce que i'auois bien

fait estat d'engager si auant ledit affaire par l'accord de ladite cessation, que l'on eust esté contrainct de part & d'autre de passer outre; mon pere n'en fut moins marry que moy, car ils'en estoit faict fort & m'auoit faict venir exprés pour cela. Toutesfois ie receus, &c.

Pag. 253. li. 24. apres ces mots, *tendoit le plus*, adioustez, Cecy fut cōsulté avec ledie Duc de Parme & l'Euesque de Plaisance, lesquels ie recogneus craindre extrememēt que l'on attachat quelque negotiatiō avec sa M. pour quoy que ce fust, tant ils se défoient desia dudit Duc de Mayenne, auquel aussi ils desguisoient encores le bût du Roy d'Espagne: car Iean Baptiste de Tassis, ayant remis à l'en esclaircir, quand il arriua apres que la ville de Paris seroit secouruë, cōme il fut blessé d'une grāde arquebuzade deuant Corbeil, de laquelle l'on pesoit qu'il deust mourir, il ne luy en dit rien dū tout, nō plus que ledit Rossieux qui l'auoit accompagné en Espagne, lequel disoit que sa Maiezté Catholique auoit chargé du tout ledit Tassis; Et toutesfois Monsieur le President Ianin m'a dit auoir appris en son voyage d'Espagne qu'il n'en auoit esté rien celé audit Rossieux, mais qu'ils l'auoient si bien gagné qu'il estoit plus à eux qu'à

son maistre, comme il tesmoigna tres-bien en ceste occasion, que ledit Duc de Parme & les autres ministres du Roy d'Espagne resolurent courir audit Duc de Mayenne la volonte de leur maistre, par ce qu'ils recognoissoient qu'il auoit quelque autre dessein, que ledit Duc de Parme s'en vouloit retourner avec son armee, & que leur partie n'estoit pas encore si bien dressée qu'ils desiroient pour la manifester à d'autres qu'à ceux desquels ils estoient bien asseurez: Et si ledit Rossieux eust esté fidelle à son maistre il l'eust lors esclairey de toutes choses, surquoy il eust peu prendre quelque autre party que celui qu'il print. Et veritablement plusieurs iugeoient, que ledit Duc de Parme n'auoit secouru Paris pour le deliurer; mais pour en acquerrant à son maistre & à luy la gloire & obligation de ce succez, rendre ses forces plus necessaires, car il eust pris ladite ville de Corbeil plustost & à meilleur compte s'il eust voulu: & s'il se fust adressé à Melun deuant l'autre, peut-estre qu'il en eust eu bon marché.

D'AVANTAGE il pouuoit encore retenir l'armee, & apres la prise de Corbeil entreprendre encore quelque autre chose, & mesme s'attaquer à S. Denis, qui n'estoit

encores fortifié ; car la Maieſté eſtoit foible, & ledit Duc de Parme n'auoit faute de moyens d'entretenir voire de rafraifchir ſon armee : Mais il fut poſſible bien aife qu'elle ſe deſſit & conſumaſt deuant ledit Corbeil, tant il donna mauuais ordre à la nourriture d'icelle, expres pour auoir excuſe de ſ'en retourner, & en ce faiſant laiſſer ladite ville de Paris & le party en neceſſité, car ledit ſiege de Corbeil dura plus de ſix ſepmaines; Et ſi d'abordee il euſt voulu l'afſaillir par où il le battit & print à la fin, comme il luy fut remonſtré ; il l'eueſt forcé en huit iours, ſans reietter, comme il fit, cette longueur ſur la faute des poudres & balles à canon, & partant ſur ledit Duc de Mayenne, lequel faiſoit plus qu'il ne pouuoit pour le ſecourir ; Et toutesfois l'autre le deſcrioit tant qu'il pouuoit. S'il le faiſoit pour mieux faire les affaires du Roy Catholique ou non, comme aucuns ont voulu dire, ie m'en rapporte à ce quien eſt: mais il eſt certain qu'il y feit plus de mal que de biens ſ'y gouuernant comme il fit, car les hommes & principalemēt les François ſe gaignent & acquierent bien pluſtoſt par les beauxfaits que par la neceſſité, comme les Eſpagnols ont depuis eſprouué.

P. 259. lig. 10. apres ces mots *ſeroit enuoyé*

Hh iiij

adioustez, Donques suiuant l'aduis desdits sieurs ie m'acheminay à Soissons & vis sa Maiesté en passant à Senlis, à laquelle ie dis, & pareillement à Messieurs Do & de la Noüe le desplaisir que i'auois receu desdites lettres, les plaintes que i'en auois faites, & auois deliberé de renouveler ce que le President Ianin m'en auoit escrit: & comme i'allois trouuer ledit Duc expres pour les faire reformer & remedier au mal qu'elles auoient fait, mais qu'il estoit question de sçauoir si sa Maiesté feroit renouveler & prolonger lesdits passeports, si ledit Duc vouloit changer sa depesche, puis que les deux mois accordez par les premiers estoient quasi expirez, remonstrant à sa Maiesté que c'estoit chose qu'elle deuoit accorder, affin que ceste faute que l'ô disoit ne proceder de mauuaise volonté, comme ledit Ianin m'auoit escrit, ne fust cause de rompre ladite assemblée sans laquelle la paix ne se pouuoit faire: Sa Maiesté me promit faire rafraischir lesdits passeports, pourueu qu'elle vit & fuist d'accord de la forme & substance des lettres que l'on escriuoit aux Prouinces.

Et d'autât que ledit sieur Ianin m'auoit escrit que ledit Duc l'ëuoioit en Espag. & qu'il desiroit sçauoir deuant son partemēt si sa M.

en traitât la paix se laisseroit aller de vuidier par accord aussi les differents qu'elle auoit avec le Roy d'Espagne, afin d'en respondre où il alloit, ie pris la hardiesse d'en demander à sa Maiesté sa volōté, & luy dis que s'estoit pour la faire sçauoir audit President, adioustant qu'il me sembloit que sa Maiesté ne deuoit faire difficulté d'en dōner parole, d'autant que cela pourroit seruir grādemēt à faire ladicte paix, estant certain que le vent qui venoit de ce costé-là nourrissoit plus qu'autre chose la tourmente qui troubloit ce Royaume: ioint que ie sçauois que ledit Duc de Mayenne ne traitteroit iamais sans ledit Roy, & que ce seroit l'honneur & l'aduantage de sa Maiesté de mettre la Chrestienté en paix avec son Royaume. Ce qu'il prist de sa grace en tresbonne part, me disant qu'elle auoit si grande enuie de deliurer son peuple d'oppression, qu'elle estoit resoluë d'y ceder du sien pour y paruenir, & suiure en cela le conseil des plus sages, pourueu qu'on le fist dignement & honorablement, & non autrement, car elle vouloit plustost perdre la vie que de rien faire & passer indigne de sa Maiesté & de la memoire de ses predecesseurs; dequoy elle me promit de donner aduis audit President Ianin, comme à vn

chacun de son affection au repos du Roy-
aume. Cecy fut par l'aduis de Monsieur de
la Nouë que j'ay tousiours trouué tres-fi-
delle à son maistre, & prudent en toutes
choses, mais principalement en ses der-
niers iours à desirer & conseiller laditte
paix, comme il faisoit ordinairement, com-
battant l'opiniastreté ou malice de certains
flateurs ou ignorans, lesquels soustenoient
que sa Maiesté pouuoit mieux venir à bout
de ses ennemis par la guerre que par vn ac-
cord; & partant la dissuadoient d'entendre
à toute reconciliation, & toutefois eussent
esté bien marris de se relascher d'un seul
point de leurs profits & commoditez or-
dinaires pour pourueoir aux necessitez de
sa Majesté & du Royaume.

E S T A N T en la ville de Senlis le sieur
Alphonse d'Ornano Colonnell des Corfes
qui auoit passé à Guise, où il auoit veu ledit
Duc de Mayenne, me dit en la presence de
sa Maiesté par son commandement, qu'il
auoit aprins de bonne part, que ledit Duc
estoit si bien lié & engagé avec les Espa-
gnols qu'il ne pouuoit plus traiter avec sa
Maiesté sans eux, comme celuy qui depen-
doit du tout de leur volonté, dont ie luy
respondis que ie n'en auois encores rien
sceu, mais que l'on luy auoit peut-estre

voulu dire que ledit Duc auoit promis aux Espagnols de ne traitter sans eux, comme ie ne doutois point qu'il n'eust fait; que ie l'estimois honnestes & raisonnable, veu le secours qu'il en auoit receu. Toutesfois qu'il ne s'ensuiuoit pas que pour ceste promesse il dependit d'eux entierement, ny fust obligé de preferer leur contentement au bien de la Religion, du Royaume & de sa maison.

Pag. 261. lig. 1. apres ces mots, *laditte assemblee*, adioustez.

LEDIT Duc ayant veu laditte reformation l'approuua, mais voulut que ie fisse dire à sa Maiesté qu'il n'entendoit pour cela prescrire aux deputez qu'il enuoyeroit querir, la charge qui leur seroit donnee aux Prouinces, avec lesquelles il vouloit sçauoir, s'ils ne pourroient pas venir seurement, quand bien elle leur seroit donnee contraire au seruice & aux intentions de sa Maiesté, & au contenu desdittes lettres reformees; affin que personne de part & d'autre ne fust trompé & eust occasion de se plaindre de ce qui en succederoit, disant aymer mieux n'auoir lesdicts passe-ports que de respondre desdittes commissions, assuiettir lesdicts deputez & ceux qui les enuoyoient à la

volonté d'autrui, & mettre ses amis en peine & hazard à faute d'esclaircissement & intelligence.

Pag. 262. lig. 17. apres ce mot *Chartres* adioustez.

Nous demeurâmes plus de six semaines sans auoir réponse dudit sieur de Fleury à la depesche qui luy auoit esté enuoyée par ledit trompette, dont il s'excusoit sur ledit siege qui occupoit du tout sa Maiesté, & certaines lettres interceptes, lesquelles il disoit auoir mis sa Maiesté en plus grande deffiance que iamais de ladite assemblee; & mesmes vne dudit Duc de Mayenne adressante à l'Euesque d'Amiens du secōd de Feurier, par laquelle il luy mandoit ne vouloir entendre à la paix avec saditte Majesté, & que tout ce qu'il faisoit avec elle n'estoit que pour faciliter laditte assemblee, & avec icellō pouruoir à leurs affaires: Mais ledit sieur de Fleury vint sur la fin de Mars aupres de Soissons avec la coppie desdites lettres & plusieurs memoires qui auoient esté surpris, lesquels il auoit charge de faire voir audit Duc, & sur ce entendre & s'asseurer encores de sa volonté, & de l'effet auquel il vouloit employer laditte assemblee deuant que de liurer lesdits passeports. Entre

autres interceptes, il y en auoit vne de l'Es-
cuesque de Plaisance au Cardinal Caietan,
par laquelle il luy mandoit que l'on ne se
leuoit fier audit Duc de Mayenne ny à
luy: que ceste assemblée dont on parloit
ne luy pouuoit estre que suspecte, combiẽ
que ledit Duc l'eust asscuré la faire pour
nieux affermir & establir le party: il ap-
porta aussi yne certaine remonstrance de
Panigarolle au Duc de Sauoye, par laquel-
le il luy persuadoit d'entreprendre la con-
queste de ce Royaume, comme celuy qui
deuoit auoir plus de part, & y mieux fai-
re ses affaires que tous autres: adioustant
que le Roy seroit bien-tost maistre de la
ville de Chartres, & qu'apres il auoit deli-
beré de faire vne assemblée seulement des
Princes, Officiers de la Couronne & de
plusieurs Prelats, & mesmes y appeller
ceux du Parlement, pour donner ordre à
ces affaires par leur aduis, & sur tout au fait
de la Religion; où si l'on pouuoit fai-
re que Monsieur de Mayenne fist trouuer
quelques vns de sa part, plusieurs esti-
moient qu'il en reüssiroit vn grand bien:
qu'il auoit charge de le dire audit Duc; &
que par mesme moyen l'on y pourroit
traitter & accorder le commerce general,
ne priant d'entreprendre le voyage de la

part dudit Duc avec Monsieur de Videuil, le. Et d'autant que ie luy dis qu'il ne falloit pas esperer que ledit Duc le nous promit, si ce n'estoit pour traicter dudit commerce, il escriuit que l'on nous enuoyast des passeports fondez sur ce subiet, en attendant qu'il vceist ledit Duc, lequel estoit party de Soissons & allé à Meaux, pour voir si de là il pourroit secourir ladite ville de Chartres qui commençoit à estre pressée. Il donna iusques au bois de Vincennes, où il fut cōseillé de reformer le Parlement de Paris, & en oster quelques officiers à la poursuite des zelez de ladite ville, lesquels estoient lors si supportez des grands, & redoutez des autres qu'ils osoient & faisoient tout ce qu'ils vouloyent, & souuent deffaisoient ou blasmoient au soir ce qu'ils auoient fait ou approuué le matin, comme il aduient ordinairement à ceux qui suivent plustost leurs passions que la raison, lesquels accusent d'iniustice tout ce qui leur desplaist: ceux-cy en feirent de mesme en ceste occasion, car quelques iours apres ils blasmerent ladite purgation, faite toutesfois à leur postulation, comme disoient ceux qui auoyent suiuy ledit Duc: car il m'auoit laissé en ladite ville de Soissons, mais l'ayāt aduertie de l'arriuee dudit sieur de Fleury,

de ce qu'il auoit apporté, & de l'instance qu'il faisoit de parler à luy, il me manda le mener à Chasteau-Thierry où il estoit rebroussé, ne se sentât assez fort pour secourir laditte ville de Chartres: ioint qu'il ne dispoist des forces estrangeres comme il vouloit, de sorte que laditte ville se rendit bien tost apres.

Pag. 265. l. 9. apres ces mots, *tost apres*, adioustez. M A I S le dit sieur de Fleury s'estant rencontré avec le sieur de Rosne deuant que de partir, recueillit de luy certaines ouuertures pour faciliter ladite paix, & croyant qu'il ne les mettroit en auant sans dessein, il les rapporta à sa Maïesté, laquelle en fit cas, par ce qu'il disoit qu'il ne falloit s'arrester à laditte assemblee generale pour traiter, mais seulement en faire vne particuliere en quelque lieu, sous pretexte de parler de la deliurance de Monsieur le Duc de Guise, & là enfoncer vne bonne negotiation en laquelle on employast des personnes qui affectionnassent le bien & aduantage particulier de Paris, sans tant s'arrester au general comme on auoit tousiours fait, s'offroit d'y seruir volontiers si l'on trouuoit bon qu'il y fust employé, comme celuy qui desiroit & affectionnoit plus le bien dudict Duc

que toute autre chose, adioustât que ce ne seroit iamais faict que de remettre les affaires à ladite assemblée, cela fut cause que sa Maiesté enuoya ledit sieur Fleury avec d'autres passe-ports lesquels faisoient mention de la deliurance dudit Duc de Guise, entre lesquels il y en auoit vn pour ledit sieur de Rosne: mais d'autant qu'apres que ledit sieur de Videuille & moy eusmes receu les premiers que l'on nous auoit enuoyez pour traicter dudit commerce, ledit Duc nous auoit presse de partir, i'arriuy à Fleury aussi tost que le maistre de la maison avec ces derniers passeports, où il me dit lors le langage que luy auoit tenu ledit sieur de Rosne, l'estime que sa Maiesté en auoit faite, & ce qui s'en estoit ensuiuy; de quoy ie fus assez estonné, car il ne m'en auoit rien dit, & n'auois point ouy parler de ce moyen ny de chose qui en approchast, & vous assure que i'en fis plus d'estat, cognoissant l'humeur de l'auteur: neantmoins voyant que sa Maiesté l'auoit prins autrement avec ceux de son conseil, lesquels sur cela attendoient peut-estre que Monsieur de Videuille & moy leur ferions d'autres ouuertes que celles dont ledit Duc de Mayenne nous auoit donné charge, ie ne voulus passer outre sans leur faire
sçauoir

ſçauoir que ledit ſieur de Videuille & moy n'auions autre pouuoir que de parler du commerce pour la ville de Paris, & eſcouter ce que l'on nous voudroit propoſer pour le public, pour à noſtre retour informer & aduertir ledit Duc du changement, afin qu'il depeſchaft ledit ſieur de Roſne, ou nous eſclaircir de ſa volonté ſur les ouuertures qu'il auoit faiçtes, & meſme ſur la deliurance de monſieur ſon nepueu, laquelle ie luy conſeillois d'embrasſer & affectionner puis que l'occafion s'en preſentoit. Ce fut ledit ſieur de Fleury qui alla, &c.

Pag. 266. lig. 20. apres ces mots, *l'incommodoit grandement*, adiouſtez.

QUAND ledit Duc me vit il fit dire à M. Pinard que ie deſirois parler à luy, ſans que ie le ſceuſſe : ledit ſieur Pinard fit reſponſe, qu'il ſeroit bien ayſe de me voir. Je fus mandé ſur cela & prié par ledit Duc de me preſenter, ce que ie fis à la meſme heure : ledit Pinard m'apperceuant par vne canonniere d'une porte de la ville laquelle eſtoit terrasſee, me pria de paſſer du coſté du pōr, par où il me pourroit receuoir & parler plus commodement ; ce qu'il fit accompagné des gentils-hommes & principaux capitaines & habitans qui l'asſiſtoient, & m'ayant retiré en vne boutique entre la

porte du pont & celle de la ville, ie luy dis en la presence de cinq ou six qu'il auoit retenus, n'estre venu là pour luy donner Conseil de se rendre ou faire chose indigne d'un homme d'honneur, luy ny son fils, d'autant qu'aymant mes amis comme moy mesme, ie ne voulois aussi leur conseiller chose que ie ne voulusse faire estant en leurs places; ioinct que i'auois si bonne opinion d'eux, & de ceux qui les assistoient, que quand i'en userois autrement ils en feroient peu de compte: partant ie desirois seulement qu'ils sceussent que i'estois en l'armee prest à les assister & seruir avec mes amis quand ils en auroient besoing, n'estant arriué que depuis vn iour avec le sieur de Fleury, venu pour parler de la paix. Ledit sieur Pinard me remercia de mon Conseil & de l'offre que ie luy faisois: me dit qu'ils estoient tous resolu de mourir plustost que de commettre vne lascheté; qu'ils estoient plus de mil hommes de guerre sans les habitans, regorgeoient de courage & de bonne volonté de ce faire, l'ayant ainsi promis & iuré tous ensemble sur les saintes Euangiles depuis le siege, & esperoit que Dieu les fortifieroit iusques à la fin: qu'ils s'estoient cōme

ledit Duc s'estoit attaqué à eux avec vne armee si foible & mal pourueüe de munitions qu'estoit la sienne pour forcer vne telle place, garnie de tout ce qui estoit necessaire pour bien se deffendre: qu'apres que la ville feroit prise il auroit encore affaire au Chasteau qui estoit imprenable, & qu'il scauoit aussi qu'il auoit desia consumé ses poudres & ses balles sans rien aduancer, & que son canon estoit allé à la picoree: que ledit Duc feroit bien mieux au lieu de s'opiniastrer à ce siege de se seruir de luy & de ceste occasion pour faire la paix à l'honneur de Dieu; qu'il scauoit que sa Maiesté y estoit tres disposee & ne l'en esconduiroit, & que de sa part il sacrifieroit volontiers sa vie: Qu'il estoit bien aduertty que sa Maiesté auoit pris Chartres, & qu'on la verroit bien-tost aux tranches de l'armee dudit Duc, toutesfois il l'auoit supplié de ne se haster, tant il estoit asseuré de son baston. En verité, Monsieur, ie ne fus marry de le veoir en ces propos, croyant certainement, veu sa contenance laquelle estoit encores plus asseuree que ses parolles, qu'il auoit le ieu encor meilleur qu'il ne disoit, de sorte que ie luy dis seulement qu'il ne s'attendist à ceste negotiation de paix,

ny que ledit Duc se departist dudit siege que par force ; que ie scauois qu'il auoit enuoyé querir des balles & des poudres, & qu'elles deuoient arriuer le lendemain, partant qu'il songeast seulement à se bien deffendre, & ne se fier partrop à la bonté de sa place & de ses forces que de mespriser ny retarder vn bon secours s'il le pouuoit auoir. Estant en ces termes l'allarme se donna dedans la ville à cause de quelque boutique enfoncée dedans la riuere, qu'ils apperceuoient que nos soldats vouloient retirer à la faueur de la trefue accordee durant ce Parlement, de sorte que ie fus contrainct me retirer sans voir le Vicomte de Comblizy, ny entretenir dauantage son pere, qui ne parla iamais à moy que tout haut & en la presence de ceux qu'il auoit appelez.

M A I S la ville fut prise bien tost apres par faute de garde à la bresche; l'on dit que ceux qui y auoient esté commis n'estimoient pas qu'on deust aller alors à l'assaut, pource qu'il y auoit plus de quatre heures que le canon auoit cessé, de sorte qu'ils auoient remparé laditte bresche, que la montee d'icelle s'estoit renduë plus difficile à cause qu'il auoit pleu & que le iour commençoit à faillir, telles longueurs pro-

edant des difficultez que faisoient les Capitaines estrangers d'aller à l'assaut, encore qu'ils eussent obtenu la poincte, au grand esplaisir des François: mais ils vouloient qu'on ostat encotes quelques places qui es voyoient tout à descouuert, auât qu'aucun y allast, & ledit Duc n'auoit pour ce faire, tant il estoit mal pourueu de balles & de poudres, ayant consumé celles qui luy estoient arriuees: Mais comme l'on estoit en ceste conrestation, les soldats s'ennuias de telle longueur, l'un d'eux se coula d'une mur rompuë, où il s'estoit logé avec quelques autres iusques sur la bresche avec vne hache à la main, où ne voyant que trois ou quatre soldats de garde commença à les combattre & à appeller ses compagnons qui furent suivis du reste de l'armee, de sorte que ladicte ville fut ainsi forcee alors que l'on y pensoit le moins.

A D V I S
DE MONSIEVR
DE VILLEROY
à Monsieur le Duc de Mayenne,
publié à Paris apres la mort du
Roy; sur la fin de l'an M.D.LXXXIX.

De cét
aduis
est fait
mentio
cy des-
sus.

MONSIEVR,
Chacun dit n'y auoir que trois
moyens par lesquels l'on puisse remedier
aux desordres du Royaume.

L'VN de composer avec le Roy de Nauarre.

L'AUTRE de reünir tous les Catholiques pour s'opposer ensemble à l'establissement du Roy de Nauarre, sous la reconnaissance & obeysance d'un Prince du sang nommé & esleu regent du Royaume, durant la prison de Monsieur le Cardinal de Bourbon, & declarer son successeur apres son deceds, du gré & consentement de nostre S. pere le Pape & du Roy d'Espagne.

LE troisieme est, de se ietter entre les bras du Roy d'Espagne & luy donner telle

art & autorité en ce Royaume qu'il aye occasion de ne rien espargner pour nous proteger & garentir.

Surquoy ie vous diray, qu'il me semble que vous deuez aduiser sur toutes choses à prendre la resolution que vous prendrez la plus iuste & vtile au public que vous pourrez, afin qu'elle prospere.

Au moyen dequoy il faut que vous ayez euant les yeux, & pour fondement principal, de ne rien desirer, entreprendre, ny poursuivre qui soit contraire à l'honneur de Dieu ny au bien public du Royaume.

Ceux de vostre maison ont acquis le credit & pouuoir en iceluy, & la reputation en la Chrestienté dont vous iouyssez à present, ayant cōstamment defendu la querelle de Dieu contre les heretiques, & fait paroistre leur affection au soulagement du peuple.

Vous ne deuez en façon quelcōque vous le partir du chemin qu'ils vous ont tracé, car c'est la plus belle roze de vostre chapeau, de laquelle s'il aduenoit que vous fussiez priué par vostre faute, vostre nom deviendrait aussi cōtemptible qu'il a esté honoré iusques à present: les vostres en ont esté aussi si aloux & soigneux, que toutes les fois que nos Roys ont traicté avec lesdits

heretiques & surchargé leurs subiects ils ont plustost souffert qu'approuué lefdits traictez & surcharges, & ont esté les premiers à monter à cheual, & les derniers à en descendre, quand il a esté question de faire la guerre ausdits heretiques.

C'est pour cela que nous auons veu apres la mort de Messieurs vos freres (que Dieu absolue) tant de villes, de noblesse & d'autres personnes conspirer ensemble contro leur souuerain naturel Prince & seigneur, ayant creu qu'il auoit auancé leurs iours expres, par ce qu'ils soustenoient les Catholiques, & poursuuoient le soulagement du peuple.

ET si en la prise & leuee des armes & depuis, nous eussions tesmoigné par effects auoir plus de soin de l'un & de l'autre que nous n'auons eu, vostre party seroit à present plus fort qu'il n'est; mais il semble que Dieu ait permis yne telle & si signalce subleuation autant pour nous chastier nous mesmes que pour faire sentir la rigueur de la iustice aux auteurs de nos miseres: qu'ainssi ne soit depuis la mort du Roy, les choses nous ont moins succédé heureusement que nous esperions, car nous nous promettions, & non sans raison, que la noblesse Cathol. qui l'auoit assisté se ralieroit avec

nous pour nous ayder à deffendre nostre Religion, & qu'elle ne s'assubectiroit iamais à vn Prince heretique, que nous retirerions incontinent Monsieur le Cardinal de Bourbon qui estoit entre les mains d'un Catholique, & que les heretiques seroient contraincts se retirer delà la riuere de Loyre où nous porterions la guerre.

M A I S au contraire de cela nous voyons non seulement ladite noblesse plus affectiõnee au seruice du Roy de Nauarre quasi qu'elle n'estoit au feu Roy, & celle qui nous assiste tres-refroidie & degoustee de continuer à ce faire. Ledit sieur Cardinal auoit esté liuré entre les mains des heretiques, dont il nous reste bien petite esperance de le retirer par la force, & le Roy de Nauarre plus puissant en ses prouinces que deuant.

Dequoy nous deuons à bon droit d'autant plus nous accuser nous mesmes que les Catholiques qui assistent ledit Roy de Nauarre: car par nos deportemens nous les auõs plustost effarouchez & degoustez de nostre party que conuiez d'y entrer, ils ont esté constituez prisonniers, rãçonnez, pilliez en leurs maisõs & bassouiez par tout, nonobstant vos commandemens & declarations, de sorte qu'ils ont recogneu ny

auoir avec nous aucune feureté pour eux; dauantage vos gens de guerre ont vescu si licencieusement & debordement qu'ils vous ont fait hayr (s'il m'est permis d'ainſi le dire) de Dieu & des hommes.

QVI croira que vous combattez pour la foy Catholique & pour le ſoulagement du peuple voyant à voſtre ſuite Dieu mal ſeruy comme il eſt, ſon S. nom blaſphémé, les Eglises pillées, meſmes celles que nos aduerſaires auoient conſeruees, les benefices conferez à perſonnes indignes, les biens des Eccleſiaſtiques ravis, & toutes ſortes d'impietez, ſacrileges, volleries, rauiſſemens & autres meſchancetez commiſes ſans iuſtice, police, ordre, ny reigle aucune? Eſtimez-vous que Dieu & le peuple vous fauoriſent, tant que ces deſordres regneront? Il ſuffit bien aux perſonnes priuees de viure honneſtement & ſans faire tort à autrui: mais cela n'eſt aſſez aux Princes qui gouernent les affaires publiques, il faut qu'ils donnent ordre que perſonne ne face mal ny outrage à autrui, car il n'importe gueres à ceux qui ſouffrent quelque iniure, qui que ce ſoit qui la leur face, & ſ'en prennent touſiours aux ſuperieurs.

N O S T R E vnion abonde en des-vnion

depuis les pieds iusques à la teste, nos villes sont remplies de desobeyssances, de violences, de confusion, & pauureté; la charité & la iustice, vertus tres-agreables à Dieu, & les anciennes marques des Catholiques, en sont bannies entierement, l'auarice & l'enuie qui sont les nourrissees de la discorde y dominant totalement, les Magistrats & officiers y sont gourmandez & sans authorité, & principalement ceux qui n'approuuent telles violences, ils ne iouissent de leurs gaiges ny de leurs rentes & biens, non plus que les bons Bourgeois & Marchands qui sont outre cela priuez du commerce, dequoy ils souloient nourrir leur famille; & les artisans aussi ont si peu de pratique, qu'ils sont contrains de quitter leurs mestiers, & quelquefois deuenir volleurs pour viure. Les gens d'Eglise n'y sont pas plus à leurs aises, car leurs biens des champs estans pilléz & rauagez autant ou plus que les autres, ils n'ont dequoy subuenir aux charges de leurs Eglises, ny à leur nourriture, & neantmoins sont tous les iours comprins aux daces & coruees comme les autres Habitans, auxquelles il faut qu'ils contribuent.

Si quelqu'un s'en lamente & blasme les auteurs de tels desordres il est incon-

rinent accusé d'heresie & de trahison, l'on l'appelle Catholique simulé, fauteur d'heretique ou polytique. Il est iugé & condamné & quelquesfois executé sans estre ouy; neantmoins qui hait la police humaine, hait quand & quand la iustice diuine: car ce sont deux choses conioinctes si estroittement, qu'elles ne peuvent subsister aucunement entre les hommes l'une sans l'autre, vn Magistrat ne peut estre bon politique, qu'il ne soit premièrement tres-grand zelateur de la Religion, car la Religion est le fondement principal de toutes republiques, & la fin d'un bon politique est d'instituer les mœurs de ces concitoyens à vne iustice ciuille, & s'accorder les vns avec les autres, & entretenir & conseruer vne paix & tranquillité commune, faire que chacun soit gardé en ce qui est sien, que les hommes communiquent ensemble sans fraude, & que l'insolence des meschans soit punie, lesquelles choses ne peuvent auoir lieu ny durer, si elles ne sont basties sur ce premier base de religion & pieté.

Et toutesfois nous recognoissons & confessons tous estre du tout impossible, que les choses subsistent long-temps en

l'estat auxquelles elles sont, car toutes personnes desesperent de leur salut, & sont si incommodées, qu'elles n'ont quasi plus de quoy viure : Les gentils-hommes qui vous assistent sont priuez de la iouissance de leurs biens, & neantmoins subiects à des despences tres-grandes à cause de vostre séjour aux villes, de sorte qu'il faut qu'ils abandonnent, ou que vous les secouriez d'argent, à quoy il est impossible de fournir, qui est ce qui en rend tant de mal contents comme il s'en voit; car celuy qui souffre en seruant attribué ordinairement à faute de bonne volonté ce qui procede d'impuissance; tant la nécessité est indiscrete. D'autre part les villes sont grandement tourmentées par les ennemis qui sont respandus aux environs d'icelles où ils ne permettent entrer aucuns viures, de sorte qu'elles sont reduites en telle nécessité qu'il est fort à craindre que les habitans changent la bien-veillance qu'ils vous ont portée iusques à present, qui est le seul gage, avec lequel vous les pouuez dire vostres, en vn desespoir tres-dommageable, & croyez que l'exemple d'une en attirera plusieurs autres à ce point, vous sçavez que les peuples sont naturellement enclins à esperer plus qu'ils

ne doiuent, & à endurer moins qu'il n'est nécessaire.

MONSIEVR, les choses estans reduictes aux termes susdits, le mieux que vous puissiez faire pour le seruice de Dieu, la conseruation du Royaume & pour vostre particulier honneur & bien, est d'essire vn chemin par lequel vous puissiez bien-tost par la rigueur des armes, ou par la douceur, deliurer ces peuples des vexations qu'ils endurent, affin qu'ils ayent moyen de viure, & en viuant glorifier Dieu, & vous continuer leur bien-veillance.

POVR ce faire l'on vous a proposé les trois moyens predits, pour lesquels ie vous supplie prendre en bonne part que ie vous represente ce qu'il m'en semble, avec la liberté, & la mesme affection qu'il vous plaist me porter, le seruice que ie vous ay votié & ma conscience m'obligent de ce faire.

IE commenceray par le premier, sçauoir est de composer avec le Roy de Nauarre, mais ie vous diray estre chose à laquelle il me semble que vous ne deuez entendre aucunement tant qu'il demeurera separé de l'Eglise comme il est, d'autant que vous offenseriez mortellement & pareillement vostre honneur & tous les Catholiques du Royaume & de la Chrestienté, de sorte

que chacun attribueroit à pleine ambition
vos actions passées, les présentes & futures,
& seriez abandonné de Dieu & des hom-
nes.

Et aussi que vous tomberiez en tel mes-
pris mesmes dudit Roy de Nauarre, qu'il ne
seroit aucun conte de vous, parce qu'il ne
recueilleroit de vostre amitié & reconcilia-
tion le fruit qu'il auroit attédu, car les Ca-
holiques esliroient incontinent vn autre
chef que vous pour les deffendre contre le
Roy de Nauarre, sous l'obeyssance du-
quel vous n'aurez en ce faisant le credit de
vous ranger.

Mais si le Roy de Nauarre vouloit de
cœur & d'affection, comme il conuient re-
tourner au giron de l'Eglise, & nostre saint
Pere luy recevoir & le rédre digne de por-
ter le sceptre François, en ce cas comme il
y auroit plus à vider quel'intérest de M.
Cardinal de Bourbon, auquel l'on pour-
roit pouruoir par quelque expediēt, de son
druis & consentement mesme; i'estime
qu'il seroit plus vtile au public & à vous
mesme d'accorder avec luy que de suiure
oute autre voye.

CAR vous rempliriez ce Royaume d'v-
ne paix vniuerselle, & pourriez par mesme
moyen estre cause de cōposer les differents

qui troublent la Chrestienté, parce que ie pense que ledit Roy de Nauarre ne feroit difficulté de remettre & ceder quelque partie de ses droicts pour paruenir à la iossifiance paisible de ceste Couronne.

Q V E L L E plus grande gloire pourriez-vous acquerir que d'estre authœur d'un tel heur en ce Royaume & en la Chrestienté, l'un vous deutoit la saluatiō, & l'autre vous l'obligeriez à vous honorer eternellemēt; car si vostre guerre dure, ie tiens le premier pour destruiēt, & croy aussi que l'autre en patira grandement.

P A R E I L L E M E N T ie ne doute point que n'obtinssiēz facilement dudit Roy de Nauarre le recognoissant pour Roy, tout ce qu'en pourriez honnestement desirer pour vostre particuliere satisfaction: tel aduantage seroit à vous & aux vostres plus honorable, certain & paisible, que ne seroient à l'aduanture tous les autres, que les occasions qui se presentent vous pourroient promettre: car il ne feroit subiect à reproches; & toutes grandeurs qui ne sont fondees & basties sur fondement legitime, ne peuuent estre honorables ny durables; si vous desirez que vos enfans heritent du fruit de vos traux, & rendre vostre memoire heureuse, cheminez

nez en iustice, & preferez par effect l'honneur de Dieu, & le bien de vostre patrie à toute autre consideration.

Pour negotier ce fait comme il appartient il seroit necessaire au prealable d'en aduertir nostre saint Pere le Pape, afin de l'entreprendre avec sa permission, d'autant qu'estant chef de l'Eglise les portes d'icelle ne peuuent estre ouuertes audit Roy de Nauarre que par son autorité.

IL seroit raisonnable aussi d'en aduertir le Roy d'Espagne, pour l'obligation que la cause & vous luy auez de son assistance, & ne luy donner occasion de se plaindre de vous, ny trauerser ce dessein, par lequel il seroit assurez vostre intention estre de vider la querelle du Royaume de Nauarre à son aduantage & contentement, & quand & quand l'obliger à ne donner secours ny assistance à ceux qui troublent ses affaires aux pays Bas par les moyens & termes qui seront ingez les plus propres & conuenables.

IL seroit à propos pareillement d'en faire sçauoir autant à Monsieur le Cardinal de Bourbon, puis que nous l'auons reconnu pour Roy, & que nous auons iuré & déclaré le Royaume luy appartenir, afin de n'estre arguez de legereté ny d'infidelité.

K k

C'ESTS deuoirs accomplis il faudroit enuoyer quelque personnage de qualité deuers ledit Roy de Nauarre, pour luy faire entendre vostre deliberation & s'esclaircir de la siene, & voudrois ceste legation estre publiee & sceuë d'un chacun.

CAR il aduiendroit que ledit Roy de Nauarre se refoudroit & obligerait de se reconcilier à l'Eglise, aux charges & conditions qui luy seroient proposees pour la securité des Catholiques, & pour la paix publique, ou qu'il refuseroit de ce faire.

S'IL en faisoit refus vous destourneriez par ce moyen plusieurs Catholiques qui le suiuent, auxquels il a promis de se faire Catholique, & a imprimé en l'esprit qu'il ne tient qu'à vous qu'il ne l'aye desia fait, & mesmes que ne desirez aucunement la paix & conseruation du Royaume: mais que vous voulez l'occuper & demembrer, ou en inuestir ledit Roy d'Espagne, dequoy ils seroient esclaircis par vostre proposition, de sorte, qu'ils ne pourroient plus douter avec raison de son intention ny de la vostre. Ce qui rendroit les opiniastrés au party dudit Roy de Nauarre apres vostre-ditte Declaration, sans excuse conuaincus tout à fait de crime de leze Maiesté diuine & humaine, & iustificeroit grandement vo-

estre dessein enuers Dieu & les hommes qui est ce qui vous peut autant honorer que profiter.

MAIS ledit Roy de Nauarre eslisoit l'autre voye, comme par raison il semble qu'il deuroit faire tant pour le salut de son amo que pour asseurer sa grandeur, il ne seroit plus question que de chercher les moyens d'en aduâcer l'execution le plus promptement & diligemmēt que faire se pourroit, pour tant plustost deliurer ce pauvre Royaume du danger où il est, & des maux qu'il souffre.

POVR ce faire ie serois d'aduis qu'on cōmençast par vne cessation d'armes pour six mois, tant pour donner relasche au pauvre peuple, que pour pouuoir plus commodement & seurement cōuoquer les Estats du Royaume par l'aduis & autorité desquels il me semble que toutes choses deuroient estre concluës & executees pour plus grand de seureté.

A ceste fin il seroit expedient que lesdits Estats feussent assemblez en vne ville, en laquelle ils fussent libres de dire & faire ce qu'ils iugeroient estre vtile au public, & qu'ils fussent seulement assistez des officiers de la Couronne.

QUE ledit Roy de Nauarre, M. le Car-

dinal de Bourbon & vous promissiez de suiure, obseruer & accomplir de bonne foy tout ce qui seroit resolu & arresté par laditte assemblée, qui ne seroit contraire ny preiudiciable à la religion Catholique, ny aux loix du Royaume, ny seulement aux droits des Princes nos voisins & amis, à tous lesquels ie desirerois procurer pareil repos qu'à nous mesmes. Ie desirerois sur toutes choses estre aduisé & resolu en icelle des moyens, pour pouuoir asseurer les Catholiques de l'obseruation de la foy & des promesses dudit Roy de Nauarre, iusques à ce qu'il eust donné occasion par sesdits comportemens d'en prendre entiere asseurance.

COMME seroit de luy faire iurer, promettre & accorder de pouruoir aux offices de la courõne, aux gouuernemens, charges de Lieutenans generaux des prouinces, Presidens des Cours souueraines, Aduocats & Procureurs generaux d'icelles, capitaineries de places & citadelles, & autres pareilles charges de cõsequence, sinõ personnes ayans fait profession de la religion Catholique depuis certain tẽps qui seroit prescript, de ne mettre aussi aucune garnison dãs les villes de l'Vnion & autres qui sont dans le Royaume qui pourroieẽt apporter ialousie

aux Catholiques, de suivre le reglemēt qui seroit fait pour la nomination des benefices, la conseruation des personnes & biens Ecclesiastiques, de l'observation du Cōcile de Trente, la ré-vniō à l'Eglise Catholique de ceux qui en sont separez, la succession à la Couronne apres son deceds, & mesmes pour l'effet de son mariage; avec protestation & declaration solēnelle d'absolution, resolution & de charge entiere du serment de fidelité en son endroit, en cas de contrapétion, reuocation & rupture de sa part des choses susdites, & autres qui y seroient arrestees & accordees, en laquelle obligation seroient priez d'interuenir nostre S. Pere le Pape, & autres Princes que l'on iugeroit estre plus à propos en la forme & maniere qui seroit resoluë.

IL faudroit aussi aduiser à dōner tel contentēment à M. le Cardinal de Bourbon que toutes choses s'effectuassent de son bō gré & cōsentemēt, ce que les Catholiques qui l'ōt reconnu pour Roy sont obligez de procurer & obtenir pour luy, pour satisfaire à leur honneur & deuoir; & ne doute point que M. le Cardinal, pour l'affection singuliere qu'il porte à nostre religion & à l'Estat ne cedast beaucoup au desir public, quand es choses seroient traictées avec le respect

& la dignité qu'il cōuient: ce luy seroit aussi plus de gloire d'estre cause de la restauratiō de la religion, & du salut du Royaume que de consentir que la guerre fut continuée & poursuiue plus auant sous son nom, avec tel hazard de l'vn & de l'autre, qu'est celuy qu'elles courent par la longueur d'icelle.

L'ON traitteroit aussi de la deliurance de M. le Duc de Guise, avec la dignité & l'aduantage que merite la memoire de feu Monsieur son pere, & pareillement de celle de M. le Duc d'Elbœuf, la liberte desquels est desiree d'vn chacun.

I'AY parle de composer & vider tout à fait le different qui est entre le Roy d'Espagne, & ledit Roy de Nanarre à cause dudit Royaume de Nauarre, & quand & quand obliger le Roy de Nauarre sous les conditions susdites à ne dōner aucun ayde, force ny assistance à la Roynie d'Angleterre ny aux Estats des pays Bas qui font la guerre audit Roy d'Espagne, afin de retrācher enticrement toutes les occasions qui pourroient à l'aduenir rompre & alterer la paix entre les Catholiques, à quoy il faudroit aussi pouruoir par l'entremise, & à la requeste desdits Estats, pour procurer de tout nostre possible à nos amis & voisins pareille paix qu'à nous mesmes; & vous diray que

si chacun vouloit embrasser ceste reconciliation de cœur & d'affection, elle pourroit estre cause d'establiſſir vne telle paix & con-
corde en la Chreſtiété, que le nom de Dieu
en ſeroit grandement glorifié : car ie croy
que ledit Roy d'Eſpagne ſeroit tres-côtent
de recouurer ſes pays d'Hollâde & Zelan-
de & autres villes qu'on luy detient, & laiſ-
ſer tous ſes voiſins en paix & ſes Eſtats pai-
ſibles au Prince ſon fils, à quoy peut eſtre
que la Roynes d'Angleterre ne contrediroit
auſſi de ſon coſté, pour deliurer ſes ſubiets
de l'incommodité de la guerre qu'elle ſou-
ſtient contre le Roy d'Eſpagne, & faudroit
apres conſpirer de faire la guerre au Turc
pour occuper les ambitieux, & ceux qui ne
peuent demeurer en repos.

Voila (Monsieur) le bien & auantage du-
quel i'ay conſideré que vous pourriez eſtre
auteur ſuiuant ce premier chemin, mais
il faudroit que vous vous y reſoluſſiez au
pluſtoſt, ſi vous deſiriez vous en ſeruir,
d'autant que le retardement rendra tous
les iours les choſes plus difficiles, à cauſe
des deſſeins & preparatifs que font nos
voiſins des neceſſitez qui nous accablent
& des engagemens plus grands, auſquels le
Roy de Nauarre embarque iournellement
la Nobleſſe Catholique qui l'aſſiſte.

Donques ie serois d'aduis que voust ten-
rassiez ce moyen par preference à tous au-
tres pour les raisons susdites, encores que
ie ne sois sans doute que ledict Roy de Na-
uarre y vueille entendre, considéré ses de-
portemens passez & actions presentes en-
uers nostre saint Pere le Pape & Monsieur
son Legat, & aussi pour la gñde con-
fiance qu'il a ausdits heretiques, avec les-
quels il s'est grandement obligé, & les
moyens dont il vse enuers les Catholiques
qui l'accompagnent, auxquels il distribuë
tous les iours les biens de l'Eglise, & de
ceux qui portent les armes contre luy, en la
iouyssance & possession desquels il promet
les maintenir par la crainte & apprehension
qu'il leur donne d'vne nomination estran-
gere, qu'il espere vaincre ses aduersaires &
s'establiir avec sa religion en despit de tous
ceux qui s'y opposent, desquels il dit reco-
gnoistre la foiblesse procedante de la diui-
sion des chefs, de l'ambition des Princes
estrangers qui les assistent, des desordres qui
regnent parmy eux qui desesperent tout le
monde, de manquement de zele & affe-
ction à l'aduancement de nostre cause, de
la legereté & inconstance des peuples qui
se lassent d'endurer, & finalement du desef-
poir auquel chacun est de pouuoir sortir

de ceste guerre, la pourfuiuant par le mesme chemin que nous l'auons commencee & continuee iusques à present.

MAIS (Monsieur) luy ayant mis ce marché en la main, le refusant, comme il seroit seul coupable enuers Dieu & les hommes des maux de la guerre, que vous seriez contraint de continuer pour deffendre l'honneur de Dieu à cause de son obstination: ie suis certain que cela fortifieroit grandement vostre party dedans & dehors le Royaume, & pourriez apres librement & en saine conscience auoir recours au deuxiesme moyen qui a esté proposé, comme ie serois d'aduis que feissiez, & pour cefaire que missiez peine de gagner les Catholiques qui suiuent le Roy de Nauarre, & les obliger à s'opposer avec vous à l'establissement d'iceluy: & pour y paruenir plus facilement il faudroit veritablement donner contentement aux Princes du sang Catholiques, & specialement à Monsieur le Cardinal de Vendosme, & Comte de Soissons, en leur accordant le rang & lieu que leur maison, & condition merite, apres toutesfois s'estre faicts absoudre suffisamment par la Saincteté de la faute qu'ils ont faicte d'auoir recogneu, & seruy ledit Roy de Na-

uarre comme ils ont faict.

CAR retirant & contentant lesdits Princes vous iustificerez aussi grandement vos desseins & intentions, attirerez à vous les Catholiques qui en sont separez, confirmerez & assurez grandement ceux qui nous assistent, & peut-estre que Messieurs les Ducs de Nevers, & Longueville s'y rengeroient, & pareillement le grand Prieur de France, & les Ducs de Montmorency & de Rets, & les autres officiers de la Couronne qui sont Catholiques, comme desesperez de la conuersion du Roy de Nauarre, sous lesquels Princes & Seigneurs recognoistroient qu'aurez esté auteur d'un tel bien.

PLVSIEURS pensent que n'aurez grande difficulté à gagner les Princes du sang, d'autant qu'on dit qu'ils sont assez mal edifiez du Roy de Nauarre, lequel faict peu de compte d'eux, comme ceux desquels il n'est sans ialousie, faisant demonstration de vouloir preferer à eux le fils du Prince de Condé né depuis sa mort aduenue comme chacun sçait, auquel on dist qu'il a donné le gouuernement de Guyenne en qualité de premier Prince du sang, mais l'honneur & aduantage qu'ils tireroient de vostre amitié, & l'obligation qu'ils ont

de deffendre l'honneur de Dieu, & nostre Religion les y attireroit encores plustost que toutes autres choses, & mesmes s'ils voyoient que le Pape, & le Roy Catholique feussent ioincts avec vous en ce dessein.

A quoy il faudroit tendre pour le fortifier de l'autorité, du nom & des moyens de l'un, & de la force & puissance de l'autre, pour rendre les effects d'iceux tels que les gens de bien desirent.

CAR encore que lesdits Princes du sang accompagnez desdits Catholiques fussent ralliez avec vous, neantmoins vous ne seriez encores assez fort & puissant pour subjuguer ledit Roy de Navarre estant appuyé d'Angleterre, & des Princes & Cantons Protestans, comme il seroit, sans l'estre aussi de sa Sainteté, & dudit Roy Catholique, auxquels il seroit necessaire à ceste fin donner contentement.

A quoy personne ne contrediroit quand l'on cognoistroit par les effects, vostre but estre de conseruer la Couronne à qui elle appartient en conseruant nostre Religion; car l'on n'entreroit en doubte du changement de l'Estat ny du demembrement d'icelle, qui sont deux choses que redoubtent le plus les François, & lesquels

font eschapper plusieurs personnes avec ledit Roy de Nauarre, cuydant n'y auoir moyen quelconque d'euitier l'vn & l'autre que par son establisement, d'autant qu'ils pensent que veilliez partager l'estat avec vos amis, ou en inuestir ledit Roy Catholique, tant pour ce que vous auez iusques à present reietté toutes voix & ouuerture d'accord & reconciliation avec ledit Roy de Nauarre, iacoit qu'il ait fait sentir assez qu'il se fera Catholique, comme pour auoir attendu à faire declarer & proclamer Roy Monsieur le Cardinal de Bourbon, qu'il ayt esté tout à fait entre les mains & au pouuoir dudit Roy de Nauarre, & n'avez deuant ny apres aucunement recherché l'amitié des autres Princes du sang, en quoy les confirment encores dauantage que toute autre chose les propos & articles & escripts publiés en ceste ville en faueur dudit Roy d'Espagne, les pratiques que font ses ministres & leurs procédures en toutes choses.

MONSIEVR, vostre dessein estant iuste feroit loüé & approuué d'un chacun dedans & dehors le Royaume; il n'y auroit Prince ny Potentat Catholique qui n'y entraist apres sa Saincteté & ledit Roy d'Espagne, de sorte que ledit Roy de Nauarre

demeureroit seul avec les heretiques facile à dompter.

LES DITS Princes du sang vous seroient si obligez de leur auancement & grandeur, qu'ils le recognoistroient enuers vous & les vostres selon vostre desir, à quoy vous pourriez encores les astraindre dauantage par quelque alliance que l'on pourroit faire avec vostre maison: dauantage ils auroient tousiours tel besoin de vous & de vos amis qu'ils despendroient plustost de vous que vous ne dependriez d'eux: car ayāt le Roy de Nauarre & les partisans pour ennemis coniurez, ils n'y pourroient resister sans vostre ayde & celle de vos amis, lesquels ie m'asseure que vous sçauriez tres bien mesnager & augmenter.

Et pour ce faire, ie dis que ceste resolution vous seroit fauorable, car en preferant le salut & bien du Royaume à toutes considerations particulieres, vous seriez pour cela plus aymé & honoré d'un chacun, que si vous faisiez autrement, estant certain que l'opinion de la vertu & équité, est la vraye fontaine d'honneur & d'amitié.

DAVANTAGE les Princes estrangers recognoissant que vous pourriez suivant ce chemin vous mieux passer d'eux que si

vous entrepreniez quelque autre vol, pri-
feroient dauantage vostre amitié, car les
hommes & principalement les grands font
ordinairement moins de compte de ceux
qui ne se peuent passer d'eux que des
autres.

Av moyen dequoy (Monsieur) ie vous
conseille de suiure ceste seconde voix, si
vous ne pouuez tenir la premiere, laquel-
le pour mon regard i'estime plus vtile au
public, plus courte & assuree que l'au-
tre: car que sçauons nous si mesdits sieurs
le Cardinal de Vendosme & Comte de
Soissons voudroient abandonner ledit
Roy de Nauarre & se ioindre à vous pour
la ialousie & deffiance ordinaire & ancien-
ne que leur maison a tousiours eüe de lavo-
stre? qui nous assurera quand ils s'y resou-
droient, qu'ils soiēt suiuis des Catholiques
qui assistent ledit Roy de Nauarre, sans les-
quels peut-estre leur venue & assistance
troubleroit & diuiseroit bien autant nostre
party, & partant l'affoibliroit plus qu'elle
ne le fortifieroit, parce qu'il seroit tres-dif-
ficile de faire goustier à Messieurs les Ducs
de Sauoye & de Lorraine l'aduantage que
lesdits Princes prerendroient, & qu'il se-
roit raisonnable leur donner? car chacun
pense bien autāt à soy & à ses affaires qu'au

public; & neantmoins i'estime que l'amitié desdits Ducs nous est necessaire continuās à faire la guerre audit Roy de Nauarre, lequel se voyant assailly de ceste façon, desesperé de vostre amitié, ne faudroit à les rechercher, & mettre toutes pierres en œuvre pour nous mal-faire. Et croy qu'il aymeroit mieux promettre le partage de l'Estat que sa ruine & nostre prosperité.

DAVANTAGE il est tres certain que pour vaincre le Roy de Nauarre tout à fait, & mesmes pour luy resister, nous auons quasi autant de besoin que deuant des deniers & des forces du Pape & du Roy d'Espagne, specialement iusques à ce que nous eussions nettoyé quelques Prouinces du Royaume des moyens & reuenu desquels nous peussions estre secourus, car la guerre ne se peut faire sans argent, dont vous estes tres-mal fourny : qui sçait encores à quelles conditions la Sainteté & le Roy d'Espagne voudroient continuer leur assistance : serions-nous si mal aduisez de croire que l'un & l'autre, & principalement le dernier, voulussent employer leurs moyens, reculer & incommoder leurs affaires, qui ne sont pas petites, seulement pour faire les nostres & conseruer ce Royaume en son entier ? par raison d'Estat le dict Roy d'Espagne deuroit plustost

nous ayder à nourrir la guerre en ce Royaume qu'à l'acheuer & finir ; & à demembrer la couronne qu'à la conseruer en son entier s'il perdoit l'esperance de se la mettre sur la teste : ses ministres disent que le Duché de Bourgongne luy appartient ; celui de Bretagne aux Infantes ses filles ; & pareillement les Comtez de Bloys , de Coucy , & d'Auuergne , pour le moins ledit Roy voudroit estre asseuré pour son argent , qu'il luy seroit fait droit desdites pretentions , & qu'il seroit receu paisible possesseur desdites Prouinces , qui sont les plus nobles & importantes du Royaume , & dont la distraction l'affoibliroit grandement : nous deuons croire aussi que sa Maiesté Catholique favorisera & assistera tousiours plustost Monsieur le Duc de Saouye en ses desseins , pour estre son gendre , que nos Princes , si d'aduanture il n'en vouloit eslire quelqu'un , & luy donner sa fille aisnee en mariage , & pour dot les susdites pretentions avec les moyens de le rendre Roy paisible de ce Royaume , auquel cas certainement l'on pourroit esperer tout bon & heureux succez de ce dessein , tât pour le seruice de Dieu , le bien de la Chrestienté , que le salut particulier de ce Royaume : mais il seroit question de dispo-

ser.

ser sa Maieſté Catholique à ce point, à quoy faire ie recognois y auoir pluſieurs difficul-
tez & longueurs durât la deciſiõ, deſquel-
les il ſeroit fort à craindre l'empirement de
nos affaires à cauſe des preparatifs qui ſont
de toutes parts pour nous engloutir.

D'AVANTAGE il faut conſiderer que ledit
Roy d'Eſpagne preferera touſiours la grã-
deur de ſa maiſõ à toutes autres, il n'a qu'un
ſeul fils aſſez delicat & de foible cõplexion
qui eſt ieune, ſi Dieu l'en priuoit, ſa fille aiſ-
née heriteroit de tous ſes Eſtats, & par cõ-
ſequent celuy qui l'auroit eſpouſee, c'eſt la
raiſon pour laquelle il ne l'a encores ma-
tiee, & ſemble qu'il l'ait dediee à vn Prin-
ce de ſon nom & ſang, toutesfois ie ne
veux m'oppoſer à ceux qui deſirent qu'on
traicte ce moyen enuers ledit Roy d'Eſ-
pagne pour obtenir de luy ſ'il eſt poſſi-
ble ce mariage : car ie recognois que ce
ſeroit vn ſouuerain remede à nos affai-
res, ne pouuant traicter avec ledit Roy de
Nauarre : mais ie deſire grandement ſi
c'eſt choſe que l'on vueille faire, qu'on
n'y perde vne ſeule heure de temps pour
les raiſons ſuſdittes, & que nous ne nous
repaifſions d'eſperance qui nous bande les
yeux & nous conduiſe à noſtre ruine &
perdition entiere au lieu de noſtre ſalua-

tion. Car cependant & en attendant que nous en soyons esclaircis, nous serons contraincts pour nous deffendre contre ledit Roy de Nauarre de faire entrer en nostre Royaume des forces estrangeresqu'on nous offre, lesquelles y estans nous assuiectiront facilement à la volonté de ceux de qui elles dépendront, qui est ce à quoy il semble que tendent ceux qui ne se donnent pas grand'peine du changement & dissipation del'Estat.

I E ferois moins de doubte de la volonté du Pape à nous assister en ceste occasion, que de celle du Roy Catholique, car sa Saincteté s'est desia laissée entendre qu'il falloit choisir vn Prince du sang Catholique pour heritier du Royaume apres le decceds de monsieur le Cardinal de Bourbon, laquelle elle disoit tenir cōme pour mort en ce mōde, afin de dōner occasion à tous les Catholiques de se reünir à son obeyssance contre lesdits heretiques, & conseruer le Royaume à la maison de Bourbon, à laquelle il appartient. Mais i'estime que sa Saincteté ne pourroit fournir seule aux despēs&frais necessaires pour faire la guerre telle qu'il conuient audit Roy de Nauarre, sans quoy il nous seroit impossible d'en sortir, estans si desnuez d'argent que nous

sommes, dequoy l'on se pourra esclaircir à l'arriuee de son Legat : Mais il est certain que l'assistance de sa Sainteté apporteroit beaucoup moins d'ombrage aux François & à tous les autres Princes de la Chrestienté, que ne feroit celle du Roy d'Espagne, laquelle sera tousiours si suspecte aux François, que la seule ialousie que ledit Roy de Nauarre leur en donnera sera d'oresnauãc la chaisne, avec laquelle, ne se faisãt Catholique, il retiendra à son seruice les Catholiques qui sont avec luy, & les menera gayement à la mort pour s'establis avec sa religiõ.

C'EST pourquoy ie ne pourrois approuuer en faõ quelcõque l'opiniõ de ceux qui voudroiet que nous nous reiettrassions tout à faict entre les bras dudit Roy d'Espagne, que luy donnassions des marques & tiltres d'une souueraine puissance en ce Royaume, & que luy engageassions nos villes & nostre foy, qui est le troisieme moyen de remedier à nos maux qui vous a esté proposé, car ce seroit ouuertement enfreindre nos loix & par trop offencer nostre honneur & deuoir.

CE seroit nous precipiter entre les mains d'un Prince caduc qui n'a qu'un fils tresdelicat & ieune, sous la puissance d'une nation tres-contraire à la nostre, en mœurs,

& façon de viure, de laquelle depuis vne certaine année auons esté nourris en telle ialousie que nous en auons quasi oublié l'ancienne haine que nous souliions porter aux Anglois.

CE seroit aussi mettre nostre saint Pere le Pape, & le saint Siege avec le college des Cardinaux, & tous les autres Princes & Potentats de la Chrestienté en telle ialousie pour la crainte qu'ils ont desia de la grandeur & puissance Espagnolle, que nous les aurions en ce dessein plustost pour contraires que fauorables; ce qui nous preiudicieroit grandement.

DAVANTAGE il ne faut pas croire que les thresors & moyes du Roy d'Espagne soiēt infinis, c'est veritablement vn puissant & tres-grand Prince, mais il est aussi chargé de tres-grandes & excessiues despées pour la conseruation de ses Estats qui sont separez les vns des autres: il a la guerre au pays Bas qu'il a soustenuë à tres-grands frais depuis vingt ans, laquelle durera encore long temps ayant affaire à la Roynie d'Angleterre qui est en tres-grande prosperité, & l'incommode grandement sur la mer.

ET s'il aduenoit que le Turc luy recommençast la guerre, comme il ne faut pas douter qu'il n'en fut recherché & sollicité

par ledit Roy de Nauarre qui n'oubleroit rien pour se deffendre & mal faire à ses aduersaires: Sadite Majesté Catholique seroit contraincte d'y employer ses meilleures forces, & moyës, car il preferera tousiours le salut & la deffence de ses Estats à toute autre chose : quoy aduenant il luy seroit tres-difficile de nous continuer l'ayde & secours qu'il nous auroit promis.

DAVANTAGE nous aurions formellemēt contraires à ceste resolution les Estats du Royaume, & mesmement toute la noblesse & les officiers qui font la plus forte partie d'iceluy, tant ils ont leur honneur & deuoir en recommandation, & apprehenderoient vne domination estrangere: les Ecclesiastiques n'en feroient peut-estre pas moins, voyans & sentans les impietez & maux que la longueur de la longueur de la guerre apporte : à quoy ils se resoudroient bien plus ouuertement si sa Saincteté n'approuuoit ce dessein, & croy qu'ils seroient suiuis en cela des principaux Bourgeois & habitans des villes du Royaume, & peut-estre du corps mesme entier d'icelles pour se deliurer des maux & necessitez de la guerre & euitier la domination estrangere: de maniere que vous seriez abandonné quasi de toute la France, & contrainct de

pourfuiure ceste guerre avec des Estrangers desquels vous vous trouueriez peut-estre bien empesché.

DAVANTAGE comment pourriez-vous engager vostre foy & personne au seruicé dudit Roy d'Espagne, luy promettre nos villes, & luy donner autorité & puissance en ce Royaume sans la permission de M. le Cardinal de Bourbon, puis que vous l'avez reconnu pour Roy & souuerain seigneur, ou du moins sans l'aduis & consentement des trois Estats du Royaume & legitime-ment assemblez? car estant François comme vous estes, & officier de la Couróne, vostre honneur & deuoir vous obligent aussi de conseruer & garder les loix du Royaume. Vous pourriez encores moins avec raison disposer des droicts des villes & de la souueraineté d'icelles en qualité de Lieutenant general de l'Estat Royal & Couronne de France, d'autát que ceste charge ne vous a esté cõmise que par prouisiõ en attendant l'assemblee generale des Estats, pour cõseruer & maintenir ce Royaume en son entier avec la religiõ Catholique; dequoy si vous vous dispensiez, tenez tout assuré qu'en seriez blasmé, ce qui vous seroit reproché eternallemēt, & que peu de persõnes vous y assisteroient & scruiroient, specialemēt.

si elles cognoissent pouuoir sans ce faire estre maintenus en leur religion.

IE croy aussi que ceux qui procureroient vn tel aduantage audit Roy d'Espagne feroient peu pour sa reputation, & pour le bien de ses affaires & mesmes pour son mescontentement, car c'est vn Prince tres-curieux & ialoux de son honneur qui n'a iamais rien entrepris contre ses voisins sans raison & consideration, & qui a demonstre vouloir plustost entretenir la paix de la Chrestienté que de la troubler; Ce seroit aussi l'embarquer à vne guerre tres-perilleuse, incertaine & difficile, pleine de peines, d'ennuys & de souey, & dont les mauuais succeds luy pourroient à l'aduenture engendrer en ses propres Estats, & mesme apres son deceds, des affaires tres-fascheuses & domageables, car ayant les François & le Royaume sur ses bras, il se tireroit pour luy & les siens à iamais l'inimitié d'vne natio tres-belliqueuse, qui voudroit s'en resétir lors que l'occasion s'en preseteroit, chose qui luy seroit d'autât plus facile à faire, si elle se trouuoit cōmandee & regie par vn Prince genereux & guerrier, particulièrement offencé de luy, & qui auroit pour amys & adherans l'Angleterre & les Princes & cantons Protestans, avec ceux qui

auroient desir de s'accroistre aux despens dudit Royd'Espagne & deses Estats, ou diminuer son authorité & puissance en la Chrestienté, laquelle on scait desia estre par trop enuiee & insupportable à plusieurs.

MONSIEVR, ie ne vous presenteray les hazards & desaduantages que courreriez & ausquels vous pourriez estre subiect en vostre particulier, vous donnant tout à faict audit Roy d'Espagne, cōbattant avec ses forces & deuenant son pensionnaire & subiect: car ie croy que vous les auez sagement considerez cōme chose qui concerne particulièrement vostre personne, & la fortune de messieurs vos enfās, lesquels ne sont à mespriser ny l'experience que vous en auez desia faicte, que ie ne cotteray ny specifieray point pour n'offencer persōne, seulemēt ie vous supplie de me permettre de vous dire, ques'il faut que vous continuiez à rēdre obeysāce & subiectiō à quelqu'un, vous acquererez tousiours plus de gloire, de grādeur & de biēs pour vous & les vostres en vous assubiectissant aux loix du Royaume, & au cōmandemēt d'un Prince François, qui ē faisāt autremēt, pourueu que vous cognoissiez pouuoir en ce faisāt conseruer nostre religiō, laquelle ie seray tousiours

iours d'aduis, comme i'ay desia dict, que vous preferiez à tout autre consideration.

MAIS l'on dict que si vous ne contentez du tout ledit Roy d'Espagne il se seruira d'autres que de vous, & que vous demeurerez en ce faisant sans appuy entre deux forces, qui vous maistriseront avec honte & dommage.

MONSIEUR, ceux qui mettent en auant tels propos ont ce me semble bien petite cognoissance de l'estat auquel se trouue le Royaume; de la force & puissance d'iceluy, & quand & quand des moyens que vous & les vostres aurez tousiours de bien & mal faire à vos amis & aduersaires.

Si les ministres dudit Roy d'Espagne vouloient prendre ce chemin il faudroit qu'ils se seruissent de François ou estrangers.

ILs publient qu'ils traitteront avec messieurs les Cardinaux de Vendosme & Comte de Soissons, qui seroient accompagnez de messieurs les Ducs de Neuers, de Longueuille, & de Montmorency, lesquels ils veulent que nous croyons qu'ils attireront facilement à leur dessein avec la noblesse & plusieurs villes du Royaume.

PEUT-estre que ce seroit chose à laquel-

le il'y auroit quelque apparéce d'adiouster foy & auoir esgard, si vous aliez à l'estourdy recognoistre ledit Roy de Nauarre pour Roy, & vous ioindre à luy sans la permissiõ du Pape, & sans le consentemēt du Card. de Bourbon, deuant qu'il se fust recõcilié à l'Eglise, & auoir pourueu à la seureté des catholiques du Royaume, d'autant que lesdits sieurs Princes & villes catholiques indignes de ce, pourroient se resoudre de se rallier avec ledit Roy d'Espagne pour defendre nostre religion, laquelle ils verroient que vous auriez abandonné: mais c'est vne faute que vous n'avez garde de faire & en laquelle personne ne vous conseillera iamais de tomber; dauantage ie fais grand doubte que lesdits Princes, noblesse, & villes feussent si disposees à contenter ledit Roy d'Espagne, cõme ses ministres se promettent, ny à s'attacher à luy, pour les mesmes raisons qui vous en auroient empesché, sçachant aussi que la coustume d'Espagne est de faire de leurs filles deux gédres, c'est à dire, de donner esperâce du mariage d'icelles à plusieurs, pour s'en ayder, sans les leur deliurer: mais que quand lesdits Princess' embarqueroient, chacun sçait qu'ils n'auroient pas grande fuitte en ce Royaume sans vous & les vostres, car l'on attri-

bueroit ce qu'ils feroient avec lesdits Espagnols à pure ambition, attendu les deportemens passez des vns & des autres.

Mais au deffaut desdits Princes du sang, & des autres susdits, on adiousté que le Roy d'Espagne se seruiroit de messieurs les Ducs de Sauoye & de Lorraine, avec lesquels, & sa puissance, il s'empareroit du Royaume, où le demembreroit. Veritablement ie voy que lesdits Princes ne feroient pas grande conscience, ny difficulté de se ioindre au desir dudit Roy d'Espagne en ce dessein, pour l'esperance qu'ils auroient de s'en preualloir & s'agrandir, & de faict il semble desia qu'ils n'y soient que trop disposez & preparez, & mesmes que ce soit leur resolution; qui est la raison entre toutes les autres qui esmeut & incite plus les vrais François, & vos bons seruiteurs à vous conseiller, Monsieur, d'entendre à composer nos diuisions, & d'aduiser à vous mieux asseurer des moyens avec lesquels vous pourrez preseruer ce Royaume du peril qui le tallonne que vous n'avez encores faict; mais ie tiés pour certain que s'ils entreprenoiént de ce faire sans vous & vos amis, qu'ils maudiroient l'heure de l'auoir commencé, mesmement si vous vous accordiez avec ledit

Roy de Nauarre en la forme qui a esté dite, car le nombre desdits François qui les assisteroient seroit bien raccourcy, & n'y auroit faute de moyens de leur tailler de la besongne en leur propre pays avec ceux auxquels leur dessein plein d'ambition seroit des-agreable, & à contre-cœur : & si la France a résisté autresfois à toutes les puissances & forces de toute la Chrestienté ensemble, comme elle a faict, sans qu'elle aye rien gaigné sur icelle, à present qu'elle regorge de gens de guerre, qu'elle seroit assistee de ses voisins, qu'il n'y a bon François qui ne voulut auoir achepté cherement vne guerre estrangere, pour se deliurer de l'intestine ; ie vous laisse à penser si nous aurions le moyen de nous deffendre desdits Princes ioincts audit Roy d'Espagne.

MONSIEVR, certainement ie ne croiray iamais que le Roy d'Espagne entreprenne vn si haut dessein avec lesdits Ducs seulement, quoy que dient ceux qui mettent telles propositions en ieu, lesquels parlent & iugent des affaires du Royaume, comme personnes qui sont informés de l'estat d'iceluy par gens qui les flattent, & qui veulent pescher en eau trouble & s'enrichir par leur moyen, lesquels seroient peut-

estre les premiers à les vendre & trahir en la poursuite de leur entreprise : ie veux croire aussi que les desseins dudit Roy d'Espagne seront tousiours plus confidez & moderez que ne sont les parolles de telles gens, lesquels ie cuide qu'ils iettent au vent autant & plus pour vous picquer & esmouuoir à faire ce qu'ils desirent en vous donnant martel desdits Princes, que pour enuie qu'ils ayent de vous quitter, & s'adresser à ceux desquels l'aduancement & grandeur leur seroit à bon droit plus suspecte que la vostre.

Qvoy qu'il y ayt, quiconque entreprendra d'assubiectir les François à vn Prince estranger, y fussiez-vous resolu, M. il faut qu'il fasse estat qu'il sera tres-mal accompagné & suiuy d'eux, & partant qu'il faudra qu'il fasse la guerre avec des estrangers seuls, chose que ie vous conseille d'euitier tant qu'il vous sera possible, comme la plus vituperable & perilleuse de toutes celles que vous pourriez entreprendre.

MAIS ie vous supplie tres-humblement, & vous coniure par vostre propre bien & honneur, par le salut de vostre patrie, & le zele que vous portez au seruice de Dieu, de vous resoudre bien-tost en ces affaires.

CAR le Royaume ne peut long-temps subsister fous le faix qu'il porte ny en la confusion en laquelle il est; vous ne possédez les villes qui se sont vnies avec vous que de leur gré & bonne volonté; les neccitez & pauuretez que les habitans d'icelles souffrent, les incōmodent & pressent de telle sorte, que vous deuez craindre grãdement qu'ils changent d'aduis, d'autant qu'ils s'estoient promis d'estre deschargez d'oppression par vostre moyen, dequoy ils se trouuent tres-estoignez: car vous sçauiez qu'il n'y a villes ny Prouinces qui ne vous demandent secours & qui n'en ayent tres-grand besoin: ne croyez pas qu'elles puissent longuement demeurer en cette sorte, specialement si ledit Roy de Nauarre leur peut persuader qu'il se fera Catholique, ou qu'il les maintiendra en leur religion: pareillement la noblesse qui vous suit n'en peut plus, & vous n'avez dequoy la secourir & gratifier; les champs s'en vont estre deserts & sans culture à cause des volleries que font les gēs de guerre, le traffic est empesché du tout par terre & par mer, sans lequel le Royaume ne peut s'etretenir, & seront nos greniers bien tost desgarnis de sel par les violences & desobeyssances qui s'ordinares: & cōme c'est vn aliment neccs-

faire pour la vie de l'homme, ie preuoy que ce deffaut engendrera infinies putrefactions qui troubleront grandement toutes sortes de personnes. En somme il n'y a celuy qui ne desire la fin de ces miseres, de sorte que si bien-tost vous ne faiçtes voir que vous auez moyen de nous en deliurer, faiçtes estat, Monsieur, que chacun cherchera à ce faire de soy-mesme, & que la premiere ville qui en monstrera le chemin sera suiue de plusieurs autres.

Et comment nous ferez-vous cognoistre que vous nous puissiez procurer vn tel bien par la continuation de la guerre, puisque vous ne tirez ny pouuez plus esperer vn seul sol de tous les reuenus du Royaume, dont souloient iouir nos Roys, lesquels sont rauis par nos aduersaires, consommés par vos soldats, ou rendus infertiles par la pauureté, & destruction du peuple? c'est aussi se mettre au hazard de reuolter les villes que de leur parler d'emprunts & contributions, & mesme de receuoir des gens de guerre en icelles pour les defendre & conseruer; & toutesfois comme sans argent, vous ne pouuez continuer la guerre, il est impossible que vous deliuriez lesdites villes des vexatiōs que leurs voisins leur font sās forces; de sorte que c'est cōme

reduire les choses à l'impossible que de vous denier l'un & refuser l'autre, & neantmoins vouloir que vous continuiez la guerre.

A quoy c'est abus de penser, & esperer que la puissance seule du Roy d'Espagne soit bastante de remedier ; ie vous predis que l'entree en ce Royaume des armées, desquelles ses ministres promettent de vous secourir, scandalisera & offensera plus grand nombre qu'elle n'en consolera ny contentera, & verrez que les portes des villes leurs seront fermées ; & qu'elles auront peine de viure en la campagne.

Et si d'un costé nous sommes assistez desdittes armées lesquelles s'efforcetont de faire les affaires de leur Roy plustost que les nostres, n'estimez vous pas que le dit Roy de Nauarre n'en appelle aussi à son secours qui destruiront aussi de leur costé ce que les autres auront espargné, & empescheront vos desseins?

MONSIEVR, tant s'en faut que nous deuions esperer de sortir de nos miseres par le moyen desdites forces, que nous en deuons plustost attendre nostre entiere & totale ruine, aduenât laquelle, & la guerre durant, ie dis que la religion, & l'Eglise Catholique

Catholique en ce Royaume auront plus grand peril, qu'elles ne feroient par la pacification d'icelle avec ledit Roy de Navarre aux conditions susdites.

Car si Dieu permet qu'il prospere par la guerre & qu'il s'establisſe avec les armes, il changera comme il voudra la religion en ce Royaume, & peut-eſtre qu'il paſſera plus auant au dommage de la Chreſtienté, à quoy le ſeul accident du trespas du Roy d'Eſpagne luy donnera ville gaignee, ou la perte d'une ſeule bataille, & meſme celle de voſtre perſonne que Dieu vueille bien garder.

Ce qui peut-eſtre, ne ſuccederoit ſi advantageousement pour nous, quand pareil accident leur arriueroit, d'autant que le party de ceux de la religion s'eſt plus accouſtumé à ſouffrir, & à mieux garder les places qu'ils occupent, comme nous n'avons que trop expérimenté.

D'AVANTAGE pour noſtre proſperité nous verrions naiſtre tant de partis & factions entre nous meſmes, à cauſe des diuiſions qui nous accompagnent qui proceder des diuerſes fins auxquelles tendent nos chefs, que nous ne ferions noſtre profit de noſtre proſperité, cōme ils feroient de la leur, d'autant qu'ils ſont tous d'ac-

M m

cord à vn mesme but.

Et la seule continuation de la guerre rendroit les Ecclesiastiques si pauvres, la noblesse si volontaire & peu soigneuse de la religion, les villes si troubles & les champs si deserts, qu'il seroit impossible que la religion Catholique n'en diminuast & partist grandement, & partant n'encourust plus grand hazard qu'elle ne feroit par le moyen de la susdite paix, avec laquelle vous pourriez r'allier & vnir tous les Catholiques ensemble à conseruer & deffendre ladicte religion en force & autorité, nonobstant les desseins & ruses desdits heretiques, ausquels s'opposeroient lesdits Ecclesiastiques par leur vigilance, bonnes mœurs & prieres, la noblesse par sa reünion & bonne intelligence obtenüe par vostre moyen, assistee de vostre autorité & providence & de tous ceux de vostre maison. Et les villes par leur ialousie & defiance ordinaire, fortifiees du deuoir qu'y feroient les officiers, & particulièrement de l'autorité de sa saincteté, & de la correspondance que les Catholiques entretiendroient pour ce seul effect avec les Princes Catholiques.

Au moyen dequoy ie concluds qu'il seroit plus expedient & vtile de traicter avec

ledit Roy de Nauarre aux conditions susdittes, pourueu que le Pape & le saint Siege s'y accordent, que de suivre toute autre voye, puis que par vn tel moyen vous deliureriez du tout le Royaume de la guerre avec moins de hazard & peril pour la religion Catholique, laquelle ie prie Dieu vous faire la grace de defendre & conseruer à son honneur & gloire & au salut du Royaume.

HARANGVE FAICTE

*par Monsieur de Villeroy pour estre
prononcee en l'assemblée des pretendus
Estats de Paris, M.D.LXXXIII.*

MESSIEURS,

Si iamais il a deub estre permis,
& fut oncques necessaire de parler libre-
ment en vne deliberation, c'est en celle
qui se presente, en laquelle il s'agit de la
deffence de nostre religion & de la dispo-
sition du Royaume & de nos personnes;
croyant fermement, que si en la recherche
& eslection du remede à nos maux, nous
nous oubliions tant que de prendre le nom
de Dieu en vain, & abuser de celuy de la
religion en nous flattant nous mesmes, ou
voulant plaire à autrui, il confondra nos
desseins & nous fera perir honteusement:
c'est pourquoy ie supplie la diuine Maiesté
me faire la grace que ie ne dise ne propose
rien en ceste compagnie, s'il est possible,
qui ne soit à la gloire, au salut du Royau-
me, comme ie proteste estre mon seul but.
Mais ie vous supplie, messieurs, de prendre
en bonne part que pour ce faire i'vse de la
liberté & franchise d'un homme de bien,

laquelle i'ay accoustumé du gré de nos Roys, tant que ie les ay seruis, comme celuy qui veut plustost manquer à soy mesme qu'à son deuoir en ceste occasion, esperant que Dieu qui cognoist mon cœur, & vous, Messieurs, qui m'avez veu autresfois en besongne, excuserez mes fautes. Je proteste aussi de ne vouloir estre opiniastre & que ie cederay tousiours au iugement & conseil des plus sages, vray est qu'il me semble que ce tiltre est deub principalement à ceux qui ont la crainte de Dieu, la cognoissance & experience des choses du monde, pour scauoir discerner l'ombre d'aveu le corps, & ne se laisser emporter à des desirs & desseins imaginaires, & impossibles, qui ne sont ordinairement suivis que de honte & dommage.

Messieurs, personne ne peut nier que la cause que nous deffendons ne soit iuste, ayant pour fondement l'honneur de Dieu & le soulagement du peuple; neantmoins pour auoir esté entreprise & commencée avec plus d'ardeur que de prudence, & depuis poursuivie avec plus d'esperance que d'ordre, non seulement nous y auons plus perdu que gagné, mais aussi nous auons donné matiere à nos aduersaires de la blasmer, dont ils n'ont tiré peu de pro-

fit à nostre domnage dedans & dehors le Royaume, tant à de force & de puissance sur les hommes, ce qui est iuste, mais aussi ce qu'ils estiment l'estre: à quoy il me semble qu'il nous importe grandement de pourvoir pour l'aduenir, ce que nous ferons, quand nous donnerons ordre que nostre conduite & nos actions respondent vraiment & d'un commun accord au défaut susdit, chose que nous deuons esperer de la resolution qui se prendra en ceste assemblée, laquelle pour ceste cause a esté il y a vn long temps recherchée & desirée des gens de bien; & toutes fois ie veux croire, que si elle n'a eu lieu plustost, que Dieu l'a ainsi permis, afin que le temps & nos maux seruissent d'enfermeement à ceux qui en auoient besoin.

Pour bien deliberer de nos affaires & du remede d'icelles il me semble qu'il faut commencer par nous représenter deux choses, la premiere ce que nous auons gaigné à la guerre pour le party Catholique, depuis que nous auons pris les armes, & la deuxiesme en quel estat & disposition le Royaume se trouue maintenant, afin que nous ne nous abusions en nostre poursuite, & ne bastissions nostre resolution, s'il est possible, sur vn faux fondement: car ils en faut beaucoup, ie ne diray, que ne soyons si

ardens & affectionnez à la guerre, mais si forts & puissans pour la soustenir, que nous estions au commencement d'icelle : nous auons fait comme ceux lesquels courent si viste au partir de la carriere qu'ils perdent l'haleine auant qu'ils soient arriuez au mitan d'icelle : de maniere qu'il faut recognoistre que c'est maintenant la necessité & non la raison qui nous rend plus circonspects & considerez que nous n'estions, dōt s'il aduient que nous facions nostre profit, l'allegement que nous en receutōs aydera à nous faire oublier & porter plus doucement nos fautes & pertes passees. Mais n'attendons ie vous supplie, que ceste necessité, qui ne nous presse desia que trop, opere d'auantage en nous & en nos affaires, ce que la prudence y doit apporter, car vous sçauiez que ses effectz sont ordinairement tres-violens & perilleux, specialement quand ils agissent és cœurs d'un peuple.

MAIS comme pouuons nous, ie veux dire ceux qui se sont embarquez en ce party pour le respect seul de la religion, desduire au vray & par le menu les changemens aduenus en ce Royaume, au desauantage d'iceluy depuis la guerre, sans soupirer, voire desesperer de sa conseruation, s'il est ainsi que l'on doie iuger des choses aduenir par

les passées : certainemēt si les gens de bien n'auoient plus d'esperance en la bonté & protection de Dieu qu'en la conduite des hommes & en leurs forces, leur desespoit pour ce regard seroit quasi arriué à son période, mais ie ne puis croire que son courroux esmeu par la grauité & multitude de nos pechez s'estende si auant que de nous vouloir priuer du tout de la religion avec laquelle nos peres & nous, l'auōs adoré & seruy iusques à present, sinon avec telle integrité qu'il conuiēt, au moins avec la foy de l'Eglise vniuerselle, de laquelle nous deuons plustost mourir que nous departir : & toutesfois il est certain que nos armes ont plus seruy iusques à present à l'affoiblir qu'autremēt, combien que nous protestions les auoir prises & employees seulemēt pour la deffence d'icelle, tāt sont les iugemens de Dieu incomprehensibles, & les proiets des hommes vains & abusifs.

QVAND nos mouuemens ont commencé l'ordre Ecclesiastique en ce Royaume estoit très-florissant & puissant, il estoit reueré & supporté & bien vny, nos Eglises estoient garnies de Prelats autant dignes de leurs charges qu'elles auoient esté 50. ans auparauant, où Dieu estoit seruy honorablement, comme en plusieurs bonnes

Abbayes & Monasteres d'hommes & de femmes, & specialement des Religieux, où la charité & hospitalité estoit exercée exemplairement. Les Curez administroient leurs cures aux villes, aux champs, en toute seureté, & lesquels contentoient leurs paroissiens en la foy de l'Eglise: mais depuis la guerre, la misere & la pauureté ont tellement persecuté lesdits Pasteurs, que les vns ont esté contraincts d'abandonner leurs troupeaux, les autres n'en peuuent quasi plus viure: la mort en a aussi banny plusieurs, de sorte que maintenant il y a autant ou plus d'Eglises en ce Royaume vacantes & priuees d'iceux que d'autres: & ne sont les maisons de Religion en meilleur estat, car les Religieux & Religieuses les ont laissées & laissent tous les iours, errans par tout avec grand mespris & scandaleuses offenses, cherchans à viure & viuant tres-licencieusement: les Curez aux champs sont encores pis, tant ils sont outragez & maltraictez des vns & des autres: il y a aussi infinies parroisses où le peuple est priué tout à fait de l'exercice de religion & de la consolation des saintes Sacraments. D'auantage combien d'Eglises ont esté saccagees & despoüillées de leurs reliques & ioyaux, mesmes abbatuës depuis

la guerre, & à l'occasion d'icelle qui n'a mis la main dedàs leurs biës pour s'en accômoder? que deuons nous attendre de la disposition que font nos aduersaires des Archeueschez & Eueschez, Abbayes & autres benefices qui vacquent ou sont tenus par ceux de nostre party, sans distinction d'ordre ny de religion, qu'un renuersement entier de ceste hierarchie & Eglise Gallicane, que nos maieurs ont avec tant de pieté, honneur & loüange fondee, augmêtee & conseruee? Pouuons nous faire mention aussi de la separation & diuision de ceux du desordre & de l'assistance qu'en recoiuent les ennemis de l'Eglise & du schisme qui est prest à esclatter, sans horreur & frayeur? Messieurs, si ceux de nostre party sont du tout innocés de ces desordres, vous le scauez mieux que moy: il me suffira de vous requerir qu'il y soit pourueu comme il est necessaire, si nous voulons que Dieu nous ayde, & que la posterité ne nous reproche la ruine & subuersion de son Eglise, aussi bien qu'à nos aduersaires.

APRES, considerons nos villes, lesquelles estoient deuant la guerre très riches & opulentes, nos aduersaires en ont pris plusieurs, dont les gës estoient très affectionnez au party, qui en est maintenant affoibly

d'autât, & celles qui nous sont demeurees, combien qu'elles soient les principales, sont toutesfois remplies de tant de partialitez & affections, & si chargees d'impositions & coruees extraordinaires mises sus, autant par nous mesmes comme par ceux qui nous font la guerre; qu'elles sont tres-miserables & necessiteuses: les habitans y sont sans commerce priuez du payement de leurs rêtes, de la iouissance de leurs heritages, & sans iustice de leurs debtes, ayant mangé & consommé leurs reserves & biens de leurs magasins: la iustice qui souloit y presider n'y est pas quasi recognoissable, rât elley a esté mal-traitee, & encores ouïree de regret: les Ministres & officiers d'icelle y sont sans autorité & sans gages, y viuans en grande crainte & pauvreté avec leurs familles, apres auoir tout vendu & souffert pour y durer comme ils ont fait iusques à present; bref, tout y regorge de confusion, de diuision, necessité, frayeur & mescontentement, principalement en ceste noble ville de Paris, la constance de laquelle est certainement admirable & doit seruir de consolation & d'exemple à toutes les autres; elle est Messieurs, la capitale du Royaume, le vray throsne de nos Roys, le premier siege de leur Iustice, la residence

de ceste fameuse eschole & faculté de theologie, la garde de nos reliques plus saintes & precieuses & des thresors de la couronne; où i'ose dire que la charité a eu autant de vogue, & la pieté a esté de tous temps aussi ardemment embrassée & continuellement exercee qu'en nul autre endroit du monde; celle qui a tousiours seruy de fanal & de reigle à toutes les autres du Royaume; pouuons nous considerer son changement sans douleur, & souffrirons nous qu'il en mes-aduienne, elle qui importe tant à la cause de Dieu, & au party pour lequel elle a ioué de son reste? Toutesfois, Messieurs, il est impossible qu'elle persiste, si elle n'est deliuree des charges & incommoditez qui la pressent, eslargie & remise en estat qu'elle puisse se substantier, maintenir & conseruer d'elle mesme, & par elle mesme, comme elle souloit faire & non par conuois & à force de garnisons & d'argent, ainsi qu'elle a esté gouuernée & nourrie depuis le siege, autrement il ne nous en demeurera que les corps bien debiles & extenuiez, si encores nous les pouuons retenir.

Si nos villes sont desolees que dirons nous du plat país, en tout & par tout en proye & à l'abandon: il semble que depart

& d'autre nous en ayons entrepris, & conjuré par enuie l'entiere ruine & vastation, ces pauvres peuples payent double, & triple taille par tout, sans cōter les autres subsides, contributions & coruees que l'on exige de luy à discretion, qui excède de trop toutes lesdites tailles, outre infinies autres sortes d'outrages, excez & violences que l'on luy faict souffrir, dont rien ne le peut garentir que la seule mort : car tout espee de refuge, ayde, consolation & iustice luy est desniee, c'est quasi honte que d'en auoir compassion, c'est peine perduë que d'interceder & parler pour luy, & crime que d'en demander, & poursuire le soulagement. Nos villages en sont deserts, & la face de la terre hideuse, & en friche en plusieurs endroiets ; & toutesfois, Messieurs, c'estoient les vrais tresors de la France, nos minieres & nos indes que ces bonnes gens lors qu'ils cultiuoient nos terres en toute liberte & seureté avec le bestial dōt ils souloiet estre garnis, estat destruits, où trouuerōs nous dequoy viure, qui nourrira nos armées, & entretiendra nos garnisons la guerre durant ? tout nous manquera tout au coup : Messieurs, il me semble que nous en deuions craindre, & apprehender la ruine plus que nous ne faisons

autant & plus pour l'aduenir que pour le present; car soit que Dieu nous donne la paix ou la victoire, ce defaut & māquemēt des peuples, de labeur & bestiaux, nous incommodera grandement, & sera sans remede sinon avec vn long-temps.

MAIS quelle mention ferons nous de nostre noblesse Catholique, qui souloit estre deuant la guerre tres vnie à la deffence de nostre religion, la voyant maintenant separee comme elle est, combattre l'vne cōtre l'autre aussi furieusement qu'elle faisoit ensemble du temps de nos Roys contre les ennemis d'icelle? Pouuoit-il aduenir au party Catholique par la guerre vn affoiblissement plus grand que cestuy-cy, comme ainsi soit que l'vnion des Catholiques soit la vraye terreur des heretiques, lesquels aussi ne sont forts aujourd'huy, & ne nous resistent que de l'assistāce qu'ils tirēt d'eux? quel creue-cœur en deuōs nous auoir? que ne deuons nous tenter & employer pour les retirer & nous reünir ensemble? Messieurs, il est certain que si nous auions gagné ce poinct, nous auriōs acquis à la cause vn tres-grand aduantage: le nom de Roy duquel nosdits aduersaires s'appuient, les fortifie grandement, mesmes autant (à mon aduis) que faict la diuision de la no-

blesse Catholique, & le secours qu'ils en tirent. Dauantage combien de Princes, & quels Princes, chefs d'armees, Seigneurs & gentils-hommes Catholiques auons nous perdus depuis ces mouuemens ? ie comprends & regrette en ce nombre ceux qui sont morts avec nosdits aduersaires comme les autres : car s'ils eussent vescu peut-estre que le temps, & les occasions nous eussent r'alliez ensemble plus que deuant, comme encore ie ne puis desesperer que ne facent quelque iour ceux qui restent, lors que Dieu aura compassion de nos miseres. Bref nosdits aduersaires estoient deuant la guerre combattus de l'autorité Royale, & de l'vnion desdits Catholiques ; pauvres, necessiteux & reduits, comme abandonnez en trois Prouinces du Royaume, où encores ils estoient tres-foibles, à present ils nous opposent la mesme autorité, nous combattent de nos armes par nostre diuision, disposent mieux que nous des deniers Royaux & moyens publics, auxquels ils ne souloient auoir aucune part, & sont cependant logez & establis par tout le Royaume, allans du moins de pair avec nous en tous lieux.

VOILA Messieurs, ce que nous auons

profité à la guerre pour le party Catholique, & l'Estat présent du Royaume que ie vous ay representé le plus sommairement & simplement qu'il m'a esté possible (pour ce que vous en sçavez plus que moy) & que la chose parle assez d'elle mesme. Je vous supplie de n'estimer qu'en ce faisant i'aye voulu blasmer personne, car ce n'a esté mon intention, & moins m'adresser à nos chefs & superieurs qu'à tout autre; spécialement à vous, Monseigneur, duquel ie sçay comme celuy qui a eu cest honneur que de vous suivre, & accompagner long-temps, que la violence de la tourmente qui nous agitez, a souvent forcé vos conseils & volontez, & que avez autant ou plus travaillé, & enduré que fait iamais Prince de vostre qualité, pour souter les affaires; en quoy ie puis dire sans flatterie, que i'ay souvent admiré vostre patience & constance, l'une à supporter vertueusement comme vous avez fait les grandes incommoditez, necessitez, & deffauts qui vous ont esté ordinaires, principalement depuis les batailles de Senlis & d'Iury, & l'autre à mespriser & rejeter toutes sortes de recherches & ouvertures qui vous ont esté faictes de diuers endroits, pour tirer de vous quelque consentement

sentement ou promesse en ce qui concerne le general de la Religion, & de l'Estat deuant cette assemblée; ayant tres-religieusement & fidelement gardé & conserué le sainct depost de l'une & de l'autre qui vous auoit esté confié, comme il vous pleut nous declarer & faire entendre dernièrement à l'ouuerture d'icelle, dont certainement nous vous sommes tous tres-obligez, & vous rends graces tres-humbles en mon particulier comme bon Catholique & vray François.

MESSIEURS, apres cette deduction, par laquelle le malade vous a esté representé avec yne partie de ses playes, il conuient traicter des remedes, c'est où gist nostre labeur, & la difficulté en laquelle nous auons besoin sur toutes choses de l'ayde de Dieu, & de n'vser de flatterie, dissimulation ny conuiuence. I'implore donc sa grace, & vostre permission pour m'en acquitter dignement & fidelement; en quoy ie seray plus brief & plus modeste qu'il me sera possible, pour ne vous ennuyer ny desplaire à personne si ie puis, car ce n'est mon but, mais seulement de seruir la cause à vostre gré & à ma descharge.

OR il est certain, Messieurs, que nous ne pouuons conseruer nostre Religion que

N n.

par trois moyens, par la singuliere & speciale grace de Dieu, de nous mesmes, & avec l'ayde & assistance de nos amis.

I E ne m'estendray sur le premier, car c'est matiere plus propre, & mieux seante à la bouche de Messieurs du Clergé qu'en nulle autre; seulement ie me dispenseray de dire deux choses; l'une, que si nous voulons que Dieu aye soin de nous, il faut que nous deuenions plus charitables & equitables, moins vicieux, & en effect meilleurs Chrestiens que nous ne sommes: & l'autre qu'il se faut bien garder de tenter Dieu, & abuser de l'esperance que nous pouuons auoir en luy, par temerité, presumption ou autrement, comme à l'aduenture nous ferions si nous choissions des remedes impossibles, nous fondans & confians du tout sur nos bonnes intentions; & sur la iustice de nostre cause, sans dauantage esplucher ny conferer les choses: car souuent Dieu permet qu'une mauuaise cause prospere avec ceux qui la deffendent, pour matter & chastier les autres qui combattent au contraire, comme nous n'auons que par trop esprouué en ce Royaume, depuis trente cinq ans contre les mesmes aduersaires, & en la mesme cause de laquelle il

s'agist maintenant, sans qu'il soit besoin pour nous enseigner que nous iettions les yeux sur nos voisins, ny sur la terre sainte, tombee par nos dissensions & pour nos vices & pechez, au pouuoir des infidelles. Le moyen qui depend de nous gist aux forces qui nous restent, & en nostre conduite.

Nos forces consistent en la vertu de nos chefs, en la richesse & bôté de nos villes, au nombre & en la valeur de nos gés de guerre, & en nos deniers communs & publics. Nosdits chefs sont genereux & experimentez, & tres-affectionnez, & croy cerraement que nos affaires ne demeureront par eux, ie souhaite seulement qu'ils soient mieux reuerrez, obeys & vnis, comme il est necessaire pour nous bié faire. Nous auons encores nos principales villes, mais elles sôt fort decheuës & appauuries depuis la guerre, cōme ie vous ay representé, de sorte que si du cōmencement elles se gardoiēt d'elles mesmes, voire regentoient autour d'elles, fortes de zele, de nōbre d'habitans, de commoditez & d'esperance, maintenant il faut que nous les gardions du dehors, & par le dedans avec forces & moyens, d'ailleurs non sans peine, & sollicitude tres-grande, tant elles sont diuisees, desnuées de peu-

ples, plaines de necessité, de crainte, & de
deffiance de l'aduenir : Quoy estant il sera
difficile qu'elles contribuent d'oresnauant
aux affaires publiques autre chose que le
nom, & la reputation de leur ancienne
grandeur avec la retraitte & seureté de
ceux du party : ce qui procede du mal
qu'on leur a fait, par le dehors, & qu'elles
mesmes se sont fait par le dedans, dont
chacun sçait & ressent les particularitez :
mais, comme elles ne peuuent estre remi-
ses ny restatüees qu'auec le temps, il con-
uient pour ceste heure aduiser plustost au
moyen de les soulager & secourir pour les
conseruer, que de faire estat (si on ne me
trompe) d'en tirer de l'ayde, & principa-
lement en deniers pour soustenir la guerre.
Quant aux gens de guerre du party, le
nombre en est grand, mais mal réglé, dis-
cipliné; l'ambition & l'auarice les domi-
nent par trop : car tous quasi pensent plus
à s'agrandir & enrichir, qu'à l'vtilité publi-
que, vice ordinaire des guerres ciuiles, ores
tres-perilleux & contagieux, qui se prend
par exemple non seulement entre esgaux,
mais aussi du petit au grand : cecy engendte
toutes sortes de maux, entre autres vne li-
cence effrence, & vne desobeysance gene-
rale, & vne ialousie & combustion extre-

me qui corrompt, esnerue, & affoiblit tellement la bonté desdits gens de guerre, que nous ne devons faire estat d'en estre bien seruis pour le public tant que cela durera. Le secours que nous pouuons tirer des deniers publics est encores plus incertain, d'autant que lesdits gens de guerre le prennent, & comment, tout par tout, sans ordre ny reigle, encores n'en ont ils pas à demy : dauantage il faudroit faire reuiure le peuple qui est mort depuis la guerre, & remettre le plat pays en culture pour en tirer commodité, chose tres-difficile voire impossible de faire sinon avec le temps. Toutesfois si nous pouuions reprendre l'ordre, & les reiglemens anciens en l'administration des finances, comme font sagement nosdits aduersaires; peut-estre que nous en tirerions quelque chose pour subuenir aux despens de nos armées, tout ainsi qu'ils font de leur costé, lesquels n'ont quasi autres deniers pour faire la guerre : mais il faudroit y mettre la main bien-tost & viuement, & ne se laisser vaincre aux importunités & mescontentemens de ceux qui s'en accommodent particulièrement, comme l'on a fait iusques à present, de façon que le public n'en a eu aucun secours : doncques estans nos villes pauvres & troubles com-

me elles sont, nos gens de guerre mal créés & disciplinés, & nos deniers publiqs mal mesnagez & incertains, il faut que nous reconnoissions, & aduoyons estre tres-difficile que nous resistions à nosdits aduersaires, & nous maintenions de nous mesmes.

Nous voyons ce que nous pouons esperer de nostre conduite, Messieurs; si nous voulons la rendre bonne, & faire qu'elle prospere, il faut que nous la iustificions tellement, que Dieu & les hommes en demeurent satisfaits: Nous la iustifierons, quand vrayement & sincerement nous chercherons la gloire de Dieu, & l'vtilité publique, comme nous ferons quand nous prendrons le chemin, par lequel nous pourrons plus seurement & promptement deliurer le Royaume de l'heresie & de la guerre; car tant qu'il sera battu de ces deux fleaux, il ne faut esperer que nous restaurions la Religion ny le public, comme nous auons esprouué aux despens de l'vne & de l'autre depuis nos mouuemens, au moyen dequoy tout ainsi que ceux qui se veulent preualoir de la ruine de nostre Religion & du Royaume s'accordent en ce poinct, sçauoir est de fomentier & nourrir la guerre & nos di-

uisions par tous moyens & artifices qu'ils peuuent inuenter ; si nous voulons sauuer l'vn & l'autre, il faut au contraire nous efforcer de les assoupir & terminer le plustost qu'il nous sera possible. C'est le vray moyen aussi de faire cesser les enuies, partialitez, & passions, qui troublent & destruisent nostre vnion, s'il en faut esperer quelque chose : car il n'y a rien qui puisse plus ayder à ranger à la raison, & ramener les particuliers à leur deuoir enuers le public, que l'exemple & la bonne conduite d'iceluy.

A quoy i'adiousteray l'opinion de ceux qui disent que nous deuons promptement eslire & créer vn Roy sur nous, comme vn moyen tres-propre, voire qui seul nous reste, pour releuer nos affaires & les garder de naufrage, attribuant à ce deffaut non seulement toutes nos infortunes passées & nos diuisions, partialitez & mauuaises procédures, mais aussi les aduantages que nosdits aduersaires ont gagné sur nous dedàs & dehors le Royaume, pour la reuerence & affection que les François nourris & accoustumez de tout temps, à la Royauté portent naturellement à leurs Roys, & par le credit & pouuoir qu'a ce nom enuers les Princes & Potentats estrangers, lesquels desirans pour leur interest la conseruation

entiere de la Couronne, fauoriseront tousiours plus volontiers celuy qui en portera le tiltre qu'ils ne feront toute autre sorte d'administration, laquelle ne peut qu'elle ne leur soit d'autant plus suspecte & odieuse, & moins agreable aux subiects d'icelle, qu'elle semble aucunement aspirer & tendre à vne alteration ou mutation d'Estat, chose que i'estime estre à considerer avec beaucoup de raison par ceux qui affectionnent ce conseil; partant ie ne veux estre des derniers à y ioindre mes vœux, toutesfois ie desire que nous poissions & considerations bien & meurement la nouueauté & importance du faict deuant que nous y engager. Car, Messieurs, ce n'est pas comme vous scauez trop mieux, le nom ny le tiltre, la couronne & sceptre qui donne autorité, force & puissance aux Roys, & les faict reuerer & aymer: c'est le droict d'une legitime succession que la nature leur donne par la grace & permission de Dieu, suiuant les loix & constitutions des pays, & leurs vertus & bonne conduite: & si quelquesfois l'on s'est dispensé de destroger & contreuenir ausdites loix en faueur de quelqu'un, ç'a esté avec l'acclamation, approbation & du consentement vniuersel de tous les estats & peuples d'iceluy, pour

vne vtilité & paix publique, & non pour se ietter & plonger en vne guerre immortelle, tres-perilleuse & douteuse; comme certainement fera celle que nous espouserons pour toutes nos vies, faisant ladite election. Parquoy ie dis qu'il est necessaire au prealable d'aduiser à deux choses: la premiere, s'il n'y a point de moyen ny d'espoir de conseruer nostre religion sans vser de ce remede. L'autre s'il y a Prince auquel nous puissions nous donner, qui soit fort & puissant assez pour nous sauuer & deliurer de la guerre & des vexations d'icelle, afin que l'on n'attribuë à passion, ce que la necessité seule de conseruer nostre Religion nous doit contraindre, & doit excuser de faire, & qu'au lieu mesme d'y profiter & à nous mesmes, nous n'aduancions la ruine d'icelle & la nostre; mais d'autât que ce poinct est le principal de nostre deliberation, dont ie dois attendre à dire mon aduis, & m'expliquer d'auantage à la fin & conclusion de mon discours, ie me cōtenteray d'en auoir touché ce mot en traictât des moyens & remedes qui dependent de nous, afin que l'on n'estime que ie le vueille obmettre.

Mais en fin il faut confesser que nos forces domestiques sont trop foibles auec

toute nostre conduitte, pour sortir d'affaires par les armes sans l'ayde de nos amis; partant il ne nous reste plus qu'à examiner si c'est chose à laquelle nous deuons esperer de paruenir par leurs moyens ou non, pour sur ce bastir nostre resolution.

MESSIEURS, nous tenons à bon droit pour nos principaux, plus asseurez & speciaux amis nostre S. Pere le Pape, le Roy d'Espagne, & avec eux Mess. les Ducs de Lorraine & de Sauoye, lesquels n'ont rien espargné iusques à present pour nous secourir & fortifier: de sorte qu'il faut recognoistre veritablement que sans eux nous eussions esté contraincts de composer avec nos aduersaires, ou de souffrir beaucoup plus que nous n'auons fait. Nosdits Ss. Peres y ont employé les vns apres les autres leur autorité & leurs thresors spirituels & temporels tres-largement, comme nous voyons qu'ils continuent encores sans espargne: enquoy ils ont esté tres-bien secondez dudit Roy d'Espagne, lequel a eu tant de soin de nous, qu'il faut que nous aduoüions, si nous ne voulós estre tres-mescognoissans, que nous luy deuons la gloire & la recognoissance entiere de nostre estre: car sans luy les villes de Paris & de Roüen, qui sont les deux principales colonnes de nostre cause, ne

feroient plus nostres, & n'auons soustenu la guerre depuis le commencement iusques à present que de ses deniers & avec ses forces, ayant souuent delaisé ses propres affaires pour mieux nous secourir: ce que nous pouuons dire semblablement que lesdits Ducs ont faict aussi de leur part, tant que leurs moyens se sont estendus, dont nous voyons que leurs affaires sont en arriere, & leurs pays grandement incommodez.

Et neantmoins ie ne vois pas qu'avec tout cela, ioinct ce que nous auons peu y contribuer de nostre part, lors que nous estions encores plus frais & mieux pourueus de toutes choses que nous ne sommes & ne pouuons estre cy apres, nous ayons gaigné tel aduantage sur nosdits aduersaires, que nous ayons grande occasion de nous resiouyr, ny esperer qu'en cōtinuant nous voyons de long temps la fin d'eux par les armes: les fulminations de nosdits sainctspères ont plustost aigry leurs cœurs, & leurs exhortations & admonitions souuent reiterees enuers les Catholiques qui les assistent, ne les ont pas encor' esbranlez: Les gens de guerre qu'ils nous ont aussi par force & à grands frais enuoyez ne nous ont gueres plus profité; & iacoit que ledit Roy d'Espagne nous ait enuoyé

plusieurs armées, l'une apres l'autre, qu'il ait aussi secouru à part la Bretagne & le Languedoc d'hommes & d'argent, & qu'il n'ait rien obmis à faire pour nous: toutes-fois le fruit de sa bonne volonté & des frais qu'il y a faits tres grands, n'a respondu à nos esperances ny à nostre besoin. Si ce malheur nous est adueni par nostre faute ou celle d'autrui, pour n'auoir esté les choses conduictes, administrees ou employees comme elles deuoient estre, ou par impuissance & foiblesse procedant de nostre part, ou de ceux qui nous secourent, ie m'en raporte à ce qui en est: tant y a qu'il est veritable & notoire à tous que nostre condition est plustost empiree qu'amendee, combien que celle de nosdits ennemis soit quasi aussi languissante que la nostre, n'estans moins incommodez & mattez de la guerre: Toutes-fois d'autant que leur force principalement gist en eux, qu'ils sont mieux vnis que nous, qu'ils tendent & trauaillent tous à vn mesme but, qu'ils obseruent & suivent en leurs affaires tant en la conduite des armées qu'en l'administration de la iustice & police, & au maniement des finances, l'ordre ancien du Royaume, par lequel chacun est auctorisé & soustenu en sa charge & fonction, comme il doit estre, qu'ils font

argent de tout comme nos Roys souloient faire en temps de paix, que les villes sont riches des despoüilles & desordres des nostres, & que le party huguenot va tousiours se fortifiant autant que celuy des Catholiques s'affoiblit, par la continuation de leurs diuisions ils se maintiennent mieux que nous. Nous ne faisons rien qu'à force d'hommes & d'argent & qu'avec toutes les longueurs, peines & difficultez du monde; au lieu que nosdits aduersaires s'entretiennent de peu de chose & font tous les iours quelque effect, comme gens qui disposent de leurs forces & moyens ainsi qu'il leur plaist, & qui seruent leur party, ou pour mieux dire leur maistre de cœur & d'affection, attendans la recompense de leurs seruiques de sa prosperité : dauantage ils ont gagné ce poinct sur nous, que chacun croie dedans & dehors le Royaume qu'ils cherchent le combat & que nous le fuyôs, chose qui faict craindre leurs armes, & mespriser les nostres, & principalement parmy nous autres François accoustumez à respecter ceux qui sont non seulement genereux & vaillans, mais aussi hazardeux; ioinct que nous estimons que c'est le vray moyen d'abreger nos miseres desquelles nostre langue & necessité nous rend tous les iours.

plus impatiens, mesmement voyant les excès & desordres que font sur nous sans distinction de party lesdites forces estrange- res ; & pareillement les diuerſes pratiques & menees qu'aucuns font par toutes nos villes , qui tendent plus à nous precipiter qu'à nous ſauuer.

Quoy eſtant , quelle raiſon auons nous d'eſperer que nos affaires ſuccedent mieux cy-apres qu'elles n'ont faiſt depuis quatre ans ? mais peut-eſtre que le Roy que nous parlons d'eſlire, comme vn ſouuerain remede à toutes nos playes, y apportera le changement que nous deſirōs. Quoy! rendra il noſtre cauſe plus iuſte & noſtre vniō plus parfaite qu'elle n'eſt ? rechauffera-il noſtre ardeur eſteinte par la neceſſité, ou s'il reſtaurera nos villes & fera ceſſer les partialitez qui acheuēt de les deſpeupler & deſtruire? remettra-il nos champs en culture, & s'il fera rebiure nos laboureurs que la guerre a raiſis, afin que nous puiſſions recueillir nos fruiſts pour viure, & en tirer les deniers publics pour cōtinuer la guerre: ou bien s'il nous emplira de tant de commoditez, & nous apportera en peu de temps vn tel aduātage que rien ne nous manquera, ny ſera difficile à executer contre noſdits aduerſaires, pour nous eſlargir & con-

tenter ? Messieurs, si le zele que nous portons à nostre Religion, & si nostre perplexité nous faict desirer & volontiers esperer ce secours d'une telle resolution, faut-il pourtant s'asseurer que les effects s'en ensuiuent sans en estre mieux esclairez ? Croyons nous que le Roy, qui sera peut-estre composé & créé de nature estragere, estant adiousté & receu au corps de nostre party, autant parauanture par contraincte que par raison, ayt ses fonctions aussi vigoureuses & vtilles, que si nature nous l'auoit donné ? Messieurs, ouurons les yeux, & recognoissons que nous sommes hommes, que l'on peut bien imiter la nature, mais non atteindre à sa perfection.

PARLONS plus clairement, s'il faut que nous prenions vn Prince dedans nostre party pour estre nostre Roy, il faut necessairement que nous le choisissons au gré du Roy d'Espagne & de son desir, car nul des autres ne peut estre assez puissant pour se maintenir en ce degré & nous sauuer sans son ayde, quelque reputation, parens, amis & moyens qu'il puisse auoir. C'est chose recogneüe de tous, au moyē dequoy si ledit Roy veut auoir ceste Courōne pour luy ou pour l'Infante sa fille aisnée, comme nous font entendre les ministres, &

qu'il n'y ait moyen de l'en diuertir, l'obligation que nous luy auons, & le besoin que nous auons de luy, s'il faut que nous continuions la guerre, requierét que nous passions plustost par dessus nos loix & toutes autres cōsiderations pour le contéter, que de l'offenser en nous adressant à vn autre: car tout ainsi que nosdites loix n'ont esté faictes que pour bien faire au public, l'observation nous en doit estre chere & recommandee, sinon autāt qu'elle peut estre vtile à iceluy, & sur tout à la defense & conseruation de nostre Religion que nous deuons preferer à toutes autres choses. Quoy estant il ne nous reste plus qu'à sçauoir, si en eslisant ledit Roy d'Espagne ou ladite Infante sa fille nous y trouuerons les benedictions & aduātages qui nous setont necessaires, comme aucuns se promettent, afin que nous ne soyons si temeraires & mal aduisez de franchir ce saut qui est suiet à infinis perils & inconueniens difficiles à preuoir, mais encores plus à éuiter apres le coup, deuant que d'auoir bien considéré & pesé comme il appartient les euenemens d'iceluy pour éuiter le dommage, le blafme, & le regret d'un tardif repentir qui suit de près ordinairement vne resolution precipitee, sans souffrir que nos passions, ou
attendre

attendre que nos necessitez soient si grandes qu'elles nous violentent en ce faict.

Pour mon regard ie suis d'aduis, s'il faut que nous contentions ledit Roy, que nous nous donnions à luy plustost qu'à sa fille, sans nous arrester qu'elle est issue d'une fille de France : car s'il est necessaire que nous violions nos loix, ce doit estre pour le party plus vtile, & non pour celuy qui en approche le plus: sans doute nous trouverons tousiours plus de seureté au tronc qu'aux branches, car les moyens de ladite Infante dependent de la volonté dudit Roy son pere, & apres luy du Prince son fils, qui doit estre heritier vniuersel. Mais qui peut respondre & asseurer que ledit Prince succedant aux Estats de son pere succede aussi à l'affection, qu'il veuille obmettre ses propres affaires pour assister sa sœur, comme fait à present le pere sa chere fille? C'est chose rare qu'un fils suiue en tel cas les intentions de son pere; & encores plus qu'un Prince delaisse & abandonne ce qui le cōcerne pour bien faire à autrui, quelque proximité qu'il ait, ce que nous deuons encores moins nous promettre de ce changement que de nul autre. Car il n'y a desia que trop de seruiteurs & subiects

dudit Roy, qui regrettent les despences qu'il a employees à ce Royaume; de sorte que si Dieu en dispoſoit deuant que ſa fille fuſt eſtablie, & que ledit Prince ne fuſt conſeillé, ou ne peult à cauſe de ſes affaires nous continuer le meſme ſecours que nous receuons du pere, cōment pourrions nous ſecourir ſa cauſe & la noſtre; les choſes de ce Royaume & de la Chreſtienté, eſtans en l'eſtat qu'elles ſont? Dauãtage ie ne puis croire que le nom & party de laditte Infante, n'engendre par tout les meſmes ialousies & eſſects que fera celuy du Roy; car c'eſt touſiours ſe donner à la maiſon, la grandeur & puiſſance de laquelle, & non celle de la perſonne du Roy, tient en crainte le reſte de la Chreſtienté: à quoy ne ſert de rien de dire qu'elle eſpouſera vn Prince de langue François, d'autant que c'eſt à elle & non à ſon mary que ledit Roy entend que nous donnions la Couronne. Partant ſi elle decedoit ſans enfans apres noſtre élection, ſon droit ſeroit pretendu & debattu par ſes plus proches. Du commencement & iuſques à la venuë de Monſieur le Duc de Feria, les Miniſtres dudit Roy nous ont dit ouuertement qu'il ne vouloit que laditte Infante fuſt mariee à vn de nos Princes, pour ne mettre la ſuc-

cession de tous ses Estats au hazard de tomber entre les mains d'un Prince d'une autre famille que de la sienne, comme il aduiendroit, si le Prince, son fils, mouroit sans enfans; de sorte que l'esperance que sous main l'on nous donne maintenant de la bailler à un des nostres ne me peut estre que suspecte d'estre ietee & publiee entre nous plustost pour gagner nos voix en faueur de laditte Infante, que pour enuie que l'on ait de l'effectuer. En tout cas il seroit donc necessaire pour nostre seureté que ledit mariage fust accompli deuant laditte election, afin que l'on ne s'en peust desdire apres icelle, comme il seroit lors trop facile de faire sans remede, ne me pouuant persuader que ledit Roy marie iamais sa fille deuant son fils, principalement à un Prince d'autre maison que la sienne: mais l'on dit que si ce Royaume est conserué & possédé à part, quand ce seroit par un Prince de la mesme maison dudit Roy, les autres Princes n'en prendront tant de ialousie qu'il est à celuy d'Espagne. A quoy ie respons que ceste raison seroit considerable si nous pouuions à present disposer de la possession, & en rendre la iouissance paisible à laditte fille & à son mary: mais comme

c'est chose impossible, & que les grands se menent principalement par les raisons & choses presentes, & non par celles qui sont attendues, lesquelles sont ordinairement incertaines, chacun d'eux craignant autant la ruine & dissipation de ce Royaume, par la continuation de la guerre, que la susdite Vnion avec celuy d'Espagne: il faut faire estat que les Princes & Potentats de la Chrestienté qui redoutent l'accroissement dudit Roy d'Espagne & l'affoiblissement de la France, prendront pareille ialousie de l'une que de l'autre, comme ils ont fait assez paroistre depuis le commencement de nostre guerre: outre cela il faudroit enfreindre nostre loy Salique, laquelle nous a tousiours esté tres-saincte & sacree, quelque mutation qui soit aduenue en ce Royaume, avec lequel elle est née, & est tellement attachee & incorporee, que l'un ne peut patir sans l'autre: iamais aussi l'on n'a essayé de s'en dispenser qu'à l'instant le Royaume n'ait esté remply & accablé de calamitez, desquelles il n'a esté deliuré que quand elle a esté restaurée en sa premiere force. Et si maintenant nous la mesprisons sur l'esperance d'un bien futur, faisons estat d'en recevoir en nos iours le mesme traitement, & apres qu'ils serot

passiez, le mesme blasme & reproche de ceux qui en ont autres fois abusé : c'est aussi vne vraye imagination d'esperer pouoir persuader aux François, que ceste loy qui leur a esté si vtile, & laquelle ils doiuent, apres Dieu, la grandeur & conseruation de leur pays, est violable, estant si auant grauee en leurs cœurs, & d'eux reuerée & chérie comme elle est. Au moyen dequoy tāt s'en faut que i'estime que nous en deuions faire si peu de compte, que ie dis qu'il est necessaire de faire cesser les bruits qui courent de ce dessein le plus diligemment qu'il sera possible, comme trespreiudiciable à nostre cause, & à la reputation de ceste assemblee dedans & dehors le Royaume.

C'EST doncques à la personne mesme dudit Roy d'Espagne, & à la puissance de son Empire que nous deuons nous lier, si d'vn costé son assistance nous est si necessaire, que nous ne puissions nous en passer pour conseruer nostre Religion : & si de l'autre il ne luy plaist nous la continuer, que nous ne nous donnions à luy tout à faict, ou à laditte Infante sa fille. Or pour iuger de la necessité dudit secours, il faut discourir du bien, & du mal qui nous peut aduenir de laditte Declaration : car si nous

ne sommes bien certains qu'il nous en succede mieux qu'il a fait iusques à present de l'assistâce que nous auons tirée dudit Roy, encores qu'elle ayt esté secondee des moyens du sainct Siege & desdits Ducs de Lorraine & de Sauoye, certainement nous ferions vne grande faute de nous y engager.

L'ON dit que quand nous nous serons donnez audit Roy, il aura soin de nous comme de ce qui luy appartiendra en propre, ou sa reputation sera entierement engagee; de sorte qu'il nous secourra à l'aduenir, non pour allumer & faire durer nos troubles, comme à l'aduanture il a faict iusques à present, mais pour les esteindre & faire cesser, & partant plus puissamment & à propos qu'il n'a fait, & que rien ne nous manquera, & que son election fera cesser les ialousies, diuisions & desseins priuez qui regnent entre nous: car quand nous l'aurons vne fois esleu pour Roy, chacun de nous ne pensera plus qu'à le seruir comme maistre, ainsi qu'ont accoustumé de faire les grands Princes qui peuuent remunerer ceux qui les seruent fidellement, & punir les autres. Que cela sera cause de cōseruer le Royaume en son entier, lequel autrement court fortune d'estre partagé & dissi-

pé par la guerre, s'il ne tōbe entre les mains & en la protection d'un Prince fort pour l'en garantir, toutes choses n'estans desia que trop acheminees à desmembrement, qui est le plus grand malheur qui nous peut arriuer, lequel nous deuons à ceste cause euitier à quelque prix que ce soit. Qu'estant ledit Roy Prince tres-equitable & grand obseruateur de sa foy & parole, nous ne deuons point douter qu'il ne nous face iouir de tout cequ'il nous aura promis en general & en particulier par le traicté de son election, à l'exemple du traictement qu'il fait à ses subiects du Comté de Bourgogne, & autres, lesquels il a tousiours gardez & mainteues en leurs franchises & libertez, suiuant leurs loix & cōstitutions: plus, que ce nous sera vn grand aduantage d'estre appuyez de ses autres Estats, & d'oresnauant participer à la commodité d'iceux, cōme membres que nous serons de son Empire, & enfans de sa maison, qui est tres-opulente & puissante. Qu'estât Prince tres-entier & constant en la foy Catholique, il perdra plustost tous ses Estats, & mesme la vie, que de manquer d'un seul poinct au deuoir d'un Roy tres-Chrestien pour la defence d'icelle, qui est tout ce que nous deuons desirer. Qu'il est aujourdhuy le

ble. Pour lesquelles raisons aucuns concluent qu'il est non seulement vtile, mais si necessaire pour conseruer nostre religion, & ne tomber en la puissance des ennemis d'icelle, de nous ietter entre les bras dudit Roy d'Espagne, & le recognoistre pour maistre par preference à tous autres Princes estrangers & domestiques, que si nous faillons à le faire nous n'en pouuons éuiter la tyrannie.

A QVOY ils adioustent estre chose que nostre S. Pere le Pape desire & nous conseille de faire, offrant y ioindre son autorité & sa puissance spirituelle & temporelle. Qu'estans ces deux forces & puissances vnies en ce dessein, il n'y aura Prince, Potentat, ny Republique Catholique qui ose s'y opposer, mesme du costé d'Italie, où personne ne se peut maintenir qu'avec leur bien-veillance. Que si quelques vns s'oublent tant que de s'en formaliser, il sera facile ausdits Princes de les ranger à la raison. Que les Princes de la Germanie & les Cantons de Suisses Catholiques fauorisent aussi ce dessein, les vns cōme parens & allies dudit Roy d'Espagne, & les autres cōme tres-interessez en la cause. En fin qu'estans toutes ces Couronnes vnies sous vn seul Monarque, doté des vertus qui

abondent en la personne dudit Roy, il n'y aura force ny puissance aucune qui luy resiste. Quoy aduenant, nous changerons bien-tost nostre malheur en vn perpetuel bon-heur à la gloire de Dieu, chose que nous ne deuons esperer par autre voye que ce soit.

A V S Q V E L L E S raisons tres-fortes & considerables, ceux qui sont de contraire aduis opposent principalement l'impossibilité de ce dessein, disans qu'estant la religion en peril, comme il est certain & notoire à tous qu'elle est, ce seroit vrayement pure impieté que d'y contredire, nous defaillant tous autres moyens d'y pouruoir, si nous pouuions ou seulement auions de quoy esperer de faire ce changement heureusement: mais ils cognoissent tant de difficulté & obstacles qui rendent le succès d'iceluy impossible, qu'ils sont contraincts de le reietter.

P R E M I E R E M E N T ils ne peuuent croire, que le general du Royaume ny mesme du party, l'embrasse iamais de bon cœur, pour estre si contraire à nos loix qu'il est, comme sont les mœurs de la nation Espagnolle aux nostres, & sur tout à nostre noblesse, en laquelle consiste la force du Royaume, laquelle difficilement s'absub.

ietira à vn Prince de maison estrangere, & mesme de nation contre laquelle nos Roys & nous avec eux auons depuis cent ans continuellement faict la guerre, & debattu de grandeur & preeminence. Qu'il est vray qu'on doit passer par dessus toutes considerations humaines, quand il s'agit de la gloire de Dieu: mais comme nous sommes nés imbecilles & imparfaits, non seulement nous pouons errer en nos iugemens, mais aussi estre tres-difficile de disposer & faire resoudre tout vn peuple à ce deuoir au peril evident de ce qui le concerne. Qu'il n'y a pas grande apparence que laditte election rende nostre vnion plus parfaite, ny change les volonteze & desfeins de ceux qui pretendent faire leur profit particulier de la dissipation de l'Estat: car telles conuoitises augmentent avec le temps bien plustost qu'elles ne diminuent, specialement quand elles ont pour exemple vn attentat faict aux loix publiques sous quelque pretexte que ce soit. A quoy l'authorité dudit Roy pour grande qu'elle soit pourra difficilement remedier par force tant que le Royaume sera troublé; car quiconque refusera de s'y assubiectionner, n'aura faute de supports dedans & dehors pour se maintenir. Dauantage, qui

doute qu'il ne soit besoin que ledit Roy accorde & delaisse aux grands de nostre party des aduantages extraordinaires, qui ne pouuans estre que preiudiciables aux droicts de la Couronne, pour les attirer & faire condescendre plus volontiers à son desir, de sorte que tant s'en faut que nous deuions faire estat d'euiter par ceste eslection la dissipation dudit Royaume, qu'à bon droit nous redoutons, il n'y a rien qui en effect la facilite dauantage: car c'est la guerre plus qu'autre chose qui esguise l'appetit de ceux qui y tendent, & qui peut seul leur donner les moyens d'y paruenir, partant plus elle s'allumera & durera, plus ils auront le ieu beau pour ce faire. Quoy? y a-il rien qui la puisse tant eschauffer & mouuoir que ladite eslection, par laquelle elle deuiendra immortelle? d'une guerre de religiō nous fonderōs vne guerre d'Estat. Je demanderois volontiers si celuy Roy d'Espagne après que nous l'aurōs esleu passera en Frâce en personne exprès pour nous regir & fortifier de sa presence, comme ainsi soit qu'il n'y ayt rien qui enflamme plus les cœurs des François que l'œil de leurs Roys? Abandonnera-il l'Espagne en l'aage où luy & le Prince son fils sont, pour icy s'envelopper, ou peut-estre

s'enseuelir en nos miseres & en nostre confusion : ou s'il faudra que nous soyons encores apres ladite eslection conduicts & gouuernez par Lieutenans generaux, desquels l'authoriré, les moyens & les deportemens seront controlez & suiets à mille traueses & longueurs, qui destruisent les affaires, comme nous auons assez esprouué? sera-ce à vn Prince François ou à vn estranger que la fisdite charge si importante sera commise : si c'est vn de nostre natiõ les estrangers ne s'y fierõt qu'à demy, non plus qu'ilsont fait iusques à present, pour la crainte que tousiours ils auront qu'il veille acquerir de la reputation & faire ses affaires à leurs despens, de façon qu'il n'aura les fonctions libres, comme il est necessaire qu'ait quiconque exercera ladite charge pour bien faire: dauantage nos autres Princes en auront ialousie, tant est grande & desbordee l'enuie que la licence du temps a engendree entre nous. Et si pour remedier l'on cuide y employer vn estranger, qui sera celuy de nos chefs qui voudra supporter vn tel affront & luy ceder? Messieurs, pensons de bonne heure à ces contentions, car ce ne sont pas là les moindres & plus legers inconueniẽs qui naistrõt de ladite eslection, laquelle alterera aussi

indubitablement les cœurs des officiers royaux qui nous restent; comme ceux qui sont plus obligez que tous autres de suivre & deffendre les loix du Royaume: de sorte qu'il faut faire estat que plusieurs d'eux, cōbien qu'ils soient tres-affectionnez à la religion, quitterōt plustost leurs offices, que de consentir ny s'assubiettir à ce changement; ce qui apportera vn grand remuēmēt parmi nous, scandalisera & affoiblira la cause plus qu'aucuns ne veulent croire, car à leurs exemples plusieurs autres, aux villes & ailleurs se degousteront de s'y embarquer: de sorte qu'au lieu d'estre fortifiez & reünis dedans nous & pour ladite eslection, nous en serons plus diuisez & foibles que nous ne sommes, dont au contraire nosdits aduersaires tireront vn grand aduantage, car il ne faut point douter que cela ne lie & affermissse du tout à leur seruice les Catholiques qui les assistent de tous estats, pour courre tous ensemble vne mesme fortune iusques à la fin de la guerre, sans plus penser qu'il y ayt autre remede à nos troubles, que par la ruine des vns & des autres, ou de tous les deux partis ensemble, qui est la chose que nous deuons plus craindre & apprehender. Et s'il aduient que les habitans de nos

villes ne reçoient de ce changement la deliurance de leurs miseres si promptement & aduantageusement qu'ils se sont promis des esperances qu'on leur a donnees, & que leur besoing le requiert, Quels effects deuons-nous attendre du mescontentement, ou pour micux dire du desespoir qui en naistra parmy eux? y a-il rien qui altere plus les peuples qu'un tel mesconte, quand ils en ressentent le domminage? si nous souffrons vne fois que leurs calamitez surmontent & estouffent leur zele, ou qu'ils s'impriment de pouuoir conseruer leur religion & iouyr du benefice d'icelle plus commodement par quelque autre voye, que par leur perseuerance en ce dessein, qui doute qu'ils ne le changent encores plus volontiers qu'ils ne l'auront embrassé? avec quoy pourrions nous retenir ce torrent, s'ils esbranle? sera-ce à force de garnisons estrange-res? Messieurs, s'il en faut venir là, que deuiendront les priuileges, immunitiez & libertez desdites villes, & les autres promesses que l'on leur aura faictes? comme ainsi soit que les Princes n'estiment estre obligez à l'observation de leur foy au desauantage de leurs affaires: alors quelle fiâce aurons nous d'eux & eux de nous? cômēt cō-

patirons-nous avec eux, & résisterons tous ensemble à nosdits aduersaires? Preuoyons ces choses deuant qu'elles arriuent, comme accidens infaillibles de ladite resolution, si bien tost apres la declaration d'icelle, nos villes ne voyent & ressentent les effects desdites promesses, car leurs afflictions commencent desia à leur estre insupportables: & si Dieu & les hommes ont permis que la guerre leur ait esté si peu fauorable iusques icy, expres pour les attirer & ren-ger plus facilement au party duquel il s'agit? Prenons garde, Messieurs, qu'apres le coup ils ne se repètent d'auoir plustost sui-uy leurs desirs & necessitez que leurs loix, adiousté plus de foy à leur esperance qu'à l'experience, & que leurs affections & simplicité ne se changent en fureur au dōmage de nostre religion: Messieurs, les conquestes ne se conseruent que par force, & ne faudra point moins de temps pour surmonter ceste naturelle deffiance & rigueur Espagnole, qu'il en faudra pour dompter nostre inconstāce & impatience Françoisse: dont ceux qui en craignent la domination appellent à tesmoins les Neapolitains, Siciliens, Milannois, Portugais, Indiens & iusques aux mesmes Flamans, pour respondre aux autres qui se mirent en la dou-
ceur

teur de ceux du costé de Bourgongne : mais ledit Roy nous assistera apres son election si puissamment & à propos , qu'en peu de temps nous pourrons vaincre nosdits aduersaires , & apres remettre facilement toutes choses en ce Royaume en leur premier & ancien ordre, ayant delibéré pour cest effect faire vn merueilleux effort deux ans durant, dedans lequel temps il espere executer ce dessein , c'est ce que l'on nous dit. Mais verifions, Messieurs , si c'est chose possible, & de laquelle nous ne deuions douter aucunement : pour ce faire il seroit necessaire que ledit Roy enuoyast en ce Royaume plus de forces & d'argent qu'il n'a fait par cydeuât, qu'elles y arriuaissent plus à propos , & qu'elles fussent mieux conduictes , & lesdits deniers mieux employez qu'ils n'ont esté, & pareillement que nosdits aduersaires deuissent plus foibles, & moins assistez & heureux en leurs affaires qu'ils n'ont esté iusques à present : car s'il n'aduiant quelque changement en tout cela à nostre aduantage, comment esperons nous qu'il nous en prenne mieux à l'aduenir que par le passé ; desia sommes nous bien certains que ledit Roy ne sera assisté & seruy d'autres Princes & Potentats, que de ceux qui se sont em-

ployez cy deuant pour nous, c'est à sçauoir de nostre saint Pere & desdits Ducs de Lorraine & de Sauoye, encores de-uons nous doubter que les deux derniers s'y plongent si auant qu'ils ont fait, d'autant que nous ne sçauons s'ils approuueront ce dessein, parce que leurs esperances de s'agrandir en ce Royaume seront du tout retranchees : qu'ils n'ont peut-estre tant d'occasion de desirer l'accroissement dudit Roy comme aucuns estiment, & qu'en tout cas leurs affaires ne sont en estat qu'ils puissent faire pour ceste cause ce qu'ils ont cy deuant fait, d'autant qu'ils ont mis & consommé tout ce qu'ils auoient de meilleur, & qu'ils n'ont faite de besongne en leurs propres pays, lesquels ils ne seront conseillez de mettre en plus grand peril pour le bien d'autrui. Quant à la Saincteté, nous n'auons point encores esté bien assurez qu'elle approuue ce dessein, & si nous pouuons conseruer la Religion en ce pays par quelque autre moyen, par raison saditte Saincteté nous deuroit conseiller de l'embrasser plustost que cestuy-cy, quand ce ne seroit que pour entretenir la Chrestienté en repos, & pour la conseruation & autorité du saint Siege qui depend du contrepoids

de ces deux Puissances, dont les predecesseurs ont tenu & soigneusement gardé la balance & esgalité tant qu'ils ont peu: toutesfois quand ladite Saincteté passant par dessus toutes ces considerations se resoudra de fauoriser du tout ladite entreprise, c'est tout ce qu'elle pourra faire d'y contribuer autant qu'ont faict depuis quatre ans ceux qui l'ont deuancee: partant il faut necessairement que ceste augmentation de forces & de deniers, dont l'on nous donne esperance, vienne entierement dudit Roy Catholique, car mesme il ne tirera point de secours de la Germanie, ny de Suisse qu'à force d'argent: Ce n'est pas aussi la coustume dudit pays d'en vser autrement. Messieurs, sans doute la puissance dudit Roy est tres-grande, il possede & domine plus de pays que n'a faict aucun Prince en la Chrestienté depuis Charles le grand. Mais comme ils sont fort separez les vns des autres, ils sont aussi subiects à plusieurs frais & accidens, auxquels il a iusques à present par sa prudence, & puissance, fauorisé de la minorité de nos Roys & des troubles de ce Royaume, tres-heureusement pourueu depuis trente cinq ans: & neantmoins si d'un costé il a adiousté à s^{on} Empire le Royaume de

Portugal auec tout ce qui en pouuoit dependre, il n'a peu toutesfois recouurer l'obeyssance entiere des estats des pays Bas: quelque effort qu'il y ait fait par le moyen de ceux que la nature luy auoit donnez, lors qu'ils estoient paisibles, les forces de son Empire estoient en la Chrestienté & principalement en la France tresformidables. Car ç'a esté la porte par laquelle ses predecesseurs & luy ont faict plus de dommage au Royaume durant nos guerres estrangeres: c'est vn aduantage que le Royaume de Portugal ne peut recompenser & valloir, pour le dessein qu'il veut entreprendre en ce Royaume, à cause de son esloignement, & de la ialousie & défiance qu'il a des Portugais, laquelle durera autant qu'eux, & leurs Castillans conserueront leurs noms. S'il est vray que ledit Roy ayt retranché & mis en arriere depuis quatre ans la despence qu'il fouloit faire en ses autres pays pour les conseruer, afin de mieux entendre & pouruoir aux affaires de France, & neantmoins n'ait peu nous deliurer de nos miseres ny bien souuent payé les gens de guerre qu'il nous a enuoyez, ny ceux que nous auons receus en nos villes, lesquelles par faute de ce ont esté contrainctes de se desbader & cō-

mettre plusieurs excez à nos yeux, par quel moyen deuõs nous croire qu'il nous pour-
ra mieux pourueoir à l'aduenir, si pour no^s
acquérir & nous dõner occasiõ de nous iet-
ter entre ses bras, il n'a deub par raison es-
pargner aucune chose, cõme pour mon re-
gard ie croy qu'il n'a faict, & neantmoins
que ses moyens & sa puissance ayent esté
trop foibles contre nos maux ? deuons
nous esperer qu'il fasse mieux, lors que
nous ne nous en pourrons plus desdire,
& que par honneur & deuoir nous serons
obligez à supporter ses deffauts comme
ses autres subiects, & courre sa fortune
iustques au bout ? Messieurs, tels Princes
n'ont pas accoustumé de se feindre ny es-
pargner aucune chose, quand il est que-
stion d'acquérir & adiouster tel accroisse-
ment à leur empire, qu'est ce Royaume,
qui merite bien vn bon effort : de maniere
que ie ne puis estre de l'aduis de ceux qui
ont attribué à art, plustost qu'à faute de
moyës les retardemens & deffauts de de-
niers, dont ledit Roy nous a assiste, com-
me si luy & ses ministres auoient voulu nous
renger à leur desir par necessité, plustost
que par bienfaits, & partant eussent faict
naistre exprés tous ces manquemens, par
lesquels nous voyons que l'esperâce, &cõ-

fiance premiere que nous auions en leur assistance & bonne volonté est grandement descheuë, ne plus ne moins que la reputation de leurs forces & cōduite au seul aduantage de nosdits aduersaires. Messieurs, la bonté & prudence dudit Roy ne meritent qu'on luy attribue vn tel artifice, & faut necessairement plustost croire qu'il n'a esté seruy selon son desir en tout ce qui s'est passé, dont à l'adventure que l'esloignement de sa personne a esté cause, autant que toute autre chose, d'autant qu'il faut perdre beaucoup de temps à l'aduertir de ce qui se passe & receuoir ses commandemens, & que nos mouuemens en France sont ordinairement si soudains & muables, qu'il est tres-difficile de s'en preualoir si on y apporte de la longueur. I'ay souuenance d'vne responce que i'ay souuent ouy faire dès le commencement de nos troubles à vn des plus sages ministres dudit Roy, employé par deça en ses principaux affaires, sur ce qu'aucuns luy remōstroient, que tant qu'ils emploiroient leurs moyens à nous secourir petit à petit, & escharcement, comme ils faisoient, pour les mesnager & faire durer dauantage, ou peut-estre pour nous le faire trouuer meilleur, ils leurs seroient & à nous instructueux,

d'autant que nostre feu vouloit estre esteint à force d'armes, & d'argent, autrement il consommeroit totalement tout ce que l'on y mettroit, sçauoir est que les moyens de son Roy estoient véritablement tres-grands, mais qu'ils n'estoient infinis, & qu'il estoit nécessaire qu'il les despartist en diuers endroits, mesmes pour la conseruation de ses Estats, nous exhortant à ceste cause d'aduiser de bonne heure à establir & dresser quelque fond de nous mesmes pour subuenir à nos necessitez, & soulager la bourse de son maistre, sans du tout nous reposer & confier sur icelle, comme nous faisons, par ce qu'à la longue elle n'y pourroit fournir: Messieurs, l'aduertissement de ce personnage nous a esté confirmé par l'experience que nous en auons faicte depuis; car nous auons d'an en an tousiours esté secourus dudit Roy, & principalement en deniers plus estroictement, non à mon aduis par faute de bonne volonté, mais comme il est vray semblable, par ce qu'il n'y a peu fournir selon son desir; c'est aussi vne charge tres-pesante, de laquelle suiuant le conseil du mesme autheur, nous eussions peu trouuer les moyens de le soulager, si la fortune de la guerre nous

eust esté plus fauorable : mais elle a tellement appauury nos villes , & a mis chacun en arriere , qu'il n'y a celuy de nous qui n'ayt peine seulement à viure encores bien pauurement & miserablement. Et toutes-fois ie dis que si nous pouuions encores in- uenter quelque expedient de pratiquer ce conseil, ie ferois d'aduis qu'il en fut vſé, soit que nous nous donnions audit Roy ou non : car sans doubte nous succomberons à la longue sous le faix de nos miseres , si nous ne contribuons & aydons aux des- pences qu'il conuient faire pour soustenir la guerre , autrement que nous n'a- uons faict cy-deuant , tout l'or des In- des n'estant suffisant pour donner à viure à ceux qui en ont besoin parmy nous , & partant nous maintenir & faire voir en l'e- stat auquel nous sommes , qui empire tous les iours à veüe d'œil : de sorte qu'il faut que nous auisions à faire quelque ef- fort d'armes , par le moyen duquel nous finissions nos iours , ou entrions en la iouissance de nos heritages , & d'un com- merce plus libre , & moins onereux que celuy qui nous reste , affin que chacun ayt de quoy se substantier & nourrir. Car si nostre langueur est à present tres- grande & insupportable , elle deuiendra

horrible, lors que par nostre susdite resolution nous aurons rendu nostre guerre immortelle, & aurons fermé la porte à toute esperance de paix, & reconciliation entre nous autres François, à cause des rigueurs que nous exercerons les vns contre les autres.

MAIS posons le cas que ledit Roy faisant vn effort extraordinaire, comme l'on dit qu'il veut faire, puisse mettre ensemble de grandes sommes de deniers. Quoy! hazardera-il cy apres ses gens au cōbat aussi souuent qu'il est necessaire pour vaincre nosdits aduersaires, & se rendre paisible possesseur du Royaume? Ses seruiteurs & ministres luy donneront-ils ce conseil en l'aage où il est, ses pays Bas estans troublez comme ils sont, & la Chrestienté comme au guet, attendant quelque mutation en son Empire par son trespas ou autrement pour s'en preualloir: ces mesmes considerations qui augmentent avec le temps, ont-elles pas souuent empesché que les armées qu'il a cy deuant enuoyees à nostre secours, bien qu'elles fussent tres-fortes n'ayent combatu & faict infinis beaux exploits à nostre grand regret & dommage, par lesquels s'ils continuent à estre si retenus & circonspects, Messieurs, quand fini-

ront nos miseres, quand aurons nous repris tant de villes & places que nosdits aduersaires occupent, lesquelles ils fortifient tous les iours de plus en plus ? sera-ce en deux ans que l'on diët que doit durer son effort, & à force de temporiser & nous faire languir qu'il aura la raison d'eux ? Ce puissant Royaume fut-il onques conquis autrement qu'à force d'armes ? les François de ce temps estans nourris à la guerre comme ils sont, sont-ils moins courageux & magnanimes qu'ils ont esté, ou s'ils sont plus lasches & patiens qu'ils ne souloient ? Lisons en nos cœurs, nous n'y trouuerons l'ardeur, ny le courage de continuer la guerre entre nous, qui y estoit du commencement : mais qui en est cause, que ceste langueur, & suite de calamitez qui nous a plus mattez que nosdits aduersaires, avec laquelle neantmoins il faut que nous nous resoluions de compatir, nous donnant audit Roy d'Espagne, si luy & ses ministres ne veulent refoudre de combattre, pour avec nous vaincre ou mourir, autrement qu'ils ont faict iusques à present. Mais encores suis-je empesché, où lediët Roy trouuera avec son argent des gens de guerre suffisamment pour executer ce dessein, car il n'en voudra desgarnir l'Espagne

plus qu'elle est, puisque il y tient sur pied vne armee expres pour obuier aux inconueniens, qu'il craint, comme Prince tres-prudent qu'il est, qui y peuuet arriuer, spécialement apres son deceds si Dieu le permet, cependant que le Prince son fils est encores ieune. L'Italie luy en peut encores moins fournir, car non seulement elle est menacee & en doubte de remuëment, mais c'est bien chose certaine si les nostres durent qu'elle se troublera à bon escient & bien-tost; nous sçauons aussi en quel estat sont les affaires au pays Bas, qui luy ont cy-deuantourny des soldats en bon nombre: mais nos guerres depuis quatre ans en ont tant deuoré, que ses seruiteurs ont peine maintenant d'y en assembler. Et mesmes en Allemagne si c'est pour venir en France, où ils sçauent n'y auoir plus rien à gagner que des coups, & de la necessité, & c'est ce qui est cause qu'il faut tât de temps comme nous voyons qu'il s'en passe à remettre sus ces armées, quand elles sont vne fois deffaictes. Il en pourroit tirer plus commodement des Cantons Catholiques de Suisses que d'autres endroits s'il vouloit s'en seruir: mais pour ce faire il faudroit qu'il accordast avec eux du payement des debtes de la Couronne, ou du moins de

celles qu'auons creées au nom de nostre party pour les seruices que nous auons receus d'eux depuis quatre ans, car l'estime qu'ils ne s'y engageront, autrement que tres-difficilement, tant pour le peu de cōpte que ledit Roy Catholique a fait de leur nation, & pour le soin qu'ont nosdits aduersaires d'en conseruer l'amitié: & toutes-fois il est certain qu'il ne faut pas remettre ensemble de petites & mauuaises forces, ie ne diray pour ruiner nosdits aduersaires, mais seulement pour eslargir ceste miserable ville de Paris, & luy ouurir les passages qui luy empeschent les viures, car s'ils sont puissants d'eux mesmes, ils le sont aussi d'alliez & d'amis qui les secourent commodément & volontiers, comme ceux qui sont interessez en leur cause, tant pour le respect de la religion que pour la conseruation & seureté de leurs estats, dont il ne faut point douter que la ialousie dudit Roy d'Espagne n'augmente encore le nombre & l'affection: car comme nostre guerre changera de nom ils s'y engageront plus librement, qu'ils n'ont encores fait, & mesmes du costé d'Italie d'où ils seront assiste d'argent, qui est ce dont ils ont plus de besoin. Car ils ne peuuent chaumer d'hommes, pourueu qu'ils ayēt de quoy les payer,

ayans l'Angleterre, l'Eſcoſſe, l'Allemagne, & les Suiffes à leur deuotion, & pareillement ceux des Eſtats des pays Bas qui font la guerre audit Roy d'Eſpagne; & ſi il faut croire qu'ils feront encores ce qu'ils pourront pour eſbranſler le Turc contre ledit Roy: dauantage, ils font plus de beſongne d'un eſcu, que les miniſtres dudit Roy de quatre, tant à cauſe des intereſts du port & change de deniers que l'on faiſt tenir d'Eſpagne, en Flandre, & de là en ce Royaume, où quelquefois il ſe perd encores aſſez ſur les eſpeces, par ce qu'il y a des debtes du paſſé à payer à ceux qui ſont employez au ſeruiſe dudit Roy qui conſomment de grandes ſommes de deniers, & ne font rien qu'à force d'argent. Je ſuis auſſi en peine comment ces grandes armées eſtrangeres ſeront cy apres nourries en ce Royaume, principalement ſ'il faut qu'elles approchèt de Paris, comme il eſt neceſſaire qu'elles faſſent pour la deſgager & conſeruer; car d'oſeſnauant les viures ſeront tres-rares en ce Royaume, pour ce que les terres, & les vignes n'y ſont labourees comme elles ſouloient, & deſia que és enuironſ de laditte ville il ne s'y trouue de quoy viure, principalement pour la cauallerie: dauantage, quand auront-ils repris par force les

villes & places que tiennent nosdits aduersaires, seulement à l'entour de laditte ville sur les riuieres d'icelle. Nous auons esprouué souuent qu'il ne faut qu'un seul siege de place pour ruiner vne forte armee, laquelle aura cousté beaucoup d'argent & de temps à dresser, encores faut-il estre bien asseurez que les munitions de guerre necessaires pour ce faire ne nous manquent, & faire estat aussi que nosdits aduersaires ne demeureront les bras croisez ny inutiles durant ce temps-là, non plus qu'ils ont faict cy deuant, & que s'ils ne peuuent pis faire, du moins ils attaquerront nos places quand ils verront nos armees engagees aux leurs, & peut-estre qu'ils en forceront & prendront autāt que nous, de sorte que cessera tousiours à recommencer, & ne s'en ensuiura qu'une entiere & generale ruine & desolatiō qui ne restaurera nostre religion, Messieurs, non plus que la continuatiō de ceste miserable guerre, laquelle acheuera de r'emplir ce Royaume d'impietē & d'affoiblir le party Catholique.

MESSIEURS, ces choses estans veritables comme elles sont : Quel aduantage deuōs nous esperer qu'apportera à nostre religion & à nostre patrie nōstre declaration

en faueur dudit Roy d'Espagne, puis qu'elle rendra nostre guerre immortelle, & plus perilleuse & douteuse pour nous que iamais? quelle recompense aurons nous d'auoir violé nos loix, forcé nos volontez, & espousé pour iamais la domination d'une nation estrangere, dont les façons de viure sont du tout contraires aux nostres, leur grauité estant incompatible avec nostre naturelle franchise & promptitude? Que ne deuons nous tenter & faire pour fuir ce naufrage qui ne nous sera moins vituperable que domageable? Sera-ce faire le deuoir de vray François, que de nous precipiter à ce gouffre calamiteux, les yeux bandez, comme aucuns nous conseillent, nous confians du tout, ainsi qu'ils disent, en la iustice de nostre cause, sans d'auantage auoir esgard ny nous arrester à tous nos vices & passions qui offusquent la pureté & lumiere d'icelle? Est-ce le moyen de conseruer la Religion, que de forcer & obliger les Catholiques qui assistent nosdits aduersaires, de plustost mourir que de les abandoner, leur acquerir de nouveaux amis & nous diuiser & partialiser entre nous plus que nous ne sommes? C'est veritablemēt mourir glorieusemēt que de finir ses iours pour deffendre sa religion: mais

aussi c'est offencer Dieu que de s'y precipiter inconsiderement & temerairement: car il faut que l'intention soit accompagnée de charité & de raison, & qu'elle profite à l'effect qui la conduit.

IE m'estonne sur toutes choses comment ledit Roy d'Espagne affectionne tant la-ditte eslection en l'aage où il est, veu les accidens qui en peuuent naistre au reste de la Chrestienté & à ses Estats, estant Prince doué d'une tres-grande experience & sagesse cōme il est, & qui a toute sa vie faict demonstration de vouloir regler ses entreprises & actions au pied de la raison & de l'equité autant que nul autre Prince de ce siecle: car il me semble qu'il doit plustost desirer de laisser au Prince son fils, la succession de ses Estats entiere & paisible, que de le surcharger d'enuie & d'une querelle hereditaire fondee sur le debat de ceste Couronne, n'y ayant point d'apparence qu'il doive esperer d'en veoir la fin en ses iours: & neantmoins il faudra qu'il employe & consume infinis hommes & deniers, qui peut-estre feront faute à son fils apres son trespas; car routes mutations de Princes sont subiectes à mouuemens, & s'il aduenoit qu'ils trouuassent son Empire desgarny de forces & de moyens, ou de la
bonne

bonne fortune qui l'a continuellement acompagné depuis cent ans, ils le pourroient endommager grandement. Mais comme il n'y a point de puissance en la Chrestienté qu'il doive craindre pour ce regard que celle de ce Royaume, si d'aventure il n'en deuient le maistre suiuant son dessein, l'on se promet peut-estre qu'il se rendra si foible par la guerre, qu'il ne pourra pour lors nuire à son fils ny à ses Estats, de sorte qu'en tout cas il ne luy peut mesaduenir de tenter ce dessein & nourrir nos diuisions. Messieurs, il me semble que ce n'est cognoistre la force de France, ny le naturel des François que de bastir telles esperances sur fondemens si inconstans, dont le succeds pourroit réüssir tout au rebours, ne plus ne moins qu'il aduint en l'année mil cinq cens octante huiët de ceste grande & formidable armée de mer dudit Roy d'Espagne, avec laquelle il s'estoit promis d'enuahir l'Angleterre, & tout ensemble ruiner ceux qui luy font la guerre aux pays Bas, qui ne seruit toutesfois qu'à augmenter la gloire & asseurer le regne de la Roynne dudit pays, & à releuer les affaires des autres qui ont tousiours depuis prospéré au detrimement de la religion Catholique: ledit Roy n'a aucun droit en ceste Courône,

Ter aller à d'autres conseils; & sur tout ne nous precipiter en celuy de ladicte élection qui rendra nostre guerre immortelle: car lors il ne sera plus question de la foy & religion, ains du droict de la Couronne, duquel l'on n'aura priué seulement le dit Roy de Nauarre, mais aussi tous les Princes de sa maison, jaçoit qu'ils facent profession de la religion Catholique: ie desirerois semblablement que l'assemblée fust representee à nostre saint Pere le Pape par personnes dignes de ce faire; & exempts de toute autre conuoitise & passion, que de la conseruation de la religion & du Royaume: car ie ne puis croire que ladicte Saincteté ayt encores bien entendu la verité de nos affaires, laquelle luy a esté souuent desguisee autant peut-estre par nous mesmes que par d'autres & diuerses fois. Et comment pouuons-nous esperer la guerison de nos playes, si nous mesmes les cachons & desguisons à ceux qui y peuuent remedier, comme peut faire ladicte Saincteté mieux que tout autre, pour le lieu qu'elle tient en la Chrestienté, & l'interest qu'a ledit saint Siege en ceste cause, & en la conseruation de ce Royaume, auquel il a tousiours trouué plus de support & d'obeyssance qu'en tous autres.

Messieurs, faisans donc ce deuoir enuers l'un & l'autre, s'il est bien receu nous en recueurons le principal fruit : si au contraire on n'y veut auoir esgard, ce sera autant de descharge enuers Dieu & le monde, & de consolation en nous mesmes qui nous soulagera en nos afflictions, & nous ouurira & nous facilitera peut-estre quelque autre voye, par laquelle nous pourrons nous en tirer à la gloire de Dieu, au salut de nostre patrie, & à nostre honneur & vtilité. Je sçay bien que Monsieur le Legat est icy, auquel on dira que nous pouuons adresser nos remonstrances, & pareillement à Messieurs les Ambassadeurs de sa Majesté Catholique qui representent leurs Princes, lesquels nous apprendront leurs intentions, sans enuoyer plus loing : mais ce faict est de tel poids & importe tant à la Religion, à ce Royaume & à nous mesmes, qu'il me semble que nous ne deuons laisser de faire l'offre susdict, car vne remonstrance faicte par personnes interessees à viue voix, a plus d'energie : il faut aussi que le Medecin voye, oye & touche le patient en personne, & non par procureur, s'il veut bien cognoistre, iuger & guarir la maladie : ces Princes seuls nous peuuent guarir, ou pour le moins gran-

dement aider à nous deliurer de nos maux. Doncques parlons nous mesmes à eux en corps, & leur representons au vray & sans nous flatter l'estat de nos affaires, pour les supplier & disposer de nous y assister, non à l'appetit d'aucuns en particulier, mais comme tous ensemble nous cognoissons qu'il est expedient & necessaire de faire pour le seruice de Dieu, & nostre commun salut.

Et d'autant que tels voyages ne se peuvent faire qu'avec le temps, & qu'il est à craindre qu'ils soient trop tardifs pour nos maux qui nous pressent merueilleusement; voicy mon aduis, Messieurs, que ie vous supplie receuoir en bonne part, & comme procedant d'un cœur entierement deuoué à la religion & à son pays: C'est que nous procurions cependant que la Conference qui a esté proposée & de vous approuuée avec les Catholiques qui assistent nosdicts aduersaires, s'effectue, parce qu'il n'en peut aduenir mal, mais au contraire beaucoup de bien, y portant vne intention vrayement Chrestienne & bandée au salut public. Messieurs, il est certain que c'est le plus seur moyen que nous ayons pour conseruer nostre religion & le Royaume, que de r'allier enséble les Catholiques d'icelle,

car toutes les puissances estrangeres ne serviront qu'à destruire l'une & l'autre, si les diuisions continuent: C'est pourquoy ie me suis grandement esmeruillé & esmeu quand ceux qui sont avec nosdits aduersaires nous ont conuié de parler à eux, pour aduiser aux moyens de conseruer la Religion & l'Estat; aucuns ont dit que c'estoit crime d'y entendre: car j'auois creu auparauant & j'auois ainsi aprins de Messieurs les Legats Ministres de nos saincts Peres decedez, que c'estoit ce qu'ils desiroient & affectionnoient le plus que ladite reconciliation, & de fait ils s'y estoient employez les vns apres les autres; si ç'a esté inutilement, s'ensuit il que la chose ne soit encore bonne & ne doiue estre tentee, veu que le temps nous a aprins qu'elle est plus necessaire que iamais? Il faut necessairement que ceux là ayent crainct que la Conference fit naistre ouerture, par le moyen de laquelle nous recognoissions pouuoir mieux conseruer nostre religion & nostre pays que pour les autres qui se sont presentees: car sans doute ils n'ont deu craindre qu'il en arriuaist aucun inconuenient à la Religion ny à l'Estat, nous rendant moins affectionnez & constans en l'un & en l'autre, & nos maux plus clairs & sensi-

bles : où ils ont conceu vne tres-mauuaise opinion de nous en toutes façons, ce que ie m'abstiendray maintenant de vous représenter, puis qu'ils l'ont depuis approuué, si ie n'estimois estre chose indigne de considerer, par laquelle est conneuë leur inclination & affection en nos affaires. Or i'adiousteray, vsant de ma franchise accoustumee, que ie desirerois que nous fissions aussi vne cessation d'armes, pour cependant arrester aucunement le cours de la guerre qui destruit la Religion & le Royaume, & dont la continuation durant ladite Conference ne peut seruir qu'à troubler & empescher les bons effects d'icelle : aussi bien tous les grands aduantages que les vns & les autres cuident receuoir du progres d'icelle, sont tres-incertains comme chacun a esprouué, à son retour, tant aux sieges de Paris & Roüen, qu'en la retraicte & dissipation des armées estrangeres venuës au secours des vns & des autres, & comme nous sommes encores à la veille d'esprouuer de celle qui est sur pied en nostre faueur : car si nous attendons à preparer la voye pour sortir de nos calamitez, & que nous soyôs esgaux en forces & en esperances, nous perirons de part & d'autre deuant que nous

y entendions, pource que ce sera tousiours à recommencer. Il ne faut pas aussi que ce soit la consideration d'une necessité pressante, ny les accidens qui nous conduisent en ladite recherche, ains le seul zele de nostre religion, & l'amour de nostre pays: d'auantage nous pouuons bastir ladite cession de façon que la cause n'en empirera, ny receura aucun preiudice, toutes choses demeurans en l'estat qu'elles sont pour le temps qu'elle durera, & toutesfois les parties ne laisseront d'en tirer quelque commodité & relasche: mais il ne faut pas esperer que nous paruenions iamais à vne resolution generale des affaires que nous ne commencions par là. C'est pourquoy ceux qui desiroient faire leur profit de l'affoiblissement de la religion & du Royaume, y ont cōtredit iusques à present tant qu'ils ont peu pour nous empescher de nous reconnoistre, & ce faisant descrié le party plus vtile à la conseruation de l'un & de l'autre: peut-estre aussi craindrons-nous en ce faisant d'offencer ceux qui nous assistent, & mesmes sa Saincteté & sa Maiesté Catholique, & partant qu'ils nous abandonnent deuant que nous ayons pourueu à la seureté de nostre religion, & d'autant plus que le succez des traictez que l'on

peut faire durant ladite cessation ne peut estre que tres-incertain. Certainement ceste raison est considerable, mais ie ne puis croire que sadite Saincteté & sadite Maiesté Catholique trouuēt mauuais que nous recherchions les moyens de pourueoir à nos miseres, pourueu que nous ne facions rien qui preiudicie à nostre religion & au party Catholique, ny à leur autorité & seruice particulier, comme il me semble que nous ne ferons si nous entretenons les choses en l'estat qu'elles sont, & leur promettons de ne toucher au principal ny traicter d'iceluy sans leur aduis : car de tout temps semblables traictez ont esté faicts, mesmes avec les infidelles, que les saincts Peres ont excusé, ou pour euitter vn plus grand mal, ou paruenir à vn plus grand bien : en quoy i'estime que sadite Saincteté estant bien informée de nos affaires ne sera non plus difficile que ses deuanciers. Je fais pareil iugement dudit Roy Catholique, par ce que ie veux croire qu'il a soin de nous, & nous assiste pour nous seruir, & non pour nous perdre : & d'autant plus que nostre perte ne peut estre qu'elle ne luy soit honteuse, & dommageable, ayant entrepris, comme il a faict à bannieres desployées nostre def-

fence. De sorte que si nous luy remōstrons que ce chemin nous peut conduire au port de salut, plustost qu'en autre, ie ne me puis persuader qu'il s'en offence, preuoyant, comme i'ay dit, à ce qui le concerne, comme certainement nous sommes tres-obligēz de faire. L'en oppose encores à ce conseil deux craintes: l'vne que nos peuples estans las & recreus de la guerre, comme ils sont, refusent si besoin est, de r'entrer aux perils & miseres d'icelle, apres auoir gousté de la douceur de ladite cessation d'armes, & qu'aucuns prennent pretexte sur ce de se desbander d'avec nous & dresser vne guerre à part au preiudice de la cause publique. Messieurs, ie dis que ces inconueniens ne sont tant à craindre que les malheurs inéuitables de la cōtinuation de nostre guerre fōdee sur les moyens qui nous restent, & aux conditions ausquelles l'on pretend nous abstraindre: car quand nos peuples cognoistront qu'il n'aura tenu à nous que nous ne les ayons deliurez de la guerre à l'honneur de Dieu, & au salut public, tant s'en faut qu'ils fuyent de r'entrer en la lice de la guerre, que i'estime qu'ils s'y ietteront avec plus de courage que iamais, meus d'vne iuste indignation qu'ils auront contre ceux qui seront cause

de la continuation d'icelle, contre lesquels ils combattront pour lors, comme contre ennemis irreconciliables: ce que dauanture il sera difficile leur faire faire autrement: & quant à ceux qui pourroient se separer de nous à cause de ladite cessatiō, le nombre à mon aduis, n'en pourra estre que tres-foible, & partant y acquerir plus de honte, qu'il n'apportera de dommage à la cause. Et d'autant plus que tels remuēmens seront attribuez à pure ambition, ce qui rendra leurs actions odieuses, & leurs esperances encores plus vaines.

M A I S posons le cas que ie me trompe au iugement que ie fais des volontez desdits Princes, & specialement de celle dudit Roy d'Espagne aux fins de laditte cessation. Quoy, vaut-il mieux se ietter à corps perdu au pouuoir dudit Roy, que de chercher les moyens de sauuer nostre religion & le Royaume par autre voye? car, Messieurs, il faut que nous fassions l'vn ou l'autre, puisque ses Ministres disent qu'il retirera ses forces, & cessera de nous assister si nous ne le contentons du tout. Ce sont les termes de nostre perplexité, ausquels nos pechez & passions nous ont reduits: aurons-nous plus d'honneur & de profit de nous precipiter en vne guerre irrecon-

ciliable, avec les aduantages que nous auons esprouuez depuis quatre ans, lesquels augmentent avec l'aage dudit Roy, qui essaye à les euitier par le moyen de ladite cessation? ie scay bien qu'il seroit à l'aduanture plus seur pour nous d'accorder des à present tout à faict vne bonne paix generale, que de commencer par ladite cessation, à cause de l'incertitude du succez d'icelle, & que ceux qui nous assistent nes'offenceront gueres plus & peutestre moins de l'une que de l'autre, d'autant que les Princes quelquesfois s'accommodent par prudence plus volontiers aux choses faictes, qu'ils ne consentent aux moyens de les faire; & qu'en tout cas nous aurions pourueu par icelle à la seureté de nostre religion, ce qui rendroit le mescontentement de ceux qui s'en offenceroient moins perilleux pour nous. Mais, Messieurs, outre que c'est souhaitter l'impossible qu'un tel traicté soit basty en peu de iours, & sans qu'il soit sceu & diuulgué; partant lesdits Princes auront-ils pas tousiours le mesme loisir & pretexte de troubler ladite negotiation, & retirer lesdites forces à cause d'icelle & deuant qu'elle soit concludë, comme par ladite cessation, & en ce faisant nous lais-

fer à la mercy & discretion de nosdits aduersaires? C'est bien chose certaine que le peril en seroit d'autant plus grand; qu'il ne nous resteroit aucun temps ny loisir de pouruoir à nos affaires comme nous aurons en faisant ladite cessation, par laquelle nous nous esclaireirons des volontez de ceux, avec lesquels nous l'aurons faicte deuant qu'elle soit expiree, & si nous iouïrons cependant du benefice, & rafraichissement d'icelle. Messieurs, si nous pouuons faire trouuer bon ausdits Princes, que nous essayons de pourueoir à la conseruation de la religion & du Royaume par autre voye, que par la continuation de la guerre, ils doiuent auoir plus agreable ce qui nous y acheminera par laditte cessation que autrement: car ils pourront durant icelle se descharger, s'il leur plaist, d'une partie des frais qu'ils font pour nous, & les employer vtilement contre les ennemis de nostre mesme religion qui font la guerre audit Roy en ses propres pays. Mais si c'est chose que nous deuons esperer, quoy, faut-il que nous nous perdions pour les contenter? comme ainsi soit que nous ne puissions faire ce que ledit Roy desire sans en courre la fortune, comme

ie vous ay representé ; quel profit apporteront-ils en ce faisant à nostre religion, & à nous mesmes ? que deuiendra l'Eglise Catholique si nosdits aduersaires s'establisseront vne fois par les armes, comme ils feront s'ils continuent à prosperer sur nous, ainsi qu'ils ont aduancé depuis les guerres, & qu'il y a apparence qu'ils feront, si nous ne changeons de chemin & conduitte pour y remedier ? Les Catholiques qui les assistent empeschent-ils apres nostre ruine qu'ils ne disposent de la religiō ainsi qu'il leur plaira ? Sera-ce l'honneur, le bien & aduantage du saint Siege, mesme dudit Roy d'Espagne & de ses affaires, que ces choses aduiennent ? Blâmez-moy, si bon vous semble, d'auoir mauuaise opinion du succez de nos affaires, & si j'ay parlé peut-estre trop librement : mais prenez vous en premierement à ceux qui sont cause des malheurs d'icelle : car pour mō regard j'ayme mieux estre repris de timidité & inconsideration, que de manquement de foy enuers Dieu, & mon pays & enuers vous, Messieurs, comme ie meriterois si ie ne vous representois & cōfessois en ceste action, ce que en ma conscience i'estime estre vtile à nostre religiō & appartenir à nostre hōneur & salut public.

Je suis encores moins d'aduis, Messieurs, que nous forcions la nature & nos loix pour vn autre Prince que pour ledit Roy d'Espagne, comme i'ay desia dict, pour ce que nostre guerre ne laisseroit d'estre irreconciliable, & toutesfois nous aurions moins de moyen pour la soustenir; car il n'y a puissance en la Chrestienté qui soit suffisante pour ce faire si celle dudit Roy ne l'est, laquelle ne scauroit continuer entiere en faueur d'vn autre; car c'est abus d'esperer que nous luy engagiôs par le moyen du mariage de l'Infante sa fille, comme aucuns se promettent, pour les raisons que i'ay dites: ioinct que ce seroit la marier à vne querelle perpetuelle, dont la defence luy seroit à grande charge & despence, & l'issuë ne pourroit estre que tresdouteuse. Messieurs, ce seroit tout ce que ledit Roy pourroit faire que de l'accorder à vn Roy de France bien estably & paisible, en l'estat que sont les affaires: ie sçay que pour tenir & conseruer l'assistance dudit Roy, nous manquant le bien dudit mariage, il faudra pour le moins luy faire part du Royaume, & en ce faisant le desmembrer, quand ce ne seroit que pour asseurer ses deniers, & satisfaire aux pretentions de ladite Infante, chose

que nous deuons craindre & esuiter sur toutes choses : car si nous souffrons vne fois que ce partage ayt lieu nous deuendrons les plus miserables gens du monde , comme ceux qui seront subiects à la tyrannie perpetuelle de plusieurs occupants , en perpetuelle guerre & inimitié les vns contre les autres , en opprobre à tout le monde & à nos voisins , & le iouet de toutes les passions de la Chrestienté : ce seroit aussi l'entiere ruine de nostre Royaume , pour l'aduantage qu'auront nosdits aduersaires , que parce que tels vsurpateurs mettroient incontinent toutes pieces en œuvre sans distinction de religion , pour se maintenir ou accroistre les vns sur les autres : car telles vsurations sont ordinairement incompatibles avec les loix , & ennemis de toutes bonnes mœurs , principalement à leur origine que tout est licite & iuste qui peut seruir à en conseruer la possession. Dauantage , tel desmembrement seroit aussi desagreable & ombrageux à toute la Chrestienté que seroit l'accroissement dudit Roy d'Espagne , comme i'ay desia dict , car comme il n'y auroit plus de puissance en icelle qui fist cõtre-poids & résistance à la sienne , chacun seroit subiect à ses volontez , qui est la seule

la seule crainte & considération qui meut maintenant les autres en faueur de nosdits aduersaires, lesquels par ce moyen ne seroient priuez du secours qu'ils en esperent, & neantmoins c'est la plus forte raison qui combatte pour ce party; car pour mon regard ie croy que difficilement il feroit cesser les partialitez qui sont entre nous, tant elles sont enracinees, par ainsi nous empiterions nostre condition.

FAYT-IL donc obeyr à vn Roy faisant profession de religion contraire à la nostre? Messieurs, ie n'ay encores donné ce conseil à personne, combien que i'aye conseillé & désiré la paix autant que nul autre; i'ay aussi la conseruation de ma religion, & le repos de ma conscience en autant de recommandation que ie dois, & ne cederay en cela à creature qui viue. Si ie vous represente en homme de bien l'opinion que i'ay des partis que l'on nous propose, dois-je pour cela estre accusé de faire banqueroute à ma religion, & de n'en désirer la propagation? il me semble, sous correction, que c'est mal argumenter, & que ie deurois plustost estre blasmé, si ie vous desguisois ce que j'en sens, ou si la passion me maistrisois

en ce Conseil. Je vous ay protesté dès le commencement que ie ne veux estre opiniastre, & que ie cederay tousiours au conseil des plus sages : ie le repete encores maintenant, & m'y oblige de bon cœur, doibt-on desirer de moy autre submission ? vray est que i'entends estre combattu & vaincu de raisons, & non de passions, d'effets & non d'esperances & de promesses, car la matiere de laquelle il s'agist le requiert : ce seroit estre proditeur du seruice de Dieu, & de la patrie que de se flatter à l'appetit & à l'adueu d'autrui, par art, ou par ignorance, en ce iugement : ja à Dieu ne plaise que ie m'oublie tant que cela, considerant que nos peuples, & iusques aux moindres, voire que plusieurs de ceux qui au commencement estoient si eschauffez qu'ils en estoient deuenus aveugles, ont maintenant les yeux tres-ouuerts, estans deuenus sçauans à leurs despens ; enseignez de l'experience, leur maistresse ordinaire. Messieurs, ils sont si las de la guerre, & si mal edifiez des choses qui se passent, que si maintenant le Roy de Navarre leur donnoit occasion d'esperer sa conuersion, ou dauantage si apres quelque forme d'instruction il alloit à la Messe,

peut-estre qu'ils n'attandroient le consentement de nostre Saint Pere le Pape, ny celuy des chefs de nostre party, pour le recognoistre, & poser les armes, par où vous pouuez iuger quel hazard nous courons si nous violons nos loix, fondez sur la perfection, puis qu'il est au pouuoir de nos aduersaires d'apporter ce changement parmy nous quand il leur plaira: au lieu que du commencement les exemples des mutations qui sont aduenües au faict de la Religion en la Germanie, Angleterre & ailleurs, animoient nos peuples à la guerre, ils seruent maintenāt à les faire craindre & apprehender, que si l'on continuë à user de rigueur à l'endroit du Roy de Nauarre sur son instruction & reconciliation à l'Eglise, qu'ils sçauent que les Catholiques qui l'assistent ont par sa permission demandee & recherchee, il est à craindre que le desespoir ne l'emporte avec eux à iouter de son reste en ceste guerre, & que le succez en soit aussi preiudiciable à nostre Religion qu'a esté la resolution prise audit pais de se distraire du tout de l'obeissance du saint Siege comme ils ont faict; pour ceste cause j'eusse bien desiré qu'il eust pleu à sa Sainteté de receuoir & ouyr celuy que lesdits Catholiques auoient pour cét effect

enuoyé deuers luy ; car ie crains que le refus qu'elle en a faict non seulement serue de pretexte à nosdits aduersaires pour courir leur obstination, mais aussi soit cause d'arrester & lier avec eux plus estroitement que iamais lesdits Catholiques indignez d'iceluy, l'attribuant plustost au pouuoir qu'ont à Rome ceux qui craignent la conuersion dudit Roy de Nauarre, & la grandeur, qu'à toute autre consideration fondée sur la religion, cōme ceux qui cognoissent & croyent certainement, cōme ie fais de ma part, que la ditte conuersion eust apporté à ce Royaume & à toute la Chrestienté vn tres-grand repos pour la suite qu'elle eust eue, & que si elle ne fust aduenue par la faute dudit Roy le party Catholique en eust aussi tiré vn grand aduantage, d'autant que plusieurs d'eux eussent estimé auoir lors iuste occasion de la quitter, comme ie pense certainement qu'ils eussent faict, car i'en recognois infinis qui ont grand regret de la diuision des Catholiques, & de veoir que leurs armes seruent à establir les autres : & s'il aduient que la guerre dure, & qu'elle succede mal pour nous. Quel regret aurons nous d'auoir perdu cette occasion de gagner lesdits Catholiques & nous reünir tous ensemble pour nostre

mutuelle conseruation : Pour mon regard
i'estime, Messieurs, quoy que nous resolu-
ions& facions que nos affaires iroient touf-
iours du mal en pis, iusques à ce que les
Catholiques du Royaume soient d'accord
& bien reünis à la deffence & manutentiõ
de leur religion, comme ils ont esté autres-
fois, & partant qu'il est neecessaire sur tou-
tes choses de viser & mettre peine d'at-
teindre à ce but, autrement le party Catho-
lique s'affoiblira tous les iours à veüë d'œil
comme il a faict depuis nostre dés vnion :
pour ce faire il est du tout besoin que nous
iustificions tellement nos intentions par
nostre presente resolution & nostre con-
duitte en icelle, que ceux qui sont avec
nosdits aduersaires n'ayent occasiõ de croire,
cõme ils ont faict iusques à present, que
nostre guerre est plustost ambitieuse que
religieuse, à quoy peut grandement seruir
laditte conferëce, pourueu qu'elle soit fai-
cte en seureté & dilection vrayemēt Chre-
stienne, & avec telle patiëce qu'il conuiët.
Chose qui nous est tres-difficile d'executer
durant la tourmente de la guerre, laquelle
occupe tellement les esprits des hommes
& principalement des grands, sans les-
quels on n'y peut rien aduancer, que l'on
n'y vacquera qu'à demy, & comme par

maniere d'acquit, si l'on ne la faict cesser pour quelque temps: & si c'est chose que nous ne puissions obtenir de nosdits aduersaires, lesquels iusques à present certainement s'y sont monstrez tres-mal disposez, au moins differons à prendre vne resolution qui rende les choses irreconciliables, iusques à ce que nous voyons ce qui reüssira de laditte conference, & que nous ayons perdu toute esperance de nous pouuoir maintenir par autre voye.

OR Monsieur, nous auons tous en ceste assemblee les yeux fichez sur vous, tout ainsi qu'ont les mariniers sur leur principal pilote en vn passage tres-perilleux, duquel ils n'esperent sortir que par son industrie & experience, en laquelle ils ont toute confiance: nous desirons autant que iamais de plustost perdre les biens & la vie, que de manquer d'vn seul point au deuoir de vrais Chrestiens, pour la deffence de nostre Religion: c'est le vœu que nous auons faict, dont ne voulons nous desdire pour chose quelconque: mais nous vous supplions ne permettre que les aucugles nous conduisent, ny que les factieux abusent en cela de nostre zele & de vostre autorité, comme plusieurs eussent desia faict si ne l'eussiez empes-

ché, dont ils vous regardent encores d'aussi mauuais œil que iamais, quelque contenance qu'ils fassent du contraire, au lieu que les gens de bien vous en reuerent & cherissent d'auantage. Monsieur, le nombre de ceux-cy est plus grand & plus puissant qu'il n'a esté, car l'experience l'a fort accru, de sorte qu'il vous sera tres-facile, vous seruant d'eux & les authorisant, de conduire la barque au port que vous iugerez avec eux estre plus salutaire: Si vous prenez ce conseil vous comblerez vous & vostre maison de benedictions, car chacun à bon droit vous donnera la gloire d'auoir aydé à conseruer la Religion & la France en son entier, & vous deura sa saluation; vous iustificerez d'un tesmoignage irreprochable la memoire des vostres & toutes vos actions passées & presentes, avec les intentions de tous ceux qui vous ont suivi & seruy, lesquels participeront en ce faisant à vostre bon-heur: vous bastirez vostre grandeur & la fortune des vostres, sur des fondemens qui pour estre iustes & vtils au public seront fermes & solides, & partant perdurables, representez-vous ce que vous auez auancé, & pour vous & pour eux depuis quatre ans, vous trouuerez que si le public y a plus perdu.

que gaigné, vous avez encores moins profité. Qui n'a faict les affaires mieux que vous? où sont les citadelles que vous avez basties, comme ont faict d'autres pour maistriser ceux qui les auoient appelez & receus en leurs villes? où sont les thresors que vous avez assemblez aux despens du public? tant s'en faut que vous l'ayez faict, encores qu'il ayt esté en vostre puissance, que vous y avez mis tout ce que vous auiez. Plusieurs ont abusé de vostre bonté ayant pris argent de vous, lesquels n'ont seruy comme ils vous auoient promis. Il est vray, mais doit-on pour cela vous accuser d'auoir mal mesnagé les deniers publics comme on a osé faire aussi malicieusement qu'indiscretement? quel chef de part en vne guerre ciuile n'a esté subiect à telles piperies, & quel moyen y a-il de chastier les auteurs d'icelle, lesquels trouuent par tout support, non seulement avec les aduersaires, mais aussi parmy les leurs mesmes, desquels il est souuent aduenü qu'ils ont esté pratiquez & desbauchez plustost que les autres; & toutesfois vous seul avez porté & portez encores l'enuie & le blasme des fautes d'autrui. Il n'y a partie sur vous ny en vous qui n'ayt esté atteinte de quelque calomnie, si quelquesfois vous avez

voulu regler les affaires & y apporter vn ordre chacun s'y est opposé, comme si vostre interest vous y eust pouffé plustost que la consideration publique: & si depuis forcé de la violence du mal vous avez voulu couler le temps avec les autres en la confusion qui a tousiours esté, qui ne s'é est plaint, & ne vous a blasmé quand vous avez cherché les moyens d'aduancer & solliciter la presente assemblee, comme vn souuerain remede à tels desordres: l'on a dit que vous voulez traicter avec nosdits aduersaires, & quand au' contraire vous avez esté cōtraint à cause de la guerre & des dāgers des chemins la retarder, vous avez esté accusé de le faire exprés pour la crainte que vous auiez d'icelle, mesme d'estre priué de la charge qui vous a esté cōmise, peu de gens ayant voulu considerer combien elle est pesante & onereuse, ny les incommoditez, perils & fascheries desquels elle a tousiours esté accompagnée; quels offices n'a-on faicts contre vous dedans & dehors le Royaume, pour descrier & trauerfer vos entreprises, mesmes contre nosdits aduersaires: de sorte que ie ne m'esmerueille pas de ce qu'elles ont si mal succédé, mais de ce qu'il n'en est pas aduenu: car maintenant l'ō veut pour vous recompenser de toutes vos

peines, pertes, & merites que vous faciez les affaires d'autrui à vos despens, & aux nostres. Monsieur, ie vous diray en vn mot avec ma liberté ordinaire, que si vous suivez ce chemin, vous y rencontrerez tout le rebours de ce que l'autre vous promet: Vous seriez aussi le premier, qui se seroit bien trouué d'auoir introduit dans son pays vn Prince plus grand que soy, & par dessus soy; s'il en aduient autrement, toujours vostre grandeur & prosperité sera suspecte à ceux qui tiendront la leur de vous: & si deuant le coup l'on a fait tout ce que l'on a peu pour vous desantheriser, iusques à tenter de faire vn establissement sans vous, deuez-vous croire qu'apres qu'il sera rué; & que vous aurez lasché la parole, l'on vous respecte d'auantage? c'est bien ce que l'on vous promet, mais ce seroit contre toute maxime & reigle d'Estat si l'on l'obseruoit, quand mesme la guerre durerait laquelle vous rend necessaire: ie parlerois plus clairement & par exemple, si i'estimois qu'il en fust besoin. Monsieur, ie ne veux plus vous représenter qu'une chose, c'est que si vous entreprenez de disposer du Royaume contre les loix d'iceluy, peut estre y engagerez vous pour vn temps nos personnes & nos biens, puis que nous vous

zuons confié la garde & deposition de nos villes: mais croyez qu'il sera tres-difficile que nos cœurs s'y assuiectissent iamais, principalemēt s'il faut que nostre lāgueur dure apres ce saut, cōme il y a grande apparence d'estimer qu'elle fera, voire qu'elle augmētera plustost qu'autrement, d'autant qu'il sera en la puissance de nosdits aduersaires si vous ne les battez & affoiblissez grandement, de nous incōmoder & couper les viures, principalement en ceste ville de Paris, cōtre laquelle cōme cōtre les autres, il ne faut pas douter, que lors ils ne fassent du pis qu'ils pourront, par ce que la querelle sera deuenue irreconciliable: lors chacun nous reprochera le malheur commun, se ressouenant qu'il aura esté en vostre puissance de nous garantir, & mesmes vous en aurez esté requis, dont vous ne devez point douter qu'il ne vous arriue plusieurs inconueniens tres-dangereux: au moyen de quoy ie vous supplie & conseil-le tout ensemble, cōme vostre tres-hūble & affectiōné seruiteur, de iustifier au moins tellement vostre conduite en ceste action & resolution, que vostre honneur y soit cōserué, avec la creance que vous avez acquise enuers les gens de bien, sans laisser le certain pour l'incertain à l'appetit de gens

qui ne se fieront peut-estre iamais en vous,
& qui ne se peuuent asseurer & establir en
ce Royaume que, par vn general & entier
renuersement d'icelle, & neantmoins ne
peut aduenir que nostre Religiō ne courre
la mesme fortune, dont seront respōsables
deuant Dieu tous ceux qui en vne sorte ou
en vne autre y auront presté la main.

CETTE harangue fut faicte par Mon-
sieur de Villeroy au mois de May 1593.
pour estre prononcee en l'assemblee des
Estats de Paris, où il auoit esté tres-vtile:
mais les soupçons, broüilleries & trauerſes
qu'il y trouua, l'empeschèrent de ce faire,
toutesſois ledit ſieur Duc de Mayenne l'a
ueü, & a de beaucoup ſeruy pour le bien,
ayant peut-estre esté le moule qui a formé
les humeurs & volonteſ des gens de bien
à rechercher le bien & le ſalut de cet Estat.

LETTRE DE MONSIEVR
de Villeroy à Monsieur de Ma-
yenne du deuxiesme iour de
l'an M. V. LXXXXIII.

MONSIEUR, ie vous escrirois
souuent, si ie le pouuois faire vtile-
ment pour le public & pour vostre seruice;
mais les affaires sont en vn estat tel qu'il n'y
a plus que la main de Dieu qui y puisse val-
loir quelque chose: nous auons perdu tou-
te creance & esperance des vns aux autres,
de sorte que nous attribuons à art & trom-
perie les ouuertes que nous faisons de
part & d'autre, qui est vn mal difficile à sur-
monter, car où la confiance defaut les pa-
rolles sont inutiles, principalement celles
qui sont priuees & secretes. C'est pour-
quoy ie vous ay souuent supplié, & vous ay
encores n'agueres escrit faire manier &
traicter publiquemēt & par personnes pu-
bliques les affaires generales, estimant n'y
auoir autre moyen d'arrester le cours du
mal qui nous va accabler que cestuy-là; vo-
l'avez tousiours reietté pour diuerses con-
siderations, qui regardent plus les interets

priuez que la cause publique. Et c'est ce qui a faict blasmer & calomnier vostre procedure & tous ceux que vous y auez employez : qui vous a faict perdre la bienveillance du peuple, qui estoit le principal appuy & fondement de vostre autorité, & qui à la fin destruiravostre party aux despens de la Religion & de l'Estat; vous auez eu crainte d'offenser les estrangers qui vous assistent, lesquels toutesfois vous en ont sceu peu de gré, & si ont encores eu moins de soin de vous secourir & fortifier comme il falloit, pour remedier par la force & la reputation de vos armes ioinctes ensemble à ces subtils mescontentemens, & desespoir public, que nous preuoyons qui deuoient naistre dudit renouvellement de la guerre. Les ennemis croyent que vous ne demandez la cōtinuation de la trefue, que pour attendre vos forces, & mieux dresser vostre party à Rome & en Espagne; & le peuple pour faire durer la guerre, & mieux faire vos affaires particulieres : cela estant, comment esperez-vous, estant foible comme vous estes, persuader aux premiers, que vous voulez negotier de bonne foy, & aux autres que vous voulez & pouuez les sauuer, que par vne negociation publique & authentique telle que ie vous en ay cy

deuant escript , qui autorise & iustifie par tout vostre intention? C'est chose que vous pouuez faire sous le bon plaisir du Pape, afin de rendre à sa Sainteté le respect que vous luy deuez , & satisfaire à vostre parole, & laquelle ne peut estre resoluë ne concluë si tost , que vous n'ayez encores loisir d'estre esclairey de la volonté de sa Sainteté, quand mesmes on entreroit en matiere dès demain deuant qu'elle soit acheuee. Vous estimez ce chemin estre trop perilleux & honteux ; & ie croy pour mon regard non seulement qu'il ne peut estre que tres-seur & vtile au general , & à vostre particulier tres-honorable , & à vostre grande descharge : mais aussi qu'il est vnique , & ne nous en reste point d'autre pour arrester le mal qui nous presse. Monseigneur ie vous dis cecy franchement cōme amy de ma patrie , ialoux de la conseruation de nostre Religion & de vostre reputation & seruice, en fin chacun est las de la guerre, & ne sera plus non seulement à l'aduenir questiō de la religion, mais aussi en vostre puissance de vous deffendre & conseruer, ny à vous de bien faire à vous mesmes. Je ne vous diray les raisons sur lesquelles ils se fondēt, car vous les sçauiez & sentez mieux que personne : mais croyez,

ie vous supplie, qu'il y a peu de gens qui prennent plaisir de se perdre de gayeré de cœur, & d'espouser vn desespoir pour le reste de leur vie & de leur posterité, les bonnes-villes & communautéz y sont les plus bandées, comme celles qui se trouuent descheuës de l'esperâce qu'elles auroient conçeuë de ceste guerre, & qui en supportent plus de tourment que les autres. N'attendez donc les effets de leur desespoir, vous estes trop foible pour l'empescher, & a desia passé trop auant pour estre retenu par douceur & par art, vous l'esprouueriez & congnoistrez aussi, M^{on}seigneur, & Dieu veuille que ce ne soit trop tard pour son seruice & de vostre particulier : quiconque a vronté de bien faire ne doit faire difficulté d'operer & d'agir en public, ne de se bien obliger qui veut bien payer. Sur-ce ie vous baise tres-humblement les mains, & prie Dieu,

*Monseigneur, vous conseruer en parfaite santé,
de Pontoise ce 2. iour de l'an 1594.*

LETTRE

LETTRE DE MONSIEVR
de Villeroy à Monsieur de Bellicure,
du 17. Mars, 1596.

MONSEIGNEVR, si ie pouuois par mes responce vous rendre la consolation que ie reçois de vos lettres, qui sont pleines d'amitié & de bons enseignements, ie vous escrirois souuent, & n'eussant tardé de vous remercier de celle du vingt-sixiesme de Feurier, que M. de la Verriere m'a faict tenir: mais tout me manquant pour ce faire horsmis la bõne volonté, ie m'abstiens de vous importuner, comme celuy qui n'a pouuoir de deplorer avec les gens de bien nostre commun malheur, & qui est sans moyen d'y remedier ny de seruir ses amis, c'est ce qui m'a faict sortir de la presse, & me retirer en ce lieu, d'où, Monsieur, ie ne puis vous offrir qu'une entiere affection de vous honorer, obeyr, & seruir en toutes choses, qui ne me faudra ny changera iamais: ie n'approuue non plus que vous tous ces escrits qui ont esté publiez, lesquels ont esté aussi composez sans moy: i'ay appris à vostre eschole que ce n'est le chemin qu'il faut tenir

Si

pour bien faire, ils ne seruent qu'à effaroucher le gibier, & faire parler le mode: ceux qui veulent accorder vne querelle n'vsent de tels manifestes, qui ne seruent qu'à aigrir les parties plustoit qu'à iustifier leur cause. I'en ay dit mon aduis où ie me suis trouué, mais il y en a qu'il faut que l'experience enseigne, & le pis est que ce sera aux despens du public, à quoy plusieurs innocens patiront & auront part comme les autres. I'ay esté des premiers à desirer, & peut-estre à proposer ceste conference des Catholiques, comme vn moyen tres-propre pour faire parler les vns avec les autres à cœur ouuert, & pour arrester le cours à plusieurs desseins extrauagans qui sont partout: mon intention estoit bonne, & vous diray que l'ayant communiquee à mon arriuee à Paris, elle fut bien receüe, & toutes-fois nostre malheur est tel, que quand elle fut depuis proposee elle fit peur à beaucoup de gens, & neantmoins elle n'a peu estre reiettee, parce qu'un tel refus condamneroit les auteurs d'iceluy, & chacun craint ce iugement. C'est pourquoy avec les autres raisons qu'il vous a pleu m'escrire ie serois d'aduis qu'on y voulust entendre; il ne peut mal aduenir qu'à ceux qui y procederont de mauuaise foy, & qui n'auront

l'intention bonne; elle retardera plusieurs mauvais desseins qui sont sur le bureau, peut-estre qu'elle produira plus de fruit que nous n'esperons. Combien auons nous veu de choses succeder au contraire de l'intention de ceux qui les auoient commencées & acheminées? nous sommes en vn estat que nous ne deuons faire difficulté de traicter toutes sortes de remedes: car nous sommes comme abandonnez des Medecins, & faut considerer quel est le but d'un chacun. Je pense vous auoir escript cy deuant que si i'auois vn procez de grande consequence & bonne cause, ie ne m'arrerois aux poursuites & productions de ma partie pour en auoir la fin à mon contentement, parce que ce ne seroit son profit d'aduancer le mien. Aussi nous en voyons peu qui soient pour se resoudre de quitter leur esperance, quand ils s'y sont laissez emporter, pour iouir d'un bien qu'ils estiment moindre, encores qu'il soit plus certain, que ceux qui ont le plus d'interest à la matiere fassent leur deuoir, & dieu leur aidera sans doubte, car il est protecteur de l'equite & de la verité: c'est ce que i'ay à respondre à vostre lettre derniere: i'ay eu des lettres de Monsieur le Cardinal de Gondy par Monsieur de Bussi: mais ie remets le

Sf ij

tout sur ce qu'il me dira, à quoy il m'a promis de satisfaire au retour de Chartres, où il est allé voir Madame sa mere. Je ne puis vous dire combien i'ay esté picqué des traverses qu'a receuës ledit sieur Cardinal en son voyage, contre les promesses que ie luy auois faictes, & ce que i'auois charge de luy dire, dont m'estant plaint viuement, on s'est excusé sur l'indiscrétion de ceux qui ont faict l'offence, Dieu en sera le Iuge, mais toutes dissimulations se descouuriront avec le temps, aux despens de ceux qui en vsent quand elles tendent à mal.

Ce dix-septiesme Mars, 1596.

MANIFESTE DE MON-
sieur de Villeroy, sur l'evasion de
l'Hoste son Commis, 1604.

LE vingt-deuxiesme du mois d'Auril le
sieur Descartes Secrétaire de Mon-
sieur de Barrault Conseiller du Roy en son
Cōseil d'Estat, & son Ambassadeur en Es-
pagne, rencontra le sieur de Villeroy, estât
sur des cheuaux de poste, entre sa maison
de Villeroy & Iuuifi, ledit sieur de Villeroy
estât en carosse, l'ayant salué il le pria de le
suiure iusques au lieu de Villeroy où il al-
loit coucher, ce qu'il fit: y estant arriué ledit
sieur Descartes luy representa bien parti-
culierement de la part dudit sieur de Bar-
rault ce qu'il auoit appris & descouuert en
Espagne, par le moyen du sieur de Raffis,
que ledit Descartes auoit amené avec luy,
& laissé à Fontaine-bleau, des intelligen-
ces que le ieune l'Hoste l'un des Clercs du
dit sieur de Villeroy auoit avec les mini-
stres du Roy d'Espagne, ausquels il s'estoit
engagé & prostitué dès le temps qu'il estoit
en Espagne, seruât le Roy aupres de Mon-
sieur de la rochepot, avec lequel ledit sieur
de Villeroy l'auoit mis pour apprendre la

langue, & y seruir sa Majesté, lesquelles intelligences il auoit depuis entretenues & augmentées au grãd preiudice du seruice de sa Majesté. Ce que ledit sieur Descartes veriffia & prouua audit sieur de Villeroy par deux lettres escrites en Espagnol de la main dudit l'Hoste, sous nom deguisé, que ledit sieur de Villeroy recogneut tres-bien estres escrites par ledit l'Hoste, apres mesme les auoir confrontées avec d'autres escrites par luy en mesme temps, langue, & caractere, soubssignées de son nom, que luy representa aussi ledit Descartes: tellement que ledit sieur de Villeroy iugea ledit aduis estre veritable, sans plus en doubter; & comme ledit sieur Descartes luy proposa qu'il estimoit estre à propos de dissimuler & celer quelque temps ledit aduis affin de surprendre ledit l'Hoste en faute, comme il seroit facile de faire ne se deffiant de rien, & ses actions estans obseruées de près, ledit sieur de Villeroy rejeta ceste proposition, iugeant qu'il estoit difficile tenir ce fait secret long-temps, de façon que ledit l'Hoste n'en eut le vent, mesmes par aduis qui luy en seroit donné par la voye de l'Ambassadeur d'Espagne sur le partement du pays dudit Rassis, & le retour à Valladolid de celuy dans la boîte duquel

Monsieur de Barrault auoit faict prendre les deux susdites lettres qui verifioient le crime de l'Hoste. Pour ceste cause ledit sieur de Villeroy le pria de retourner le iour mesme à Fontainebleau où il auoit laissé ledit Rassis, pour luy dire qu'il s'y rendroit le lendemain de bonne heure pour informer sa Majesté de ce faict, luy presenter ledit Rassis, & receuoir ses commandements, ce que fit ledit Descartes.

Et le lendemain 23. dudit mois le sieur de Villeroy arriua à Fontaine-bleau environ les dix heures du matin, fit entendre à sa Majesté, le recit que luy auoit faict ledit Descartes, & les preuues qu'il luy auoit fait veoir de la perfidie dudit l'Hoste, suppliant sa Majesté d'ouïr sur cela dès le iour mesme ledit Rassis en la presence dudit Descartes, & que ce fust en lieu secret, afin que personne n'eust cognoissance de leur veuë, & principalement dudit Rassis que Descartes disoit auoir tenu enfermé & caché au logis où il estoit descendu à son arriuee audit Fontaine-bleau. Sa Majesté ordonna audit Descartes d'amener ledit Rassis en la gallerie de la basse-court incontinent apres son dîner, & leur fit bailler vn passe-par-tout, afin de s'y rendre par les iardins sans passer par la basse-court ny

entrer au Chasteau, pour n'estre veus & descouverts, comme ils firent.

LEDIT sieur de Villeroy estant demeuré auprès de sa Majesté iusques à ce qu'elle se mit à table entre midy & vne heure, sortant du Chasteau pour venir en sa chambre de la bassecourt veit arriuer au bureau de la poste, qui est logee près d'icelle deux courriers vestus à l'Espagnolle avec quelques malles, incontinct il dit à Montaigne commis du sieur de la Varenne qui se trouua là, qu'il sceust quels gens ils estoient, d'où ils venoient, & où ils alloient.

LEDIT Montaigne ayant rapporté au sieur de Villeroy qu'ils venoient d'Espagne, & que l'un d'eux estoit Flaman de la maison de l'Ambassadeur d'Espagne, qui estoit passé pour aller trouuer ledit Ambassadeur à Paris, ledit sieur de Villeroy luy commanda au nom du Roy de retenir lesdits Courriers, & les enuoyer loger en quelque maison du village & mettre vn homme auprès d'eux, qui ne permist que personne parlast à eux sans sa permission, ce qu'il luy dit, qui luy ordonnoit pour cause qui importoit au seruice du Roy, à quoy ledit Montaigne dit qu'il satisferoit.

LEDIT sieur de Villeroy estant monté en sa chambre pour disner, ledit Montai-

gne luy apporta vn paquet dudit sieur Barrault avec vne petite boëte carree, dans laquelle y auoit des graines de iardins que luy enuoyoit ledit sieur de Barrault dont il auoit chargé l'vn desdits courriers, lesquels ledit Montaigne asseura ledit de Villeroy auoir enuoyé loger au village, & commis auprès d'eux le ieune Pizeux fils d'un courrier qui sert il y a long-temps à la suite de la Cour.

LEDIT sieur de Villeroy fut mandé par le Roy l'aller trouuer en ladite gallerie de la bassecourt, n'estant encores hors de table, d'autant que sa M. auoit ia disné voulant aller à la chasse : s'y estant acheminé il trouua sa Maiesté en ladite gallerie accompagné de la Royne seule, le sieur de Chasteau-vieux Cheualier d'honneur de ladite Dame, gardant la porte, leurs Maiestez ayans ja ouy le recit dudit Raffis touchant la trahison dudit l'Hoste, la façon de laquelle il l'auoit sceüe, & comme il l'auoit descouuerte audit sieur de Barrault, ledit Descartes estant present, ledit Raffis informa encore leurs Maiestez de plusieurs autres choses tres-importantes à leur seruice, & respondit à plusieurs questions & demandes que sa M. luy fit, present ledit sieur de Villeroy.

SA Majesté ayant finy avec ledit Raffis & Descartes, leur commanda s'en retourner au logis par le mesme chemin qu'ils estoient venus afin de n'estre veus & descouverts de personne, & retint ledit sieur de Villeroy auprès d'elle.

COMME sa Majesté sortoit de ladite gallerie pour prendre la botte pour aller à la chasse, sur la terrasse proche la grande gallerie, Desnots aussi Commis dudit sieur de la Varenne n'agueres venu de Thurin despesché vers sa Maïesté par ledit sieur de la Varenne, se presenta à elle estant arriué à la mesme heure de Paris, où il auoit passé sans voir sa Maïesté en ce lieu pour porter sa despesche audit sieur de Villeroy, ainsi que ledit sieur de la Varenne luy auoit commandé, dont sa Maïesté n'estoit contente.

LEDIT sieur de Villeroy demeura auprès de sa Maïesté iusques à ce qu'elle fut montée à cheual, apres il se retira en sa chambre, & ne fut si tost entré en son cabinet que Monsieur l'Euesque de Chartres accompagné du Pere Cotton & des Aufmosniers de sa Maïesté qui sont en quartier, y entra pour aduiser avec luy ce qu'il falloit faire le lendemain iour de saint George pour la ceremonie de l'ordre de la Jarriere, que sa Maïesté a accoustumé de so-

lemniser ledit iour : leur conference dura assez long-temps.

Si tost qu'ils furent sortis d'auec luy ledit sieur Descartes y entra, qui dit audit sieur de Villeroy que ledit l'Hoste estoit arriué de Paris auec ledit Desnots, de quoy il n'auoit encores rien sçeu, qu'il estoit venu en poste, & que par malheur il l'auoit rencontré retournant auec ledit Rassis de la gallerie où ils auoient parlé au Roy, en leur logis, qu'apperceuant ledit l'Hoste à cent pas de luy, il auoit dit audit Rassis qu'il fit semblant de prendre congé de luy, & qu'il se retirast dans la porte d'un logis aupres duquel ils estoient, ce qu'auoit fait ledit Rassis le plus subtilement qu'il peut, & qu'il estoit allé accoster & saluer ledit l'Hoste qu'il auoit trouué estonné, qu'il luy auoit baillé des lettres de Monsieur de Barrault & autres qu'il auoit pour luy auec quelques gants qu'il auoit apportez d'Espagne, & auoit mis peine de l'entretenir, mais qu'il auoit l'esprit esmeu & trauaillé & que ledit l'Hoste luy auoit dit auoir sçeu qu'il estoit arriué deux courriers d'Espagne; demandant audit Descartes s'il les auoit veus, & comme ledit Descartes luy dist que celay qu'il auoit peu voir

vestu à l'Espagnole qui s'estoit separé de luy & estoit entré audit logis en pouuoit estre l'un, ledit l'Hoste continua à faire contenance d'homme qui estoit en peine, neantmoins que luy Descartes l'auoit entretenu le mieux qu'il auoit peu sans l'abandonner, qu'estans entrez en la basse-court & venus iusques aupres du logis dudit sieur de Villeroy, l'Hoste l'apperceuant venir du Chasteau, il auoit dit audit Descartes qu'il ne vouloit pas qu'il le vist les bottes aux iambes & qu'il s'alloit debotter, que ledit Descartes luy auoit faict cōpagnie iusques hors la basse-court, qu'estant aupres du logis dudit sieur Euesque de Chartres, ils auoient rencōtré vn des gens dudit Euesque parēt dudit l'Hoste, qui les auoit accostez. Que ledit l'Hoste luy auoit dit qu'il n'auoit mǎgé depuis estre party de Paris, & qu'il vouloit aller en vn cabaret pour trouuer à disner, que ledit Descartes s'estoit offert de l'y accompagner, qu'en fin au lieu d'aller au cabaret, il estoit retourné tout court en la basse-court du chasteau & estoit entré en la cuisine dudit sieur de Villeroy pour y demander à manger, que ledit Descartes le voyant là estoit mōté en la chābre dudit sieur de Villeroy pour l'en aduertir, mais d'autant que ledit sieur Euesque de

Chartres & lesdits Aumosniers estoient avec luy, il n'auroit osé s'ingerer d'y entrer plustost.

LEDIT sieur de Villeroy entendant ce que dessus partit aussi-tost de son cabinet pour aller faire prendre ledit l'Hoste, s'en alla au logis du Roy, prie le sieur de Lomenie avec luy pour l'assister en ce qui se passeroit, & enuoya chercher le Lieutenant du grand Preuost: cependant il comanda à du Noyer qui le seruoit de M.d'Hostel d'aller chercher ledit l'Hoste, demeurer aupres de luy & ne le laisser ny abandonner qu'il ne l'eust enuoyé querir, sans luy dire la cause pour laquelle il luy faisoit tel commandement, de laquelle aussi ledit sieur de Villeroy n'auoit encores fait part ny donné aduis à aucun de ses domestiques. Du Brocq l'un des Lieutenans du grand Preuost estant arriué en la gallerie qui est près la chambre du Roy, ledit sieur de Villeroy present ledit sieur de Lomenie, luy dit de la part du Roy qu'il allast prendre prisonnier ledit l'Hoste au logis dudit sieur de Villeroy où il estimoit qu'il estoit: ledit du Brocq ayant respondu qu'il ne le cognoissoit point, ledit sieur de Villeroy luy dit qu'il allast se promener en la basse-court du-Chasteau, & qu'il arrestast celui qui y passeroit & seroit

accompagné d'un de ses laquais, par lequel il l'alloit enuoyer querir, ainsi qu'il fit à l'heure mesme, disant audit laquais qu'il trouueroit ledit du Noyer avec ledit l'Hoste, & qu'il l'amenaist avec luy.

SUR cela lesdits sieurs de Villeroy & de Lomenie passerent en la grande gallerie pour veoir faire ceste capture des fenestres d'icelle: mais ledit sieur de Villeroy voyant que ledit laquais tarδοit trop à venir, & que ledit du Noyer estoit paillé seul par ladite Cour sans ledit l'Hoste, ledit sieur de Villeroy soupçonna incontinent ce qui estoit aduenü, à sçauoir que ledit l'Hoste s'en estoit fuy d'effroy.

CE qui fut veriffié incontinent apres par ledit du Noyer, lequel ne le trouuant audit cabaret ny ailleurs, s'aduifa d'aller au logis du sieur de Fleury pour veoir s'il y estoit encores; là il apprit qu'il auoit retiré son cheual, mais il ne l'y trouua point, ains seulement un garçon qui auoit accoustumé de le penser qui luy dit qu'il l'estoit venu prendre fort à la haste, & qu'il s'en estoit allé sans auoir dit où il alloit: ce qui fut rapporté audit sieur de Villeroy par ledit du Noyer, estant encore en laditte gallerie avec ledit sieur de Lomenie, & à l'instant il depescha des courriers & lettres de toutes

parts & sur tous les chemins que pouuoit tenir ledit l'Hoste pour le pouuoir rencontrer & arrester, ainsi qu'il est aduenu du costé de Meaux. S'enquist aussi au mesme instant comment ledit l'Hoste auoit peu auoir aduis de la deliberation qu'on auoit faite de le prédre, & veriffia que cela estoit procedé de celuy que luy auoit donné ledit Montaigne commis de la poste, à son arriuée & descente au bureau, que lesdits deux Courriers qui estoient venus d'Espagne l'auoient demandé & desiroient parler à luy, lesquels il alla trouuer & parla à eux deuant que d'entrer au logis dudit sieur de Villeroy, & est à presumer qu'il fut aduertty par eux de la venuë dudit Raffis avec ledit Descartes, & partât qu'il prist garde à luy, lesdits Courriers estants partis d'Espagne quelques iours apres lesdits Raffis & Descartes, en quoy il fut confirmé par la rencontre inopinée qu'il fit de l'un & de l'autre, ainsi qu'il est dit cy deuant.

Et d'autant que l'on a sceu par les depositions de ceux qui ont esté interrogez depuis sur ce faict par le sieur de Miraumont Lieutenant du grand Preuost, ce qui en a esté apries d'ailleurs, & par le procès verbal du Preuost des Mareschaux de Meaux ce qui est aduenu en la poursuite, & quand

son corps a esté trouué en la riuere de Marne près du bac à Fay, où il fut atteint par ledit Preuost, dont ne sera fait mention par le present memoire, qui a esté fait par le sieur de Villeroy, seulement pour représenter au vray ce qui s'est passé en l'évasion & fuite de Fontaine-bleau dudit l'Hôte, dont il a eu cognoissance.

Fait à Fontaine-bleau le troisieme iour de May, 1604.

Signé, DE NEUVVILLE.



TABLE DES CHOSES
PLVS DIGNES DE REMAR-
que contenu le long de ces
Memoires.

A

A Bbaye de la Grace donnee au sieur du
Perrat au preiudice de la maison du sieur
de Mädelot & celie de Monsieur de Villeroy. 133

Abbaye de Molnoüe pillée par les Espagnols.

232

Abbé de Chesy pris prisonnier par la garnison
de Meaux. 292

Abus des Secretaires ou de leurs commis en
l'expedition des dons. 14

Accord & resolution de toutes choses remises
au Duc de Parme par le Roy d'Espagne. 283

Accusation de Salcede contre Monsieur de
Villeroy. 21

Accusation contre monsieur de Villeroy de
n'auoir conduit la pratique de la ville d'Orleans
avec les sieurs d'Antragues & de Dunes. 55

Auis de la Royne Mere pour n'engager le
Roy de promesse touchant le pouuoir de Monsieur
de Guise. 70

Auis du sieur de Villeroy enuoyé au sieur
Mareschal de Biron, de Turenne & du Plessis

T

T A B L E.

<i>pour la cessation d'armes.</i>	252.
<i>Affaires entre Monsieur d'Espernon & Monsieur de Villeroy.</i>	33
<i>Affection tres-grande du Roy Henry III. à la Religion Catholique. 25. il hayssoit mortellement les heretiques.</i>	ibid.
<i>les Amis du sieur de Villeroy veulent faire instance aux Estats de Blois pour son appel, mais les supplie ne le faire.</i>	135
<i>Apologie & discours de Monsieur de Villeroy pour mostrer la peine qu'il a prise de faire la paix entre le Roy & Monsieur du Mayne, & de sa continuelle poursuite à la pacification de nos miserables troubles, à M. de Belieure.</i>	140
<i>Arriuee du Duc Mayenne en Dauphiné contre les huguenots.</i>	102
<i>Armee d'Allemands leuee par le Vicomte de Turenne pour le Roy, & son arriuee en France. 155. & 156.</i>	
<i>Amour du peuple enuers le Duc de Guise d'où procedoit.</i>	
<i>Arrest du Parlement de Roüen contre Salcedo.</i>	22
<i>Arriuee du sieur Tassis Espagnol avec le Commandeur Moreau pour faire traicter avec le Roy d'Espagne. 175. demandent que leur Roy soit protecteur du party Catholique en France. ibid.</i>	
<i>Arriuee de M. le President Janin de son voyage de Lorraine.</i>	152

T A B L E.

<i>Arriuee du Duc de Mayenne à Paris.</i>	236
<i>Arriuee des Flamans en l'armee du Duc de Mayenne.</i>	184
<i>Artifice des Espagnols voulans surprendre Cambray sous pretexte de secourir le Duc de Mayenne & enfermer le Roy à icelle.</i>	170
<i>Assemblée des Estats necessaire pour faire la paix.</i>	216
<i>Affistance donnee à Monsieur de Villeroy par les Seigneurs Gentils-hommes & gens de guerre, officiers & habitans du Languedoc, pour executer le commandement du Roy contre Monsieur de Montmorency.</i>	9.10
<i>Affurance d'amitié donnee à M. de Villeroy par le Duc d'Espernon.</i>	36
<i>Authorité des Secretaires d'Estat.</i>	10.11

B

B <i>Bataille d'Iury.</i>	183
<i>Bataille de saint Denys le 10. Novembre 1567.</i>	4
<i>Boucher Docteur en Theologie, avec le sieur de Masparaut & Senaut enuoyez par les Parisiens à Rethel vers le Duc de Mayenne.</i>	186
<i>Bourg de Villeroy pillé par les troupes sorties de Paris.</i>	134
<i>Monsieur de Belieure & de Villeroy entremetteurs pour composer le differēt d'entre Monsieur de Guise & le Duc d'Espernon.</i>	45

T A B L E.

C

- C**alomnie des Huguenots contre la Royne
Mere. 128
- Calomnie des Anglois & des huguenots contre M. de Villeroy, disans qu'il estoit pensionnaire du Roy d'Espagne. 123
- Calomnie de Salcede contre le sieur de Carrouge gouverneur de Normandie. 23
- Calomnie contre Monsieur de Villeroy, qu'il auoit esté enuoyé en Languedoc pour attenter à la personne du Duc de Montmorency, sous couleur de paix. & la iustification. ibid.
- Calomnie frequente à la Cour. 1
- Cardinal Caietan meprise les bons aduis du Cardinal de Gondy. 178
- Cardinal de Bourbon proclamé Roy au Parlement de Paris. 161
- Causes qui menuent Monsieur de Villeroy apres la mort de Henry III. de se ioindre à M. du Mayne. 140.
- Chastiment faict à Paris par le Duc de Mayenne qui s'y saisit de la Bastille. 289
- Citadelle de Valence surprise par le sieur de la Valette frere du Duc d'Espernon. 37
- Citadelle de Lyon rasée par Monsieur de Mandelot par permission du Roy. 39.
- Cœur & volonsé des Princes suiette au changement. 239
- Commandemēt au sieur de Varicaruille de se

T A B L E.

ietter dans Meulan.

135

Commandement du Roy enuoyé à Monsieur de Villeroy pour se saisir du Duc de Montmorency, & d'aduerter la prouince du Languedoc de ne le plus recognoistre pour gouuerneur. 7. chose qui estoit de difficile executio, au milieu de son gouuernement & de ses forces.

ibid.

Commandeur Moreau dit au Duc de Mayene qu'il seroit tost secouru de grâdes forces leuees en Allemagne, Suisse & Lorraine, & de grandes sommes de deniers d'Espagne.

146

Compagnie de Monsieur d'Alincour à la suite de Monsieur d'Espéron.

44

Compte rendu au Roy à Rouën par Monsieur de Villeroy touchant sa negociation avec le sieur d'Antragues & de Dunes. 67. volonté du Roy escriptte sur chaque article des demandes des sciences.

68

Conference de Constañs entre les sieurs d'Antragues, de Dunes & de Villeroy.

56

Conferēce du Mareschal de Biron, du Vicōte de Turenne & dudit sieur du Pleſſis deputez par le Roy avec le sieur de Villeroy à Buypres Alincour.

248

Congé donné à l'Euesque de Limoges aux premiers Estats de Blois, & pourquoy?

18

Conseil mauuais donné au Roy contre le feu Duc de Guise. 29. incogneu à Monsieur de Villeroy.

48

T A B L E.

Conseil pour sommer le Roy de se faire Catho-
lique. 179

Conseil debattu pour la paix. 167

Conseil donné au Duc de Mayenne de se faire
esleuer & declarer Roy. 153. belles persuasions
qu'on luy faict. *ibid.* & *suiv.*

Conseil pour eslire le Roy d'Espagne Roy de
France. 159. autre pour eslire le Duc de Lorraine
à un de ses enfans, autre pour le Duc de Sauoye:
autre pour le Cardinal de Bourbon. *ibid.*

Conseil donné au Roy Henry III. à Lyon,
pour les acquits des deniers contens mis és cof-
fres du Roy & pour le changement de la for-
me ancienne des expéditions des dons & biens-
faicts, source de beaucoup de maux. 12

Conseil du sieur de Villeroy donné au Roy
Henry IV. pour se conuertir 214

Conseil donné au sieur de Villeroy par les
sieurs de Fleury & l'Abbé de Chesy, & par let-
tres de Messieurs le Chancelier & Cardinal de
Gondy de trauailler derechef à la paix. 239

Contentement plus grand d'un homme, est
d'estre tenu pour tel qu'il est. 1

Contestation entre le Roy & Monsieur d'Es-
pernon sur le don du domaine de la feue Royné
d'Ecosse. 42

Contre ceux qui disent que les gens de M. de
Villeroy s'entendoient avec ceux de la ligue. 116

Corruption des bonnes mœurs en France. 1

T A B L E.

*Courses du Roy Henry IV. vers Laon pour
empescher l'assemblage des troupes du Duc de
Mayenne.* 220

*Courroux de Monsieur d'Espernon contre M.
de Villeroy.* 79

*Crainte du Duc de Parme estant à Meaux
pour la difficulté des chemins iusques à Paris.*

234

D

D*euoir du President Ianin enuers les ha-
bitans de Marseille contre les menees du
Duc de Sauoye.* 283

Deuoir des mesmes aux affaires d'Estat. 114

*Deffence du Duc de Mayenne faicte au sieur
de Villeroy d'accorder la tréue avec le Roy.* 253

*Deffiance du Duc d'Espernon de M. de Ville-
roy, d'où procedoit.* 35

Deliuance de l'Archeuesque de Lyon. 176

Demandes des Princes au Roy. 55

*Demandes du sieur d'Antragues, outre le
gouuernement du Duché d'Orleans.* 63

*Despesche de Monsieur de Villeroy vers le
Cardinal de Bourbo & de Guise pour la paix.* 52

*Despesche de Monsieur de Villeroy en Langue-
doc avec Monsieur de S. Sulpice, pour composer
les troubles du pays.* 6

*Deposition de Salcede iustifie Monsieur de
Villeroy.* 21

*Deposition de Salcede contre Monsieur de
Villeroy, iugée impertinente.* 30

T t iiii

T A B L E.

Deputez du party du Duc de Mayenne mandez.	116
Deputez du Duc de Mayenne desirez par le Roy Henry IIII. pour faire la paix.	113
Desir du Duc de Neuers de parler au sieur de Villeroy à Soissons.	261
Desir de Monsieur de Villeroy d'estre deschargé de sa charge de Secretaire.	92
est Diuerty de ce faire par ses amis.	93
la Desobeyssance ne s'arreste point en son cours par gratification.	32
Dessein du feu Duc de Guise aux Estats de Bloys incogneu.	30
Differents du Duc d'Esperuon avec Messieurs de Guise.	45
Difficultez proposees par le sieur de Dunes pour le faict d'Orleans des-greables au Roy.	70
Domaine de la feue Royned'Escoffe en Poitou.	42
Debat pour iceluy entre le Duc d'Esperrnon & Monsieur de Villeroy.	43
Dourlans & Crotoy surpris par le Duc d'Anmale.	26
le Duc de Montmorency ne veut entrer en traicté de paix avec Monsieur de Villeroy, attendant quelque nouveau mouuement en Cour.	7
le Duc de Mayenne veut qu'on traicte avec le Cardinal de Bourbon.	297
Duc de Parme arriué en France pour secourir	

T A B L E.

Roiien. 303
Duc de Parme tres-soigneux & vigilant.

303.
*le Duc de Guise faisoit estat de Monsieur de
 Villeroy. 118. cōtre ceux qui disent qu'ils auoient
 intelligence ensemble.* 119. & 120

*Duc de Mayenne vient à Paris, pour chastier
 des mutins.* 288

le Duc d'Elbæuf prisonnier à Loches. 288

*Duc de Mayenne ne veut traicter à part avec
 le Roy.* 219

*Duc de Mayenne mescontent des longueurs du
 Duc de Parme.* 230

*le Duc de Mayenne dit qu'il ne peut entendre
 à la paix à cause du respect qu'il portoit au Car-
 dinal de Bourbon qu'il auoit recogneu pour son
 Roy.* 147

*le Duc de Mayenne recognoist l'intention
 du Roy d'Espagne.* 152

*le Duc de Guise demande Orleans pour ville
 de seureté.* 71

*le feu Duc de Guise n'estoit assez fort aux
 Estats de Blois pour forcer le Roy à luy accorder
 ce qu'il luy eust refusé.* 29

E

E *mbarquement du Duc de Saouye & du
 Presidēt Ianin pour aller en Espagne.* 279

*Emprisonnemēt du Cardinal de Bourbon, du
 Prince de Ioinuille, des Ducs de Nemours &*

T A B L E.

<i>d'Elbæuf, & de l' Archeuesque de Lyon.</i>	134
<i>Emprisonnement du Cardinal de Bourbon à Fontenay le Conte.</i>	167
<i>Ennemis du sieur de Villeroy l'accusent de trahison aupres du Roy.</i>	137
<i>Ennuy du Roy Henry III. pour les longueurs de la paix.</i>	50
<i>Entreprise du Duc du Mayne sur Mante.</i>	278
<i>Entreprise sur Compiègne par le Duc de Mayenne.</i>	277
<i>Entreuë de Monsieur de Villeroy & de Monsieur de Liencour par permission du Duc de Mayenne.</i>	164
<i>Entreuë du Duc de Mayenne & de Monsieur de Villeroy à S. Denis.</i>	184
<i>Enuoy du sieur Belin par commandement du Roy vers le Duc de Mayenne au pont d'Auney.</i>	166
<i>Escalade du Roy faicte à Paris.</i>	234
<i>Escarmouche des troupes du Duc de Guise avec celles de l'armee protestante.</i>	41
<i>Espagnols pressent le Duc de Mayenne de traiter avec le Roy.</i>	175
<i>Esperance des huguenots sur le diuertissement des armes de Monsieur frere du Roy, pour aller en Flandres.</i>	19
<i>Monsieur d'Espernon pourueu de l'Estat d'Admiral de France.</i>	46
<i>Monsieur d'Espernon mal voulu à la Cour.</i>	

T A B L E.

49. va trouuer le Roy Henry III. à Chartres
contre le desir de sa Maieſté. *ibid.* il dissuade la
paix, & blasme ceux qui la conseilloyent. *ibid.*

Eſtats de Blois assemblez avec dessein cōtrai-
re que celuy d'executer quelque chose contre
Messieurs de Guise. 27

l'Eſtime de la chose engendre l'amitié. 3

Euaſion du Duc de Guise hors du Chasteau
de Tours. 278

l'Eueſque de Limoge enuié sous Henry III.
par ceux qui se vouloyent aduancer aux charges.
18. il fut renuoyé en sa maison, sans estre ouy,
aux premiers Eſtats de Blois. 5

l'Eueſque de Plaisance creature du Duc de
Parme. 247. partial pour le Roy d'Espagne. *ibid.*

Excuses des habitans d'Angoulesme au Roy,
pour auoir laissé entrer le Duc d'Espernon dans
leur ville. 80. promettent l'en chasser. *ibid.*

Execution faicte au Louure par le Duc de
Mayenne. 289

F

Facilité & couuerture des comptables a en-
gendré beaucoup de concussions, larrecins
& despences mal employees. 13

Facultez de Monsieur de Villeroy & son pa-
trimoine. 124

Fauueur de Dieu au Roy à la iournee d'Ar-
ques. 165

Faueur idolatree à la Cour. 17

T A B L E.

<i>Fiance du Roy Charles IX. en la personne de Monsieur de Villeroy</i>	4
<i>Fivnce des sieurs d' Antrague & de Dunes en Monsieur de Villeroy.</i>	56
<i>Fidelité du sieur de Fleury, beau frere de M. de Villeroy.</i>	25
<i>Fils de M. de Villeroy de la compagnie de M. de Ioyense.</i>	35
<i>le sieur de Fleury employé par le Roy près le Duc de Mayenne pour sonder son intention.</i>	261
<i>Forces d'Italie enuoyees par le Pape Gregoire 14. sous la conduicte de son Nepueule Duc de Montmartiano, au secours du Duc de Mayenne.</i>	283
<i>Forme d'expedier les placets, du regne de Charles IX.</i>	15

G

G <i>Arnisons & gendarmerie doit estre payee par preference à toutes autres debtes.</i>	21
<i>le General des Estats de Blois n'auoit intention d'offenser le Roy.</i>	29
<i>Gouuernement de Lyon donné à Monsieur de Nemours au preiudice de la promesse faicte par le Roy à M. d' Alincour.</i>	133
<i>Gouuerneurs de Picardie recherchez & pratiquez par les Espagnols.</i>	219

H

H <i>Abitans d' Angoulesme ont fiance à M. de Villeroy.</i>	79
--	----

T A B L E.

*Habitans d'Angoulesme promettent au Roy
se saisir du Duc d'Espernon, ce que le Roy agreea,
mais leur Deputé dit qu'il y auoit danger de l'e-
xecuter.* 85

*Monsieur d'Alincour nourry près Monsieur
le Duc de Longueville.* 102

*Haure de Grace demandé par ceux de la Li-
gue pour lieu de seureté.* 74

*Hayne de Monsieur d'Espernon contre M.
de Mandelot d'où procedoit.* 39

Hayne du peuple contre le Duc de Mayenne.
159

Henry III. secouru fort à propos des Suisses.
24

*Henry IIII. Prince craignant Dieu & con-
scientieux.* 213

*Henry IIII. plus assisté de Catholiques que
de Huguenots.* 209

*Heritiere de Maure mariee au Comte de To-
rigny fils du Marechal de Matignon.* 35

*Hommes d'estat plus fidelles au Roy, subiets
aux calomnies. i. sont ordinairement blasmez
des choses faictes.* *ibid.*

*L'Hoste Commis de Monsieur de Villeroy, ses
crimes, son euasion, manifeste dudit sieur de Vil-
leroy sur le subiect d'icelle.* 645

*Huguenots appelloient les Ministres plus fi-
delles de l'Estat, Guisards & pensionnaires
d'Espagne dans les regnes passez.* 2

T A B L E.

Huguenots ne veulent s'accorder à la paix sans exercice de religion. 19

les Huguenots n'estiment vrais François que ceux qui approuuent leurs actions. 128. leur malice & actions mauvaises en ce Royaume. ibid.

Humanité du Roy Henry III. tesmoignée au sieur de Villeroy à Turin. 14

I

I*alousie du feu Duc de Guise imprimée au Roy, par mauvais Conseillers.* 31

Ialousie grande entre les Ducs d'Espèron & de Joyeuse. 35

Indulgence de Henry III. cause du malheur de ses affaires. 47

Inimitié de M. d'Espèron a aduancé la disgrace de Monsieur de Villeroy. 33

Instance de la Roynie Mere au Roy en faueur de M. de Nemours pour le Gouuernement de Lyon. 99

Instance de Monsieur de Villeroy faicte à la Roynie Mere pour la continuation de ses seruites aux affaires d'Estat. 94

Instruction de M. de Villeroy aux affaires d'Estat; procedoit des bons recors qu'il tiroit iournellement de Messieurs de Moruillier & de Limoges. 5

Intelligence entre le Comte de Tauannes & le sieur de Villars Gouverneurs du Haure, à Rouën. 277

T A B L E.

Interests prineez ont plus de puissance sur les François que les raisons & considerations publiques.

241

Iouissance d'une bonne fortune sujette à divers accidens.

209

Journee des Barricades.

46

L

L *Egat Caietan contraire au Conseil de Monsieur de Villeroy.*

180

Lettre du sieur de Villeroy escrite à sa femme, surprise.

228

Lettre du sieur de Buffy enuoyee au sieur de Villeroy.

301

Lettre du sieur de Villeroy escrite au Roy en faueur de la famille de Monsieur de Mandelot.

131

Lettre du Roy au sieur de Villeroy pour descharge de son estat. 100. Responce dudit sieur de Villeroy à sa Maieité.

101

Lettre du sieur de Dunes enuoyee à Monsieur de Villeroy demandant la promesse de son aîné & de luy.

87

Lettres & memoires du Duc de Neuers enuoyez au sieur de Villeroy.

261

Lettre du Roy au Duc de Guise pour luy faire accepter le pouuoir de Lieutenant General. 75. aucuns disent que le Roy luy donna ce pouuoir avec regret & voulut chasser ceux qui le luy

T A B L E.

<i>auoient conseillé.</i>	76
<i>Lettre de Monsieur de Liancour à Monsieur de Villeroy pour venir trouuer le Roy. 149. mais le Duc de Mayenne ne luy veut permettre d'y aller.</i>	150
<i>Lettre du Roy au sieur de Villeroy, luy commandant faire retirer son fils de Lyon. 136. suit de ce commandement recogneu par luy.</i>	137
<i>Lettre du Duc de Mayenne enuoyee aux Provinces pour conuoquer l'assemblee, de la paix, retenuës par les Dames de Nemours, de Montpensier & de Mayenne.</i>	257
<i>Lettre de Monsieur de Villeroy à Monsieur de Mayenne du 2. iour de l'an 1594.</i>	637
<i>Lieutenance Generale du Royaume offerte au Duc de Guyse par Monsieur de Villeroy, par commandement du Roy.</i>	51
<i>Ligue de l'an 1585.</i>	24
<i>Loix & formes d'un Royaume ne doiuent estre legerement changees. 16. quoy que depraues doiuent estre corrigees plustost que changees. ibid.</i>	
<i>Madame de Longuenille mise en liberte avec sa belle fille & ses filles, par le moyen du Duc de Mayenne.</i>	299
<i>Louange de Monsieur de Villeroy prononcee de la bouche du Roy à monsieur d'Allincour son fils.</i>	103
<i>Louange d'Henry IIII. au sieur de Villeroy.</i>	
207	

T A B L E.

Lyonnois proposent le mariage du sieur d'Alincour avec la fille de M. de Mandelot. 37

M

M *Adame de Mandelot enuoye prier le Roy d'auoir compassion d'elle & de sa maison.* 133

Maladie & mort du sieur de l'Aubespine Secrétaire d'Estat & beau pere du sieur de Ville-roy. 4

Mandement du Pape Gregoire 14. aux Catho- liques & Euesques estans près du Roy, de l'aban- donner. 272

Mandement du Roy au sieur de Villeroy pour l'aller trouuer au parc de Boulongne. 144

Mandement du Roy par M. de Villeroy au Gouverneur & habitans d'Angoulesme de ne laisser entrer personne de plus fort en la ville. 79

Manifeste de Monsieur de Villeroy sur l'evasion de l'Hoste son commis. 645

Mariage de la fille aisnee de Monsieur de Man- delot avec Monsieur le Marquis de Villars, dont on tint pourparlé, pouuoit faire entrer ledit sieur de Mandelot en la Ligue. 37

Mariage du Viconte de Turenne avec l'heritie- re de la maison de Bouillon, fait par le Roy - estant à Sedan. 285

Marquis de Maignelay enuoyé deuant la Fere pour y estre tué, & pourquoy? 275

Menaces du Duc d'Espernon contre Mon-

T A B L E.

<i>sieur de Villeroy.</i>	78
<i>Dom Bernardin de Mendoza veut engager</i> <i>M. de Villeroy aux desseins du Roy d'Espagne.</i>	
<i>151. dont il se scandalise.</i>	<i>ibid.</i>
<i>Mescontentement du Roy contre le feu Duc</i> <i>de Guise, luy donne occasion de se fortifier.</i>	31
<i>Ministres de l'Estat accusez & calomniez</i> <i>par ceux qui ayment le desordre.</i>	2.
<i>Monsieur Miron premier Medecin du Roy</i> <i>Henry III. depeesché à Paris pour la paix. 50.</i> <i>mais il ne rapporta que des paroles.</i>	<i>ibid.</i>
<i>Mort du sieur de Mandelot Gouverneur de</i> <i>Lyon.</i>	130
<i>Mort du Cardinal de Bourbon.</i>	226
<i>Mort de Monsieur de Guyse à Blois.</i>	134
<i>Mort du Roy Charles IX. au retour du sieur</i> <i>de Villeroy de son voyage d'Auignon.</i>	12
<i>Mort du Duc de Joyeuse.</i>	44
<i>Mort du Pape Sixte V.</i>	246
<i>Messieurs de Moruillier & de Limoges fort</i> <i>experimentez aux affaires du monde, & tres-</i> <i>zelez au bien du Roy & du Royaume.</i>	5
<i>Moyen pour gagner le sieur d'Antragues &</i> <i>de Dunes.</i>	56
<i>Moyens d'arrester le cours des desseins de</i> <i>Monsieur de Guise, sans user de celuy qui a esté</i> <i>pratiqué, selon l'opinion de monsieur de Ville-</i> <i>roy.</i>	127
<i>Mutinez Espagnols receus en l'armee du Duc</i>	

T A B L E.

de Mayenne

228

N

Necessitez de Paris durant le siege. 237
 Noyon assiegé & pris par le Roy Henry IV. 278

O

Offre du secours d'Italie au Duc de Mayenne par Landriano Milannois enuoyé à Rheims par le Pape Gregoire XIV. 272
 Opposition de Monsieur d'Espernon au mariage de l'heritiere de la maison de Maure avec le fils de Monsieur de Villeroy. 34. dit qu'elle estoit promise au fils de Monsieur de Termes, (sçavoir Monsieur de Bellegarde. *ibid.*
 L'Ordre & l'obeyssance necessaires en une armee. 235

P

Paris en ialousie contre M. de Villeroy apres la mort de M. de Guise. 134
 Parisiens assurez de la bonne voloté du Roy par l'Archeuesque de Lyon. 232
 ville de Paris en grande crainte pour les pernicieux traictez qui s'y faisoient avec les Espagnols. 414
 Parisiens viennent encores à pied au deuant du Duc de Mayenne reuenant de Meaux. 289
 Paris choisi par le Duc de Mayenne pour y tenir l'assemblée generale. 390
 Paix aduancee avec les huguenots par le Roy

Vu ij

T A B L E.

Henry III. auant le partement de M. son frere pour aller en Flandres.	19
Paix desirée d'un chacun à sa mode.	365
Paix reculée par les huguenots, & pourquoy.	349.
Paix fondée sur la conuersion du Roy.	350
sans la Paix le Duc de Mayenne estoit contraint de traiter avec les Espagnols ne pouuant plus se deffendre.	242
le Pape escrit au Cardinal de Gondy qu'il n'aille à Rome, disant que Desportes auoit trauersé son voyage. 392. sa Saincteté enuoye le Cardinal de Pellevé pour presider en l'assemblée Catholique.	ibid.
le Pape ne desiroit la paix en France pour ietter la guerre sur le Roy d'Espagne.	434
le Pape n'a receu le Duc de Neuers en qualité d'Ambassadeur du Roy, mais seulement comme Prince d'Italie.	471
Pardon demandé au Roy par le sieur du Plessis en presence de son cōseil, de la tres-grāde faute qu'il disoit auoir faicte, d'auoir creu & esperé que la paix se feroit apres auoir conseré avec le sieur de Villeroy.	360
Parlement de Paris donne arrest contre l'election de l'Infante d'Espagne.	417
Parole du sieur de Villeroy au Mareschal de Biron pour faire incliner le Roy à la paix.	215
Parole du Roy au Baron du Luz sur la volon-	

T A B L E.

ré qu'il auoit de contenter le Duc de Mayenne.

346

Parolles de collere tenues par M. d'Espernon à M. de Villeroy. 43. risque que courut M. de Villeroy deslors. ibid.

Partement au Duc de Mayenne de la ville de Paris pour aller receuoir l'armee estrangere. 399

Partisans d'Espagne veulent preferer le Duc de Guise au Duc de Mayenne, & d'en faire vn Roy avec l'Infante à ses despens. 374

le sieur du Passage chassé de la citadelle de Lyon, par M. de Mandelot. 39

Passeports accordez pour tenir l'assemblée des Estats conuoguez pour la paix. 253

Passeport refusé au sieur de Villeroy par le Roy. 222

Passeports refusez au Duc de Mayenne par le Roy. 217

Peine & trauail de M. de Villeroy pour empescher la pratique des Espagnols. 177

Peine tres-grande en la conuersion du Roy. 308

Pension de deux mil escus par an offerte au sieur de Villeroy par le Roy de Nauarre. 124

Permission donnee au sieur de Beau lieu Ruzé de se retirer & demettre de ses charges. 98

le sieur Pinard retire du Chasteau Thiery à la faueur du sieur de Villeroy. 276

T A B L E.

*Placet du Comte d'Escars signé du Roy pour
leuer des soldats sur ses terres, refusé d'expedier
par monsieur de Villeroy, & pourquoy. 14. dont
il fut reprimendé. 15*

*Plaincte du Roy à monsieur de Villeroy par un
aduis que le Duc d'Espenno se vouloit aller ietter
dās Angoulesme. 78. plaintes des Parisiens. 289*

*Plaincte du sieur de Villeroy aux Dames de
Nemours, de Montpensier & de Mayenne sur la
charge des passeports pour l'assemblée des Estats
pour la paix. 257*

*Plaincte de M. de Villeroy, au Roy contre l'ac-
cusation de Salcede. 21*

*plaincte du sieur de Villeroy faicte au Duc de
Mayenne sur le serment par luy faict entre les
mains du Legat de Rome. 444*

*Plainte des Parisiens pour n'estre soulagez de
l'armee estrangere. 407*

*plainte du Duc de Mayenne contre le sieur de
Villeroy faicte à Rouen, & la repartie dudit
sieur. 373*

*le sieur du plessis sollicite le sieur de Villeroy
de mouuoir les conditions generales & particu-
lieres des seuretez requises par le Roy auant l'as-
semblée de Paris. 336*

*le sieur du plessis huguenot & fort suspect
aux Catholiques. 350*

*le sieur du plessis ne veut point de surseance
d'armes. 351*

T A B L E.

le sieur du Plessis fait changer les affaires pour son bruit. 362

Poinct en fin principal de l'assemblee generale de Paris. 401

Pour parler du sieur de Villeroy avec le sieur de Comblisfy gouverneur de Chasteau Thicry. 267

Poursuite du Duc de Parme qui se retireroit par le Roy. 255

Pouuoir des ennemis du Roy de Nauarre à Rome. 628

Pratique avec le Cardinal de Bourbon refusee du Duc de Mayenne pour n'offencer les Espagnols. 379

Pratiques faictes à l'assemblee Catholique de Paris. 431

Pratique du Cardinal de Plaisance pour faire eslire pour Royné de France l'Infante d'Espagne. 335

Pratique des Espagnols tres-forte à Rome. 461

President Ianin conseille le Duc de Mayenne de conuoquer l'assemblee Catholique dans Paris pour beaucoup de bonnes considerations. 391

President le Maistre gracieusement accueilly du Duc de Mayenne luy allant porter l'arrest & faire les remonstrances de la Cour, cōtre l'eslection de l'Infante d'Espagne. 419

President Ianin fidel amy du Duc de Mayenne. 425

T A B L E.

<i>Pretention du Roy d'Espagne sur Marseille.</i>	
283	
<i>Pretention du Roy d'Espagne à la Couronne de France tant pour luy que pour l'Infante sa fille.</i>	416
<i>Priere de messieurs de Biron, de Bouillon & d'O faicte au sieur de Villeroy pour les aller trouver à Gisors & traicter avec eux, lequel s'en excuse disant qu'il n'en auoit pouuoir du sieur de Mayenne.</i>	363
<i>Princes & Seigneurs Catholiques enuoyent vers les Ducs de Mayenne & de Parme pour leur declarer leur volonté à la paix.</i>	350
<i>Princes & Seigneurs qui furent visiter Monsieur de Villeroy apres son bannissement de la Cour.</i>	129
<i>les Princes & Seigneurs Catholiques consentent la paix moyennant que le Roy se conuertisse.</i>	350
<i>Princes & Seigneurs iurent fidelité au Roy apres la mort d'Henry III.</i>	145
<i>Princes de Lorraine diuisez en leur assemblee de Rheims.</i>	405
<i>Prise de Corbeil par l'Espagnol.</i>	255
<i>Prise du sieur de Lomenie par les gens du Roy qui le menent à Pontoise.</i>	308
<i>Prise de Lagny par force par le Duc de Parme à la veüe du Roy.</i>	234
<i>Prise du frere du Duc de Montmorency & du</i>	

T A B L E.

<i>Mareschal de Cosé.</i>	2
<i>Prise de la depesche du Cardinal de Plaisance enuoyee à Rome & apportee au Roy.</i>	441
<i>Prise & reduction de Chasteau Thierry.</i>	265
<i>Prise du sieur de Videnile.</i>	265
<i>Prise de Melun attriste plus le Roy qu'elle ne console.</i>	203
<i>Prise du sieur Belin à Arques.</i>	165
<i>Prise de Chasteau Thiery.</i>	500
<i>Prise des fauxbourgs de Paris.</i>	174
<i>Procédure du Duc de Mayenne blasmee du peuple.</i>	638
<i>Procuration du gouvernement ou Duché d'Or- leans demandee par le sieur de Dunes pour le sieur d'Antragues son frere.</i>	89
<i>Prolongation de la trefue pourquoy demandee du Duc de Mayenne.</i>	465
<i>Prolongation de la trefue faite apres la conuer- sion demandee à sa M. par le Duc de Mayenne.</i>	437
<i>437. continuee pour deux mois.</i>	454
<i>Promesse faicte par Henry III. au Duc de Mayenne de luy donner un breuet pour pourvoir aux benefices & offices de son gouvernement.</i>	352
<i>Promesse du sieur de Dunes au Roy. 64. ne veut rien signer ny escrire. ibid. desire que le Roy entre à Orleans avec sa seule Cour.</i>	65
<i>Promesses faictes au sieur d'Antragues pour rendre Orleans au Roy.</i>	61

T A B L E.

Promesse du Roy au sieur d'Antraques pour le gouvernement en chef du Royaume & au sieur de Dunes pour la Lieutenance. 62. portee par le sieur de Schomberg. 62

Teneur de la promesse escrite de la main du Roy touchant le Gouvernement de Lyon au fils de M. de Villeroy. 131

Promesse du gouvernement de Lyon faicte par le Roy à Monsieur de Villeroy pour son fils. 38

Proposition faicte au Roy Henry IV. par le Cardinal de Gondy & Monsieur de Villeroy pour asseurer sa conuersion dans un temps prefix. 310

Propositions des Espagnols contraires à leurs premieres protestations. 413

Proposition de l'Assemblée Catholique de Paris pour l'eslection de l'Infante, sous quelle condition. 413. qui depleut aux Espagnols & fut par eux reiettee. 414

Proposition du mariage du Duc de Mayenne avec la sœur du Roy. 389

Proposition & conseil donnee au Duc de Mayenne par le sieur de Villeroy. 502. & suivās.

Proposition d'un serment que vouloit faire prester le Card. de Plaisance à l'assemblée Catholique de ne. faire paix ny traitté avec le Roy de Nauarre & ses adberans, empesché par le sieur de Villeroy. 270

Proposition temeraire faicte par les Espagnols

T A B L E.

en l'assemblée Catholique de Paris, touchant le droit & pretention de leur Infante sur ce Royaume.

Propositions & moyens offerts par M. de Villeroy pour contenter le Duc de Mayenne. 341

Protestation de M. de Villeroy escriuant les Memoires. 13. est fait Secretaire d'Estat à 24. ans sous le regne de Charles IX. à la resignation que luy en fit M. de l'Aubespine son beau pere. ibid. les lettres presentees au Chancelier de l'Hospital par M. de Moruillier pour estre scelees. ibid. son dessein en ses Memoires. 5

Propositions faictes aux assemblees & conferences d'Andresy & de Milly pour pacifier son Royaume où plusieurs poincts furent presque accordez. 424. & 425

Proposition fort aduantageuse faicte à Monsieur de Guise. 416

Protestation des Princes de venger la mort de feu Henry III. 146

Protestation du Roy Henry III. faicte à Blois, de ne faire iamais paix avec les huguenots, s'ils ne quittoient l'exercice de leur religion. 17

Propositions faictes par les ennemis du Roy pour empescher l'effect de sa conuersion. 421

Publication de la lettre du Cardinal de Plaisance contre la reception faicte à Rome à M. de Neuers Ambassadeur du Roy. 47

T A B L E.

2

Querelle doit estre appointee apres la narration du fait, des plaintes & des raisons.

357

Querelle nouvelle entre M. d'Espernon & M. de Villeroy, pour auoir voulu gaigner l'Archuesque de Lyon. 40

R

Raïsons qui firent accepter la conference au Legat de Rome. 404

Raïsons pertinentes de M. de Villeroy contre les pretentions du Roy d'Espagne & de l'Infante. 623. & 624

Rapport faiët au Roy par M. de Villeroy des propos tenus par le depute d'Angoulesme. 85. il l'introduit au cabinet. ibid.

Reception du Roy Henry IV. au giron de l'Eglise dans S. Denis en France. 402. & 421

Reception de la garnison Espagnole dans Paris contre le gré du Duc de Mayenne. 384

Recompense demandee au Roy par M. de Villeroy pour son office. 105. Recommande le sieur Pasquier son Commis ibid. Respoë du Roy. 106

Reddition de compte faiët par le Legat au Rape de tout ce qui s'estoit passé aux assemblees de Paris. 441

Reduction de Meaux & de M. de Vitry son gouuerneur à l'obeïssance du Roy. 471

Refus du Duc de Mayenne de consentir à l'ele-

T A B L E.

Etion de l'Infante d'Espagne, qui au contraire s'y oppose. 417

Regret de la Chrestienté en la mort du Roy Charles IX. 10

Regret des Espagnols pour n'estre assiste de Duc de Mayenne en leur dessein & selon leur desir. 379

Reglement fait pour la seureté du labourage pendant la treue. 254

Religion Catholique en France ne se peut conserver que par trois moyens, selon que Monsieur de Villeroy remonstre aux pretendus Estats assemblez à Paris. 562

Religion Catholique autant differente de la Huguenotte que le Ciel de la terre, au dire de Beze. 212

Remonstrance tres-sage du sieur de Villeroy faite au Duc de Mayenne. 428. 429. 430. & suivans.

Remonstrance du sieur de Villeroy faite au Duc de Mayenne par Monsieur Zamet apres la reduction de Meaux. 472

Remonstrance de Monsieur de Villeroy faite au Roy Héry III. sur les maux de la guerre. 49

Remonstrance & aduis de monsieur de Villeroy faite au Roy sur la priuation de son office. 104

Remonstrance & aduis de M. de Villeroy au Duc de Mayenne publié à Paris apres la mort du Roy Henry III. l'an 1589. 502

T A B L E.

Remonstrance & harangue faicte par monsieur de Villeroy pour estre prononcee en l'assemblée des pretendus Estats de Paris l'an 1593. 513

Remonstrance faicte au Cardinal de Pellené pour luy faire accepter la conference avec les seruiteurs du Roy. 401

Renuoy du sieur Belin avec responce conceüe en termes generaux de l'affection au Duc de Mayenne à la paix. 173

Reproche du Duc d'Espernon contre monsieur de Villeroy. 92

Reserue du gouuernement de Lyon donné par le Roy au Duc d'Espernon & à son frere fut remise entre les mains de sa Maiesté & pourquoy. 39.
dit à M. de Villeroy qu'il l'auoit faict en sa faueur. *ibid.*

Resolution du Roy Henry IV. pour conten-ter le Pape. 373

Resolution loüable du Duc de Mayenne apres la remonstrance à luy faite par le sieur de Villeroy. 433

Resolution pour l'assistance des corps d'Estat qui se debuoient trouuer à l'assemblée Catholique tenuë à Paris. 398

Resolution du Roy à sa conuersion. 420

Resolution du Duc de Mayenne de ne rien faire avec le Roy au parauant qu'il sceust la volonté du Pape. 381

Resolution de M. de la Chastre à la paix.

T A B L E.

<i>moyennant la conuerſion du Roy.</i>	321
<i>Reſolution du ſieur de Villeroy d'entrer au</i>	
<i>Conſeil des Catholiques à Paris.</i>	138
<i>Reſolution du Roy à la paix commencée par</i>	
<i>une ceſſation d'armes.</i>	243
<i>Reſolution des principales villes du Royaume</i>	
<i>pour recourir au Roy & luy iurer fidelité. 474.</i>	
<i>& 475.</i>	
<i>Reſolution finale du ſieur d'Antragues pour</i>	
<i>contenter le Roy.</i>	66
<i>Reſponce du ſieur du Pleſſis à M. de Villeroy</i>	
<i>ſur la conuerſion du Roy.</i>	315
<i>Reſponce du ſieur de Dunes faiçte de la part</i>	
<i>de ſon frere au ſieur de Schomberg, touchant la</i>	
<i>promeſſe du Roy pour le gouuernement d'Or-</i>	
<i>leans.</i>	63
<i>Reſponce des huguenots en paroles ambi-</i>	
<i>guës.</i>	53
<i>Reſponce du preſident Ianin à la lettre du</i>	
<i>ſieur de Villeroy.</i>	345
<i>Reſponce de monſieur de Villeroy aux diſ-</i>	
<i>cours tenus ſur ſa diſgrace.</i>	108
<i>Reſponce du ſieur de Villeroy à ceux qui ven-</i>	
<i>lent auoir le Roy d'Eſpagne pour Roy de Frâce.</i>	
<i>481. 482. & ſuiuans : & notamment à la pag.</i>	
<i>585. & 586. & ſuiuans.</i>	
<i>Retour du Duc de Mayenne de ſon voyage de</i>	
<i>Lorraine reſioiuit les zelez.</i>	285
<i>Retraiçte du Roy à Chartres.</i>	46

T A B L E.

<i>Retraicte du Duc de Mayenne à Soissons apres la bataille d'Iury, ayant laissé le Duc de Nemours à Paris.</i>	177
<i>Retraicte du Roy vers Dieppe, suiuy tost apres par le Duc de Mayenne.</i>	164
<i>Retranchement du Duc de Parme près Lagny à la presence du Roy.</i>	235
<i>le sieur de Rosne desire auoir Noyon pour sa retraicte & la veut surprendre.</i>	407
<i>Roüen secouru par le Duc de Parme.</i>	291
<i>le Roy loüe l'affection des habitans d'Angoulême.</i>	83
<i>le Roy permet au Duc de Guise de l'aller trouuer à Meaux pour aduiser des moyens de resister à l'armee protestante.</i>	31
<i>le Roy accorde la descharge du sieur de Ville-roy.</i>	95
<i>Rendez-vous du Roy Henry IIII. à S. Denys en France pour estre receu en l'Eglise.</i>	421
<i>le Roy enuoye le Duc de Neuers à Rome pour se resoudre sur l'intention du Pape.</i>	459
<i>ce que le Roy se promettoit leuant le siege de deuant Paris.</i>	235
<i>le Roy de Nauarre reietté à cause de sa religion.</i>	160
<i>Roy de Nauarre meilleur conseiller du Roy Henry III.</i>	210
<i>le Roy perd plus que personne à la ruine de ses villes</i>	

T A B L E.

villes. 204.

La Roynne mere desirouse de faire tout plaisir à M. de Villeroy promet le faire descharger de sa charge. 95

le Roy d'Espagne enuoye le Duc de Feria avec un Docteur expres pour debattre nostre loy Salique. 393. faict entrer armee nouvelle pour fauoriser ses partisans & ses desseins en France. ibid.

Ruine de la forte & puissante armee nauale d'Espagne enuoyee contre l'Angleterre l'an 1588 609 S

Sacre du Roy Henry I I I I. en la ville de Chartres. 473

Sagesse du Duc de Guise qui refusa la proposition des Espagnols. 418

Salcede accuse M. de Villeroy de certains desseins avec le feu Duc de Guise. 21

Scandale des Catholiques pour le traitté du Duc de Mayenne avec le sieur du Plessis. 368

Secours du Duc de Parme arriué à Roüen. 324

Secretaire d'estat charge importante. 109. & 110.

Serment faict à Paris le 23. Iuillet 1593. entre les mains du Card. de Plaisance sur les Saintes Euāgiles, & en presence des Espagnols, par le Duc de Mayēne, le Card. de Pelleuē, & autres Princes & Seign. de la Ligue. 439. ce que contenoit ledit serment. ibid. & 440. & suy.

X x

T A B L E.

Siege de Selles en Berry leué par le Roy. 405

Siege de Gournay par le Duc de Mayenne.

163

Siege de Noyon pris par le Duc de Mayenne.

304

*Soin du Duc de Mayenne pour les affaires de
Messieurs de Guise avec les siennes.* 386

Solemnitez de la conuersion du Roy. 421

Soucy du Duc de Mayenne pour Paris. 173

*Souhait des Espagnols & du Duc de Mayenne
de conuoquer assemblee dans Paris.* 334

*Soupçon du President Ianin contre les Espa-
gnols & ceux qui ne desiroient la paix.* 347

*Soupçon des Espagnols que le Duc de Mayenne
auoit faict donner l'Arrest du Parlement de
Paris contre l'Election de leur Infante.* 418

*bon Succes du Voyage du Cardinal de Gondy
à Rome coniecturé sur quelques lettres qui ve-
noient d'Italie.* 388

*Supplication faicte au Roy Henry I I I I. à
Estampes pour la retraicte en la maison du sieur
de Villeroy.* 144

*Surseance d'armes non conseillée par le sieur
du Plessis.* 222

*Suruinance de l'Estat du sieur de Villeroy ac-
cordée au sieur de l'Aubespine Secretaire de la
Royne mere du Roy.* 97

T A B L E.

T

Temps de la surseance d'armes demandee,
pour vacquer à la conuersion du Roy. 353. &
354.

Teneur des articles de la paix proposez par
M. de Villeroy. 338. & suy.

Teneur de la lettre du President Ianin escrete
à Noyon. 331. & suy.

Termes ausquels la continuation de la guerre
auoit reduit l'autorité du Roy. 360

Traicté faict entre le Duc de Mayenne & le
sieur de Villeroy publié & diuulgué en l'armee
du Roy. 334

Traicté des Espagnols retardé. 330

Traicté proposé aux Espagnols par le Duc de
Mayenne. 306

Traicté du Roy comme de pair avec le Duc
de Mayenne. 422

Traicté de Flex entre le Roy de Nauarre &
Messieurs de Bellicure & de Villeroy. 19

Traicté avec le sieur d'Antraques par l'entre-
mise du sieur Desbarreaux Tresorier en France
à Orleans. 58

Trefue proposée par le Roy apres le siege de
Paris. 329

Trefue accordée aux enuiron de Paris pen-
dant la Conference qui s'y tenoit. 408

Trefue continuée requise par le Duc de Ma-
yenne. 638

T A B L E.

<i>fois à Salcede.</i>	22
<i>M. de Villeroy, suit presque tousiours Monsieur le Duc de Mayenne apres la mort de Henry III.</i>	206
<i>Monsieur de Villeroy accusé faussement d'auoir esté despesché en Languedoc pour empoisonner le Duc de Montmorency.</i>	11
<i>Monsieur de Villeroy honoroit fort le sieur de la Valette pere de M. d'Espernon.</i>	33
<i>Monsieur de Villeroy enuoyé avec Monsieur de Chiuerny, & Monsieur de Saunc au deuant du Roy Henry III. iusques à Turin par la Royne Mere.</i>	12
<i>M. de Villeroy employé au traitté de la paix avec le Roy de Nauarre l'an 1577.</i>	17
<i>M. de Villeroy a tousiours conseillé l'union des Catholiques avec le Roy. 121. contre ceux qui ont dit que Monsieur de Villeroy estoit pensionnaire du Duc de Guise.</i>	121.
<i>Voyage de Monsieur de Villeroy en Languedoc auant la mort du Roy Charles IX.</i>	6
<i>M. de Villeroy appelé bon Espagnol par ses ennemys.</i>	153.
<i>Monsieur de Villeroy n'approuue ce qui s'est executé à Blois contre Messieurs de Guise.</i>	27
<i>Monsieur de Villeroy n'a esté autheur ny inuenteur du pouuoir donné au Duc de Guise.</i>	54

T A B L E.

Voyage du sieur de Villeroy à Pontoise pour la cessation d'armes. 247

Monsieur de Villeroy conseille au Roy de réunir à soy tous les Catholiques. 28

Monsieur de Villeroy attaqué par Monsieur d'Espernon au cabinet du Roy à S. Aignan. 42

Monsieur de Villeroy propose deux choses pour acheminer les affaires à la paix. 242

Monsieur de Vitry fort affectionné au bien & repos du Royaume. 321

Vie des Espagnols dans Paris fort mécanique. 422

Voyage du Duc de Mayenne à Amiens, & sa reception magnifique. 173

Voyage du Duc de Mayenne à Cambrai. 218.
 & 219. fait iurer les gouverneurs de Picardie de demeurer unis avec luy. *ibid.*

Voyage du sieur de Villeroy vers le Duc de Mayenne au siege de Corbeil. 243

Voyage du Roy Henry IV. à Tours fort prejudiciable à sa Maesté. 404

Voyage du sieur de Bassompierre en Lorraine. 435

Voyage & expeditions du sieur de Fleury pour la paix. 265

Voyage de Rome blasmé & traversé par le Cardinal de Plaisance & Espagnols. 388

Voyage du sieur de Villeroy à Soissons l'an 1591. pour voir le Duc de Mayenne. 259

T A B L E.

*Voyage de Rome blasmé de plusieurs, & la
response du sieur de Villeroy là dessus.* 365

*Voyage de Monsieur de Villeroy à Esparnay
vers la Royne Mere.* 25

*Voyage du sieur de Villeroy à Turin au de-
vant du Roy Henry III.* 12

Fin de la Table.









